

國學基本叢書  
石湖居士詩集



上海图书馆藏书




A541 212 0006 1299B

~~175954~~

書叢本基學國

集詩士居湖石

撰大成范



行發館書印務商

# 序

予疇昔之晨。與客坐堂上。遙見一健步黃衣。負一笈至庭下。呼而誡其奚自。曰。自參政公范氏也。發其笈。公之文集在焉。索其書讀之。則公之子莘叩頭請曰。莘不天。不自贊越。而先公一夕奄忽。棄其孤。莘欲死。而不敢者。有先公付託之重任在。方先公之疾而未病也。日夜手編其詩文。數年成集。凡若干卷。逮將易箆。執莘手而授之。且曰。吾集不可以無序篇。有序篇非序篇。寧無序篇也。今四海文字之友。惟江西楊誠齋與吾好。且我知微斯人。疇可以屬斯事。小子識之。若莘則何敢請。而先公之治命不敢墜。惟先生哀而諾之。予執書抱遺編而泣曰。萬里與公同年進士也。公先進。至爲朝廷大臣。與天子論道發政。坐廟堂進退百官。而萬里環堵荒寒之士也。何敢與公友。公不我薄陋而辱友之。萬里不敢拒公。亦不敢以執政俟公也。今忍死丁寧之託。其何敢辭。初。公以文學材氣。受知壽皇。自致大用。至杖漢節。使強虜。卽其庭伏穹廬。不肯起。袖出私書切責之。君臣大驚。有自階闥之嬖。竊位樞臣者。其勢方震赫。公沮之。竟不奉詔而去。其所立又有不凡者矣。若夫劖心於山水風月之場。彫龍於言語文章之囿。此吾輩羈窮酸寒無聊不平之音也。公何必能此哉。古語曰。爭名者必於朝。爭利者必於市。是二人者使之以此易彼。或以彼易此。二人者其肯乎哉。非不肯也。不願也。非不願也。亦各樂其樂也。詩人文士挾其所樂。足以敵王公大人之所樂不啻也。猶將愈之。故王公大人無以傲夫士。而士亦無所折於王公大人。今公乃自屏其所可樂。而復力爭夫士之所甚樂。所謂不虞君之涉吾地者。其不多取乎。然公之詩文非能工也。不能不工耳。公風神



英邁。意氣傾倒。拔新領異之談。登峯造極之理。蕭然如晉宋間人物。他人戛戛吃吃而不能出諸口者。公曠呻噫欠之間。猝然談笑而道之。則其詩文之工。豈十日一水。五日一石之謂也哉。甚矣文之難也。長於臺閣之體者。或短於山林之味。諧於時世之嗜者。或漓於古雅之風。賤奏與記序異曲。五七與千百不同。調非文之難。兼之者難也。至於公訓誥具西漢之爾雅。賦篇有杜牧之之刻深。騷詞得楚人之幽婉。序山水則柳子厚。傳任俠則太史遷。至於詩。大篇決流。短章斂芒。縟而不釀。縮而不儻。清新嫵麗。奄有鮑謝。奔逸雋偉。窮追太白。求其隻字之陳陳。一倡之鳴鳴。而不可得也。今海內詩人。不過三四。而公皆過之。無不及者。予於詩。豈敢以千里畏人者。而於公獨斂衽焉。於是文士詩人之難者易。偏者兼矣。其不盛矣乎。嘻。人琴今俱亡矣。廣陵散。今此聲遂絕矣。惠子不生。莊子不死。復何道哉。公之別墅曰石湖。山水之勝。東南絕境也。壽皇嘗爲書兩大字以揭之。故號石湖居士云。公諱成大。字至能。世爲姑蘇人。其世次言行職官。則有少保大觀文大丞相益公周公之銘詩在。紹熙五年六月十一日。誠齋野客楊萬里謹序。

# 序

石湖居士范公。待制敷文閣。來帥成都。兼制置成都潼川利夔四道。成都地大人衆。事已十倍他鎮。而四道大抵皆帶蠻夷。且北控秦隴。所以臨制捍防。一失其宜。皆足致變。故於呼吸顧盼之間。以是幕府率窮日夜力。理文書。應期會。而故時巨公大人。亦或不得少休。及公之至也。定規模。信命令。施利惠。農選將治兵。未數月。聲震四境。歲復大登。幕府益無事。公時從其屬。及四方之賓客。飲酒賦詩。公素以詩名。一代故落紙墨未及燥。士女萬人已更傳誦。被之樂府弦歌。或題寫素屏團扇。更相贈遺。蓋自蜀置帥守以來。未有也。或曰。公之自桂林入蜀也。舟車鞍馬之間。有詩百餘篇。號西征小集。尤雋偉。蜀人未有見者。盍請於公以傳。屢請而公不可。彌年乃僅得之。於是相與刻之。而屬游爲序。淳熙三年上巳日。朝奉郎成都府路安撫司參議官兼四川制置使司參議官山陰陸游序。

# 宋史本傳

范成大。字致能。吳郡人。紹興二十四年擢進士第。授戶曹監和劑局。隆興元年遷正字。累遷著作佐郎。除吏部郎官。言者論其超躐。罷奉祠。起知處州。陛對論力之所及者三。曰日力。曰國力。曰天力。今盡以虛文耗之。上嘉納。處民以爭役囂訟。成大爲勑義役。隨家貧富輸金。買田助當役者。甲乙論第。至二十年。民便之。其後入奏言及此。詔頒其法於諸路。處多山田。梁天監中。詹南二司馬作通濟堰。在松陽遂昌之間。激漢水四十里。溉田二十萬畝。堰歲久壞。成大訪故迹。疊石築防。置堤闕四十九所。立水則上中下。灌漑有序。民食其利。除禮部員外郎。兼崇政殿說書。乾道令以絹計贓。估價輕而論罪重。成大奏承平時絹匹不及千錢。而估價過倍。紹興初年遞增五分。爲錢三千足。今絹實貴。當倍時直。上驚曰。是陷民深文。遂增爲四千。而刑輕矣。隆興再講和。失定受書之禮。上嘗悔之。遷成大起居郎。假資政殿大學士。充金祈請國信使。國書專求陵寢。蓋泛使也。上面諭受書事。成大乞并載書中。不從。金遣使者慕成。大名。至求巾幘效之。至燕山。密章奏具言受書式。懷之入。初進國書。詞氣慷慨。金君臣方傾聽。成大忽奏曰。兩朝旣爲叔姪。而受書禮未稱。臣有疏。搢笏出之。金主大駭曰。此豈獻書處耶。左右以笏標起之。成大屹不動。必欲書達。旣而歸館所。金主遣伴使宣旨取奏。成大之未起也。金庭紛然。太子欲殺成大。越王止之。竟得全節而歸。除中書舍人。初。上書崔實政論賜輔臣。成大奏曰。御書政論。意在飭綱紀。振積敝。而近日大理議刑。遞加一等。此非以嚴致平。乃酷也。上稱爲知言。張說除簽書樞密院事。成大當制。留詞頭七日不下。又上疏言之。

說命竟寢。知靜江府。廣西窘匱。專藉鹽利。漕臣盡取之。於是屬邑有增價抑配之敝。詔復行鈔鹽。漕司拘鈔錢均給所部。而錢不時至。成大入境曰。利害有大於此乎。奏疏謂能裁抑漕司強取之數。以寬郡縣。則科抑可禁止。從之。數年。廣州鹽商上書乞復令客販。宰相可其說。成大出銀錢助之。人多以爲非。下有司議。卒不易成大說。舊法馬以四尺三寸爲限。詔加至四寸以上。成大謂互市四十年。不宜驟改。除敷文閣待制。四川制置使。疏言吐蕃青羌兩犯黎州。而□□結蕃列等尤桀黠。輕視中國。臣當教閱將兵。外修堡砦。仍講明教閱團結之法。使人自爲戰。三者非財不可。上賜度牒錢四十萬緡。成大謂西南諸邊。黎爲要地。增戰兵五千。奏置都監路分。吐蕃入寇之路。十有八。悉築柵分戍。□□結擾安靜砦。發飛山軍千人赴之。料其三日必遁。已而果然。白水砦將王文才私娶蠻女。常導之寇邊。成大重賞檄羣蠻使相疑貳。俄禽文才以獻。卽斬之。蜀北邊舊有義士三萬。本民兵也。監司郡守雜役之。都統司又俾與大軍更戍。成大力具其不可。詔遵舊法。蜀知名士孫松壽年六十餘。樊漢廣甫五十九。皆挂冠不仕。表其節。詔召之。皆不起。蜀士由是歸心。凡人才可用者。悉致幕下。用所長。不拘小節。其傑然者。露章薦之。往往顯於朝。位至二府。召對除權吏部尙書。拜參知政事。兩月爲言者所論。奉祠。起知明州。奏罷海物之獻。除端明殿學士。尋帥金陵。會歲旱。奏移軍儲米二十萬。賑飢民。減租米五萬。水賊徐五竊發。號靜江大將軍。捕而戮之。以病請閒。進資政殿學士。再領洞霄宮。紹興二年。加大學士。四年。薨。成大素有文名。尤工於詩。上嘗命陳俊卿擇文士掌內制。俊卿以成大及張震對。自號石湖。有石湖集。攬轡錄。桂海虞衡集。行於世。

# 石湖居士詩集目次

卷一

詩四十六首

卷二

詩五十四首

卷三

詩六十三首

卷四

詩六十七首

卷五

詩五十一首

卷六

詩四十三首

卷七

詩四十九首

卷八

詩五十二首

卷九

詩五十一首

卷十

詩五十九首

卷十一

詩六十五首

卷十二

詩七十二首

卷十三

詩四十四首

卷十四

詩五十四首

卷十五

詩六十九首

卷十六

詩六十五首

卷十七

詩六十九首

卷十八

詩六十首

卷十九

詩五十二首

卷二十

詩八十四首

卷二十一

詩六十首

卷二十二

詩四十二首

卷二十三

詩七十二首

卷二十四

詩七十首

卷二十五

詩六十三首

卷二十六

詩五十六首

卷二十七

詩七十九首

卷二十八

詩七十五首

卷二十九

詩五十首

卷三十

詩三十三首

卷三十一

詩五十一首

卷三十四 嗣出

賦六首

卷三十二

詩五十七首

楚辭四首

卷三十五 嗣出

卷三十三

詩三十九首

詞

石湖詩集三十三卷。凡古今各體詩一千九百一十六首。范文穆公手自編定。宋嘉泰間。其子莘等刻以行世。合詩文凡百有三十卷。時曾已重刻。而流傳頗少。又有活板印本。殘闕甚多。今藏書家多有抄本。而訛舛異同。魯魚錯出。吾友金子亦陶所藏。從宋板抄得。更爲廣集諸家。較勘精密。可稱善本。茲先刻其詩集。以公諸同好。卷帙前後悉依原本所編。其間譌字如井堊木刊之誤。堊爲堊。弟靡波流之誤。弟爲弟。皆略爲改正。所有一二漶漫之處。無從辨證。姑闕之以俟考。外附賦楚辭一卷。樂府一卷。賦本在詩前。今附於詩後者。集以詩名。從其類也。嗟乎。自文穆公至今四百有餘年矣。而詩篇在是。聲光爛然。亦可以見吳下之風流。其淵源至今弗絕也。康熙戊辰八月中秋前一日。依園主人謹識。



# 石湖居士詩集卷一

嗣協迂客

吳郡 顧嗣臯漢魚 重訂

嗣立俠君

## 行路難

贈君以丹棘忘憂之草。青棠合歡之花。馬腦遊仙之夢枕。龍綜辟寒之寶紗。天河未翻月未落。夜長如年引春酌。昔人安在空城郭。今夕不飲何時樂。

## 西江有單鵠行

西江有單鵠。託身萬里雲。猥爲稻粱謀。墮此鷗鷺羣。朝遊楓葉杪。暮宿蘆花根。懷安浦溆暖。忘記雲海寬。忽有孤征鴻。驚飛落江濱。眼明見黃鵠。解后傾情真。羽毛雖不同。意氣頗相親。言鵠有六翮。何不高飛翹。水鳥不足羣。朝暮徒嘲喧。相將乘風去。一上盤秋旻。渴飲顛露滋。飢吸晴霞暎。方知翅翎俊。可以凌埃塵。東風昨解凍。春光暖如薰。陽鳥當北鄉。行止條已分。儻欲相逐去。關山隔吳秦。兩鳥竟分飛。鳴聲動行人。豈不有歲晚。鴻富復來賓。但愁山海闊。岐路多糾紛。復來失故道。那得相知聞。鴻歸有儔侶。鵠住長悲辛。

## 車遙遙篇

車遙遙。馬憧憧。君遊東山東復東。安得奮飛逐西風。願我如星君如月。夜夜流光相皎潔。月暫晦。星常明。

留明待月復三五共盈盈。

放魚行

水落塘枯魚臥陸。小兒抱取不濡足。昂藏赤鱗亦垂頭。背負玄鱗三十六。家人滌砧不辭勞。云有素書金錯刀。嗟予贖放豈徼福。忍把汝命供吾饜。如今已脫張胡子。好上龍門飲湖水。不然崛起載飛仙。切莫顛狂稱長史。

晚步東郊

水墨依林寺。青黃負郭田。斜陽猶滿地。片月早中天。策策鴉飛急。冥冥樹影圓。西山元自好。那更著雲煙。

元夜憶羣從

愁裏仍蒿徑。閒中更華門。青燈聊自照。濁酒爲誰溫。隙月知無夢。窗梅寄斷魂。遙憐好兄弟。飄泊兩江村。

登西樓

少年豪氣合摧鋒。青鬢朱顏萬事慵。疇昔四愁無夢到。及時一笑有誰供。詩情飲興如雲薄。草色花光似酒醲。千里春心吟不盡。下樓分付晚煙鐘。

不寐

南風釀卑溼。滑滑病履烏。竟日隱几坐。拳局不得適。丹田恍瀕洞。銀海眩眇黑。髀弱類跨鞍。臂強如運甃。合體競酸嘶。莫夜輒增極。奏牀不得眠。耿耿到明發。黃嬾共住久。來夢乃其職。睡魔吾故人。曩是不速客。招呼各偃蹇。莫効尺寸力。周公無由來。咫尺今古隔。彭尸不得去。罌騎無行色。主客兩愁緒。虛室浪生白。

人言老禪師。兩脅不到席。茲事恐未暇。但願了今夕。平生北窗眠。栩栩卽聖域。睡僊吾所慕。行步亦軒息。

河豚歎

繖生藜苲腸。食事一飽足。腥腐色所難。況乃衷砒毒。彭亨強名魚。殺氣孕慘贖。旣非養生具。宜謝砧几酷。吳儂眞差事。網索不遺育。捐生決下箸。縮手汗童僕。朝來里中子。饒吻不待熟。濃睡喚不應。已落新鬼錄。百年三寸咽。水陸富肴藪。一物不登俎。未負將軍腹。爲口忘計身。饕死何足哭。作俑者誰與。至今走末俗。或云先王意。除惡如菘菽。逆梟與毒獍。歲歲參幣玉。芟夷入薦羞。蓋欲殲種族。生死有定數。斷命烏可續。適丁是時者。未易一理局。龜鼎子公怒。羊羹華元劓。異味古所珍。無事苦畏縮。駢頭訂此語。戒諭祇取瀆。聾盲死不悟。明知諒已燭。

續長恨歌七首

金杯漱灑曉粧寒。國色天香勝牡丹。白鳳詔書來已暮。六宮鉛粉半春闌。紫薇金屋閉春陽。石竹山花却自芳。莫道故情無覓處。領巾猶有隔生香。聞道蓬壺重見時。瘦來全不耐風吹。無端却作塵間念。已被仙官聖得知。別後相思夢亦難。東虛雲路海漫漫。仙凡頓隔銀屏影。不似當時取次看。人似飛花去不歸。蘭昌宮殿幾斜暉。百年只有雲容姊。留得當時舊舞衣。驪山六十二高樓。突兀華清最上頭。玉羽川長湘浦暗。三郎無事更神遊。帝鄉雲馭若爲留。八景三清好在。不玉笛不隨雙鶴去。人間猶得聽梁州。

雷雨鄰舍起龍

雨工避事欲蟠泥。帝遣豐隆執以歸。連鼓一聲人失箸。不知挂壁幾梭飛。

次韻唐致遠雨後喜涼

老暘作氣再三衰。鼓竭之餘不支雨。褰旗拔幟埽迹空。一點新涼破殘暑。飛蚊薨薨已無奇。蜻蜓翅淨塵天嬉。竹窗日暮轉蕭瑟。喜有促織鳴聲悲。

秋日二絕

碧蘆青柳不宜霜。染作滄洲一帶黃。莫把江山誇北客。冷雲寒水更荒涼。新秋病骨頓成衰。不度溪橋半月來。無事閉門非左計。饒渠屐齒上青苔。

窗前木芙蓉

辛苦孤花破小寒。花心應似客心酸。更憑青女留連得。未作愁紅怨綠看。

嘲里人新婚

冷艷頰容一笑開。休將鸞扇更徘徊。篋篋細寫歸舟字。彷彿遊仙夢裏來。

過松江

長虹斗起蛟龍穴。朱碧欄干夜明滅。太湖三萬六千頃。多少清風與明月。青鷁驚飛白鷺閒。丹楓未老黃蘆折。誰將橫笛叫蒼煙。無限驚波翻白雪。洞庭林屋舊遊處。玉柱金庭路巉絕。水仙逢迎摻脩袂。問我歸計何當決。去年匹馬兀春寒。今此孤篷窘秋熱。人生意氣得失間。輕重劍頭吹一映。莫將塵土浣朱顏。却

待丹砂回白髮

過平望

寸碧闖高浪。孤墟明夕陽。水柳搖病綠。霜蒲蘸新黃。孤嶼乍舉網。蒼煙忽鳴榔。波明苕葉顫。風熟蘋花香。雞犬各村落。蓴鱸近江鄉。野寺對客起。樓陰濯滄浪。古來離別地。清詩斷人腸。亭前舊時水。還照兩鴛鴦。

長安間

斗門貯淨練。懸板淙驚雷。黃沙古岸轉。白屋飛檐開。是間表丈許。舳艫蔽川來。千車擁孤隧。萬馬盤一坏。篙尾亂若雨。檣竿束如堆。摧摧勢排軋。洶洶聲喧隘。偃仄復偃仄。誰肯少徘徊。傳呼津吏至。弊蓋凌高埃。嗚嗚議讖征。叫怒不可裁。吾觀舟中子。一一皆可哀。大爲聲利驅。小者飢寒催。古今共來往。所得隨飛灰。我乃疇於人。胡爲乎來哉。

榮木并序

臥病十日。綠陰滿庭。因誦淵明榮木詩。其序曰。日月推遷。已復有夏。總角聞道。白首無成。犁然有感。乃和其韻。

薰風南來。木榮於茲。木榮幾時。黃落從之。逝其須臾。坐成四時。今我不學。殆其已而。天旋地遊。日月其根。形息氣徂。不亡者存。去鄉離家。莫肯過門。猗歟先師。不我疵陋。褰衣示珠。俾我復舊。自我來歸。十年不富。孰蠹孰蠱。惟汝自疚。冉冉榮木。霜華將墜。天黑路長。屹蹶可畏。隸也不力。奚取六驥。脂車着鞭。一息而至。

兩木并序

壬申五月臥病北窗。惟庭柯相對。手植綠橘。枇杷森然出屋。枇杷已著子。橘獨十年不花。各賦一詩。枇杷昔所嗜。不問甘與酸。黃泥裹餘核。散擲籬落間。春風拆勾萌。樸檉如榛菅。一株獨成長。蒼然齊屋山。去年小試花。瓏瓏犯冰寒。化成黃金彈。同登桃李盤。大鈞播羣物。斡旋不作難。樹老人何堪。挽鏡覓朱顏。頽髭爾許長。大笑欵巾冠。

綠橘生西山。得自髯翁家。云此接活根。是歲當著花。俯仰乃十霜。垂蠹紛相遮。芳意竟寂寞。枯枝謾槎牙。風土諒非宜。翁言豈予夸。會令返故山。高深謝汗邪。石液滋舊根。山英擢新葩。黃團挂霜實。大如螻峒瓜。當有四老人來駐七香車。

道中

月冷吟蛩草。湖平宿鷺沙。客愁無錦字。鄉信有燈花。蹤跡隨風葉。程途犯斗槎。君看枝上鵲。薄暮亦還家。

落鴻

落鴻聲裏怨關山。淚溼秋衣不肯乾。只道一番新雨過。誰知雙袖倚樓寒。

題山水橫看二首

煙山漠漠水漫漫。老柳知秋渡口寒。盡是西溪腸斷處。憑君將與故人看。霜入丹楓白葦林。橫煙平遠暮江深。君看鴈落帆飛處。知我秋風故國心。

瑞香花

萬粒叢芳破雪殘。曲房深院閉春寒。紫紫青青雲錦被。百疊薰籠晚不翻。酒惡休拈花藥嗅。花氣醉人釀。

勝酒。大將香供惱幽禪。恰在蘭枯梅落後。

讀史

登壇策劉項。臥廬料曹孫。探懷取事業。一一如印圈。英豪蓋天資。八極入控搏。由來事成毀。只繫手覆翻。玉虹朝貫日。劍氣夜燭天。雖欲避功名。何處蟄龍鸞。我生後千載。愚暗難具言。長大但食粟。閔凶不能文。麥豆已難辨。楣稅固不分。抱盃灌圃畦。截竿避城門。智略類如此。何以超籬藩。龜列始神筴。木斷方犧尊。朝市有機穽。冠裳或鉗髡。茲事定不□。吾其老泥蟠。敢云善用短。聊復強自寬。

浙江小礮春日

客裏無人共一杯。故園桃李爲誰開。春潮不管天涯恨。更捲西興暮雨來。

代聖集贈別

一曲悲歌水倒流。尊前何計緩千憂。事如夢斷無尋處。人似春歸挽不留。草色粘天鷓鴣恨。雨聲連曉鷓鴣愁。迢迢綠浦帆飛遠。今夜新晴獨倚樓。

二月三日登樓有懷金陵宣城諸友

百尺西樓十二欄。日遲花影對人閒。春風已入片時夢。寒食從今數日間。折柳故情多望斷。落梅新曲與愁關。詩成欲欲訪江南。便千里煙波萬疊山。

寒食郊行書事二首

野店垂楊步。荒祠苦竹叢。鷺窺蘆箔水。烏啄紙錢風。媼引濃粧女。兒扶爛醉翁。深村時節好。應爲去年豐。



隴麥欣欣綠。山桃寂寂紅。帆邊漁繚浪。木末酒旗風。信步隨芳草。迷途問小童。賞心添脚力。呼渡過溪東。

初夏二首

清晨出郭更登臺。不見餘春只麼回。桑葉露枝蠶向老。菜花成莢蝶猶來。晴絲千尺挽韶光。百舌無聲燕子忙。永日屋頭槐影暗。微風扇裏麥花香。

夏夜

脈脈惜佳夜。泠泠成浩歌。儻無詩句子。將奈月明何。露氣濛花重。風聲入樹多。清歡殊未辦。桂影墮江波。

與時敘現老納涼池上時敘誦新詞甚工

會心不在遠。頃步便得之。長風吹月來。清影落半池。屋頭見木葉。玲瓏剪琉璃。紅塵絆兩足。大笑兒輩癡。老禪挽我遊。高論方軒眉。潘郎忽鼎來。談詩解人頤。晚誦雲髻簫。濯濯餘春姿。想見篇中人。清潤如君詩。笑我兩枯木。獨與三冬期。

林元復輓詩

胸次崢嶸滿貯書。十年名字滿江湖。張公閱世詩千首。揚子傳家宅一區。謾道春風須得意。那知秋雨不成珠。自從雪魄冰魂散。魯國今誰更服儒。

戲贈少梁

屈膝銅鋪畫掩關。薰爐誰伴夕香寒。秋來合有相思字。會待風前片葉看。

南徐道中 以下赴金陵漕試作

生憎行路與心違。又逐孤帆擘浪飛。吳岫湧雲穿望眼。楚江浮月冷征衣。長歌悲似垂垂淚。短夢紛如草草歸。若有一廬供閉戶。肯將篋舫換柴扉。

此页空白

# 石湖居士詩集卷二

## 望金陵行闕

聖代規模跨六朝。行宮臺殿壓金鼇。三山落日青鸞近。雙闕清風紫鳳高。石虎蹲江蟠王氣。玉麟湧地鎮神臯。太平不用千尋鎖。靜聽西城打夜濤。

## 金陵道中

山晚黃羊隨日下。天寒白犢弄風歸。愁埃百轉西州路。笑憶沙湖一棹飛。

## 曉行官塘驛

篝燈驛吏喚人行。寥落星河向五更。馬上誰驚千里夢。石頭岡下小車聲。

## 秦淮

不將行李試閒關。誰信江湖道路難。腸斷秦淮三百曲。船頭終日見方山。

## 重九獨登賞心亭

誰教佳節滯天涯。強展愁眉管物華。每歲有詩題白鴈。今年無酒對黃花。悠悠造化占斜日。草草登臨記落霞。宇宙此身元是客。不須彈鋏更思家。

## 賞心亭再題

天險東南重。兵雄百二尊。拂雲千雉繞。截水萬崖奔。赤日吳波動。蒼煙楚樹昏。向無形勝地。何以控乾坤。

宿義林院

暝氣昏如雨。禪房冷似冰。竹間東嶺月。松杪上方燈。驚鷓盤金刹。流螢拂玉繩。明朝窮脚力。連夜斬崖藤。

荆公墓二首

百歲誰人巧拙。一丘底處虧成。半世青苗法意。當年雪竹詩情。本意治功徒木。何心黨禍揚塵。報讎豈教行劫。作俑翻成害仁。

十月朔客建業不得與兄弟上冢之列悲感成詩

歲已看成暮。身今未得歸。風塵孤淚盡。霜露寸心違。南澗新流水。西山舊落暉。煙松應好在。宿草定成非。逝水方東去。浮雲浪北飛。危魂先自斷。不待更沾衣。

白鷺亭

倦遊客舍不勝閒。日日清江見倚闌。少待西風吹雨過。更從二水看淮山。

臙脂井三首

昭光殿下起樓臺。拚得山河付酒杯。春色已從金井去。月華空上石頭來。午醉醒來一夢非。忽忽玉樹逐春歸。臙脂却作千年計。不似愁魂四散飛。腰支旅拒更神遊。桃葉山前水自流。三十六書都莫恨。煩將歌舞過揚州。

秦淮井序

自金陵復泛秦淮。宛轉數百曲。世傳始皇東巡。自江乘渡。望氣者以爲金陵有天子氣。乃鑿長岡引潮。

水入焉。號曰秦淮。逶迤屈曲。不類人功。故又傳爲龍所開也。

祖龍驅羣龍。疏此萬丈溝。雨工戀故棹。十步九回頭。至今秦淮曲。宛若春蛇遊。舟師厭回互。歎息倚柂樓。維昔東巡初。八極圍寸眸。天端有佳氣。鬱鬱東南浮。卜云當興王。在後五百秋。叱咤召六丁。慘淡風雲愁。鑿渠斷地脈。自謂神與謀。乾坤有端倪。已露不可收。大帝開吳天。定鼎臨江陬。融融秣陵日。始照十二旂。經營暨六代。茲地稱神州。乃知歷數定。昧者徒私憂。茲事故老傳。未知信然不。姑置勿重陳。作詩歎遲留。

九月三日宿胥口始聞鴈以下歸真山作

故人久不見。乍見雜悲喜。新鴈如故人。一聲驚我起。把酒不能觴。送目問行李。曾雲行路難。空濛千萬里。塞北多關山。江南渺雲水。風高吹汝瘦。旅伴今餘幾。斜行不少駐。滅沒蒼煙裏。羈遊吾亦倦。客程殊未已。扁舟費年華。短纜繫沙尾。物生各有役。冥心聽行止。江郊匝地熟。場圃平如砥。歸期且勿念。共餽豐年米。

欲雪

烏鴉撩亂舞黃雲。樓上飛花已睡人。說與江梅須早計。馮夷無賴欲爭春。

讀史三首

百歲虧成費械機。烏鳶螻蟻竟同歸。一檠燈火挑明滅。兩眼昏花管是非。堂堂列傳冠元功。紙上浮雲萬事空。我若材堪當世用。他年應只似諸公。鏤冰琢雪戰毛聲。畫餅聲名骨朽時。汗簡書青已兒戲。峴山辛苦更沉碑。

宴坐菴四首

油燈已暗忽微明。石鼎將乾尚有聲。衲被蒙頭籠兩袖。藜牀無地著功名。  
五更風竹鬧軒窗。聽作江船浪隱牀。枕上翻身尋斷夢。故人待漏滿鞢霜。  
粥魚吼罷鼓逢逢。臥聽飢飈上曉缸。一點斜光明紙帳。悟知檐雀已穿窗。  
跣趺合眼是無何。靜裏惟聞鳥雀多。俗客叩門稱問字。又煩居士起穿鞞。

青青礪上松送致遠入官

青青礪上松。鬱鬱礪底柏。松森上曾雲。柏踞抱幽石。偃植雖不同。臭味乃相得。  
千霜與百雪。偶立衆芳側。衆芳豈不好。歲晏掃無迹。廣廈置羣木。萬牛挽山澤。松材可世用。  
攀援入王國。草木豈有情。亦復念離析。君看此翠柏。錯莫無顏色。孤陰愁月夜。獨籟怨風夕。蒼官何當歸。相望長相憶。

除夜感懷

松楸百年哀。霜露終歲悲。天地豈汝偏。鬼神諒無私。孤窮罪當爾。我今怨尤誰。  
噎絕夢自語。伶俜影相隨。豈無一經傳。政坐五鬼嗤。鑿枘共齟齬。榛荆費耘耔。付畀踰丘山。  
奉承劣毫釐。生男九族歡。所願作門楣。時命有大謬。生男竟何裨。匏瓜謾枵腹。  
蒲柳無真姿。聲縮高顛頰。蕭騷短髯髭。貧病老歲月。斗杓坐成移。曉風淒以寒。  
簾幕相紛披。月星炯我冠。霧雨泫我衣。煮蒿奉祠事。苦淚落酒卮。逝者日已遠。  
生者日以衰。羸驂駕九折。日暮抱長飢。岐路正嶮絕。耿耿誰當知。

次韻唐子光席上賞梅

玉枝橫斜照清空。纖手撚香□□公。水部無人廣平去。後來我輩猶情鍾。  
誰噴昭華送愁絕。叫雲三弄怨



斜月徑須踏雪問前村。莫待馬蹄如踣鐵。春風壓盡百花橋。尊前仍有董嬌嬈。借無楚客歌成雪。空有蕭郎眼似刀。

夜行上沙見梅記東坡作詩招魂之句

玉妃謫人世。乃在流水村。天風吹嬋娟。飄墮寂莫濱。芳心怨命薄。玉色淒路塵。佳人來無期。日暮多碧雲。溪聲爲咽絕。月亦低微顰。相逢倦遊子。一笑不復珍。脈脈問不語。亭亭意彌真。要我冰雪句。招此欲斷魂。蘇仙上賓天。妙意終難陳。璿柄忽傾墮。曉嵐愁翠昏。

次韻唐子光教授河豚

世間尤物美惡并。江鄉未用誇吳羹。清宮洞房寒熱媒。深山大澤龍蛇生。胡夷信美胎殺氣。不奈吳兒苦知味。楊花欲動荻芽肥。汗手死心搖食指。食魚要是口黃梁。古來不必須河魴。君看噴腹似渾脫。寧肯滑甘隨芥薑。先生法語峻立壁。譏評不使一錢直。彭亨從此迹如掃。坐令梅老詩無力。懸知仙骨有青冥。風香久已滌羶腥。大笑日華解毒法。何如肘後餐霞經。

題如夢堂壁

勃姑午啼喚雨。鵲鵲曉囀留春。片雲不載歸夢。兩鬢全供客塵。

曉起

簾額繡波蕩漾。燭盤紅淚闌干。夢裏五更風急。愁邊一半春殘。

再遊上方

僧共老花俱在。客將春鴈同回。范叔一寒如此。劉郎前度曾來。

卽事

醉袖籠鞭轉柳塘。青門芳樹掩殘香。誰驚翡翠雙飛去。祇有蓮花對斷腸。

春晚卽事

屋頭清樾暗荆扉。紫萼爛斑翠莢肥。春晚軒窗人獨困。日長籬落燕雙飛。

春晚三首

陰陰垂柳閉朱門。一曲闌干一斷魂。手把青梅春已去。滿城風雨怕黃昏。  
客去鉤窗詠小詩。好絲撩亂柳花稀。微風盡日吹芳草。蝴蝶雙雙貼地飛。  
夕陽槐影上簾鉤。一枕清風夢昔遊。夢見錢塘春盡處。碧桃花謝水西流。

樂先生闢新堂以待芍藥醱釀作詩奉贈

芍藥有國色。醱釀乃天香。二妙絕世立。百草爲不芳。先生絕俗姿。風味本無雙。年來悟結習。欲試安心方。天魔巧伺便。作計迴剛腸。多情開此花。豔絕溫柔鄉。道人爲一笑。正爾未易忘。呼童葺荷芷。擇勝開軒窗。啼鶯不愁思。遊蜂亦猖狂。百年響呻頃。共此過隙光。朝爲春條綠。暮爲秋葉黃。把翫尙無幾。況以憂愁妨。願言秉燭遊。迨此春宵長。

題城山晚對軒壁

一枕清風夢綠蘿。人間隨處是南柯。也知睡足當歸去。不奈溪山留客何。

題城山挂月堂壁

百疊煙鬟得眼明。坐來心跡喜雙清。秋陽滿地西風起。猶有啼鶯四五聲。

姑惡并序

姑惡水禽。以其聲得名。世傳姑虐其婦。婦死所化。東坡詩云。姑惡姑惡。姑不惡。妾命薄。此句可以泣鬼。余行茗。嘗始聞其聲。晝夜哀厲不絕。客有惡之。以爲此必子婦之不孝者。予爲作後姑惡詩。

姑惡婦所云。恐是婦偏辭。姑言婦惡。定有之。婦言姑惡。未可知。姑不惡。婦不死。與人作婦亦大難。已死人言尙如此。

大暑舟行含山道中雨驟至霆奔龍挂可駭

隕雲變前驅。連鼓訑後殿。駸駸失高丘。擾擾暗古縣。白龍起幽蟄。黑霧佐神變。盆傾耳雙聾。斗暗目四眩。帆重腹逾飽。櫓潤鳴更健。圓滌暈雨點。濺滴走波面。伶俜愁孤鴛。颯閃亂飢燕。麥老枕水臥。秧穉與風戰。牛蹊炭城沉。蟻隧洶飭律。水車競施行。歲事敢休宴。啞啞嘯簧鳴。輻輳連鎖轉。駢頭立婦子。列舍望宗伴。東枯駭西潰。寸涸驚尺澱。嗟余豈能賢。與彼亦何辨。扁舟風露熟。半世江湖徧。不知憂稼穡。但解加餐飯。遙憐老農苦。敢厭遊子倦。

題畫卷五首

鑿落秋水石。明高楓老柳。兩灘橫。君看疊嶂雲容變。又有中宵雨意生。欹傾棧路繞山明。隔隴人家犬吠聲。無限白雲堆去路。不知誰識許宣平。

春陰十日溪頭暗。夜半西風雨脚收。但覺奔霆吼空谷。遙知萬壑正爭流。  
暑雲潑墨送驚雷。坐見前山驟雨來。今夜一涼千萬里。更無焦卷與塵埃。  
秋晚黃蘆斷岸。江南野水連天。日色微明魚網。鴈行飛入蒼煙。

六月七日夜起坐殿廡取涼

畏暑中夜起。出門月露清。晶熒臥銀漢。錯落低玉繩。網戶閉妙香。石樓棲古燈。風從何處來。殿閣微涼生。  
桂旗儼不動。藻井生上征。椽楣共突兀。鬼物相枝撐。彭觥鐵拄杖。磔磔棲燕驚。俗人豈解事。鼻息春雷鳴。  
大星送曉來。四窗炯微明。顯氣澡肌骨。栩栩兩腋輕。乘風欲歸去。騷鸞矧青冥。却恐方平知。浪得狡獪名。

中秋臥病呈同社

人間佳風月。浩浩滿大千。俗子不解愛。我乃知其天。以此有盡姿。翫彼無窮妍。受用能幾何。北溟一杯然。  
天公尙齟齬。不肯畀其全。臥病窘詩料。坐貧羞酒錢。瓊樓與金闕。想像屋角邊。如聞真率社。勝遊若登仙。  
四者自難并。造物豈我偏。

秋日雜興六首

我友蓬蒿士。却掃謝四鄰。內無三尺童。外無雙蒲輪。豈非騏驥姿。執轡難其人。無衣可御冬。忍寒待陽春。  
仰雲發永歎。夜作寒螿呻。麥戶勸之起。懷寶善自珍。秋月耿清夜。秋風捲曾雲。佳哉爲誰歎。定爲我與君。  
莫嫌酒味薄。聊復相歡欣。

夕陽下桑柘。餘暉挂西山。西山在何許。冉冉紫翠間。綵雲無朝昏。綠蘿竟暄寒。昔與霞上人。同跨雙飛翰。

上凌紫霄峯。下弄白石湍。風吹墮渺莽。及此行路難。佳人應望予。我豈真忘還。  
秋高氣彌清。歲晏入雨霜。繁枝各病綠。況乃枝上香。向來不勝春。渺在無何鄉。樂極定自悲。誰歎此更張。  
春秋無終窮。榮落殊未央。

嬌嬌芙蓉花。秀出清霜晨。衆卉已昨夢。孤芳若爲新。寒蜂無儼飛。一笑靜自珍。誰令嬋娟姿。墮此寂寞濱。

絕世貴獨立。後時莫酸辛。回風佐小舞。薄日生微醺。卽事亦足樂。何必桃李塵。  
蒼筠如蒼玉。鄉是礪壑姿。竭來西窗下。死生付汗泥。蟲緣有病葉。土瘦無新枝。太陽豈我偏。檐影爲蔽虧。

昔如松柏獨。今作蒲柳衰。暮夜風雨急。歲晏誰與歸。  
屋東雙梧桐。婉婉無真姿。朝爲春風條。暮爲秋霜枝。夜久風葉鳴。驚鵲一再飛。梧桐不足愁。會有明年期。  
人老真可歎。寧復遊冶時。

此  
页  
空  
白

# 石湖居士詩集卷三

擬古

彎環樓前月。掩抑樓上人。人月不得語。相看兩凝顰。西窗回紋機。織徧錦字春。聊可自持翫。何由將寄君。

立春日郊行

竹擁溪橋麥蓋坡。土牛行處亦笙歌。麴塵欲暗垂垂柳。醅面初明淺淺波。日滿縣前春市合。潮平浦口暮帆多。春來不飲兼無句。奈此金旛綵勝何。

次韻漢卿舅卽事二絕

風捲南枝一夜休。孤芳寧肯爲人留。淡粧素服真成夢。落月橫參各自愁。萬木垂垂欲改柯。根萌焦渴奈春何。晚來礎汗南風壯。會有溪雲載雨過。

晚潮

東風吹雨晚潮生。疊鼓催船鏡裏行。底事今年春漲小。去年曾與畫橋平。

一篇

一篇新綠浦東西。雪絮漫江鴈不飛。宿雨纔晴風又轉。片帆那得及時歸。

碧瓦

碧瓦樓頭繡幙遮。赤欄橋外綠溪斜。無風楊柳漫天絮。不雨棠梨滿地花。



題記事冊庚午

劃破虛空一劍閒。六根同轉上頭關。如今宴坐菴中事。政在凡夫道法間。

暮春上塘道中

店舍無煙野水寒。競船人醉鼓闌珊。石門柳綠清明市。洞口桃紅上巳山。飛絮著人春共老。片雲將夢晚俱還。明朝遮日長安道。慚愧江湖釣手閒。

江上

天色無情淡。江聲不斷流。古人愁不盡。留與後人愁。

餘杭道中

落花流水淺深紅。盡日帆飛繡浪中。桑眼迷離應欠雨。麥鬚騷殺已禁風。牛羊路杳千山合。雞犬村深一徑通。五柳能消多許地。客程何苦鎮匆匆。

陳侍御園坐上

愁眼逢歡春水明。詩情得酒春雲生。花梢蝴蝶作團去。竹裏鶉鳩相對鳴。邂逅浮生此日好。纏綿俗累何時輕。擘牋沫墨乏奇句。擲笛當筵慚妙聲。

獨遊虎跑泉小菴

苔徑彎環入。茅齋取次成。蔓花緣壁起。閒草上堦生。宿雨松篁色。新晴燕雀聲。筒泉烹御米。聊共老僧傾。

王希武通判挽詞二首

當代名臣後。惟公奕世賢。及親三釜養。遺子一經傳。藥石探奇字。芸香緝斷編。堂堂今不見。塵迹自依然。事契從先世。姻聯亦近親。遽爲重壤去。淒斷十年鄰。物理真飄忽。家聲正隱麟。門闌可三戟。何止駟車云。

劇暑

赫赫炎官張傘。赤帝騎龍。安得雷轟九地。會令雨起千峯。

次韻時敘

新春殘春一夢間。夢中兀兀長閉關。今朝出門春已去。但見新笋齊屋山。作詩惜春聊復爾。春亦何能與人事。閒心如絮久沾泥。但愛日長添午睡。

夜宴曲

以下共二首。效李賀。

金麟噴香煙。神蟠玉燈九枝青。闌干明瓊。帶湘簾斑。風幃繡浪千飛鸞。舞娥紫袖如弓彎。雲中一笑天解顏。銜杯快卷玻璃乾。花樓促箭春宵寒。二十五聲宮點闌。

神絃

雙娥一去三千秋。粉篁春淚凝古愁。神鼉悲鳴老龍怨。水爲翻瀾雲爲留。素空逗露晚花泣。神官行水鱗僮濕。潮聲不平江風急。蒼梧冥茫九山立。

樂神曲

以下共四首。效王建。

豚蹄滿盤酒滿盃。清風蕭蕭神欲來。願神好來復好去。男兒拜迎女兒舞。老翁翻香笑且言。今年田家勝去年。去年解衣折租價。今年有衣著祭祀。

繰絲行

小麥青青大麥黃。原頭日出天色涼。姑婦相呼有忙事。舍後煮繭門前香。繰車嘈嘈似風雨。繭厚絲長無斷縷。今年那暇織絹著。明日西門賣絲去。

田家留客行

行人莫笑田家小。門戶雖低堪洒掃。大兒繫驢桑樹邊。小兒拂席軟勝氈。木臼新春雪花白。急炊香飯來看客。好人入門百事宜。今年不憂蠶麥遲。

催租行

輸租得鈔官更催。踉蹌里正敲門來。手持文書雜嗔喜。我亦來營醉歸耳。牀頭慳囊大如拳。撲破正有三百錢。不堪與君成一醉。聊復償君草鞋費。

緘口翁

張達夫大卿酒尊名。酒尊不應緘口。客令僕嘲之。

君子取中道。常在語默間。多言固自費。不語良獨難。此翁身如鄭文淵。辨如懸河思如泉。邇來緘口欲挂壁。囁嚅畏客翻可憐。君不見東家玉壺本弟兄。叩之猶解語分明。願聞胚渾甚深義。定自能令一座傾。

春思

沙際綠蘋滿。樓頭芳樹多。光風入網戶。羅幕生繡波。前年花開憶湘水。今年花開淚如洗。園樹傷心三見花。依舊銀屏夢千里。

次韻漢卿舅臘梅二首

垂垂瘦蓼。泣微霜。剪剪纖英。鎖暗香。金雀釵頭。金蛺蝶。春風傳得舊宮粧。  
湘袂朝天紫錦裳。光風微度絳霄香。壽陽信美無仙骨。空把心情學澹粧。

宿東寺二首

淡天如水霧如塵。殘雪和霜凍瓦鱗。織女無言千古恨。素娥有意十分春。  
一聲黃鶴夜深歸。栖雀驚鳴觸殿扉。北斗半垂樓閣外。風旛渾欲上雲飛。

範老前歲相別約歸括蒼便游四明今不知何地暇日有懷

春色重來意未闌。故人一去肯復還。括蒼洞天掃舊隱。補陀海岸尋神山。杖屨雲煙遠遊樂。衣裳風雪行路難。鴻飛冥冥鷗浩蕩。安得置之雞鶩間。

癸亥日泊舟吳會亭

去年春盤浙江驛。湛湛清波動浮石。今年春盤吳會亭。冥冥細雨濕高城。天邊作客風沙裏。今年去年成老矣。客心古井冷無波。過眼人情亦如水。憶昔三生住翠微。偶來平地著征衣。山中故人應大笑。扁舟坐穩何當歸。

時紱火後意不釋然作詩解之

潘郎曉衾夢蘧蘧。舞馬竟與融風俱。前驅炎官後熱屬。席捲不貸淵明廬。淵明有火後詩君家十年四立壁。震風凌雨啼妻孥。平生白眼蓋九州。閉戶不納結駟車。清貧往往被鬼笑。付與一炬相擲揄。井堊木刊烏鼠赭。汝則暫戲吾何辜。天闕悠悠虎豹怒。叱閭上訴非良圖。作詩聊復相料理。餽墮已破空脚趂。浮生適

來且適去。況此茅屋三間餘。埽除却灰得空闕。新月恰上東牆隅。幕天席地正可樂。爲君鼓旗助歌呼。

題湯致遠運使所藏隆師四圖

欠伸

春風吹夢鷲江飛。行盡江南只片時。深院無人自驚覺。夕陽芳樹乳鴉啼。背立粧臺髻鬟懶。鏡鸞應見茸茸眼。不須回首更嫣然。劉郎已自無腸斷。

倦繡

獨兒弄煖綠苔走。花氣薰人濃似酒。困來如醉復如愁。不管低鬟釵燕溜。無端心緒向天涯。想見檣竿旛脚斜。槐陰忽到簾旌上。遲却尋常一線花。

倚竹

輕薄人情翻覆手。冰容却耐幽居久。關中舊事逐春休。付與新人莫廻首。目送斜陽忘却歸。竹風搖曳翠羅衣。君看脈脈無言處。中有杜陵飢客詩。

嗅梅

雪意勒花愁未解。背陰一朵寒先退。東風還是去年香。不比人心容易改。宿酒曹騰正耐春。花枝人面兩時新。相看好作風流伴。只恐花枝却妒人。

晚步

排門簾幕夜香飄。燈火人聲小市橋。滿縣月明春意好。旗亭吹笛近元宵。

題開元天寶遺事四首

御前羯鼓透春空。笑覺花奴手未工。一曲打開紅杏藥。須知天子是天公。  
謝蠻舞袖貴妃絃。秦國如花虢國妍。不賞纒頭三百萬。阿姨何處費金錢。  
朝天車馬詔頻催。斷得新湯未敢開。忽報豬龍掀宇宙。阿瞞虛讀相書來。  
剝啄延秋屋上烏。明朝箭道入東都。宮中亦有風流陣。不及漁陽突騎粗。

讀甘露遺事二首

神理人情本不同。絕憐鼠輩倖元功。天公盍假毛鷲助。成敗都懸反掌中。  
上林輦路草青青。誰向憑高識聖情。護展東封圖畫看。不如釀酒亂平生。

半塘 以下二十首·城西道中·

柳暗閨門逗曉開。半塘塘下越溪回。炊煙擁柂船船過。芳草綠堤步步來。

楓橋

朱門白壁枕彎流。桃李無言滿屋頭。牆上浮圖路傍堠。送人南北管離愁。

橫塘

南浦春來綠一川。石橋朱塔兩依然。年年送客橫塘路。細雨垂楊繫畫船。

胥口

扁舟拍浪信西東。何處孤帆萬里風。一雨快晴雲放樹。兩山中斷水粘空。

香山 吳王種香處

採香徑裏木蘭舟。嚼藥吹芳爛熳遊。落日青山都好在。桑間蕎麥滿芳洲。

上沙

水邊犬吠隔疎林。籬落蕭森日半陰。繁杏鎖紅春意淺。晚梅飄粉暮寒深。

天平寺 以下天平山

舊遊彷彿記三年。轟飲題詩夜滿山。山上白雲應解笑。又將塵土涴朱顏。  
三年前至先兄與余同唐少灤登山絕頂。比歸迷路。捫蘿而下。夜已午。主僧散遺羣童秉炬求余三人。久而莫得。以爲已仙也。是夜宿寺中。聯句達曉。東坡曰。自從有此山。白石封蒼苔。何常有此樂。將去復徘徊。至今往來於余心。

白雲泉 泉色正白。蓋乳泉。

龍頭高啄嗽飛流。玉醴甘渾乳氣浮。捫腹煮泉烹鬪勝。眞成騎鶴上揚州。

山頂

翠屏無路強攀緣。我與枯藤各半仙。不敢高聲天闕近。人間漠漠但寒煙。

山徑 以下高景山

雲根新徑絡山腰。暗綠交陰宿露飄。行到竹深啼鳥鬧。鵝鳩老怨畫眉嬌。

泉亭

收拾風煙鎖翠微。亂山窮處結巖扉。青天不盡烏飛盡。吳楚川原似衲衣。

金氏菴菴廢無人居

醉墨題窗側暮鴉。蔓藤緣壁走青蛇。春深有燕捎飛蝶。日暮無人掃落花。

平雲閣以下南峯

背倚天峯湧化宮。橫空閣道拖雙虹。火雲六月應奇絕。青瑣玲瓏八面風。

鐵錫支道林遺物

八環流韻寶枝鳴。古鐵無花紫翠明。莫遣閒人容易振。泉飛石落鬼竄驚。

放鶴亭亦道林故事

石門關外古亭基。樹老藤枯野徑微。放鶴道人今不見。故應人與鶴俱飛。

馬跡石傳云。道林騎白馬升天遺跡。今石上雙跡。儼然類蹄潒者。後人爲小塔識其處。

跨馬凌空亦快哉。龍腰鶴背謾徘徊。遊人欲識仙蹤處。但覓蒼崖白塔來。

金沙沙中鉄金燦然。人或煉取多不成。

莊嚴福地守靈仙。不爲人間計子錢。一掬爛熳光照眼。路傍饑隸枉流涎。

龍母廟以下澄照寺

孝龍分職隸湘西。天許寧親歲一歸。風雹春春損桃李。山中寒食尙冬衣。

白蓮堂

古木參天護碧池。青錢弱葉戰漣漪。忽忽遊子忽忽去。不見風清月冷時。



白善坑 鑿山成井·深數十丈·復轉爲隧道以取之·危險不可逼視·

銀鬚玉璞紫金精·犯難窮探亦有名·白堊區區土同價·吳儂無事亦輕生·

# 石湖居士詩集卷四

## 賀樂丈先生南郭新居

新堂燕雀喜。竹籬挂藤蘿。崩奔風濤裏。得此巢龜荷。西山效爽氣。南浦供清波。會心不在遠。容膝何須多。先生淮海俊。踏地嘗兵戈。飄飄萬里道。芒屨厭關河。風吹落下邑。楚語成吳歌。豈不有故國。荒垣鞠秋莎。無庸說當歸。到處皆南柯。卜遷不我遐。一水明青羅。閉戶長獨佳。奈客剝啄何。會令蒼苔石。屐齒如蜂窠。

## 歲旱邑人禱第五羅漢得雨樂先生有詩次韻

海山之湫龍所宮。濺瀑下赴聲琤琮。碧矚大士何許主。愛此匹練飛冥濛。偶然宴坐百千劫。神力悲願俱無窮。向來火雲挾日走。沙煎日爛千山童。陸渾風高煽熱屬。涇川草肥間雨工。萬口瞽瞍叫此士。爐燎未吐誠先通。暮塵捲地羊角暗。朝霞橫天魚尾紅。商羊摩霄鳶起舞。居然一澗歌年豐。人言佛陀入三昧。斷取世界如旋蓬。指麾釋梵駿奔走。況爾風伯并雷公。風騷老將亦贊喜。筆陣獨埽詩壇空。嗟余嘯咏不釋手。一曲何啻歌三終。

## 次韻時敘賦樂先生新居

愚士繁俗如囚奴。至人遺形與化俱。紛紜覺夢不可辨。蘧蘧栩栩知誰歟。百年如泡亦如電。剛欲鑄鐵充門樞。列仙之躋墮山澤。一席三椽良有餘。平生嶽巖百戰勇。頓挫久已歸夷途。光芒無用入詩句。青天白日轟雷車。松煤繭紙妙揮掃。芸香錦囊深貯儲。紫露雙瓶春夜醉。黃雲一稜秋田租。誰能搏扶北溟海。政

爾歸臥南陽廬。鴻飛冥冥隔雲雨。弋人可慕不可呼。

病中夜坐呈致遠

似霧如煙夜氣浮。鶴鳴驚睡起搔頭。含風竹影淡留月。著雨蛩聲深怨秋。萬事心空癡已慣。百骸歲晚病相投。便當採藥西山去。脚力蹒跚怕遠游。

戲題藥裹

捲卻絲綸颺卻竿。莫隨魚鼈弄腥涎。須知別有垂鉤處。枯海無風浪拍天。

夜歸

竹輿伊軋走長街。掠面風清醉夢迴。曲巷無聲門戶閉。一燈猶照酒壚開。

田舍

呼喚攜鋤至。安排築圃忙。兒童眠落葉。烏雀噪斜陽。煙火村聲遠。林菁野氣香。樂哉今歲事。天末稻雲黃。

戲題致遠書房

照叢菊靨萬黃金。欹架薇條半綠陰。逋客已隨丹鳳詔。但餘花草怨秋深。

烏戍密印寺烏戍卽今之烏鎮。青堆今日青鎮。

青堆溪上水平堤。烏堆東岸。謂之青堆。絳瓦參差半掩扉。殿用純紅瓦。色爛然。我與聖公俱客寓。聖翁本汀州白衣衲主。號定光佛者。連南夫知州載神像歸。寄於寺之藏前。香火蕭然。人傳帝子尙靈威。寺有昭明太子祠。勝緣齟齬三重障。東佛閣三造不成。今搃見材。取次成之。猶殊勝。志士辛勤十載歸。樓乃一僧發心束髮爲商。

走川廣得錢二萬緡。凡十年復髮而歸。樓始成。花木禪房都不見。但餘蝙蝠晝羣飛。僧房皆爲狹門深洞。極暗。行百餘步不辨人。

月夜泛舟新塘

溪上清風柳萬重。綠煙無路月朦朧。船頭忽逐回塘轉。一水迢迢却向東。

客舍

穀擊肩摩錦繡堆。朝聲洶洶暮聲催。忽然憶起長橋路。天鏡無邊白鳥迴。

病中夜坐

村巷秋春遠。禪房夕磬深。飢蚊當繞髻。暗鼠忽鳴琴。薄薄寒相中。稜稜瘦不禁。時成洛下詠。却似越人吟。

秋芸有春綠

秋芸有春綠。疎籬照孤芳。清霜早晚至。何草能不黃。寧當念衰落。政爾事容光。及時且自好。來日殊未量。

三湘怨

牙檣罨畫櫓。搖漾三湘浦。佳人翔綠裾。含顰爲誰舞。拳拳新荷葉。愁絕煙水暮。風雲忽飄蕩。隱約聞簫鼓。

夜發崑山

歲寒人瑾戶。霜重獨登舟。弱櫓搖孤夢。疎蓬蓋百憂。但吟今不樂。豈計幾宜休。慚愧沙湖月。年年照薄遊。

十一月十二日枕上曉作

竹響風成陣。窗明雪已花。柴扉吟凍犬。紙瓦啄飢鴉。宿酒欺寒力。新詩管歲華。日高猶擁被。麝食媿鄰家。

南樓望雪

夜月流瑤圃。春風滿玉都。籬疎先剝落。樹密正模糊。亂點橫煙鴈。驚啼失木烏。醉魂方浩蕩。風袖不支梧。

除夜書懷

運斗寅杓轉。周天日御回。夜從冬後短。春逐雨中來。鬢綠看看雪。心丹念念灰。有懷憐斷鴈。無思惜疎梅。絮厚眼生纈。蔬寒腹轉雷。燭花紅瑣碎。香霧碧徘徊。昨夢書三篋。平生酒一杯。牀頭新曆日。衣上舊塵埃。搖落何堪柳。紛紜各夢槐。隙光能幾許。世事劇悠哉。岐路東西變。羲娥日夜催。頭顱元自覺。懷抱故應開。踴躍金何意。青黃木自災。身謀同斥鷃。政爾願蒿萊。

戲答澹菴小偈

莫問前程事。漂然海上舟。命乖逢鬼國。緣合遇蓬丘。畢竟非身計。俱成錯路頭。故鄉隨脚是。流浪不知休。

偶書

出處由人不繫天。癡兒富貴更求仙。東家就食西家宿。世事何緣得兩全。

題立雪圖

堂下心如鐵。菴中語似雷。有人參此語。三箇一坑埋。

題日記

誰言萬事轉頭空。未轉頭時亦夢中。若向夢中尋夢覺。覺來還入大槐宮。

題張氏新亭

水楊成幄翠相遮。猶有東風管歲華。葉底青梅無數子。梢頭紅杏不多花。煩將鍊火炊香飯。更引長泉煮鬪茶。約我詩成須疥壁。莫嗔欹側似歸鴉。

玉臺體

捲幔燈千朶。鉤簾月半弓。繡鴛翔瀝水。金雀跂屏風。細意翻長袖。多情結短封。銅壺從婉婉。玉珮正丁東。

枕上

明月無聲滿屋梁。夢餘分影上人牀。素娥脈脈翻愁寂。付與風鈴語夜長。

斑駁

斑駁別後月。纖纖門外疎。桐影畫簾。留下可憐將不去。西風吹上兩眉尖。

題傳記二首

莫將綵筆寄朝雲。紅淚羅巾隔路塵。說與東風無限恨。倩風吹斷去年春。綵舟歸去海山青。寂寞瑤臺月自明。啼雨落花春已盡。夢魂何必更多情。

病中絕句八首

空裏情知不著花。逢場將病當生涯。蒲團軟暖無時節。夜聽蚊雷曉聽鴉。溽暑薰天地湧泉。彎跼避溼挂行纏。出門斟酌無忙事。睡過黃梅細雨天。石鼎颼颼夜煮湯。亂拖芝朮鬪溫涼。化兒幻我知何用。祇與人間試藥方。病中心境兩俱降。猶憶江湖白鳥雙。一夜雨聲鳴紙瓦。聽成飛雪打船窗。

檐頭排溜密如簾。溪上層陰定解嚴。最是看山奇絕處。白雲堆絮擁青尖。  
夜合梢頭蘸紫茸。蓂葱頂上拆黃封。去年團扇題詩處。依舊疎簾細雨中。  
盆傾瓴建夜翻渠。繞屋蛙聲一倍粗。想見西堂渾不睡。明朝踏溼看菖蒲。謂現老

晴色先從喜鵲知。斜陽一抹照天西。竹雞何物能無賴。如許泥深更苦啼。

病中三偈

擾擾隨流無定期。波停浪息始應知。一塵不偶同歸處。四海無親獨步時。苦相打通俱入妙。病緣纔入更何疑。霜清木落千山露。笑殺東風葉滿枝。

一交銷取萬黃金。將病求醫在用心。化盡此身成藥樹。不妨栽得病根深。莫把無言絕病根。病根深處是無言。丈夫解却維摩縛。八字轟開不二門。

雲間湖光亭

微風不動斂濤湍。組練晶晶色界寒。斜照發揮猶未盡。月明殘夜更來看。

高景菴泉亭

峯頭揮手笑紅塵。天入雙眸洗翳昏。萬里西風熟菰稻。白雲堆裏著黃雲。

晚入盤門

人語嘲喧晚吹涼。萬窗燈火轉河塘。兩行碧柳籠官渡。一簇紅樓壓女牆。何處采菱聞度曲。誰家拜月認飄香。輕裘駿馬慵穿市。困倚蒲團入睡鄉。

九月三十日夜。出關候致遠不至。

風勁使輕棹。霜嚴怯弊裘。青山蟠巨浸。紅樹立滄洲。月黑鴈猶去。燈寒人更愁。煙松漫小峴。何處問鳴驄。

次韻致遠自毗陵見寄二首

黃鶻高飛碧落寒。向來山水夢驚殘。故情若問元真子。依舊江頭把釣竿。新詞一闋話羈愁。清似寒泉咽隴頭。官下有誰同此□。仲宣應是獨登樓。

元日山寺

聽熟朝魚又暮鐘。全將慵懶度三冬。貪眠豹褥窗間日。怕擁鼙裘陌上風。登版自憐行蹭蹬。讀碑仍怪視蒙籠。少年豪壯今如此。與殘僧氣味同。

題記事冊

北山山下小菴居。佛劫仙塵只故吾。八萬四千空色界。不離一法認毗盧。

寄贈致遠并呈現老

草草家風節物新。從來憂病不憂貧。琴書稍覺浮生誤。香火惟知此事真。室裏談空思二士。花間對影謾三人。祇愁盧李分攜後。別有箜篌一曲春。

春後微雪一宿而晴

綵勝金幡換物華。垂垂天意晚平沙。東君未破含春藥。青女先飛剪水花。夜逐回風鳴瓦壠。曉成疎雨滴檐牙。朝暾不與同雲便。烘作晴空萬縷霞。



雪霽獨登南樓

雪晴風勁。來冰樓上。奇寒病骨驚。雀啄空檐銀笋墮。鴉翻高樹玉塵傾。青帘閃閃千家靜。黃帽亭亭一水橫。坐久天容却溫麗。一彎新月對長庚。

次時敘韻送至先兄赴調

梅柳欲動風作難。行人意在飛鴻間。一官遠遊門戶弱。百歲上策身心閒。胸次饒渠有廊廟。夢魂叵使無江山。栽桃種杏須付我。已辦鐵鎖遲公攀。

上沙遇雨快涼

刮地風來健葛衣。一涼便覺暑光低。雲頭龍挂如垂筍。雨在中峯白塔西。

自天平嶺過高景菴

卓筆峯前樹作團。天平嶺上石成關。綠陰匝地無人過。落日秋蟬滿四山。

高景山夜歸

伊軋籃輿草露間。夜涼月暗走孱顏。忽逢陂水明如鏡。照見沉沉倒景山。

白雲嶺

路入千峯一線通。陸離長劍立天風。五年領客題詩處。正在孤雲亂石中。

假月泉

松風竹露午猶寒。知有龍蟠一掬慳。我欲今年來結夏。莫扃岫幌掩雲關。

代人七月十四日生朝

秋入壺中玉宇鮮。芝蘭桃李共熙然。已饒瑞莢明朝滿。先借清蟾一夜圓。北闕紫泥應道路。東山紅袖莫雲煙。如今且醉江湖酒。來歲城南尺五天。

題金牛洞 洞在宣城之成山。前此蘇轍無聞。自魏公尙書發之。常有笙簫仙音之瑞。

故鄉江吳多好山。筍輿篾舫相窮年。春風吹入江南陌。疊障雙峯如舊識。聞道金牛更孱顏。古來鐵鎖高難攀。自從仙伯弭芝蓋。鳳舞鸞歌開洞天。新詩牘說山中妙。我不曾游先夢到。從渠弱水隔蓬萊。雲山何處無瑤草。

曉自銀林至東瀾登舟寄宣城親戚

曉山障望眼。脈脈紫翠橫。澄江已不見。況乃江上城。結束治野裝。木末浮三星。羸馬隴頭嘶。小車谷中鳴。亭亭東瀾樹。練練綠浦明。篙師笑迎我。新漲沒蘋汀。徑投一葉去。雲水相與平。聊將塵土面。照此玻璃清。懷我二三友。高堂晨欲興。風細桐葉墮。露濃荷蓋傾。凝香繞燕几。安知路傍情。

讀唐太宗紀 平內難

宮府相圖勢不收。國家何有各身謀。縱無管蔡當時例。業已彎弓肯罷休。弟兄相賊數天倫。自古無如舜苦辛。掩井捐階危萬死。不聞親殺鼻亭神。佐命諸公趣夜裝。爭言社稷要靈長。就令昆季尸神器。未必唐家便破亡。建成回馬欲馳歸。元吉行趨武德闈。若使兩人俱得去。却於何處極兵威。

嫡長承祧有大倫。老公愛子本平均。只知世上尋常理。爭信英雄解滅親。

重讀唐太宗紀立晉王

父子情深苦亦深。蓋天神武一沾襟。想當拔刃投牀際。也憶海地舟戛心。  
承乾謀父保天年。青雀圖兄亦兩全。隱刺諸兄却孛戮。一私知隔幾山淵。  
更張聊欲亢吾宗。仁孝承家合至公。天發殺機那可料。正投阿武禍胎中。

# 石湖居士詩集卷五

復自姑蘇過宛陵至鄧步出陸

漿家饋食糧爲藩。酒市停驂竹廡門。紅樹亭亭棲晚照。黃茅杳杳被高原。飲溪有跡於菟過。掠草如飛朴渥翻。車軌如溝平地少。飽帆天鏡憶江村。

題南塘客舍

閒裏方知得此生。凝人身外更經營。君看坐賈行商輩。誰復從容唱渭城。

南塘冬夜倡和

燃其烘煖夜窗幽。時有新詩趣倡酬。爲問灞橋風雪裏。何如田舍火爐頭。寒缸欲暗吟方苦。凍筆難驅字更遒。絕笑兒癡生活淡。略無歲晚稻粱謀。

游金牛洞題石壁上

仙翁舊游處。琅瑯韻靈曲。至今有餘音。玄鶴舞幽谷。衆真期我住。歲晚芝田熟。腰饑從翁來。籟雲跨飛壑。淨行寺傍皆圩田。每爲潦漲所決。民歲歲興築。患糧絕。功輒不成。崩濤裂岸四三年。落日寒煙正渺然。空腹荷鋤那辦此。人功未至不關天。

袁山道中

虎嘯狐鳴苦竹叢。魂驚終日走蒙茸。松林斷處前山缺。又見南湖數十峯。

花山村舍

潦退灘灘露。沙虛岸岸頽。澗聲穿竹去。雲影過山來。柳菌粘枝住。桑花共葉開。菴廬少來往。門巷濕蒼苔。

清明日狸渡道中

灑灑沾巾雨。披披側帽風。花燃山色裏。柳臥水聲中。石馬立當道。紙鷲鳴半空。幡間人散後。烏鳥正西東。

寒食客中有懷

江郭花開也寂寥。不須綠暗與紅凋。疾風甚雨過寒食。白日青春吟大招。芳景尙隨流水去。故人應作綵雲飄。煙波千里家何在。惟有溪聲似晚潮。

南塘寒食書事

埂外新陂綠。岡頭宿燒紅。裹魚蒸菜把。饋鴨鎖筠籠。酒侶晨相命。歌場夜不空。土風并節物。不與故鄉同。

周德萬攜孥赴龍舒法曹道過水陽相見留別女弟

草草相逢小駐船。一杯和淚飲江天。妹孤忍使行千里。兄老那堪別數年。馬轉不容吾悵望。櫓鳴肯爲汝留連。神如相此俱強健。綠髮歸來慰眼前。

高淳道中

路入高淳麥更深。草泥霑潤馬駸駸。雨歸隴首雲疑黛。日漏山腰石滲金。老柳不春花自蔓。古祠無壁樹空陰。一簾定屬前村店。袞袞炊煙起竹林。

夜至寧菴。見壁間端禮昆仲倡和。明日將去。次其韻。

杉松廡門森老蒼。佛屋深夜幡花香。借牀睡倒恍何處。夢隨潛魚聽驚榔。咿啞禽語曉光淨。窸窣草鳴朝雨涼。哦詩出門懷二妙。春漲繞山湖水黃。

行唐村平野晴色妍甚

煖日烘繁梅。穠香撲征鞅。雲煙釀春色。心目兩駘蕩。柳眉翠已掃。桑眼青未放。茲遊定不俗。前路八千嶂。

嶺上紅梅

霧雨臙脂照松竹。江南春風一枝足。滿城桃李各嫣然。寂莫傾城在空谷。城中誰解惜娉婷。遊子路傍空復情。花不能言客無語。日暮清愁相對生。

浙東參政寄示會稽蓬萊閣詩軸次韻寄題二首

仙翁來佩玉符麟。綠髮無霜照碧筠。永夜闌干千嶂月。清風揮塵七州春。塵埃不隔壺中境。功業猶關物外身。鸞鶴莫驚兵衛峻。主人元是白雲人。

鯨背飛來紺碧浮。人間還有小蓬丘。不須擊水三千里。已壓中天十二樓。羽駕舊曾將夢到。芝田今合爲公秋。玉霄有客方東望。竟欲乘風馭氣遊。

外舅輓詞二首

植德千章茂。礪材百鍊剛。事功纔止此。物理故難量。鴈序雲天遠。蘭階雨露芳。公無憾身後。人自惜堂堂。幽介聯昏援。門闌閱歲更。方欣承燕几。何意寫銘旌。笑語猶尋夢。恩勤已隔生。情傷到深處。有淚不勝傾。

天平先隴道中時將赴新安掾

霜橋冰澗淨無塵。竹塢梅溪未放春。百疊海山鄉夢熟。三年江路旅愁生。松楸永寄孤窮淚。泉石終收漫浪身。好住鄰翁各安健。歸來相訪說情真。

元夕泊舟霽川

蓮炬光中月自圓。人情草草競華年。最憐一夜旗亭鼓。能共鐘聲到客船。  
桐川郡圃梅極盛。皆圍抱高木。浙中無有。

家住丹楓白葦林。橫枝一笑萬黃金。玉溪園裏逢千樹。還盡春風未足心。

牧馬山道中

土橋茅屋兩三家。竹裏鳴泉漱白沙。春色惱人無畔岸。亂飄風袖拂梅花。

宿牧馬山勝果寺

佛燈已暗還吐。旅枕纔安却驚。月色看成曉色。溪聲聽作松聲。

游寧國奉聖寺

松梢臺殿鬱高標。山轉溪迴一水朝。不惜褰裳呼小渡。夜來春漲失浮橋。  
自寧國溪行至宣城。舟人云凡百八十灘。

波驚石險夜喧雷。曉泊旗亭笑眼開。休問行人緣底瘦。適從百八十灘來。

次韻宣州西園二首

苔茵無地着紅塵。花草含芳一笑新。不待東君能剪刻。相公筆力抱回春。

星芒垂耀筆牀寒。河漢波流硯滴乾。棐几松跗入三昧。一篇詩就一杯殘。

晚步西園

料峭輕寒結晚陰。飛花院落怨春深。吹開紅紫還吹落。一種東風兩樣心。

送端言

東君留戀一分春。蜂蝶闌珊燕子新。桃李無情空綠徑。市橋楊柳送行人。

早發竹下

結束晨裝破小寒。跨鞍聊得散疲頑。行衝薄薄輕輕霧。看放重重疊疊山。碧穗吹煙當樹直。綠紋溪水趁橋彎。清禽百轉似迎客。正在有情無思間。

小澗

石礙珠旒濺。灘平霧縠鋪。小童能好事。繫馬斷菖蒲。

次韻子文探梅水西。春已深猶未開。水西謂欽溪。而黃君謨州學記云。頻江地卑。蓋此水爲浙之源。正可謂之江也。

孤山山下小斜橋。客魂曾共暗香飄。五年不踏西湖路。想見黃昏清淺處。如今憔悴古江干。豈有幽芳伴倚欄。臘盡雪殘春不至。坐令愁裏眼長寒。霜稜未貸千林槁。門外風饕人欲倒。斟酌芳心正怯寒。有情真被無情惱。

後催租行



老父田荒秋雨裏。舊時高岸今江水。傭耕猶自抱長飢。的知無力輸租米。自從鄉官新上來。黃紙放盡白紙催。賣衣得錢都納却。病骨雖寒聊免縛。去年衣盡到家口。大女臨歧兩分首。今年次女已行媒。亦復驅將換升斗。室中更有第三女。明年不怕催租苦。

次韻子文衝雨迓使者道聞子規

夢魂翻蝶翅。鼻息吼鼉鼓。喚起治曉裝。馬嘶童僕語。汨泥溷鳧鶩。慚愧黃鵠舉。猥吟陔隅池。浪廢枯棹圃。啼鵲撩客心。鉤引着何許。請歌蘇仙詞。歸耕一犁雨。

奉題胡宗偉推官攬秀堂

城外屏峯雲白疊。城裏看雲笏拄頰。山靈自與人爭秀。明滅煙霏難應接。南鄰范叔骨相寒。不如騎曹知愛山。晨霞儻可救枵腹。丐君分我入朝餐。

次韻太守出郊

曉裝緹騎踏芳辰。江爲安瀾露浥塵。檠戟前驅留住月。笙簫後備帶行春。魚龍水面金杯滿。鸞鶴山頭綵筆新。聞道將軍寬禮數。不辭醅酎吐車茵。

曉出古巖呈宗偉子文

曉風生小寒。嵐潤裊巾屨。宿雲埋樹黑。奔溪轉山怒。東方動光彩。晃晃金鉦吐。千峯森隱現。一氣澹回互。平生癖幽討。解后飽新遇。那知塵滿甑。晨炊午未具。不愧忍飢面。來尋古巖路。稻粱亦易謀。烟霞乃難痼。持此慰龜腸。搜枯尙能句。

積雨蒸潤體中不佳頗思故居之樂戲書呈子文

門外泥深蘸馬鞍。墨雲未放四維寬。前山忽接後山暗。暑雨全如秋雨寒。夢裏江湖三歎息。醉中天地一憑闌。斗升留滯休惆悵。枳棘從來著鳳鸞。

簽廳夜歸用前韻呈子文

簿書堆裏解歸鞍。我亦蕭然轡勒寬。爐篆無風香霧直。庭柯有月露光寒。閒思喜鵲填河鼓。靜數流螢繞井欄。明日又驅官裏去。從教白鷺侶紅鸞。

聖集誇說少年俊遊用韻記其語戲之

京塵紅軟撲雕鞍。年少王孫酒量寬。倚袖竹風憐翠薄。捧杯花露怯金寒。黃雲城上栖烏曲。綠水橋邊鬪鴨欄。別後相思惟故物。壁煤侵損扇中鸞。

次溫伯用林公正劉慶充倡和韻

前山後山梅子雨。屯雲日夜相吞吐。長林絕壑望不到。時有樵歸說逢虎。奔溪朝來忽怒漲。夾岸柳梢餘尺許。屋頭未放濃嵐散。苦憶清風汎瓊宇。客行落此亂山中。但欲尋人訴羈旅。比鄰解后得清士。眉宇津津佳笑語。杯行起舞出新句。我氣已衰聊復鼓。明年與君杭太湖。扁舟踏浪不踏土。沉沉玉柱闕仙扃。矯矯虹梁浮水府。目力無窮天不盡。却笑向來誰縛汝。

次韻溫伯夜坐今日忽得舍弟到杭消息喜見於詞

長風吹月來。影碎竹間牖。良宵坐窘束。媿我塵外友。平生煙霞興。肆兀上南斗。頗亦契三三。未省計九九。

迷塗入簿領。鄉心幾回首。嗟予季行役。舟拂漲溪柳。凌晨雙鶻鳴。翫占得無咎。何當從汝去。履綦尋蕙畝。

再次韻呈宗偉溫伯

官居數椽間。局促如蠶牖。幸鄰詩酒社。金薤對玉友。真清廊廟器。偉望配山斗。宗偉自號真清居士。行當侍紫極。槐棘位三九。館舍有奇士。謂溫伯。高文粲參首。倡酬猥及我。雙松壓孤柳。生活從冷淡。幸免譽與咎。相從結此夏。何異歸隴畝。

次韻溫伯納涼

日斜猶畏暑。吏退合偷閒。霞散紅綃薄。溪迴碧玉彎。伴人惟羽扇。娛客欠風鬟。且復哦新句。相嘲飯顆山。

雨涼二首呈宗偉

誰扶病客起龍鍾。恩在盆傾一雨中。問訊九關何路到。擬牋歡喜謝天公。驚雷隱地送涼颺。起舞看山不自持。說與騷人須早計。片雲催雨雨催詩。

明日復雨涼再用韻二首

東山朝日澹冥濛。一片雲生萬疊中。宿雨未蘇焦卷盡。又煩箕井喚雷公。濺瓦排檐散萬絲。顛狂風篠要扶持。恩深到骨吾能報。急賦新涼第一詩。

次韻慶充避暑水西寺

佳晨出西郭。仰視天宇清。樂哉曠士懷。浩浩吞四溟。新漲忽勇退。籬落粘枯萍。風幡招客遊。曠望隔蘋汀。僕夫厲清深。竹輿竦亭亭。波翻石鑿落。尚帶蛟龍腥。華堂入松竹。德人占聚星。脫帽飛羽觴。頽放解天刑。

時當行火令。草腐亦化螢。炎官紛陸梁。空飛赤雲駟。遙知隴上耘。暴背愁白丁。茲遊豈易得。未用歎沉冥。

送滕子昭續溪罷歸

天馬西極來。目力盡九寰。轡轡者誰歟。墮此空谷間。草深石齧足。一躍度孱顏。長風送逸駕。蕩蕩登虎關。五雲清都上。白日開帝閑。鉤陳動光彩。球琳鏘轡環。亦復念舊羣。依然歎鴛頑。紅塵起天末。可望不可攀。

此页空白

# 石湖居士詩集卷六

## 次韻溫伯謀歸

官路驅馳易折肱。官曹隨處是愁城。隨風片葉鄉心動。過雨千峯病眼明。一樹何須嘗世味。寸田久已廢吾耕。羨君早作歸歟計。屈指從今幾合并。

## 次韻溫伯雨涼感懷

窮士病且飢。古今同一流。身安腹果然。此外吾何求。判司誠卑官。未免塵甑憂。窮山更癉暑。憊臥不舉頭。二物交寇我。生世真如浮。晨朝墨雲作。疾雷破山丘。排檐忽飛溜。蛙蠲鳴相酬。朱冠領熱屬。橫潰輸一籌。新涼蘇肺氣。踏溼登城樓。好邀雲雨仙。長袖按梁州。吹水添瓶壘。淨洗千斛愁。何從有此段。冰廳冷如秋。但覺詩思生。爽氣入銀鈎。章成竟何用。知能救窮不。湯子亦旅食。回望家還羞。侶子敢不和。共作商聲謳。

## 次韻子文雨後思歸

斷雲將雨洗松篁。昨夜凝龍起蟄藏。人自無情孤樂事。天猶有意作新涼。尊前不見凌波襪。樓下空聞拜月香。萬事安能盡如願。且來相伴壓糟牀。

## 次韻溫伯苦蚊

白鳥營營夜苦飢。不堪薰燎出窗扉。小蟲與我同憂患。口腹驅來敢倦飛。

## 慶充自黃山歸索其道中詩書一絕問之

鳴騶如電馬如雷。知是婆娑醉尉迴。常日錦囊猶有句。況從三十六峯來。

曉出古城山

落月墮眇莽。殘星澹微茫。竹輿亂清溪。飛蓋入嵐光。松檜霧靄溼。桑麻風露香。空翠滴塵纓。何必濯滄浪。山家亦早作。迨此朝氣涼。林深無人聲。木末炊煙蒼。離離瓜芋區。肅肅棗栗場。田園古云樂。令我思故鄉。墟市稍來集。筠籠轉山忙。吏事亦挽我。歸路盤朝陽。

李深之西尉同年談吳興風物再用古城韻

李侯昔遊吳。蓮舟鏡蒼茫。風鬟與霧鬢。共濯玻璃光。采花不盈舫。日暮雲水香。還登縹緲樓。羅襟酒淋浪。卷箔納星月。踏筵按伊梁。安知有恨事。但恐兼葭蒼。風吹落窮谷。草深麋鹿場。高岡苦炎熱。游子悲異鄉。尙喜簡書省。期會無匆忙。猶餘作詩苦。消瘦如東陽。

七月五日夜雨快晴

豐隆坎坎夜伐鼓。靈湫老龍撇波舞。褰雲掣電上清空。何捲天潢作飛雨。向來炎官作夏旱。萬里彤霞烘玉宇。豈惟牛馬困蚊蟲。壠上行人人口生土。我從雪浪葉舟來。不謂山城熱如許。天公知我愁欲病。施與一涼蘇逆旅。稍聞水繞屋除鳴。不覺星從雲罅吐。千山濯濯淨鬢髻。缺月娟娟炯眉嫵。浮生此景萬事足。但欠清歌對芳醕。天上秋期正多事。趣駕星橋跨銀渚。人間四者自難并。莫妒黃姑迎織女。

次韻宗偉溫伯

冉冉流光迫歲餘。青林日夜向人疎。雨滋巖桂重堆粟。新安木犀。秋暮再花。風折庭蕉又獻書。逋客解蘭

思婉婉。先生彈缺厭清虛。一塵不立渾輸我。卽境心安是故廬。宗偉新議婚。溫伯病起無聊。故有郎闈彈缺之語。

### 再韻答子文

浮生飽外莫求餘。羈旅東來計已疎。肩聳已高猶索句。眼明無用且繙書。百年子莫占元緒。萬法吾今付子虛。惟有登臨心未厭。黃山聞道勝衡廬。

### 道見蓼花

秋風裊裊露華鮮。去歲如今刺釣船。歛縣門西見紅蓼。此身曾在白鷗前。

### 次韻溫伯種蘭

靈均墮荒寒。采采紉蘭手。九畹不留客。高丘一迴首。崢嶸路孔棘。悽愴肘生柳。遂令此粲者。永與窮愁友。不如湯子遠。情事只詩酒。但知愛國香。此外付烏有。栽培帶苔蘚。披拂護塵垢。孤芳亦有遇。洒濯居座右。君看深林下。埋沒隨藜莠。

### 次韻子文

幻塵久已破狐涎。身世誰能料鼠肝。暮夜雨收千嶂出。晨朝風卷四維寬。我今無事不如夢。君豈有心猶覓安。但促小槽添壓石。龍頭珠滴夜珊瑚。

### 次韻知郡安撫九日南樓宴集三首

雙旌暮捲小春容。畫棟雲生笑語中。但覺山光侵酒綠。不知日脚染溪紅。控臨縹緲疑無地。指點虛無欲



馭風誰遣玉蟾催。騎吹歸來人影在朦朧。  
珠履參陪北海觴。仍邀擁節舊中郎。碧城香霧連天暝。黃葉霜風捲地涼。佳節轉頭論聚散。清波從古閱興亡。明年重把茱萸醉。公在叢霄貢玉堂。

斯民鄒魯更豐年。雅道淒涼見此賢。萬隴登禾新霽色。千村鳴柝舊寒煙。鏘金絕世詩情妙。倚劍凌空隸墨鮮。太守新題南樓榜。珍重北窗山六六。使君名與汝俱傳。

晚集南樓

浪隨兒女怨萍蓬。笑拍闌干萬事空。宇宙勳名無骨相。江山得句有神功。掉頭莫覩秋高鶻。留眼來賓日暮鴻。懶拙已成三昧解。此生還證一圓通。

賞雪騎鯨軒子文。夜歸酒渴侍兒薦茗飲蜜漿。明日以詫同游。戲爲書事。邀宗偉同作。

溪山四時佳。今日更奇絕。天公妙莊嚴。施此一川雪。飛花浩如海。眩轉塞空闊。水西萬珠樹。玉塔照銀闕。碧溪不受凍。長灘瀉清咽。漁舟晚猶汎。樵檐寒未歇。懸知畫不到。未省詩能說。歸來強搜句。冰硯冷於鐵。不知嚴夫子。迎門生煖熱。梅香不可耐。梅即侍兒小名。但覺酒腸竭。蜜融花氣動。茶泛乳膏發。寧辭春筍寒。爲暖花甃滑。書騰畫屏暖。喚起眼餘纈。笑我獨何事。作此淡生活。想像高唐賦。何如徑排闥。

從聖集乞黃巖魚鮓

截玉凝膏膩白。點酥粘粟輕紅。千里來從何處。想看舶浪帆風。

從宗偉乞冬筍山藥

竹塢撥沙犀頂銳。藥畦粘土玉肌豐。裹芽束縑能分似。政及萊蕪飯釜空。

雪後守之家梅未開呈宗偉

瓦溝凍殘雪。檐溜粘輕冰。破寒一竿日。春隨人意生。端葉再三白。南枝尙含情。定知司花女。未肯嫁娉婷。官居苦無賴。一笑如河清。落木露荒山。寒溪繞孤城。朝暮何所見。雲黃叫飢鷹。東風不早計。愁眼何當明。北鄰小橫斜。薜地可班荆。憑君趣花信。把酒撼瓊英。

次韻溫伯城上

閉戶成癡坐。扶藜得意行。樓臺浮霽色。市井碎春聲。雪盡小橋出。煙消千嶂生。病多無脚力。遙羨落鴻輕。知郡安撫以立春日揭所書新安郡榜南樓之上。曉雪紛集。邦人以爲善祥。遂開宴以落之。輒賦長句一筭。以附風謠之末。

碧瓦朱甍上牛斗。妙墨新題森鎖鈕。使君筆力挽春來。一夜飛花暗梅柳。南山與樓相對高。向來千載爭雄豪。八分三字一彈壓。衆峯戢戢如兒曹。人間盛事天不隔。急催此雪成三白。未論千古福邦人。先卜明年滿岡麥。東風酒面吹凝酥。不辭醉倒歸相扶。短歌萬一傳樂府。湛輩亦與公名俱。

次韻知郡安撫元夕賞倅廳紅梅三首

春入林梢一再風。破寒勻染弗天工。雖然媚蕩新粧別。只與橫斜舊格同。午枕乍醒鉛粉退。曉奩初罷蠟脂融。後來顏色休論似。夾路漫山取次紅。眞色生香絕世逢。煙光池面雨溶溶。楚鄰不待施朱好。虢國翻嫌傅粉濃。晴日曖雲春照耀。溫風霽月夜

春容酒闌且駐紗籠看。慢破團團一壁龍。

司花一笑爲誰開。知道朱幡得得來。踈影有情當洞戶。蕙香無語墮空杯。風生翰墨留連看。月入笙歌次第催。來歲如今翻舊唱。五雲叢裏望三台。

新安絕少紅梅。惟倅廳特盛。通判朝議召幕僚賞之。坐皆有詩。亦賦古風一首。

華燈收盡江梅落。別有橫枝照林薄。天教閬苑染芳根。小住山城慰蕭索。騰騰醉後酒紅醺。淡淡粧成笑靨新。斟酌東君已傾倒。爲渠都費十分春。別乘胸懷有風月。催喚清尊洗愁絕。花知主客得不凡。一夜光風融絳雪。樓頭煙暝吹單于。花梢挂星光有無。歸來境熟落春夢。夢入鎖香紅綺疏。

胡宗偉罷官改秩。舉將不及格。往謁金陵丹陽諸使者。遂朝行在。頗有倦游之歎。作詩送之。

凍雲埋山天冥濛。北風無情雪塞空。道傍人稀鳥飛絕。問君東遊何忽忽。君言薄官淡無味。免俗未能聊

復爾。我評茲事一鴻毛。因行且看佳山水。陵陽樓閣壓高城。煙屏百疊雙流橫。宣城疊嶂樓。黉溪閣。姑孰

江亭更奇絕。濃黛兩抹長眉青。當塗蛾眉亭。望東南梁山如雙眉。山形成龍復成虎。六代遺蹤供弔古。謂金陵

鐘山石頭。大荒莽蒼江水黃。雨淚風煙眇吳楚。賞心亭雨花臺所見。却浮一葦下長川。浮玉低昂波聒天。

長蘆。真州寺。浮玉。丹陽金山也。梁溪南岸小停櫓。一酌人間第二泉。無錫惠山。陸子泉。閶門峨峨過吾國。

姑蘇。僕故里。閶門。北門也。姑蘇臨波照金碧。太湖三萬六千頃。上有垂虹跨南極。吳江長橋三高亭。鷗夷

子在焉。我家越相尙神遊。試從煙浪訪扁舟。問訊白鷗相記否。謂言久客不勝愁。軟紅三尺長安道。九重

城闕乾坤繞。西湖山寺浙江樓。君昔曾遊今更好。故人客館中天開。非君誰上黃金臺。挽着天衢五雲上。

却望江湖如夢迴。萬境何如一丘壑。幾時定解寇裳縛。幔亭山下桂叢深。清社向來都寂莫。幔亭。清社。  
昔宗偉舊隱故事。

### 黃伯益官舍賞梅

一杯何處洗愁顏。黃法曹家玉樹寒。翠袖撚香留客看。春風都在小闌干。

### 次韻朱嚴州從李徽州乞牡丹三首

佳人絕世墮空谷。破恨解顏春亦來。莫對溪山話京洛。碧雲西北漲黃埃。  
歛浦煙山蟠萬疊。釣臺雲日擁千章。兩侯好事洗寒口。寶檻移春入燕香。

閨風苑裏司花女。肯作山腰水尾來。十二玉欄天一笑。只今歸路五雲開。時傳使君有召命。

### 送琴客許揚歸永嘉

烏帽休衝九陌埃。瘦藤定約到秋迴。龍湫鴈蕩經行處。斷取松風萬壑來。

### 送李徽州赴湖北漕

徂徠千丈松。閱世聳絕壁。高標上霄漢。峻節貫金石。惟有孤生竹。亭亭附微植。月夜借清景。春朝分秀色。  
託根未渠央。萬牛挽山澤。昂藏轉江湖。夷路入王國。明堂五雲上。一柱屹天極。可望不可攀。清都與塵隔。  
依然此清士。空山淡愁圓。悲吟發清籟。搖蕩風雨夕。

### 送通守林彥強寺丞還朝

鴈蕩之山天下無。奔岸絕壑不可圖。地靈境秀有人物。新安府丞今第一。紛綸草木變暄寒。竹節松心故

凜然窮山薄宦我無恨。識公大勝荊州韓。梅風漲溪綠如酒。曉插檣鳥上南斗。只今廣廈論唐虞。斟酌正須醫國手。秀眉津津雙頰丹。想看鳴佩翔九關。諸公倘欲持公議。莫遣此賢思故山。

送溫<sub>伯</sub>歸福唐納婦且約復游霽川

攬秀堂前一笑傾。都忘身世兩浮萍。扶藜處處從君賞。落筆時時得我驚。荔熟閩山勞夢想。蘋香茗水約逢迎。祇愁誤入桃源後。從此車輪四角生。

次韻宗偉閱番樂

十日閒愁晝掩關。起尋一笑共清歡。罷休詩社工夫淡。洗淨書生氣味酸。盡遣餘錢付桑落。莫隨短夢到槐安。繡鞵畫鼓留花住。賸舞春風小契丹。

題漫齋壁

漢陰無械可容機。歲晚功名一衲衣。槁木閒身隨念懶。浮雲幻事轉頭非。三鼓已罷庚申守。五鬼從教乙丑歸。富貴神仙兩俱累。此心安處是真依。

四月十六日拄笏亭偶題

轉午聞雞日正長。小亭方丈納空光。綠陰一雨濃如黛。何處風來百種香。

次韻卽席

留連銀燭照金荷。腸斷華年一擲梭。月姊有情難獨夜。天孫無賴早斜河。晶晶霜瓦寒生粟。袞袞風幃細湧波。鵝鷓曉啼鳴鵲散。許多佳景奈愁何。

五月聞鶯二首

桑陰淨盡麥頭齊。江上聞鶯每歲遲。不及曉風鷓鴣子。迎春啼到送春時。  
一聲初上最高枝。忙殺嘔啞百舌兒。老盡西園千樹綠。却憐槐眼正迷離。

知郡檢計齋醮禱雨登時感通輒賦古風以附輿頌

六月火雲高偃蹇。使君有意憐焦卷。一封紅篆驛金龍。雨氣條隨爐燎滿。風師避路雷車鳴。石破天驚檐溜傾。不知稻本頗甦否。但覺溪聲如百靈。稅駕朱旛未云久。造化功成屈伸肘。我評茲事與天通。知公小試調元手。清壇深夜賓衆真。前驅霓旌後飄輪。定有靈官識仙伯。報道紫皇思侍臣。

此  
页  
空  
白

# 石湖居士詩集卷七

## 送子文雜言

陰谷雲低梅雨多。黃山滌源溪湧波。南風匝地送歸客。雙槳下瀨如投梭。嚴夫子。君舉酒。我其爲君歌。萬山叢叢石鑿鑿。官居破屋巢煙蘿。杜鵑曉啼猿暮叫。客行到此真蹉跎。窮愁無復理。一飲三歎息。城東鑿舍有佳人。解后使我加餐食。同鄉更同調。目擊心已傳。蟄蟲欲作雷奮地。萬籟方寂風行山。吹竽喚我醒。連鼓相追攀。飄車電轂不可輩。但覺兩腋生飛翰。狂歌不必終曲。戲弈不必滿局。有時不揖上馬去。出門大笑驚僮僕。窮鄉眼冷見未曾。道上嗚嗚相指目。云此陜隘何以有二士。直恐翩翩跨黃鶴。廣文組解登王畿。諸公貴人爭勸歸。常日心期有定論。贈行不惜重費詞。腰金佩璐衆目好。汗簡沉碑千載癡。一尊有意重山嶽。五鼎無心輕網絲。嚴夫子。應領略。別後頻書相發藥。我旣爲萬頃之狎鷗。君勿作九臯之鳴鶴。

## 新館

露稻粘<sub>甲</sub>璫。風茅袞高浪。荒煙暗白道。行行亂蛩響。日脚午未吐。雲頭晚猶漲。欣此半日涼。籃輿走清曠。病客不堪暑。茲行天肯相。蚊蟲掃無跡。秋意滿千嶂。稍尋泉石盟。略褫簿書障。鴿原定相念。因風報無恙。

## 臨溪寺

萬山繞岬岵。二水奔瀕洞。亭亭林中寺。金碧燦欄棟。解鞍得蒲團。臥受瓦爐供。少捐一炊頃。暫作百年夢。無人自驚覺。幽禽正清哢。倦客如殘僧。無力供世用。此行端爲山。紫翠迭迎送。漱井出門去。驚塵撲飛鞚。



盤龍驛

聞雞一唱罷。占斗三星沒。天高月徘徊。野曠山突兀。暗蛩泣草露。怨亂語還咽。涼螢不復舉。點綴稻花末。惟餘絡緯豪。悲壯殷林樾。小蟲亦何情。孤客心斷絕。魂驚板橋穿。足側石子滑。行路如許難。誰能不華髮。高城謾回首。疊嶂屹天闕。遙知秋衾夢。千里一飄忽。

竹下

松杉晨氣清。桑柘暑陰薄。稻穗黃欲臥。樅花紅未落。秋鶯尙嬌姘。晚蝶成飄泊。犬駭逐車馬。雞驚撲籬落。道逢行商問。平生幾芒屨。頰肩走四方。爲口不計脚。劣能濡簞瓢。何敢議囊橐。我亦糜斗升。三年去丘壑。二俱亡羊耳。未用苦商略。

寒亭

溝塍與澗合。隴畝抱山轉。向來六月旱。此地免焦卷。早穗已垂垂。晚苗猶剪剪。一川豐年意。比屋鬧雞犬。老農霜須鬢。豐饒黃犢健。自云足踏地。常賦何能免。刈熟倩人輸。不識長官面。康年無復事。但恐社酒淺。我亦有二頃。收拾尙可爾。懷哉笠澤路。歸鏟犁頭蘚。

清逸江

微生本漁樵。長日渺江海。扣舷濯滄浪。尙說天宇隘。竭來車馬路。悒悒佳思敗。黃塵撲眉鬚。驅逐似償債。羸驂繫偈仄。狂犬吠荒怪。鄉心入旅夢。一葉舞澎湃。晨興過墟市。喜有魚蝦賣。眼明見清江。積雨助橫潰。褰裳喚扁舟。艤鷗不勝載。不辭野渡險。弄水聊一快。

隱靜山 杯渡師道場。

五峯抱巖扉。千柱奠雲壑。荒原蕞爾縣。有此寶樓閣。維昔經營初。衣錫化雙鶴。杖頭具隻眼。矯矯雲中落。尊者一笑許。璇題照林薄。庭柏有祖意。石泉韻天樂。清簧轉碧雞。飛梭擲蒼鵲。號風飢虎怒。失木啼猿愕。英遊偶然同。吏檄乃不惡。題名記吾曾。醉墨疥丹壑。

新嶺

瘦馬兀曹騰。荒雞號莽蒼。絲窠罨朝露。籬落萬珠網。宿雲拂樹過。飛泉擘山響。老桑踟潛蚪。怪蔓掛騰蟒。山行何許深。空翠滴羈鞅。釀愁積雨寒。破悶朝日放。瞳瞳赤幟張。昱昱金鉦上。浮動草花馥。清和野禽唱。僕夫有好語。沙平路如掌。惟憂三溪阻。橋斷山水漲。

送通守趙積中朝議請祠歸天台

城頭千峯青繞屋。城下灘流三百曲。誰云偈仄復偈仄。尙有高軒肯來辱。紅梅花下兩芳春。春風惠和如主人。搶攘塵土簿書裏。見此縑籍天球溫。厚祿故人車結轍。掉頭獨泛清溪月。不從世外得超然。世間誰肯如公決。生平我亦一沙鷗。葦白蘆黃今正秋。送公使我歸思動。破煙衝雨憶扁舟。明年想見東山起。我亦煎茶石橋水。道逢蓑笠把漁竿。卽是馬曹狂掾史。

送詹道子教授奉祠養親

新安學宮天下稀。先生孝友真吾師。斑衣誤作長裾曳。二年思歸今得歸。牋詞上訴人叵挽。囑書賜可羣公歎。青山百匝不留人。空與諸生遮望眼。白雲孤起越南天。向來恨身無羽翰。下馬入門懷橘拜。身今却

在白雲邊。鶴髮鬢鬢堂上坐。兒孫稱觴婦供果。世間此樂幾人同。看我風前孤淚墮。一杯送舟下水西。我欲贈言無好詞。徑須喚起東廣微。爲君重補南陔詩。

道子教授奉祠。諸生率余祖席如意院。

暫移三席款雲關。木末闌干暮紫間。絳帳莫貪江上路。青鞵先試水西山。伯陽有道來重趺。禦寇他年憶解顏。怪我抗塵驅俗駕。諸公何事許追攀。

淳安以後十五首。涇徽嚴杭道中。

篙師叫怒破濤瀧。水石如鐘自擊撞。欲識人間奇險處。但從歛浦過桐江。

嚴州舟人云。自徽至嚴二百灘。

城府黃塵撲馬鞍。一篙重探水雲寒。耳邊眼底無公事。睡過嚴州二百灘。

釣臺臺上題詩甚多。其最脗炙者曰。世祖功臣二十八。雲臺爭似釣臺高。

山林朝市兩塵埃。邂逅人生有往來。各向此心安處住。釣臺無意壓雲臺。

桐廬

溼雲垂野淡疎林。十日山行九日陰。梅子弄黃應要雨。不知客路已泥深。

富陽

不到江湖恰五年。歛山青繞屋頭邊。富春渡口門人眼。落日孤舟浪拍天。

餘杭

春晚山花各靜芳。從教紅紫送韶光。忍冬清馥薔薇醞。薰滿千村萬落香。  
於潛 俚語云。於潛昌化。鬼見亦怕。

邑居官寺兩淒清。晚市都無菜可羹。何處直能令鬼怕。祇今猶自有人行。

昌化 離溪回絕景也

翠染南山擁縣門。一洲橫截兩溪分。長官日永無公事。臥聽灘聲看白雲。

百丈山 壽聖寺僧房甚雅潔。去王千嶺尚六十里。

沐雨梳風有底忙。解鞍來宿贊公房。傳聞三嶺連天峻。未到王千已斷腸。

昱嶺

竹輿搖兀走婆娑。石滑泥融側足過。昱嶺不高人已困。晚登新嶺奈君何。

王千嶺

山靈設險合崢嶸。行客何須向此行。羸馬不前人雨汗。此身安得諱勞生。

刈麥 麥熟與雨妨刈。老農云。得便晴。即大獲。不爾。當減分數。

麥頭熟顆已如珠。小阮惟憂積雨餘。句我一晴天易耳。十分終惠莫乘除。

插秧

種密移疎綠毯平。行間清淺縠紋生。誰知細細青青草。中有豐年擊壤聲。

曬繭 俗傳葉貴即蠶熟。今歲正爾。

隔籬處處雪成窩。牢閉柴荆斷客過。葉貴蠶飢危欲死。尙能包裹一絲窠。

科桑

斧斤留得萬枯株。獨速槎牙立暝途。飽盡春蠶收罷繭。更殫餘力付樵蘇。

龍學尙書新安侯羅公挽詞二首 汝楫

今代丹臺籍。頻年綠野居。鐵冠眞御史。革履舊尙書。短世浮雲盡。平生半稿餘。人言公不朽。蘭玉照前除。一昨更調瑟。如聞欲賜環。途殫泣西狩。望絕起東山。華屋林霏慘。新阡草露班。春風埋玉淚。重爲庾公潛。

龍學侍郎清河侯張公輓詞二首

白水名多士。清河最有聲。人危孔北海。帝識柳宣城。蜀險談間固。蠻江檄到平。凌煙何處在。風雨上銘旌。太息逢萋錦。平生付薄冰。滄溟淙赤舌。白日照青蠅。嶽麓身猶健。星維馭已升。天如遺一老人。亦望三登。

新安侯夫人俞氏輓詞

蚤兆于凰卜。來嬪駟馬車。夫君宜竹帛。子舍各詩書。露薤丹旌舉。風楊組帳虛。空餘彤管訓。他日照鄉閭。

次韻甄雲卿晚登浮丘亭

賓筵舊壓三千客。燕榭新高十二城。澹墨雲頭連樹暗。垂絲雨脚過溪生。葛巾羽扇吾身健。雪椀冰甌子句清。從此相從須痛飲。故應此事勝公榮。

古風上知府祕書二首

神仙絕世立功行。聞清都。玉符賜長生。籥雲遊紫虛。雞犬爾何知。偶舐藥鼎餘。身輕亦仙去。罡風與之俱。

俯視舊籬落。眇莽如積蘇。非無鳳與麟。終然侶蟲魚。微物豈有命。政爾謝泥塗。時哉適丁是。邂逅真良圖。大鵬上扶搖。南溟聒天沸。斥鷃有羽翼。意滿蓬蒿裏。不如附驥蠅。掣雷抹荆薊。誰云極么麼。俯仰且萬里。向來庭戶間。決起不踰咫。飄飄托方便。意氣乃如此。物生未可料。且暮倘逢世。君看功名場。得失一交臂。

拉笏亭晚望

林泉隨處有清涼。山繞闌干客自忙。溪雨不飛虹尙飲。亂蟬高柳滿斜陽。

乳灘

微殿之間。灘如竹節。乳灘之險居第一。

清溪可怖亦可喜。造化於人真虐戲。轟雷捲雪鬢成絲。一擲平生來此試。險絕無雙是乳灘。舟如滾石下高山。畫樓正倚黃昏雨。豈識江間行路難。

浮丘亭

知郡祕書初作。以望黃山。有浮丘容成峯。浮丘公容成子之所遊也。

黟山鬱律神仙宅。三十六峯雷雨隔。碧城欄檻偃雙旌。笑挹浮丘爲坐客。巖扉無鎖畫長開。紫雲明滅多樓臺。雲中仙馭參差是。肯爲使君乘興來。西崑巉絕不可至。東望蓬萊愁弱才。誰知芳草徧天涯。玉京只在珠簾底。他年麟閣上清空。却訪舊遊尋赤松。我亦從公負丹鼎。來斲砂牀汲湯井。朱砂峯溫泉。皆在黃山。

·黟山卽黃山。

風月堂

章倅新作。洪守名而記之。

天風無邊吹海月。景入溪山更奇絕。太守文章別乘賢。平生付與金杯滑。門闌我亦似彭宣。想聞橫玉叫蒼煙。讀碑索句仍投轄。誰是揚州控鶴仙。

寄贈泉石使李元直入覲

漢圖昔中天。百六啓眞主。當時鄧高密。徒步赴光武。諸公上雲臺。一葉渺湘浦。聲名三十年。玉氣貫晴宇。向來宣室問。天語道舊故。不圖太平日。復見起兵簿。雙旌奠侯服。三節臨江濟。垂欲大用公。少駐議園府。人言山澤官。底用廟廊具。果聞一乘傳。已踵追鋒去。翔鳳覽輝來。風采照鴛鴦。平生經濟心。十不一二吐。茲行公勿遜。安國如鼎呂。

休寧

南街豪郡城。東圃壓州宅。誰云沸鑊地。氣象不偪仄。林園富瓜笏。堂密美杉柏。山醪極可人。溪女能醉客。吳子邑中彥。豪端萬人敵。傳杯相勞苦。不覺東方白。吳益恭·豪士也。

祁門

石梁平波心。金利駕巖腹。溪藤卷霜繒。山骨琢紫玉。東堂有嘉名。窈窕窗紗綠。落花掃無迹。蕉葉森似束。主人甚愛客。挽袖語陸續。衝雨出門去。役役媿童僕。

靈山口

陵高類登天。斗下劇窺井。衝從十里近。底用許多嶺。秋雨釀春泥。掀淖力扛鼎。僕夫負隅哭。邂逅憂性命。舊嗤子猷狂。夜半槳歸艇。方知興盡處。頃步令人瘦。

浮梁

大灘石如林。小灘石如枿。微生拋擲過。兩槳善將割。一灘復一灘。食頃經七八。崎嶇幸脫免。已足凋鬢髮。

我家五湖船。鏡面貼天闊。行迷勿浪遠。歸歟泛花月。

番陽湖

淒悲鴻鴈來。泱泱魚龍蟄。雷霆一鼓罷。星斗萬里溼。波翻漁火碎。月落村舂急。折葦已紛披。衰楊尙僵立。長年畏簡書。今夕念蓑笠。江湖有佳思。逆旅百憂集。

回黃坦

渥丹楓凋零。濃黛柏幽獨。畦稻晚已黃。陂草秋重綠。平遠一橫看。浩蕩供醉目。落帆金碧溪。嘶馬錦繡谷。世界真莊嚴。造物極不俗。向非來遠遊。那有此奇矚。

桑嶺

回腸山百盤。揮手天一握。俯驚危棧穿。仰詫飛石落。挽輿如挽舟。絕叫斷雙筇。怪蔓纏枯槎。瘠草被幽壑。此豈車馬路。誰云強刊鑿。人言遠遊好。呼來試着脚。

天都峯與山

維帝有下都。作鎮此南國。孤撐紫玉樓。橫絕太霄碧。晶熒砂竇紅。天矯泉紳白。晴雲無盡藏。竟日裊幽石。諸峯三十五。離立侍傍側。曾稽眇小哉。請議職方籍。

溫泉黃山朱砂峯下

砂牀毓靈源。石液漱和氣。鬱攸甌常蒸。鬢沸鼎百沸。人生本無垢。安用滌腸胃。一瓢瀉清肥。回首謝羅廚。山深人跡罕。政以遠爲貴。君看華清池。談者至今諱。



此页空白

# 石湖居士詩集卷八

伏聞知府祕書欲取小杜桐廬詩語。以見花名堂。成大記東坡送鄭戶曹詩云。蕩蕩清河壩。黃樓我所開。遲君爲坐客。新詩出瓊瑰。樓成君已去。人事固多乖。此段大類今日。成大行且受代。計梅開堂成。歸舟已下南浦。欲爲坐客不可得。懷不能已。請先爲公賦之。

使君來煖東堂席。又見堂前花信息。小白猶封竹外枝。微黃已點眉間色。山城十月如春臺。聞有細書天上來。說與橫斜應早計。不須更待雪花催。

知府祕書遣帳下持新詩追路贈行。輒次韻寄上。

冷雲去仍來。凍雨落還歇。平明一篙漲。珍重送船發。端成南溪泛。寧復東堂謁。何時公三日。請澤看山笈。恩勤一未報。終古銘肌骨。幡幡跡雖遠。耿耿心不沒。門闌如水波。永印此孤月。

寄上鄙句之明日。舟次梅口。南枝已有春意。復次知府祕書贈行高韻。

晏溫解船去。暮夜欒附歇。橫斜隘梅村。玉蓓粲將發。城中三輔豪。指日承明謁。高懷妙康濟。未試君前笈。周南又小春。微溫入花骨。我瞻浮丘亭。山高璿柄沒。飛鳥正飄蕩。空繞南枝月。

晞眞閣留別方道士賓實

東山西山雙袖舞。中有清宮蟠萬礎。雲橫朱閣碧梧寒。風掃石壇蒼檜古。道人賓實其姓方。來從何許今幾霜。誅蒿仆蓬殿突兀。玉華紫氣騰眞香。胸奇腹憤無人識。我獨相從似疇昔。時時苦語見鍼砭。邂逅天

涯得三益。明朝歸客上歸艎。重到晞真計渺茫。只有雙魚相問訊。歙江之水通吳江。

程助教遠餞求詩

殘山剩水帶離亭。送客煩君遠作程。直欲明年擊吳榜。白沙翠竹是柴荆。

次伯安推官贈別韻

交情彌歲竟忽忽。短棹歸尋一畝宮。寒青文書容我懶。及時盃酒賴君同。披雲峯頂城頭月。攬秀堂前扇裏風。千里音書慰離索。莫言天遠費鱗鴻。

次景琳錄事贈別韻

放船鳴櫓便秦吳。送別空煩長者車。宿霧鎖山常羃羃。斷雲將雨忽踈踈。高城五嶺花深處。短棹三江木落初。賴得溪流通尺素。蒲根仍有一雙魚。

次黃必先主簿同年贈別韻二首

當年仗外揖高標。繡纜蘆鞭寶馬驕。瓊苑天香飄合坐。碧城山色照同僚。思歸意決吾張翰。贈別情深子繞朝。鱗鱗魚梁從此去。他年書札墮煙霄。

山郭官閒得爛遊。彌年還往話綢繆。西園剝栗催奴課。東院尋梅勸客留。皆循廳故事。筆下修鋒千首富。談間和氣兩眉浮。別來悵望何時見。謾上重城謾上樓。

次胡經仲知水贈別韻

先生有道抗浮雲。拄頰看山意最真。霜鬢不堪瘠首疾。翠蛾常作捧心顰。官如斯立藍田小。家似淵明栗

里貧俯仰別來莫。英換祇今誰與話情親。經仲與侍兒皆多病。又不樂贊邑。賦歸去來詞。

次諸葛伯山贍軍贈別韻

歛維羣山圍。漫仕富英傑。清標照人寒。玉筍森積雪。嗟余獨委瑣。無用等木屑。又如道傍李。味舌不堪折。歸舟坐成泛。去馬亦已刷。三年風波險。盡付一笑閱。惟君詞懷抱。各坐天機拙。我家鷗夷子。竹帛照吳越。雲仍無肖似。頰首媿前哲。若家臥龍公。事業管蕭埒。期君踵祖武。勿惜兒女別。言狂舉白浮。醉倒霜松折。

次韻樂先生除夜三絕

團蒲曲几坐成癡。北看南觀恍是非。道眼已空詩眼在。梅花欲動雪花稀。天邊客裏五迎冬。爭信還鄉似寓公。人事都非城郭是。獨憐雞犬識新豐。牀頭歷日鬢絲絲。懶倦慵吟守歲詩。宜入新年須吉利。明朝把筆寫門楣。

次韻唐幼度客中幼度相別數年復會於錢塘湖上

西湖冰泮綠生鱗。料峭東風欲中人。花片不禁寒食雨。鬢絲猶那湧金春。江山契闊詩情在。京洛追隨客夢新。喚取歌聲不愁思。爲君吹水引盃頻。

客中呈幼度

手板頭銜意已慵。墨池書枕興無窮。釀泥深巷五更雨。吹酒小樓三面風。草色有無春最好。客心去住水長東。今朝合有家書到。昨夜燈花綴玉蟲。

奠唐少梁晉仲兄弟墓下

當年連壁氣如蜺。人許躋攀九列齊。夷壤一時埋玉樹。青雲何處用丹梯。生平書札頻雙鯉。歲晚交情但隻雞。眼底傷心難制淚。寧論宿草已萋萋。

鎮東行送湯丞相帥紹興

吳波鱗鱗越山紫。鎮東旌旆東風裏。前驅傳道相君來。一夜鑑湖春漲起。鑑湖如鑑涵空明。相君出處如湖清。十年勳業泰山重。五鼎富貴浮雲輕。人言公如裴相國。綠野堂高貯風月。我獨願公如子牟。身在江湖心魏闕。浯溪有石高嵯峨。公方東征如此何。丁寧湖水莫斷渡。早晚歸來絕江去。

水月菴謁現老不值

有客叩巖扃。無人管送迎。片雲閒出岫。水月自空明。

次韻邊公辨

錯落參旗冑竹梢。柴荆臨水閉蓬蒿。春風吹曉玉蟾墮。穠露洗空銀漢高。雙鵲繞枝應也倦。一蛩吟壁已能豪。新秋只合添詩興。莫學潘郎歎二毛。

中秋無月復次韻

屋山從捲杜陵茅。門徑慵芟仲蔚蒿。澹澹白虹風暈壯。紛紛蒼狗雨雲高。凌空累筴仙無術。半夜撞鐘句謾豪。枵腹題詩將底用。真成兔角與龜毛。

公辨用前韻見贈復次韻

先生筆力玉山鼇。氣壓明堂一柱蒿。雪梳滌毫詞絕妙。朱絃縮瑟調彌高。心兵不起無三粲。坐客常多似

四豪喜有過從南北巷蘇蘭薪桂淪溪毛

公辨再贈復次韻

書生活計極蕭騷。燭火微明似束蒿。犬子地寒徒壁立。元龍身懶謾樓高。筆端未辦誇三絕。酒裏猶能掃二豪。又向詩壇蘄借一。強磨鉛鈍齒吹毛。

送施元光赴江西幕府

鎮南旌旆照江臯。入幕如今客最高。月暗秋城稀擊柝。雲飛朝棟賸揮毫。長亭酒盡歌三疊。半夜溪深雨一篙。莫戀陽關更西路。九關歸路踏金鼇。

次韻林子章阻淺留滯

客行端似未歸雲。指點璿杓幾易辰。喜有風花黃作暈。似聞溪漲綠生鱗。我從走俗言無味。君已鳴文筆有神。繡段炳然空辱贈。急緝緹襲埽蛛塵。

次韻馬少伊木犀

月窟飛來露已涼。斷無塵格惹蜂黃。纖纖綠裏排金粟。何處能容九里香。水尾山腰樹影蒼。一天風露不供香。誰家鏡裏能消得。付與詩人古錦囊。密密嬌黃侍翠輿。避風遮日小扶踈。畫闌想見懸秋晚。無限宮香總不如。

林夫人挽詞黃中之妹。知書。

翰墨門闌正巋然。故應婉婉亦儒先。與聞古學三千禮。能誦家書四百篇。卜協媯姜占永世。夢呼辰巳識

週年班姬合有遺文在。後日從容訪孟堅。

李仲鎮懶窩

求名富着鞭。訪道亦重趼。二邊俱不住。三昧不如懶。向來南嶽師。自謂極蕭散。收涕且無緒。客至那可款。爭如懶窩高。門外轍常滿。殊不妨嘯歌。秉燭苦夜短。天寒雪欲花。屋角黃雲晚。徑須煩二妙。對洗玻璃盞。

次韻陳季陵寺丞求歛石眉子硯

金星熒熒眉子綠。婺源琢石如琢玉。寶玩何曾揀枵腹。但愛文君遠山蹙。丈人筆陣森五兵。書品入妙仍詩名。我有陂陀天海樣。與公文字俱金聲。梟廬一擲不須呼。況敢定價論車渠。只煩將到粧臺下。試比何如京兆畫。

次韻季陵貢院新晴

鎖闈令嚴深復深。五星簾幕晴若陰。澹雲微月謾清夜。短檠政自關人心。看燈作暈生睡色。江南行處夢不隔。覺來快讀新晴詩。恍然寔我鶯花前。徑欲觴公後堂酒。倘煩春衫小垂手。

次韻周子充正字館中緋碧兩桃花

碧城香霧赤城霞。深出劉郎未見花。憑仗天風扶絳節。爲招萼綠過羊家。

明日子充折贈次韻謝之

海上三山冠綵霞。六時高會雨天花。步虛聲裏隨風下。吹落尋常百姓家。

明日大雨復折贈再次韻

一天雲葉翳朝霞。風卷泥沾不惜花。羣玉山高春好在。人間煙雨暗千家。

張恭甫正字折贈館中碧桃。因次子充韻。

次年。

滿枝晴雪照青霞。舊識桃源暈碧花。俯仰京塵隔年夢。東風猶認故人家。

雨中報謁。呈劉韶美侍郎。

花落滿城雨。雨餘雲重陰。驅車有底急。巷泥三尺深。平生黃篋舫。漁榔有清音。斗升得苦相。懷刺衝愁霖。歸來掩關臥。一枕直兼金。作詩詫比鄰。幸勿譏褊心。

雨中集水月

獻之今年不堪暑。天亦相憐病良苦。明便中秋法合涼。夜半行雲曉行雨。蘄州竹簟清如冰。飢蚊倔強猶鳴聲。下牀蚤喜衣裳健。出門更覺山川明。曳屐扶藜尋水月。不惜垂垂巾角折。竹間松下已淒然。却要芳樽生煖熱。

送洪景廬內翰使虜二首

金章玉色照離亭。戰伐和親決此行。國有威靈雙節重。家傳忠義一身輕。平生海內文場伯。今日胸中武庫兵。萬里往來公有相。淮濱陰德貫神明。

近日兩淮戰地掩骼。公之請也。

檄到中原殺氣銷。穹廬那敢說天驕。今年蕃始來和漢。即日燕當遠徙遼。北土未乾遺老淚。西陵應望孝孫朝。著鞭往矣功名會。鱗閣丹青上九霄。

次韻嚴子文旅中見贈



杯中疇昔共江天。傾座新詩報警聯。海浦寸心空共月。京華雙鬢各凋年。交情敢說同方友。句法甘從弟子員。有意數從文字飲。何須爭着祖生鞭。

次韻子文客舍小樓

客裏仍攜一束書。閉門虹氣自凌虛。未聞光範延珠履。誰向甘泉從玉車。散盡生涯千答布。收將文價百車渠。淹留且結西湖夏。同到秋風賦遂初。

次韻劉韶美大風雨壞門屋

雲煙揮翰墨池翻。綉縹如山晝掩關。已許六丁收散落。只愁雷電費牆藩。

洪景廬內翰使還入境以詩迓之

玉帛干戈洵並馳。孤臣叱馭觸危巖。關山無極申舟去。天地有情蘇武歸。漢月凌秋隨使節。胡塵捲暑避征衣。國人渴望公顏色。爲報褰帷入帝畿。

寄題向撫州采菊亭

一葉起秋色。衆綠凋歲華。耿耿霜露側。餘此黃金葩。西風滿天地。孤芳照塵沙。殷勤開小築。花氣日夕嘉。落英楚纍手。東籬陶令家。兩窮偶寓意。豈必眞愛花。不如亭中人。一笑了天涯。采采勿虛度。門前欲高牙。

古風二首上湯丞相

抱瑟游孔門。豈識宮與商。古曲一再行。乃雜巴人倡。知音顧之笑。解絃爲更張。歸來掩關臥。冰炭交愁腸。平生桑濮手。未省歌虞唐。明發理朱絲。復登君子堂。遺音入三歎。山高水湯湯。

空山學仙子。窮年臥巖扃。煮石不得飽。秋鬢蒼已星。道逢紫霄翁。示我餐霞經。采采晨之華。漣濯腐與腥。向來役薪水。終然槁柴荆。跪謝起再拜。飄飄蛻蟬輕。飛升那敢學。倘許學長生。

冷泉亭放水

古苔危磴著枯藜。脚底翻濤洶欲飛。九陌倦遊那有此。從教驚雪濺塵衣。

九月十日南山見梅

五斗留連首屢迴。來尋南澗濯塵埃。春風直恐淵明去。借與橫斜對菊開。

送汪聖錫侍郎帥福唐

承明纔入又南州。重見旌旗照柁樓。道義平生無捷徑。風波隨處有虛舟。如公未可違文石。稽古何妨欠碧油。我亦登門煩著錄。此行無力爲王留。

送王純白郎中赴閩漕

聲利場中百戰塵。今誰勇退似公豪。緩尋南粵千山路。先破西興百尺濤。平日曼容嫌祿厚。他年文本歎官高。才名政爾歸安往。富貴追蹤未可逃。純白先君平生約官至正耶而休。卒踐言。故純白爲兵部便丐去。以承其志。

長至日與同舍遊北山

歲晚山同色。湖平霧不收。寒雲低閣雪。佳節靜供愁。竹柏森嚴立。蒲荷索莫休。瘦筇知脚力。政爾耐清遊。

此  
页  
空  
白

# 石湖居士詩集卷九

次韻尹少稷察院九宮壇齋宿

草草馳三里。蕭蕭共一餐。吏方縣禮。公自將詩壇。隙月窺牀近。窗風刮坐寒。鴉鳴未忍散。端爲四井難。

冬祠太乙六言四首

三一舊傳神呪。十神今濟時艱。願挽靈旗北指。爲君直擣陰山。月色隴門碧瓦。蠟煙浮動黃簾。罡騎飈輪欲下。一天飛霞織纖。雲木栖鳥未動。風庭警鶴先鳴。殘夜百靈夙駕。人間鼻息雷驚。行道羽衣縹渺。捲班玉珮冬瓏。回首金鋪獸面。步虛聲在天風。

次韻李子永雪中長句

黃昏苦寒烏鳥稀。吹沙走石交橫飛。布衾如鐵復似水。夢想東風來解圍。豈知天地有奇事。夜半窗紙生光輝。兜羅寶界佛所現。冥凌不敢專璿璣。開門倚杖眩一色。迴立此世空無依。少年行樂悅尙記。瑤林珠樹中成蹊。犬驕鷹俊馬蹄快。狡穴未盡須窮追。湖海粗豪今豈在。但憶嗚哮如餓鷄。北鄰亦復淡生活。要我忍寒吟此詩。手龜筆退不可捉。墨泓齟齬冰生衣。

次韻子永見贈建除體

建子玉杓直。黃昏月如霜。除道啓柴扃。客來巾履忙。滿炷寒缸油。共此書檠光。平生卜鄰願。何意登我堂。

定交吾豈敢。南榮慚日陽。執手道古作。遺篇記河梁。破窗風鳴悲。孤客多慨傷。危腸不揀飢。我詩安得昌。成章類村歌。但可侶牛羊。收功翰墨藪。微子誰能良。開卷得雅音。玉鑾導旂常。閉戶坐相念。雪深梅暗香。與胡經仲陳朋元遊照山堂梅數百株盛開。

九陌緇塵滿客襟。錢塘門外有園林。胡牀住處梅無限。酒旆垂邊柳未深。晴日煖風千里目。殘山剩水一人心。元方但始皆吾黨。解后清遊直萬金。

次韻胡邦衡祕監

斯言向來立。千古敢疵瑕。有命孤蓬轉。何心勁箭加。人窮名滿世。天定客還家。回首冥恩怨。虛空不著花。三月四日驟煖。

日脚融晴晚氣暄。睡餘初覺薄羅便。如何柳絮沾泥處。煖似槐陰轉午天。

久雨地溼

汗礎經旬未肯乾。破窗隨處有蝸涎。祇今不耐春陰得。想見黃梅細雨天。

畫錦行送陳福公判信州

漢家麟閣多王侯。冠珮相望經幾秋。畫錦聲名兩榮耀。惟有信州如相州。國南門頭折楊柳。借問江津垂白叟。住在行都四十年。曾見歸舟似公否。人言公與赤松期。鷺車羽輪來何時。雲出雲歸俱是道。苦學赤松還未妙。君不見補陀大士海復山。隨喜却來觀世間。

送張真甫中書奉祠歸蜀

種成桃李恰新陰。忽憶家山叢桂林。客路莫嫌歸計拙。春江爭似駭機深。一封朝奏鈞天夢。萬里江行魏闕心。後日還朝飽風露。黑頭應有雪絲侵。

送周子充左史奉祠歸廬陵

黃鶴飄然下九關。江船載月客俱還。名高豈是孤臣願。身退聊開壯士顏。傾蓋當年真旦暮。沾巾明日有河山。後期淹速都難料。相對猶憐鬢未斑。

送陳天子大監同年使闕

春關十載記英游。蚤喜時才近采旒。夷路着鞭方逸駕。急流回首忽扁舟。雲霄正穩君猶去。塵土無邊我合休。問訊後車容客否。茶山荔浦看南州。

送陸務觀編修監鎮江郡歸會稽待闕

寶馬天街路。煙篷海浦心。非關愛京口。自是憶山陰。高興餘飛動。孤忠有照臨。浮雲付舒卷。知子道根深。見說雲門好。全家住翠微。京塵戍歲晚。江雨送人歸。邊鎖風雷動。軍書日夜飛。功名袖中手。世事巧相違。

送李仲鎮宰溧陽

相逢已歎十年遲。冷淡貧交又語離。玉笋換班通籍後。黃梅催雨送帆時。月巖家世猶爲縣。仲鎮·方叔孫也。金瀨溪山好賦詩。喚起酸寒孟東野。倒流三峽洗餘悲。

送吳元茂丞浦江

玉笋翻乘縣佐車。飄然不肯待新除。才名已被人爭說。官薄何妨計小疎。憶昨西湖同我載。從今南浦望

君書遙知斂板趨風後。始覺丞哉果負予。

雪晴呈子永

碧空無處泊同雲。晴入荒園鳥雀馴。冰面小風池欲動。雪邊濃日瓦如薰。塵容俗狀長爲客。冷蘂疎枝又作春。詩卷豈能生煖熱。犯寒聊復惱比鄰。

次韻子永雪後見贈

雪瓴待伴半陰晴。竟日檐冰溜雨聲。九陌泥乾塵未動。南山石露塔猶明。稍聞吉語占農事。便覺歸心勝宦情。想得秫田來歲好。瓦盆加釀灌愁城。

次韻郊祀慶成

帝德重彝緒。天心與舜禋。慶期符後甲。元日際初辛。土緯扶南極。旄胡拱北辰。律諧風自良。衡正斗垂寅。桂燎靈宮曉。蕭脂太室晨。百神森壁壘。萬衛密鉤陳。日月青旂色。雷霆玉輅塵。洗兵銀漢水。收雪紫壇春。天步臨黃道。仙班像玉宸。陶匏宗素樸。琮璧慕精純。祕祝哀階對。高旂歛下賓。金鐘鳴傑籥。朱火燧芳薪。日麗雞竿蠹。天旋鳳律新。端門敷錫後。六合共緼縕。

從巨濟乞蠟梅

寂寥人在曉雞窗。苦憶花前續斷腸。全樹折來應不惜。君家真色自生香。

次韻朋元賣花處見梅

煙濃日淡不多寒。檐上看花雪作團。想得竹邊春已暗。明朝走馬過溪看。

與正夫朋元遊陳侍御園

沙際春風捲物華。意行聊復到君家。年年我是曾來客。處處梅皆舊識花。官減不妨詩事業。地寒猶辦醉生涯。城中馬上那知此。塵滿長裾席帽斜。

正月十四日雨中與正夫朋元小集夜歸

燈市淒清燈火稀。雨中風帽笑歸遲。月明想在雲堆處。客醉都忘馬滑時。老去樽前花隔霧。春來句裏鬢成絲。浮生不了悲歡事。作劇兒童總未知。

次韻子永夜雨

辦作長愁客。工哦苦雨吟。挑燈今夕意。欹枕故園心。漏屋疎疎滴。空檐細細斟。相過巷南北。屐齒怕泥深。

次韻朋元遊王氏園

聯翩步履翠微間。回首紅塵自鮮歡。捲地雨添千澗急。擁門雲鎖兩山盤。絕憐茶笋能留客。仍喜蛙聲不在官。雪白楊梅消息未。重來應至麥秋寒。

遊靈石山寺寺門頰壁有仙人顏禹李甲齋筠三人題詩。方運筆時。伸臂丈餘。聞人驚報主僧。回顧已失矣。

西湖富清麗。城府塵事并。我獨數能來。不負雙眼明。騷騷殘絮罷。颭颭新荷成。歲華日夜好。遊子能無情。午陰釀初暑。稍喜巾袂輕。小風吹鬢毛。將我入松聲。崖寺金碧暗。石泉肝膽清。壽藟萬蛟舞。靈峯雙髻撐。仙人昔來游。筆墨上朱臺。舉臂尋丈高。聊得兒童驚。老矣謝狡獪。題詩記吾曾。

次韻李器之編修靈石山萬歲藤歌



君不見東林怪蔓之詩三百年。字如金繩鐵索相糾纏。不如李侯靈石句。筆陣壓倒長城堅。藤陰詩律兩秀發。此段奇事今無前。吾聞草木未有不黃落。雨荒霜倒相後先。縣縣紫蘿天所壽。風雨不動常蒼然。堅姿絕鄰傲一所。深本無極融三泉。騰蚪舞蛟矯欲去。流蘇絡帶翩如仙。班荆苾藪得吾黨。酌泉共吸杯中天。詩成一斗屬太白。擘牋揮埽如雲煙。北門西掖君自有。坐擁紅藥然金蓮。山腰澗底莫濡滯。早晚天風吹蛻蟬。

次韻正夫遊王園會者六人

丘園窈窕復崎嶇。草木生香景倍殊。花下百杯齊物我。雲邊一眼盡江湖。不知朱戶趨趨者。能勝青山放浪無。六逸蕭然真可畫。爲君題作竹溪圖。

四月五日集陳園照山堂

尋壑經丘到此堂。官閑聊作送春忙。短籬水面殘紅滿。團扇風前衆綠香。盡捲簾旌延竹色。深斟杯酒納山光。洞門無鎖城門近。轉午雞啼日正長。

題寶林寺可賦軒

十里山行雜市聲。道傍無處濯塵纓。寶林寺裏逢修竹。方有詩情約略生。

次韻朋元久雨

誰釀愁露玉宇間。都緣梅子要爛斑。騰騰困思午猶夢。擾擾奔雲風未還。休問滿城騎馬滑。不妨長日閉門閑。今朝晴色熹微似。乾鵲飛來語屋山。

韓無咎檢詳出示所賦陳季陵戶部巫山圖詩。仰窺高作。歎息彌襟。余嘗考宋玉談朝雲事。漫稱先王時。本無據依。及襄王夢之。命玉爲賦。但云頽顏怒以自持。曾不可乎。犯干後世。弗察一切。溷以媒語。曹子建賦宓妃。亦感此而作。此嘲誰當解者。輒用此意。次韻和呈。以資撫掌。

瑤姬家山高插天。碧叢奇秀古未傳。向來題目經楚客。名字徑度岷峨前。是邪非邪莽誰識。喬林古廟常秋色。暮去行雨朝行雲。翠帷瑤席知何人。峽船一息且千里。五兩竿頭見旛尾。仰窺仙館至今疑。行人問訊。居人指千年遺恨。何當甲陽臺。愁絕如荒村。高唐賦。裏人如畫。玉色頽顏元不嫁。後來飢客眼長寒。浪傳樂府吹復彈。此事牽連到溫洛。更憐塵鞮有無間。君不見天孫住在銀濤許。塵間猶作兒女語。公家春風錦瑟傍。莫爲此圖虛斷腸。

次韻樂先生吳中見寄八首

金鶴飛來尺素通。新詩字字挾光風。三年湖海關心處。都在先生句子中。官居門巷果園西。桃李成蹊杏壓枝。如許年芳忙裏過。斬新今日試題詩。墓林棲鳥各深枝。燕子知巢觸幔飛。倘有三椽今已去。不關五斗解忘歸。懶不看書似姓邊。夢魂飛繞白鷗前。須知席帽衝塵出。不似蓬窗聽雨眠。送春濛雨漲蘋灘。荷葉田田柳絮闌。想見垂虹三萬頃。拍天湖水釣絲寒。知從了義透音聞。古井無波豈更渾。便好一坑埋衆妙。何須六結解諸根。幾多螻蟻與王侯。往古來今共一丘。遮莫功名掀宇宙。百年兩角寄蝸牛。

粟囊聊復寄三餐。埋沒緇塵懶濯冠。紅紫百般紛過眼。鄉山歲晚自蒼官。

胡長民監元挽詞

太學齏鹽舊中吳。翰墨聲關山。題柱筆。風露讀書檠。夜雨綠荷破。孤墳丹桂生。空將擅場手。往記玉樓成。

次韻朋元正夫夜飲

歌豪仍作家。弈勝豈徵幸。莫嗤老非少。乃尙可以逞。玉瓶引杯長。政爾寒漏永。二三文章公。共此銀燭影。陳卿得秀句。劉郎一笑領。羸驂兀殘夢。乘墜恍難省。曉枕訂更潮。俱墮無何境。

次韻趙正之同年客中

清班合列大明宮。自要牛刀試一同。踏徧巉巖吾道在。莫將尋尺較窮通。氈車席帽各青春。花下驂騑一閨塵。離合飄零十霜露。咸陽客舍有詩人。可憐山縣五斤手。不識王孫八斗才。君自扶搖有霄漢。從渠蝸鷄舞蒿萊。

次韻陳季鄰戶部旦過菴

宦遊觸處似懸匏。北嶽南山想獻嘲。拍手百年休鑄鐵。蓋頭一把暫誅茅。玉京歲晚梧桐落。水國霜清橘柚包。飛錫已隨歸夢去。何人頂上鵲成巢。

朋元不赴湖上觀雪之集。昨日余召試玉堂。見寄二絕。次其韻。

雪溪清興未渠闌。晚上西樓帶月看。公子自貪低唱酒。肯來同對玉峯寒。文場寧復鬢霜宜。白玉堂前雪霽時。不惜狂言根忌諱。禿毫冰硯竟無奇。

# 石湖居士詩集卷十

翰林學士何公溥輓詞 以下館中作

盛際羣多士。諸儒遜一賢。名場魁淡墨。官簿到花磚。地近行知政。天高不假年。書生稽古力。何必盡台躔。

送洪內翰使虜二首

郊廟熙成需率濱。罪如猾夏亦維新。邊烽已卻來南虜。使節猶煩第一人。遙想穹廬占漢月。便呼重譯布唐春。單于若問公家世。說與麒麟畫老臣。

峨冠方侍玉輿香。公比侍祠郊禋。執綬備顧問。雙節飄然照大荒。正倚先生令趙重。寧容驕子詫胡強。天教忠信行區脫。人許功名上太常。試卜和羹知未晚。歸來煙雨正梅黃。

次韻趙德莊吏部休沐

窈窕新堂好。委蛇夜直還。遙知欹帽髮。正奈捲簾山。門外客姑去。窗前人對閑。誰能烏帽底。塵土澆朱顏。

次韻士夷仲正字同遊成氏園

秀巖堂上玉東西。把酒登臨眼迷天。宇四垂粘地近。海山一抹帶潮低。絕知客好無塵事。聊記吾曾有醉題。倚賴羣仙聯姓字。他年誰敢一枕泥。是日。諸公令余題壁。

王季海祕監再賦成園復次韻

雲莊風榭對東西。清暑光陰近竹迷。一斗正緣詩興盡。兩眉休爲客愁低。披開豹霧尋陳迹。埽盡蛛塵看

舊題健往莫愁騎馬滑。闌珊梅雨不成泥。

春晚偶題

寂寥春事冷於秋雨。打風吹斷送休。點檢梨花成一夢。醜紅新綠滿枝頭。

倪文舉奉常將歸東林出示綺川西溪二賦。輒賦長句爲謝。且以贈行。

綺川亭上凌雲賦。人在回仙舊遊處。誰教書劍走長安。荻月霜楓等閑度。朱門不炙釣竿手。萬卷難供折腰具。偶然把筯憶蓴羹。乞得閑官徑呼渡。江漲橋頭有渡船。船頭歷歷東林路。雲煙如畫水如天。笑憶紅塵問良苦。我亦吳松一釣舟。蟹舍漂搖幾風雨。因君賦裏說江湖。破帽蹇驢明亦去。雞犬相聞望可見。鷺同盟心亦許。相過得得款溪門。雪夜前村聽鳴榔。

送吳智叔檢詳直中祕使闕

抗章襪被豈公難。已說高風立懦頑。客路莫嫌河畔草。直廬須愛道家山。秋生蓮浦船初泛。春滿茶溪騎趣還。却訪故人西府舊。定煩書札墮田間。

楊君居士挽詞

孝至蘭陔茂。身脩梓里恭。名場兒中鶴。嫺黨塔乘龍。駒隙驚年運。蟬嫣有慶鍾。幽光定無憾。豐刻妙形容。送周畏知司直歸上饒待次

漫郎西笑費三年。故業新聞腹果然。長塵劇談抽繭緒。短檠細字綴蠶眠。頻驚陸海風波夢。未了京塵粥飯緣。後日重來應訪舊。五湖煙浪有漁船。

次韻魏端仁感懷俳諧體

浪學騷人賦遠游。大千何事不悠悠。酒邊點檢顏紅在。鏡裏端詳鬢雪羞。過眼浮雲翻覆易。曲肱短夢破  
除休。孤煙落日冥鴻去。心更冥鴻最上頭。

次韻李子永梅村散策圖

光風先放越溪春。蕭散尋詩索笑人。藜杖前頭春浩蕩。三生應是主林神。

太師陳文恭公挽詞

日者更皇化。公來輔聖能。無心殊轍混。不作衆波澄。舉國材真相。他年了中興。天如遺一老人。亦望三登。  
候火朝連夕。籌帷決縱擒。一江遮虜障。千古殺胡林。曠日黃河誓。浮雲綠野心。身名兩無憾。天壤獨清音。  
聖父咨當璧。元臣預斷金。玉衡賓舜日。黃屋遂堯心。國定功無迹。身閑病已深。旌忠有謨訓。碑勝照來今。  
趣召單車至。驚傳兩鬢凋。傾城迎國老。即日走天驕。夢已商人奠。身猶漢相朝。古來賢達意。生滅兩消搖。

送陳朋元赴溧陽

九畹滋蘭靜自芳。啁啾誰復認孤凰。風流歲晚嫌杯酒。文字功深得鬢霜。斂板君猶能俛仰。倚樓吾敢計  
行藏。船開便作江南客。天色無情更鴈行。

次韻韓無咎右司上巳泛湖

休沐辰良不待晴。徑稱閑客此閑行。春衫欺雨任教冷。病眼得山元自明。抹黛濃嵐圍坐晚。揉藍新滌沒  
篙清。棲鴉未到催歸去。想被東風笑薄情。

太保節使趙公挽詞密

結髮險艱會。捐軀跳盪功。鬢凋猶陞戟。心在惜攸弓。劍履三槐次。樓臺四壁中。諸郎競文武。不朽是清風。

太宜人程氏挽詞

程秦之吏部之母。

我昔官黻。人傳女訓芳。尊章宜小婦。孫子壽高堂。風木真無定。冰魚已不嘗。遙憐霜露感。何必薤歌傷。捧檄三牲養。稱觴百歲期。身猶孺子泣。世已隙駒馳。吉夢青衣卜。豐碑黃絹辭。佳城有奇事。應足洗餘悲。

與王夷仲檢討祀社

殘夜露如雨。秋氣淒以分。牆西雲正黑。跼跼墮金盆。良耜醉西成。豆籩翦芳芬。去年歲大祲。小家甌生塵。疫鬼投其幘。虐甚溺與焚。皇慈降清問。下招離散魂。調糜鬻藥石。黑簿回春溫。德馨與神天。秋稼如雲屯。社公亦塞責。醉此豐年樽。神兮率舊職。爲國憂元元。自今歲其有。驅癘蒼煙根。

王園官舍睡起

公退閉閣臥。官居如淨坊。屋角斷虹飲。日西楊柳黃。客來束我帶。客去書滿牀。睡覺有忙事。煮茶翻斷香。

古風酬胡元之以下白塔新居作。

拂我膝上琴。當客清風襟。我琴無軫絃不和。願借之子調其音。美人一笑千黃金。彈作江岸花木深。下有同隊之游魚。上有同聲之鳴禽。琴聲一疊一歎息。江花江草無終極。

題徑山凌霄菴

峯頭非塵寰。一舍誰所茇。軒眉玉霄近。按指沙界豁。萬山紛累塊。衆水眇聚沫。來雲觸石迴。去鳥墮煙沒。

向無超俗緣。茲路詎可越。偕行木上坐。同我證解脫。

徑山傾蓋亭

萬杉離立翠雲幢。孑孑稀聞晚吹香。山下行人塵撲面。誰知世界有清涼。

題徑山寺樓

浴日蒼茫水。捫星縹緲樓。神光來燭夜。壽木不知秋。海內五峯秀。天涯雙徑遊。愛山吾欲住。衰疾懶乘流。

丙戌閏七月九日與王必大登姑蘇臺招王浚朋陳淵叔耿時舉避暑次時舉韻

始賀火流西。還嗟斗斜閏。餘暑猶強顏。新涼頗難進。燥剛渴欲坼。焦卷禿如燼。炎官扶日轂。輝赫不停運。登臨有高臺。勇往得三俊。仍將王郎子。飛步凌劫仞。風從噫氣來。雲作壞山陣。鄉如垂頭魚。忽已蟄蟲振。空明晚逾清。更要孤月印。書生乃易興。俛仰更喜慍。憑闌天爲高。舉酒山欲近。奇書鐵鉤鎖。麗句錦窠暈。茲遊我輩獨。難挽軟紅輶。君看籠中鳥。寧識咸池韻。淵叔出米元章書蹟甚奇。

明日夜雨陡涼復次前韻呈時舉

幽懷青松獨。直道黃楊閏。懶從襤褸子。遮日干主進。閉戶友千載。脫簡理秦燼。秋熱出意表。誰云法天運。摧頽如鑠翻。何暇賈餘俊。願從青溪仙。飛下二千仞。撇波嘯長風。塵暑陷其陣。茲行病未能。喝臥何時振。一雨忽破慳。江湖發封印。天公如仲尼。亦念季路慍。團扇未全疎。短檠差可近。細字讀蠹眠。揩眼眩燈暈。明當呼我友。乘涼躡游軌。廣詩代僕吶。非敢翫強韻。

七月二日上沙夜泛



困倚船窗看斗斜。起來風露滿天涯。亭亭宿鷺明菰葉。閃閃涼螢入稻花。月下片雲應夜雨。山根炬火忽人家。江湖處處無窮景。半世紅塵老歲華。

浴罷

西城落日半輪明。浴罷衣裳一倍輕。玉宇風來歸鳥急。火雲銷盡綠雲生。

寄溧陽陳朋元明府約秋末過之

海內交情兩斷金。一官分袂阻登臨。書來恰值看雲眼。夢往誰知共月心。道義只今無捷徑。溪山依舊有清音。西風滿棹蒲帆飽。秉燭相尋語夜深。

次韻耿時舉苦熱

赤日纔低又火雲。巷南街北斷知聞。荷風拂簾昭蘇我。竹月篩窗慰藉君。避暑無奇那避謗。能觴便了莫能文。浮湛放蕩從今始。悔把長裾強沐薰。余家近穿小蓮池。時舉亦種竹簷間。皆爲度暑計。

次韻王浚明用時舉苦熱韻見贈

暑窗當午思昏昏。雷起千峯睡不聞。鑠石誰能招楚魄。斲冰我欲訪湘君。年華祇合加餐飯。事業休工刺繡文。賴有兩賢南北巷。歲寒幽谷共蘭薰。

李次山自畫兩圖其一泛舟湖山之下小女奴坐船頭吹笛其一跨驢渡小橋入深谷各題一絕

船頭月午坐忘歸。不管風鬟露滿衣。橫玉三聲湖起浪。前山應有鵲驚飛。  
黃塵車馬夢初闌。杳杳騎驢紫翠間。飽識千峯真面目。當年拄笏漫看山。

太傅楊和王挽歌詞二首

先廟垂忠烈。孤童修舊勳。風雲天策府。心膂殿前軍。汗獮漸臺蹙。胡騎鬪幕焚。人亡汗青在。足以詔無垠。  
定遠之師。劉豫以廢。石梁之役。虜帳蕩然。功無烈於此者。

歲與靈光晚。名登甲令芳。剖符山若礪。交戟鬢如霜。半世三槐位。千秋異姓王。哀榮公不憾。人自惜堂堂。  
少卿直閣鄭公挽歌詞恭老

今代魁梧老。終身寂寞濱。鬢霜三館直。碑淚五州春。壽相空壬甲。行年竟巳辰。墳丘纔馬鬣。何處著經綸。  
憶昨登門日。驩傳考室詩。謂公安且吉。何意哭於斯。遺老典刑盡。此邦名教悲。誰能傳耆舊。他日慰吳兒。  
高景菴讀舊題有感

莓苔風雨舊詩留。十七年前鬢未秋。巖桂拂雲篁竹拱。樹猶如此一搔頭。  
華山道中

過午曾雲未肯開。煖寒村店竹初灰。蕭蕭林響棠梨戰。晚恐陽山有雨來。  
送嚴子文通判建康

四海論交賴有子。一日不見真愁予。人誰可與話心曲。天忽遣來同里居。懊惱春來不數面。丁寧歲晚猶頻書。黑頭屢別那敢惜。歎息駸駸霜滿梳。

次韻王浚明詠新居木屋

月窟移來有貴名。一簾金碧照東榮。鼻端入妙睡魔醒。眼底會真詩句生。日氣瓏璵無奈醉。露華凌亂不

勝清。君家傾國何時見。淡掃蛾眉撚夕陰。

提刑察院王丈挽詞彥光

諭蜀三年戍。遠吳萬里船。雲歸雙節後。雪白短檠前。百世春秋傳。一丘陽羨田。浮生如此了。何必更凌煙。日者悲離索。公今又眇冥。門人辦韓集。子舍得韋經。此去念築室。空來聞過庭。平生無路見。終古泣松銘。

送關壽卿校書出守簡州

東壁星宮館列仙。一麾苦欲近田園。宅家但寶千金鑑。臣輩何辭萬里船。壽卿述藝祖寶訓爲書以獻。多觸貴要者。京洛知心塵鞅裏。江吳攜手暮帆邊。聲名如此歸安往。日日闔門望眼穿。

頃自吏部郎去國時。獨同舍趙友益追路送詩。數月友益得儀真。過吳江。次元韻招之。

東風分袂省西廊。袖有明珠照客航。道義有情通出處。文章無地著炎涼。君今猶把一麾去。我敢倦鋤三徑荒。邂逅天涯如夢寐。肯來相對話更長。

長沙王墓在闔門外孫伯符

英雄轉眼逐東流。百戰工夫土一坯。蕎麥茫茫花似雪。牧童吹笛上高丘。

次韻孫長文泊姑蘇館

讀書窗下一燈殘。忽有詩來爲煖寒。聞道扁舟春共載。雪雲雖冷不相干。

長文再作復次韻

渚蒲汀蓼得霜殘。歸客思家不計寒。喜鵲門前人一笑。絕勝風色候長干。

次韻耿時舉王直之夜坐

庭葉翻翻鬧。燈花粟粟濃。關山千里鴈。風雨滿城鐘。隴上新登穀。江頭舊熄烽。今年吾計得。安穩讀三冬。

次韻徐子禮提舉鶯花亭并序

秦少游水邊沙外之詞。蓋在括蒼監征時所作。予至郡。徐子禮提舉按部來過。勸予作小亭。記少游舊事。又取詞中語。名之曰鶯花。賦詩六絕而去。明年亭成。次韻寄之。

灘長石出水鳴隄。城郭西頭舊小溪。游子斷魂招不得。秋來春草更萋萋。  
愁邊逢酒却成憎。衣帶寬來不自勝。煙水蒼茫外沙路。東風何處拄枯藤。  
墟下三年世路窮。蟻封盤馬竟難工。千山雖隔日邊夢。猶到平陽池館中。  
文章光燄照金閨。豈是遭逢乏聖時。縱有百身那可贖。琳瑯空有萬簷垂。  
山碧叢叢四打圍。煩將舊恨訪黃鸝。纈林霜後黃鸝少。須是愁紅萬點時。  
古藤陰下醉中休。誰與低眉唱此愁。團扇他年書好句。平生知己識儋州。

此页空白

# 石湖居士詩集卷十一

己丑五月。被召至行在。遇周畏知司直。和五年前送周歸弋陽韻見贈。復次韻答之。以下自處州尋

至行在作。

分袂悠悠爾許年。莫嗔蓬鬢兩蕭然。酒槽不奈青春老。經笥空供白晝眠。暗綠千章新活計。軟紅三尺舊塵緣。相逢且作西湖客。山繞荷花橫畫船。

次韻馬少伊郁舜舉寄示同游石湖詩卷七首

蕪城老蘚不知春。忽有柴門月色新。芝草琅玕無鎖鑰。白無超俗扣門人。莫問朝歌與棘津。浮生惟有一杯春。君看百戰功名地。越戍吳臺兩窖塵。鏡面波光倒碧峯。半湖雲錦萬芙蓉。去年蕩槳香風裏。行傍石橋花正濃。紅皺黃團熟暑風。甘瓜削玉藕玲瓏。身謀已落園丁後。滿帽京塵日正中。兩賢風度藹春陽。步履隨風上柳塘。綵筆紅牋芳徑裏。句中挾我萬花香。得得來題小隱詩。拂香縈柳畫船移。湖邊好景春猶未。須到秋清月滿時。瀟洒王郎亦勝流。今年何事阻清遊。富家風味今如此。孤負山陰夜雪舟。

玉堂寓直

攜文窗戶九霄中。岸幘燒香愧老農。上直馬歸催下鑰。傳更人唱促鳴鐘。金城蠟燭雲千雉。碧瓦參差月

萬重骨冷魂清都不夢。玉階蕭瑟聽秋蛩。

己丑中秋寓宿玉堂。聞沈公雅大卿。劉正夫戶部。集張園賞月。走筆寄之。

笑看收雲捲雨忙。沉沉宮樹納空光。夜長來伴玉堂宿。天近似聞丹桂香。鵝鵲樓欄浮瑞氣。鳳凰城闕帶新涼。遙知勝絕西園會也。憶車公對舉觴。

八月二十二日寓直玉堂雨後頓涼。

雨意蒸雲暗夕陽。濃薰滿院落花香。題詩弄筆北窗下。將此工夫報答涼。

次韻答吳江周縣尉飲垂虹見寄

垂虹亭上角巾傾。鬚怒龍吟醉不聽。安得對君浮大白。想應嗤我汗新青。夢魂舞蝶隨春草。時節賓鴻點暮汀。湖海扁舟須及健。莫教明月照星星。

次韻徐廷獻機宜送白釀石室酒三首

元亮折腰嘻已久。故山應有欲蕪田。因君辦作送酒客。憶我北窗清晝眠。清絕仍香如橘露。甘餘小苦似松肪。官槽重濁那知此。付與街頭白面郎。一語爲君評石室。三杯便可博涼州。百年兀兀同渠住。何處能生半點愁。

玉堂寓直曉起書事記直舍老兵語

江湖垂釣手。天漢摘文章。魂清不得眠。室虛自生光。曉纒澹天闕。江濤隱胡牀。傳呼九門開。奔走千官忙。若若誇組紱。紛紛夢黃梁。微聞鈴下騶。竊議馬上郎。但計夢長短。寧論已行藏。

與長文正夫游北山

柳岸松門勝處通。馬蹄踏霧入空濛。春寒有力欺遊子。天色無情沒斷鴻。雨脚遠連山脚暗。杏梢斜倚竹梢紅。馳裘擁鼻吾衰矣。年少猶嫌料峭風。

致政承奉廬君挽詞二首 德華父

泮水橋門識太平。歸來霜鬢老柴荆。淹中學邃方成傳。谷口名高豈待卿。黃壤無情埋玉樹。青衫有道勝金籬。襄陽耆舊今蕭索。惟有松風到晚清。純孝當年有護持。赤眉那敢近姜詩。眼看庭玉成名後。身及堂萱未老時。湖海青鞵驚斷夢。風霜丹旆挂新悲。尊前五客今誰在。愁絕廬山十段奇。

寓直玉堂拜賜御酒

歸鴉陸續墮宮槐。簾幙參差晚不開。小雨遂將秋色至。長風時送市聲來。近瞻北斗璿璣次。猶夢西山翠碧堆。慚愧君恩來甲夜。殿頭宜勸紫金杯。

送汪仲嘉侍郎使虜分韻得待字

聖人坐門堂。洪覆等穹蓋。歲頒兩玉節。前後歌出塞。公才有廊廟。安用試專對。要煩第一人。鎮撫大荒外。嫩寒欺別酒。微月見征旆。遙知燕山雪。飄灑漢冠佩。玉色照穹廡。驕子亦心醉。要領一笑得。歸來安鼎鼐。是時春正佳。湖上花如海。清遊不可遲。日日橫船待。

李翬知縣作亭西湖上。余用東坡語名之曰飲終。遂爲勝概。



芷蒼蓮巢喚客遊。蘆鞭席帽爲君留。未論吹水堪添酒。且要移牀學枕流。乍霽却陰梅釀雨。暫暄還冷麥催秋。石湖也似西湖好。煩向蒼煙問白鷗。

草蟲扇

莫嫌絡緯股鳴悲。解向寒牕促曉機。海眼多花無藉在。顛狂只待學于飛。

送汪仲嘉待制奉祠歸四明分韻得論字

丹霄碧海眇高騫。厭直承<sub>四</sub>却自論寶馬。十年聽漏箭。扁舟一雨看潮痕。侍臣相憶松門遠。歸客還憐菊徑存。清潤要非山澤相。又煩一札下雲根。

魯如晦郎中挽詞二首

術業推游刃。功名苦溯洄。著鞭孤壯志。籌算老奇才。星省龐眉去。雲山袖手來。知公了時命。何必誅餘哀。自古歸來引。于今遂隱篇。棊燈熒夜觀。歌板聒春船。陳迹空華似。佳城露草邊。寂寥雞黍約。望眼一潸然。

初約鄰人至石湖以下辛卯自西掖歸吳作

窈窕崎嶇學種園。此生丘壑是前緣。隔離日上浮天水。當戶山橫匝地煙。春入葑田蘆綻筍。雨傾沙岸竹垂鞭。荒寒未辦招君醉。且吸湖光當酒泉。

社日獨坐

海棠雨後沁臙脂。楊柳風前撚綠絲。香篆結雲深院靜。去年今日燕來時。

與周子充侍郎同宿石湖

幽香馥蕙帳。清夢安且吉。蘿月墮蒼茫。松風隱蕭瑟。曉禽啄且鳴。喚我起盥櫛。鉤窗納雲濤。灑灑浴初日。金鉉忽騰上。倒景落書帙。佳晴有新課。曬種催菽秫。從今不得閒。東臯草過膝。

和周子充侍郎見寄樂府戲贈之作

釣海風水急。登樓塵霧高。不如岸綸巾。春船攜小橋。芳草含奇薰。光景上東壁。桂林那辦此。辦作安昌客。

壬辰三月十八日石湖花下作

夜飲海棠月。朝漱山茶露。臞儒槁木形。受用侈如許。荆扉隔黃塵。誰識花鳥路。惟有瘦筇枝。共飽園中趣。林神釀餘春。政爾美無度。葱蘢千萬重。芳意未渠暮。風香薦秀色。鼎俎謝腥腐。雖無稻粱謀。捫腹有餘歛。

刈麥行

梅花開時我種麥。桃李花飛麥叢碧。多病經旬不出門。東陂已作黃雲色。腰鎌刈熟趁晴歸。明朝雨來麥沾泥。犁田待雨插晚稻。朝出移秧夜食麩。

壬辰天中節赴平江錫燕因懷去年以侍臣攝事捧御盃殿上賦二小詩

去歲排場德壽宮。薰風披拂酒鱗紅。小臣供奉金龍醴。親到虛皇玉座東。天中繖動玉輿來。萬歲三聲徹九街。想見牙牀當殿過。舜裳雲委拜堯階。

壬辰七月十六日侵晨真率會石湖路中書事

白葛烏紗稱老農。溪南溪北水車風。稻頭的皪粘朝露。步入明珠翠網中。

次韻施進之惠紫芝朮

山精媒長生。仙埋信可詰。梨棗本寓言。杞菊亦凡質。幽人愛臞儒。藥鼎薦珍物。絕粒謝煙火。耘苗換肌骨。摩挲萊蕪甑。塵生不須拂。

題醉道士圖

蜩鷓鷯鷓任過前。壺中春色蠶中天。朝來兀兀三杯後。且作人間有漏仙。

五雜組四首并序

古樂府有五雜組及兩頭織織。殆類酒令。孔平仲最愛作此以爲詩。戲亦效之。

五雜組同心結。往復來當窗月。不得已。話離別。

五雜組流蘇縷。往復來臨行語。不得已。上馬去。

五雜組回文機。往復來錦梭飛。不得已。獨畫眉。

五雜組綵絲鍼。往復來烏投林。不得已。夢孤衾。

兩頭織織二首

兩頭織織深官繭。半白半黑鶴鬣綠。膈膈膊膊上帖箭。磊磊落落封侯面。

兩頭織織小秤衡。半白半黑月未明。膈膈膊膊扣戶聲。磊磊落落金盤冰。

再賦五雜組四首

五雜組綬若若。往復來大車鐸。不得已。去丘壑。

五雜組侯門戟。往復來道上檄。不得已。天涯客。

五雜組。漢旌旆。往復來。賓鴻字。不得已。餐瓊使。  
五雜組。非煙雲。往復來。朝馬塵。不得已。嬰龍鱗。

夜坐聽雨

四檐密密又疎疎。聲到蒲團醉夢蘇。恰似秋眠天竺寺。東軒窗外聽跳珠。

寒夜獨步中庭

忍寒索句踏霜行。刮面風來鬢結冰。倦僕觸屏呼不應。梅花影下一窗燈。

會散野步

忘却下樓扶我誰。接離顛倒酒沾衣。貪看雪樣滿街月。不上籃輿步砌歸。步砌。吳語也。

孟嶠之家姬乞題扇二首輕雲。翠英。

輕煙小雨釀芳春。草色連天綠似裙。斜日滿樓人獨望。斷鴻飛入萬重雲。  
翠袖凌寒弄月明。梅花影下醉三更。一天風露誰驚覺。寂寞空杯綴落英。

周畏知司直得湖南帥。屬過吳門。復用己丑年倡和韻贈別。

邂逅婆娑失少年。劇談抵掌尙超然。君猶拄笏看山去。我且披蓑聽雨眠。京洛分襟疑後會。江吳把酒悟前緣。暫來忽去都如夢。疑是陳卿竹葉船。

偶書以下十五首。三十年前所作。補得殘稿。附此卷末。

伯勞東去燕西飛。同寄春風二月時。可恨同時不同調。此情那得更相知。

雙燕

底處飛雙燕。銜泥上藥欄。莫教驚得去。留取隔簾看。

戲題牡丹

主人細意惜芳春。寶帳籠塔護紫雲。風日等閒猶不到。外邊蜂蝶莫紛紛。

春日三首

藥欄花煖小猶眠。雪白晴雲水碧天。煮酒青梅寒食過。夕陽庭院鎖鞦韆。  
西窗一雨又斜暉。睡起薰籠換夾衣。莫放珠簾遮洞戶。從教燕子作雙飛。  
雙鯉無書直萬金。畫橋新綠一篙深。青蘋白芷皆愁思。不獨江楓動客心。

高樓曲 以下六首。皆夢境所得。

歲暮天涯客。黃昏蝙蝠飛。高樓人不到。小雨怯單衣。

湘江怨

蘋芷迷煙路。蓮舟忘却歸。夜寒江水黑。風雨夢如飛。

採蓮三首

溪頭風迅怯單衣。兩槳凌波去似飛。折得蘋花雙葉子。綠鬢撩亂帶香歸。  
藕花深處好徘徊。不奈華筵苦見催。記取南溼菱葉露。月明風熟更重來。  
柔櫓無聲坐釣魚。浪花飛點翠羅裾。空江日暮無來客。腸斷三湘一紙書。

弔陳叔寶詞

賞心亭上再來遊。煙月迷人獨自愁。行到江邊無去路。却隨潮水過揚州。

此  
页  
空  
白

# 石湖居士詩集卷十二

渡淮 八月十一日渡盱眙。過泗州。順風如飛。

船旗袞袞徑長淮。汴口人看撥不開。昨夜南風浪如屋。果然雙節下天來。

汴河 汴自泗州以北皆涸。草木生之。土人云。本朝恢復。駕回卽河須復開。

指顧枯河五十年。龍舟早晚定疏川。還京却要東南運。酸棗棠梨莫翦然。

虞姬墓在虹縣下馬鋪北三十七里。

劉項家人總可憐。英雄無策庇嬋娟。戚姬葬處君知否。不及虞兮有墓田。

宿州 五更出城。鬼火滿野。

狐鳴鬼嘯夜茫茫。元是官軍舊戰場。土伯不能藏碧燐。三三兩兩照前岡。

雷萬春墓在南京城南。環以小牆。榜曰忠勇雷公之墓。

九隕元身不隕名。言言千載氣如生。欲知忠信行蠻貊。過墓胡兒下馬行。

雙廟 在南京北門外。張巡許遠廟也。世稱雙廟。南京人呼爲雙王廟。

平地孤城寇若林。兩公猶解障妖祲。大梁襟帶洪河險。誰遣神州陸地沉。

睢水 睢口石門已隕。河亦塞。卽項羽大敗漢兵處。

一戰填河擁漢屯。拔山意氣已鯨吞。直南卽是陰陵路。兵果難將勝負論。



伊尹墓在空桑北一里。有碑喚刻云。湯相伊公之墓。相傳墓左右生棘皆直如矢。

三尺黃墟直棘邊。此心終古享皇天。汲書猥述流傳妄。剖擊嗟無咎單篇。

留侯廟在陳留縣中。案王原叔諸家考子房所封。乃彭城留城。非陳留也。自宋武下教修復時。其失久矣。

功成輕舉信良謀。心與鷓夷共一舟。呂媪區區無鳥喙。先生輕負赤松遊。

西瓜園味淡而多液。本燕北種。今河南皆種之。

碧蔓凌霜臥軟沙。年來處處食西瓜。形模濩落淡如水。未可蒲萄苜蓿誇。

宜春苑在舊宋門外。俗名東御園。

狐塚攢蹊滿路隅。行人猶作御園呼。連昌尙有花臨砌。腸斷宜春寸草無。

京城

倚天櫺櫓萬樓棚。聖代規模若化成。如許金湯尙資盜。古來李勣勝長城。

護龍河在新宋門外。中有網船數十艘。

新郭門前見客舟。清漣淺淺抱城樓。六龍行在東南國。河若能神合斷流。

福勝閣曹太皇所建。奇崛冠京城中。

輦飛五級半空翔。指點樓欄說太皇。劫火不能侵願力。巋然獨似漢靈光。

相國寺寺榜額祐陵御書。寺中雜貨。皆胡俗所需而已。

頰檐缺吻護奎文。金碧浮圖暗古塵。聞說今朝恰開寺。羊裘狼帽趁時新。

州橋南望朱雀門。北望宣德樓。皆舊御路也。

州橋南北是天街。父老年年等駕迴。忍淚失聲詢使者。幾時真有六軍來。

宣德樓慶加崇葺。僞改曰承天門。

曉闕叢霄舊玉京。御牀忽有犬羊鳴。他年若作清宮使。不挽天河洗不清。

市街京師諸市皆荒索。僅有人居。

梳行訛雜馬行殘。樂市蕭騷土市寒。惆悵軟紅佳麗地。黃沙如雨撲征鞍。

金水河在舊封丘門外。河中多大石。皆長嶽所墮。

菜市橋西一水環。宮牆依舊俯潯灣。誰憐磊磊河中石。會上君王萬歲山。

壺春堂徽廟稱道君時所居。在擷芳園中。俗呼爲八滴水閣者。

松漠丹成去不歸。龍髯無復有攀時。芳園留得觚稜在。長與都人作淚垂。

漸水黃河將決其地。則伏流先出。名曰漸水。河身日徙而南。過封丘。至胙城界中。已有漸水。去汴京大約五十里耳。

黃流日夜向南風。道出封丘處處逢。紫蓋黃旗在湖海。故應河伯欲朝宗。

李固渡

洪河萬里界中州。倒捲銀潢聒地流。列弩燔梁那可渡。向來天數亦人謀。

天成橋碑石蔡京書。在濟州岡上驛中東廡下。舊浮橋在此。今河徙南行矣。

一岡邑屋舊河灘。却望河身百里間。湧土漲沙漫白道。天成橋石在高山。

舊滑州在澧州側。積水中爲河所淪久矣。大伾卽黎陽山。西望積水不遠。

大伾山麓馬徘徊。積水中間舊滑臺。漁子不知興廢事。清晨吹笛棹船來。

扁鵲墓在湯陰伏道路傍。相傳墓上土可療病。禱而求之。或得小圓如丹藥。

活人絕技古今無。名下從教世俗趨。墳土尙堪充藥餌。莫嗔醫者例多盧。

姜里城在姜河上。四垣巖然。

陵谷遷移尙故墟。天盈商罪未蠲除。古今行客同嗤罵。何止三篇秦誓書。

文王廟在姜里城南。

堂堂十亂欲興周。肯使君王死作囚。巧笑入宮天亦笑。可憐元不費深謀。

相州推車老人自言。吾州韓魏公鄉里南北兩墳。尙無恙。

秃巾鬢髻老扶車。茹痛含辛說亂華。賴有鄉人聊刷恥。魏公元是魯東家。

秦樓在相州寺中。上有貴人幕而觀使客。云是郡主。太守之妻也。大抵相臺傾城出觀。異於他州。

欄街看幕似春遊。斑駁雕車碧畫油。奚女家人稱貴主。縷金長袖倚秦樓。

翠樓在秦樓之北。樓上下皆飲酒者。

連衽成帷迓漢官。翠樓沾酒滿城歡。白頭翁媪相扶拜。垂老從今幾度看。

講武城在漳河上。曹操所築。周遭十數里。鑿城爲道而過。

阿瞞虜武蓋劉孫千古還將鬼蜮論。縱有周遭遺堞在。不如魚復陣圖尊。  
七十二塚在講武城外。曹操疑塚也。森然彌望。北人比常增封之。

一棺何用塚如林。誰復如公負此心。聞說羣胡爲封土。世間隨事有知音。  
趙故城在邯鄲縣南。延袤數十里。

金石笙篁絕代無。颺颺藜藿正乘除。園翁但愛城泥煖。侵早鋤霜種晚蔬。  
邯鄲道卽昔人作黃梁夢處。

薄晚霜侵使者車。邯鄲阪峻且徐驅。困來也作黃梁夢。不夢封侯夢石湖。  
藺相如墓在邯鄲縣南。魏故城之西。

玉節經行虜障深。馬頭醺酒奠疎林。茲行璧重身如葉。天日應臨慕藺心。  
邯鄲驛驛後有獐犬祭天者。大抵盡爲胡俗。漢戚夫人縣人也。

長安大道走邯鄲。倚瑟佳人悵望間。若見羶腥似今日。漢宮何用憶關山。  
叢臺在邯鄲北門外。

憑高閱士劍如林。故國風流變古今。衮服雲仍猶左衽。叢臺休恨綠蕪深。  
臨洛鎮去洛州三十里。洛酒最佳。伴使以數壺及新兔見餉。

竟日霜寒暮解圍。融融桑柘染斜暉。北人爭勸臨洛酒。云有棚頭得兔歸。  
邢臺驛信德府驛也。去太行最近。城外有荷塘柳隄頗清麗。不類河朔。

太行東麓照邢州。萬壘煙螺紫翠浮。誰解登臨管風物。枯荷老柳替人愁。

柳公亭

在邢州城北小園中。伴使邀客入遊。云。舊有流杯。今廢。園正對太行馬鞍。一峯極巔。

主人敬客有餘情。催喚繩牀坐柳亭。曲水流觴非故物。馬鞍山色舊青青。

內丘梨園

內丘梨爲天下第一。初熟收藏十月出汗後方佳。園戶云梨至易種。一接便生。可支數十年。吾家

園者。猶聖宋太平時所接。

汗後鵝梨爽似冰。花身耐久老猶榮。園翁指似還三笑。曾共翁身見太平。

大寧河在內丘北河之東。皆梨棗園。二果正熟。

梨棗從來數內丘。大寧河畔果園稠。荆箱擾擾攔街賣。紅皺黃團滿店頭。北人謂道上聚落爲店頭。

柏鄉唐志。堯山乃古柏仁。俗傳或以此柏鄉爲柏人。

貫生名壓漢公卿。自古逢讎不反兵。仇虜滔天無敢動。柏鄉空溷迫人名。

唐山卽堯山。金主之父名宗堯。改山名。山下有放勳廟。

勳唐遺德照清灣。百聖聞風不敢班。何物苦寒胡地鬼。二名猶敢廢堯山。

光武廟 在柏鄉北。兩壁有二十八將像。廟前有二石人。皆自腰而斷。俗傳光武夜過。以爲生人。問途不應。

劍斬之云。

雲臺列像拱真人。野老猶誇建武春。不用劍鋒能刺石。冰河一瞥已通神。

趙州石橋在城南洩河上。以鐮筍卯貫石捲篷。不類人工。

石色如霜鐵色新。浚河南北尚通津。不因再度皇華使。誰洗奚車塞馬塵。  
柏林院卽東院趙州禪師道場。在城中。

胡來胡現却灰深。風鼓三災海印沈。急過當年無佛處。庭前空有柏森森。  
欒城縣極草草。伴使怒頓餐不精。欲榜縣令。跪告侈時方免。

頽垣破屋古城邊。客傳蕭寒爨不煙。明府牙緋危受杖。欒城風物一淒然。  
呼沱河卽光武渡冰處。在真定南五里。

聞道河神解造冰。曾扶陽九見中興。如今爛被胡羶浣。不似滄浪可濯纓。  
真定舞。虜樂悉變中華。惟真定有京師舊樂工。尙舞高平曲破。

紫袖當棚雪鬢凋。曾隨廣樂奏雲韶。老來未忍耆婆舞。猶倚黃鐘衰六么。  
東坡祠堂在中山府學。學在化原坊。

化原坊裏尙巒堂。聞道蘇仙有奉嘗。想見當年行樂處。牙旗鐵馬照金章。  
松醪中山酒。猶名松醪。然甚滴。

松風漱罷讀離騷。翰墨仙翁百代豪。一笑氍毹那辦此。當年嵇阮尙舖糟。  
望都縣人多癩。婦人尤甚。相傳縣東接唐縣。病癩者甚衆。比縣蓋染其風土。縣西有小阜曰由山。

荒寺踈鐘解客鞍。由山東畔白煙寒。望都風土連唐縣。翁媪排門帶癩看。  
安肅軍舊梁門三城。今惟一城有人煙。濟深皆涸矣。

從古銅門控朔方，南城煙火北城荒。臺家抵死爭澹灤，滿眼秋蕪襯夕陽。  
出塞路安肅北門外大道，容數車方軌。

當年玉帛聘遼陽，出塞會歌此路長。漢節重尋舊車轍，插天猶有萬垂楊。

白溝在安肅北十五里。關繞丈餘。古亦名巨馬河。本朝與遼人分界處。

高陵深谷變遷中，佛劫仙塵事事空。一水涓流獨如帶，天應留作漢提封。

太行渡河即與太行俱北。至燕猶未斷。大抵東至薊門。北至塞北。西接奚界也。若晴日無埃。則出京至封丘。

已望見之矣。

西北浮雲捲暮秋，太行南麓照封丘。橫峯側嶺知多少，行到燕山翠未休。

固城自白溝十五里至固城鎮。舊遼界也。水味極惡。用柳作大椗汲井。謂之涼罐。

柳椗涼罐汲泉遙，味苦仍鹹似海潮。却憶徑山龍井水，一杯洗眼洞霄。

范陽驛涿州驛牆外有尼寺。二鐵塔夾塗如雪。俯瞰驛中。

郵亭偃仄但宜冬，恰似披裘坐土空。枕上驚回丹闕夢，屋頭白塔滿鈴風。

定興舊黃村。慶新建爲縣。井邑未成。

新城遷次少人煙，桑柘中間井徑寒。亦有染人來賣纈，淡紅深碧挂長竿。

清遠店定興縣中客邸前。有婢兩頰刺逃走二字。云是主家私自黥涅。雖殺之不禁。

女僮流汗逐氈鞞，云在淮鄉有父兄。屠婢殺奴官不問，大書鯨面罰猶輕。

琉璃河又名劉李河。在涿州北三十里。極清泚。茂林環之。尤多鴛鴦。千百爲羣。

煙林葱蒨帶回塘。橋眼驚人失睡鄉。健起褰帷措病眼。琉璃河上看鴛鴦。此河。大中祥符間路振乘輅錄亦謂琉璃河。惟嘉祐中。宋敏求入番錄乃謂之六里河。大抵胡語難得其真。

灰洞在涿北燕南之間。兩旁皆高岡。無風而路極狹。塵土壅積。咫尺不辨人物。

塞北風沙漲帽檐。路經灰洞十分添。據鞍莫問塵多少。馬耳冥濛不見尖。

良鄉燕山屬邑驛中供金粟梨。天生子。皆珍果。又有易州栗。甚小而甘。

新寒凍指似排籤。村酒雖酸未可嫌。紫爛山梨紅皴棗。總輸易粟十分甜。

盧溝去燕山三十五里。虜以活鷹餉客。積數十隻。至此放之河中。虜法。五百里內禁採捕故也。

草草魚梁枕水低。忽忽小駐濯漣漪。河邊服匿多生口。長記軺車放鴈時。此河。宋敏求謂之廣菰。卽桑乾河也。今呼盧溝。

燕賓館 燕山城外館也。至是適以重陽。慶重此節。以其日祭天。伴使把菊酌酒相勸。西望諸山皆縞。云。初

六日大雪。

九日朝天種落驩。也將佳節勸杯盤。苦寒不似東籬下。雪滿西山把菊看。

橙綱燕城外遇數車載新橙。云修貢。種之汴京。擷芳園也。

堯舜方堪橘柚包。穹廬亦復使民勞。華清荔子沾恩幸。一騎回時萬騎騷。

踢鴟巾接送伴田彥暈愛予巾裏。求其樣。指所戴踢鴟有愧色。



重譯知書自貴珍。一生心愧蹋鷗巾。雨中折角君何愛。帝有衣裳易介鱗。

耶律侍郎兵部侍郎耶律寶。館伴使也。不識字。如提刑運使等字。亦指以問。

乍見華書眼似矜。低頭慚愧紫荷囊。人間無事無奇對。伏獵今成兩侍郎。

龍津橋在燕山宣陽門外。以玉石爲之。引西山水灌其下。

燕石扶欄玉作堆。柳塘南北抱城迴。西山剩放龍津水。留待官軍飲馬來。

燕宮宏侈過汴京。楊王亮所作。

金盆濯足段文昌。乞索家風飽使忘。他日楚人能一炬。又從焦土說阿房。

會同館燕山客館也。授館之明日。守吏微言有議留使人者。

萬里孤臣致命秋。此身何止一漚浮。提攜漢節同生死。休問羝羊解乳不。  
遼人館本朝使已。謂之會同館。

# 石湖居士詩集卷十三

與吳興薛士隆使君遊弁山石林先生故居此卷乾道壬辰冬赴廣西道中所作。舊名南征小集。

白蘋有嘉招。蒼弁得勝踐。會心不憚遠。乘興恐失便。籃輿犯窮臘。共作忍寒面。溟濛雲釀雪。浩蕩風落鴈。松篁漸清幽。猿鶴或悲怨。英英文章公。作舍鎖葱蒨。嶢峯俯前榮。佳木秀諸院。窮搜發山骨。林立侍談讌。西巖踞熊虎。東巖峙屏案。履綦故仿佛。蓋瓦已零亂。經營三十年。成毀一飛電。摩挲土花碧。小立爲三歎。

自石林回過小玲瓏巖竇益奇昔爲富人吳氏所有今一子尙幼山檢校於官

一丘乃中虛。洞穴四無礙。却略巖岫杳。黝糾石牀怪。蒼牛飲前池。碧罈灑微瀨。雕鏤具百巧。圖畫窘千態。哀湍寫壞磴。凍雨濕空翠。疎梅照草棘。瘦竹拔蹊隧。當時閭閻子。目力在塵外。孤童藐難料。奇事疑有待。誰歎千金捐。來換把茅蓋。不仙亦足豪。衆垓皆累塊。我評北山遊。勝絕此無對。玲瓏詎可小。孰能爲之大。

濯纓亭在吳興南門外

淒風急雨脫然晴。當道橫山似見迎。野水茫茫何用許。爛供遊子濯纓纓。

乾道己丑守括被召再過釣臺自和十年前小詩刻之柱間後五年自西掖帥桂林癸巳元日雪晴復過之再用舊韻三絕。

浮生渺渺但飛埃。問訊星宮又獨來。天上人間最高處。爲君題作鬱蕭臺。拙疎何計補涓埃。慚愧雙旌去復來。三過溪門今老矣。病無脚力更登臺。

界天山雪淨黃埃。溪上扁舟夜汎來。匝地東風勸椒酒。山頭今日是春臺。

玉山道中

常山多清溪。玉山富喬木。行色鬱蒼然。頗亦慰愁目。梅花隔籬見。瓏璈照茅屋。晚來風刮地。想見飄香玉。

桃花壇下望龜峯

石壇無土謾嶽岑。何自能生小柏林。擬擘蛤蜊龜殼上。病來不殺嬾登臨。

清音堂與趙德莊太常小飲。在餘干琵琶洲傍。洲以形似得名。

曲浦鬱環繞。縣青一盃閒。客兩飄零。琵琶不語蒼煙暮。山水清音著意聽。

過鄱陽湖次游子明韻

春工釀雪無端密。大塊囊風不肯收。休問巉巖與欹側。我今傘屨共波流。野鷹兀兀平沙上。折葦蕭蕭古

渡頭。滿眼荒寒底處所。令人腸斷五湖舟。

豫章南浦亭泊舟二首

繡檻臨滄渚。牙檣插暮沙。浦雲沉斷鴈。江雨入昏鴉。野曠天何近。春寒歲未華。來朝風一席。隨處且浮家。

閨歲花光晚。霜朝草色荒。趨墟猶市井。收潦再耕桑。客路東西懶。江流日夜忙。長歌情不盡。一酌醉滄浪。

清江道中橘園甚夥

芳林不斷清江曲。倒影入江江水綠。未論萬戶比封君。瓦屋人家衣食足。暑風汎花蘭芷香。秋日籬落明

青黃。客舟來遲佳景盡。但見碧樹愁春霜。

清江臺在臨江郡圃西岡上張安國題榜

南來富壽岡。形勝此蟠結。岑嶺戴高臺。欄檻了風月。蕭灘曳長煙。閣阜炯殘雪。江流當帶橫。練練浮木末。天風來無鄉。萬里吹醉纈。登臨信奇事。忍凍亦癡絕。故人春夢覺。遺墨秋蛇掣。浮雲真可吟。揮觴醉空闊。自冬徂春。道中多雨。至臨江宜春之間。特甚。遂作苦語。

客行無晴時。涔涔如漏天。東吳至西江。舊歲接新年。蠟屐驚踵決。油衣笑鶉懸。掀淖起復仆。頃步如重關。略似鴨與豬。汨沒泥水闌。我塗未渠窮。一情愧天慳。倒塔橋已斷。壁破渡無船。路人相告語。未到先長歎。薄晚得礪礪。稍入袁州山。不辭石齧足。聊爲泥沒羈。自古行路吟。聽者凋朱顏。軒渠尙能賦。詩人類癡頑。玉虛觀去宜春二十五里。許君上升時。飛白茅數葉。以賜王長史。王以宅爲觀。觀旁至今有仙茅。極異常草。備五味。尤辛辣。云久食可仙。道士煮湯以設客。

白雲堆裏白茅飛。香味芳辛勝五芝。揉葉煮泉摩腹去。全勝石髓畏風吹。

入分宜

新喻渡無橋。分宜橋有欄。孰歟兩微吏。賢否已判然。堂上著威信。四郊如目前。入國政可知。茲焉略闕觀。方竹杖

竹君箇箇面團團。此士剛方獨凜然。外貌中心俱壁立。任從癡子削教圓。

游仰山謁小釋迦塔。訪孚惠二王遺蹟。贈長老混融。

堵田溪澗清洄洄。梅洲問路寒雲堆。連空磴道虬尾滑。竹輿直上無梯階。蒼官來迎夾道立。相逢無言心

眼開翠微中。斷雪礪吼。兩耳不辨供喧。林間靜極成斷相。政要萬壑號風雷。山如蓮盆繞金地。龍官避席餘蒼崖。祖師抱膝坐古塔。大禪海浪翻天來。騰空狡獪我未暇。拄杖踏濕撞莓苔。問龍亦借一席地。解包聽雨眠西齋。當年公案忌錯舉。神通佛法同坑埋。混融菴中的的意。笑我舌本空崔巍。茲事且置飽喫飯。梯田米賤如黃埃。

大雨宿仰山翌旦驟霽混融云無乃開仰山之雲乎出山道中作此寄混融。

誰開大仰雲。此豈吾力及。日光千丈毫。彈指衆峯立。衡山捲陰氣。海市發冬蟄。韓蘇兩枯魚。出語自濡濕。人厄與天窮。底用苦封執。但喜拄杖俊。仍欣芒屨澁。向來三尺泥。有足似羈馬。龍淵古橋斂。獼徑寒溜泣。龍淵獼徑。皆山中往迹。春淺山容瘦。風饕澗聲急。一簞寄前村。野藪旋收拾。貓頭髻。筍尖。雀舌剝茶粒。土毛冠。江西斗酒況可挹。聊同一笑粲。緩賦百憂集。

初入湖南醴陵界

崖樹陰陰夾暝途。出山歡喜見平蕪。一春客夢飽風雨。行盡江南聞鷓鴣。

醴陵驛

綠水橋通縣。縣前浮橋名。門前柳已黃。人稀山木壽。土瘦水泉香。乍脫泥中滑。還嗟堠子長。櫛州何日到。鼓枻上滄浪。

湘潭道中詠芳草

積雨條然晴。秀野若新沐。芳草徑寸姿。中有不勝綠。萋萋路傍情。頗亦念幽獨。驅馬去不顧。斷腸招隱曲。

初見山花

三日晴泥尙沒鞦。幾將風雨過年華。湘東二月春纔到。恰有山櫻一樹花。

櫂洲道中

煙凝山如影。雲褰日射毫。桃間紅樹迴。麥裏綠叢高。客子歎游倦。田家甘作勞。乘除吾尙可。未擬賦離騷。

浮湘行

湘山中間湘水橫。綠蘋葉齊春漲生。盤渦沅沅去無聲。吾乘桂舟泝中湍。揚波擊汰雙櫓擗。輓轡引竿如牛鳴。篙師絕叫疊鼓轟。潛魚跳奔乳猿驚。煖煙浮空晝夢騰。山長水遠天無情。吹簫拊瑟弔湘靈。水妃風御續來迎。問客良苦遠征行。昨者斧鉞下青冥。命我盡護安南兵。嶺海一視如王庭。布蕩陽春濯腐腥。王事靡盬來有程。匪躬之故惟爾毗。芳洲杜若空青青。九歌淒悲不可聽。願賡楚調歸和平。

湘江洲尾快風挂帆

船頭雪浪吼奔雷。十丈高帆滿意開。我自只憑忠信力。風應不爲世情來。兒童屢惜峯巒過。將士猶教鼓笛催。明日祝融天柱去。更煩先捲亂雲堆。

泊湘江魚口灘

知時社燕語檣竿。游子奔波自鮮歡。趨客賣魚雙槳急。隔林沽酒小旗寒。瀟湘渾似日南落。嶽麓已從天外看。薄暮灘前收百丈。臥聞三老報平安。

謁南嶽

湘中固多山。夾岸萬馬屯。坡陀無敢高。似遜喬嶽尊。曉投望雲亭。衆丘拱牆藩。濃嵐忽飄蕩。積翠浮雲端。天柱已峻極。祝融更高寒。紫蓋鬱當中。岡勢洶崩奔。峙爲赤帝峯。下直宮壩垣。角樓捧雙闕。圓方模九闌。炎符撫中興。南正實司天。草木薰協氣。山林奠神姦。妥靈有備物。龍卷鸞旗軒。走忝桂林伯。與神俱南轅。上謁禮亦宜。爲國憂元元。心空禍福相。古井寒無瀾。杯琖不用擲。但願歸田園。相傳壁畫好。拂拭塵埃昏。弓刀立壯士。劍珮班靈官。後宮行樂處。窈窕千雲鬟。錦地舞月晝。珠櫳侍春閑。武氏筆已絕。梗概猶清妍。後宮壁畫武洞清筆。極禁禦富貴之趣。紹興二十年火後爲雨所敗。後人摹舊蹟更畫。猶有彷彿。旋車闔廟去。頗厭山市喧。勝果招客遊。徑排集賢關。梵庋絢雜組。衡嶽藏經。皆錦絲竹簾護之。孟蜀時捨簾。乃其戶部侍郎彬所造。錫杖鏘古環。開山善果尊者所遺。避雨勝業閣。在嶽祠之南。晚晴留凭欄。石廩暎响嘍。望眼增孱顏。上封眇孤絕。南臺半雲煙。碧岫有靈樂。朱陵巢洞仙。晚晴乃盡見諸峯。病倦懶幽討。山僧鐫我頤。松樛唐季枝。柏蹠隋初根。奇事不勝紀。重遊當細論。廟路三十里。夾岸大松。五季時馬氏所植。勝業寺柏不見根。偃於地。出八榦。龍蟠占數畝。世所未之見。傳爲隋時物。

兩蟲

鷓鴣憂兄行不得。杜宇勸客不如歸。天涯羈思難繪畫。惟有兩蟲相發揮。

衡陽道中二絕

桑下蕪菁晚。高花出短籬。茅簷少春事。惟記浴蠶時。  
黑殺鑽籬破。花豬突戶開。空山竹瓦屋。猶有燕飛來。

衡州石鼓書院

古磴浮滄渚。新巖鎖碧蘿。要津山獨立。巨壑水同波。俎豆彌文肅。衣冠盛事多。地靈鍾傑俊。寧但拾儒科。

合江亭并序

合江亭卽石鼓書院。今爲衡州學宮。一峯特立。踞兩水之會。湘水自右。蒸水自左。俱至亭下。合爲一江。而東有巖而賦。韓文公所謂濼淨不可唾者。卽此處。今有濼淨閣。

鼓石鬱嵯峨。截然踞滄洲。有如古盟主。勤王會諸侯。蒸湘伯叔國。稟命會葵丘。敢不承載書。戮力朝宗周。混爲同軌去。崩奔不敢留。宜哉百谷王。博大無與儔。擅毳昔亂華。車馬隔中州。未聞齊晉勳。包茅費誅求。威文亦弘規。尙取童子羞。安知千載後。但泣新亭囚。我題石鼓詩。願言續春秋。

沈家店道傍棣棠花

乍昨芳草競懷新。誰種幽花隔路塵。綠地縷金羅結帶。爲誰開放可憐春。

邵陽口路麤惡積雨餘濘難行

平生春夢境。俛仰撫八極。湖南天盡頭。夢亦未常識。豈知多病身。今乃著脚歷。山泉澄不清。崖土壘而赤。坳堂滑勝油。累塊硬逾石。貪夫一回顧。壯士三歎息。不知清淑氣。果復曾鬱積。我豈鄙夷之。短咏聊一劇。馬鞍驛飯罷縱步。

食飽倦輿馬。散策步前岡。意行踏芳草。蕭艾翁生香。春事甚寂寥。山桃帶松篁。游蜂入菜花。此豈堪蜜房。今年蠶出遲。柘葉分寸長。好晴纔數日。歲事未渠央。



黃熊嶺

薄遊每遠已。茲行遂登危。峻阪盭胸立。恍若對鏡窺。傳呼半空響。濛濛上煙霏。木末見前驅。可望不可追。躋攀百千盤。有頃身及之。白雲巨攬攝。但覺沾人衣。高木傲燒痕。蔥蘢苗新莠。春禽斷不到。惟有蜀魄啼。謂非人所寰。居然見鋤犁。山農如木客。上下翺以飛。寧知有康莊。生死安嶮巖。室屋了無處。恐尙檜巢栖。安得拔汝出。王路方清夷。

衡永之間。山路艱澁。薄晚吏卒。闕云漸近。祁陽路已平夷。皆有津津之色。

朝登赤土嶺。暮入黃泥谷。春江弄花月。歸夢恍在目。覺來行路難。杜宇叫高木。凹中泥沒踝。凸處石齧足。坐輿我尙病。想見肩輿僕。衡陽復祁陽。可暫不可宿。晚來出前岡。路坦亭堠促。將士走相賀。喜色如膏沐。人生本無悶。逆境要先熟。不從憂患來。安識平爲福。夷塗不常遇。歷險始知足。

書涪溪中興碑後并序

乾道癸巳春三月。余自西掖出守桂林。九日渡湘江。游涪溪。摩挲中興石刻。洎唐元和至今。遊客所題。竊謂四詩各有定體。頌者美盛德之形容。以其成功告於神明者也。商周魯之遺篇。可以概見。今元子乃以魯史筆法。婉辭含譏。蓋之而章。後來詞人復發明呈露之。則夫磨崖之碑。乃一罪案。何頌之有。竊以爲未安。題五十六字。刻之石傍。與來者共商略之。此詩之出。必有相詬病者。謂不合題。破次山碑。此亦習俗固陋。不能越拘攣之見耳。余義正詞直。不暇卹也。

三頌遺音和者希。形容寧有刺譏辭。絕憐元子春秋法。都寓唐家清廟詩。歌詠當諧琴搏拊。策書自管壁

瑕疵紛紛健筆剛題破。從此磨崖不是碑。

愚溪在零陵城對岸。渡江卽至。溪甚狹。一石澗耳。蓋衆山之水。流出湘中。

一水彎環羅清閣。千古零陵擅風月。取名如許安得愚。因病成妍却奇絕。至今鏡淨不可唾。猶恐先生遺翰墨。澤及溪流不庇身。付與後來商巧拙。我欲扁舟窮石澗。春漲未生寒瀨咽。紛紅駭綠四山空。惟有風篁韻。駭屑清溪東去客。西征。鈿鋤潭邊聊駐節。何時隨汝下瀟湘。歸路三千櫓伊軋。鈿鋤。髮斗也。潭形似之。

宿清湘城外田家

驅馬力猶彊。奏牀身始疲。浮浮雲拂帳。瀟瀟水鳴籬。未熟燈前夢。閑尋道上詩。湘中多夜雨。客枕最先知。

宿深溪驛。去廣右界只一程。

北戶書頻到。南雲鴈不飛。試評騎馬路。何似釣魚磯。擊柝黃茅店。篝燈白竹扉。故園桑柘煖。亦有稻粱肥。

此  
页  
空  
白

# 石湖居士詩集卷十四

晚春二首以下桂林作·舊在乙稿·

靜極聞檐珮。慵來愛枕幃。隙虹飛永晝。簾影碎斜暉。燕踏花枝語。蜂縈柳絮歸。輕颺宜白紵。時節近清微。好事憐春老。無愁耐日長。爐煙驚扇影。酒面舞花光。照水雲容嬾。移牀竹意涼。更煩紅槿帽。促拍打山香。

## 紅荳蔻花

綠葉焦心展。紅苞竹籜披。貫珠垂寶珞。剪綵倒鸞枝。且入花欄品。休論藥裏宜。南方草木狀。爲爾首題詩。

## 偶題

檐雨初乾團扇風。夕陽芳樹綠葱蔥。蕉心榴萼俱無賴。要與春衫相並紅。

次韻郭季勇機宜雪觀席上留別

勝絕尊前萬事休。縱非吾土且登樓。山迎雨脚俄飛過。風約江聲欲倒流。野水漸堪添酒面。夕陽依舊滿簾鉤。憑闌從此渾歸鞅。能及中秋對月不。

次韻許季韶通判雪觀席上

把酒臨風瑞露傾。瓊漿何用謁雲英。捲簾雨脚銀絲挂。倚杖江頭綠漲生。嶺海一涼蘇暑病。山林千籟試秋聲。茲遊奇絕忘羈宦。慚愧煙中短棹橫。

送周直夫教授歸永嘉

青燈相對話儒酸。老去羈遊自鮮歡。昨夜榕溪三寸雨。今朝桂嶺十分寒。知心海內向來少。解手天涯良獨難。一笑不須論聚散。少焉吾亦跨歸鞍。

贈趙廉州

馬羣雜沓草蒙茸。刮目權奇一洗空。天末也煩行李到。歲寒聊得酒尊同。梅花夜夜湘南雨。榕葉年年海北風。少待佳晴看山去。玉簫高插翠雲叢。

去年過弋陽。訪趙恂道通判。話西湖舊遊。因題小詩。近忽刻石寄來。謾錄。

紅塵寶馬碧湖船。一夢如今費十年。却照清溪尋綠鬢。但餘衰雪兩蕭然。

送唐彥博宰安豐兼寄呈淮西帥趙涓師郎中

唐子皦自鮮。水清石粼粼。繡腸五車書。不鄙簿領塵。黟山與桂嶺。一笑二十春。天涯會面難。歲晚情話真。五管無賢侯。但有嵐煙昏。此豈功名場。往戍清淮濱。北門詩書帥。平生吾故人。問訊今何如。凌煙上星辰。爲言落南客。病作寒螿呻。飄飄北歸夢。夜繞吳淞雲。

燕臺後盧橘一株冬前先開極香

盧橘花殘細細飛。滿枝晴日鬧蜂兒。霜餘有此香無斧。合與稱題賦小詩。

乾道癸巳臘後二日。桂林大雪尺餘。郡人云前此未省見也。郭季勇機宜賦古風爲賀。次其韻。

憶昔北征秋遇雪。穹廬苦寒不堪說。飛花如席暗燕然。把酒悲歌度佳節。胡兒館客類西河。鐫戶不容浮蟻泄。當時已分餐氈草。寧復夢遊炎嶺熱。忽逐梅花行萬里。又與故山輕話別。天公恐我愁瘴霧。十日號

風吹石裂同雲乃肯度嚴關。一夜玉峯高巖岬。老榕翁密最先編。穉竹枵虛時一折。須知桂海接蓬瀛。滿目三山白銀闕。不管樓高翠袖單。但嫌酒淺金杯凸。東郭先生履雖敝。詩情却鬪冰壺潔。歸然凍髭搜好句。山館青燈對明滅。爲憐叶氣到黃茅。何止森森松柏悅。豐年作守會飽煖。羈宦思歸自愁絕。豈無菊徑樂琴書。亦有秣田供麴蘖。東岡雪後一犁春。誰在陂頭憶調燮。

次韻陳仲思經屬西峯觀雪

仙人瀛江遊。剪水馮夷宮。賓友來鄒枚。寒轡搖冬瓏。起望天南陲。玉沙滿長風。越人來省識。把酒醉層空。從來嶠南北。人謂將無同。那知梁園叢。飛入瑞露中。幕府有清士。尋僧上西峯。六花信娟巧。未及五字工。我亦滌冰硯。課虛貴新功。莫嗤兩臞儒。亭端尙清豐。

喜雪示桂人

臘雪同雲嶺外稀。南人北客盡冬衣。從今老杜詩猶信。梅片飛時雪也飛。

寄題商華叔心遠堂用卷中韻

示我新詩卷。知君遜俗情。安流視巫峽。灰劫笑昆明。徽外夜絃語。甕頭春蟻生。藍橋卽仙窟。何況有雲英。送郭季勇同年歸衡山

天壤郭有道。文獻今在茲。喙喙家雞羣。見子野鶴姿。塵籠萬里心。擇食中夜飢。拙宦避捷徑。瘴風吹鬢絲。平生杏園友。把酒天南陲。何敢吏朱浮。但喜見紫芝。問君今何適。舊圃餘荒畦。提攜漢陰甕。歲晚俱忘機。勿開衡山雲。恐驚隱淪棲。定肯從君遊。歲晚攀桂枝。我亦理吳榜。春湘綠蘋齊。風蒲爲誰落。之子同襟期。

丁寧祝融峯。將迎兩枯藜。一望五千里。共洗蠻煙悲。

甲午歲朝寓桂林。記去年是日泊桐江。謁嚴子陵祠。遊溇度嶺。感懷賦詩。

去年曉纜解江臯。也把屠蘇泛濁醪。一席飽風漁浦闊。千山封雪釣臺高。將軍老矣鳴孤劍。客子歸哉啄大刀。早晚扁舟尋舊路。柁樓吹笛破雲濤。

癸水亭落成。示坐客長老之記曰。癸水繞東城。永不見刀兵。余作亭於水上。其詳具記中。

天將福地鞏嚴城。形勝山川表裏明。舊說桂林無瘴氣。今知灑水辟刀兵。雲深銅柱邊聲樂。月冷珠池海面平。願挽江流接河漢。爲君直北洗機槍。

緩帶軒獨坐

午日烘開荳蔻苞。檐塵飛動雀爭巢。蒙蒙困眼無安處。閒送爐煙到竹梢。

食罷書字

甲子霖涔雨。東南溼蟄風。荔枝梅子綠。荳蔻杏花紅。捫腹蠻茶快。扶頭老酒中。荒隅經歲客。土俗漸相通。  
蠻茶出修仁。大治頭風。老酒、數年酒。南人珍之。

次韻平江韓子師侍郎見寄三首

自古四愁湘水深。誰將城郭啓山林。有情碧嶂團纒繞。無數朱樓縹渺臨。蚌鼓揭天驚客坐。象鼙航海厭蠻琛。三千客路長安遠。故舊書來直萬金。  
南人以蚌蛇皮作腰鼓。響微異常。交趾以象革爲兜鞮。皆異事。

靈泉杖屨浙江頭。經濟長懷尙典州。堂上讀書朝氣爽。臺前呼月海光浮。交情尺素勤雙鯉。筆力枯松挽

萬牛已把三章翻樂府。爲君擊節變蠻謳。子師新作小築於浙江。靈泉。讀書堂呼日臺皆其處也。

前年衝雪過雙溪。風帽泥韉騎吹隨。爛醉依前逢錦瑟。好音惟是欠黃鸝。功名未試玉璫瑛。離別頻傾金屈卮。疇昔北征煩吉夢。南征合有夢歸時。頃年北使時。朝野多妄傳被留不歸。子師家中人忽夢予歸。翌日過界報到。故末句及之。鶯鶯。子師家善歌者。前年過婺。券滿已去。

### 宜齋雨中

秀麥一番冷。送梅三日霖。綠肥新荔子。紅浥舊蕉心。映竹千絲舞。垂檐一線斟。終朝盤膝坐。卑濕恐相侵。

### 次韻許季韶通判水鄉席上

青山綠浦竹間明。彷彿苕溪好處行。解慍風來如故舊。催詩雨作要將迎。休兵幕府烏鳶樂。熟稻邊城鼓笛聲。摹寫箇中須綵筆。句成仍挾水雲清。

### 水鄉酌別但能之主管能之將過石康

南郭河橋市井喧。綠荷香處有江天。一簾梅雨爐煙外。三疊陽關燭淚前。馬耳西風君並海。船頭北渚我歸田。後期只恐參商似。且醉金槽四十絃。

### 六月十五日夜汎西湖風月温麗

暮機金龜潭。追隨今夕涼。波紋挾月影。搖蕩舞船窗。夜久四山高。松桂黯以蒼。長煙界巖腹。浮空餘劍鏘。棹夫三弄笛。跳魚翻素光。我亦醉夢驚。解纜濯滄浪。多情芙蓉風。嫋嫋吹鬢霜。會心有奇賞。天涯此何方。清潤不立塵。空明滿生香。過清難久留。俛俯墮渺茫。



燕堂書事

歲稔齋鈴閤。年深屋墜摧。狸爭雷瓦過。蠹化雨窗來。盡日風常籟。無時地不梅。耳邊情話少。笑口若爲開。

酒邊二絕

團扇香中嬾嬾風。斷腸聲裏看羞紅。不須過處催乾盞。聽徹歌頭盞自空。  
日長繡倦酒紅潮。閒束羅巾理六么。新樣築毬花十八。丁寧小玉慢吹簫。

枕上作

繞枕蚊相聒。翻釭鼠自忙。早衰秋夢亂。不寢曉更長。賦擬騷人屈。吟成病客莊。安心無可覓。隨處且爲鄉。  
思歸再用枕上韻

老覺觸事懶。病添歸計忙。行年心已化。疇昔意空長。五柳栗里宅。百花錦城莊。何時去檢校。一棹水雲鄉。  
李正之提點行至郴用予忙字韻寄和答

天涯逢我病。秋晚送君忙。感慨交情厚。留連別恨長。賓筵猶雪觀。客路已雲莊。搖落郴江路。應須憶醉鄉。  
曉出北郊

偈仄深巷中。葱蘢綠陰交。山家不早起。閉戶如藏逃。濃露蛻蟬咽。小風飢燕高。新渠廬涓流。壞陂方怒號。遐毗病瘠土。不肯昏作勞。滅裂復滅裂。晚秧如牛毛。空餘朝氣白。浮浮濕弓刀。官稱勸農使。臨風首頻搔。

甘雨應祈三絕

晚稻成苞未肯肥。鶉鳩啼曉雨來時。黃紬被冷初眠覺。先向芭蕉葉上知。

數日雖蒙靈霽霑，  
過塵終恨太廉纖。  
今朝健起巡檐看，  
恰似廬山看水簾。  
高田一雨免飛埃，  
上水網船亦可催。  
說與東江津吏道，  
打量今晚漲痕來。

與鄭少融趙養民二使者訪古訾家洲歸憩松關二君欲助力興廢戲書此付長老善良以當疏頭。

飄飄竹雨潤輕裘，  
嫋嫋松風繫小舟。  
安得從容興廢手，  
越人重上訾家洲。

淳熙甲午桂林鹿鳴燕輒賦小詩少見勸駕之意。

維南吾國最多儒，  
聳看招招赴隴書。  
竹實秋風辭穴鳳，  
桃花春浪脫淵魚。  
月宮移種新栽桂，  
江水朝宗舊繫渠。  
況有狀頭坊井上，  
明年應表第三閭。

郡人曹鄴及第詩云：我到月宮收得種，爲君移向故園栽。今歲用故事。植桂正夏進德二堂之下。又復朝宗古渠。以應文章應舉之識。趙觀文、王世則亦郡人。皆魁天下。故詩中悉及之。

逍遙樓席上贈張邦達教授張癸未省闈門生也同年進士俱會樓上者七人。

疇昔金門看選賢，  
一星終矣半英躔。  
誰憐蠻府清池句，  
不著南山捷徑鞭。  
作者七人茅瘴地，  
肅霜九月菊殘天。  
浮生聚散如風雨，  
同倚東樓豈偶然。

畫工李友直爲余作冰天桂海二圖。冰天畫使北虜渡黃河時。桂海畫游佛子巖道中也。戲題。

許國無功浪著鞭，  
天教飽識漢山川。  
酒邊蠻舞花低帽，  
夢裏胡笳雪沒韉。  
收拾桑榆身老矣，  
追隨萍梗意茫然。  
明朝重上歸田奏，  
更放岷江萬里船。

耳鳴戲題

歷歷從何起。泠泠與耳謀。人言衰相現。我以安心求。遠磬山房夜。寒蛩隴樹秋。圓通無別法。但自此根修。  
復作耳鳴二首

至音豈寂透希夷。珍重幽田爲發揮。妙用何關新卷葉。圓通自有倒聞機。夢中鼓響生千偈。覺後春聲失百非。寄語爵陰吞賊道。玉牀安穩坐朱衣。

東極空歌下始青。西方寶網奏韶英。不須路入兜元國。自有音聞室筏城。牛蟻誰知牀下。雞蠅任向夢中鳴。如今却笑難施種。無耳何勞強聽聲。

碧虛席上得趙養民運使寄詩。約今晚可歸。次韻迓之。

偶攜尊酒上屏顏。忽憶行人瘴霧間。便好來分蒼石坐。已教不鎖翠雲關。

寒夜

萬象闐無語。一蛩吟獨譁。肅肅月浸樹。滿庭穠李花。風從月中來。吹我兩鬢華。北斗聲迴環。南斗亦橫斜。人生幾良夜。吾行久天涯。離居隔江漢。何由寄疏麻。

甲午除夜。猶在桂林。念致一弟使虜。今夕當宿燕山。會同館兄弟。南北萬里。感悵成詩。

把酒新年一笑非。鵲鴿原上巧相違。墨濃雲瘴我猶住。席大雪花君未歸。萬里關山燈自照。五更風雨夢如飛。別離南北人誰免。似此別離人亦稀。

乙未元日用前韻書懷今年五十矣

浮生四十九俱非。樓上行藏與願違。縱有百年今過半。別無三策但當歸。定中久已安心竟。飽外何須食

肉飛若使一丘并一壑。還鄉曲調儘依稀。儘乃俗字。

再用前韻時被命帥蜀。

休論今昨總皆非。世味誠甘與我違。蜀道雖如履平地。杜鵑終勸不如歸。三冬自苦坐毛穎。一夢微官陪蠶飛。夜久南枝翻倦鵲。茫茫月白衆星稀。

與同僚遊栖霞洞極深遠。中有數路。相傳有通九疑者。燭將盡乃還。飲碧虛上。陳仲思用二華君韻賦詩。卽席和之。

竹杖芒屨俗網疎。每逢絕勝更踟蹰。但隨歧路東西去。莫計光陰大小餘。彷彿桃源猶舞鳳。辛勤李白謫騎魚。今朝眞作遊仙夢。不似騷人賦子虛。

施元光在崑山病中遠寄長句次韻答之

四海飄蓬客舍邊。幾多雲水與風煙。絕無膂力驅長轡。空有孤忠誓大川。參井忽隨征馬上。斗牛應挂故山前。親交情話知何許。詩到天涯喜欲顛。

次韻趙養民碧虛坐上

已將山色染眉黛。更挽江波添酒壘。珍重江山勸人醉。笑人驅馬惺惺迴。

贛州明府楊同年挽歌詞二首

拱壁溫無類。深蘭遠自芳。清班孤玉笋。薄宦老銅章。傳業麒麟子。承家鴻鴈行。門闌自簪笏。吾獨憾堂堂。憶昔龍門化。曾容鴈塔陪。逡巡九閩過。迢遞一書來。未報錯刀贈。驚傳丹旆迴。辰陽隔江渚。空步楚詞哀。

此页空白

# 石湖居士詩集卷十五

初發桂林。有出嶺之喜。但病餘便覺登頓。至靈川疲甚。自歎羸軀。乃無一可。偶陸融州有使來。書此寄之。

桂林獨宜人。無憶古所傳。北客守炎官。恃此以泰然。堂高愜宴坐。訟簡容佳眠。不計身落南。璿柄三回天。今朝遂出嶺。歡呼繫行纏。買免脫豐草。池魚躍清淵。那知多病身。久靜翻懷安。長風蕩籃輿。簾箔飄以翻。靈泉路喫蹶。僕夫告頽肩。我亦頭岑岑。中若磨蟻旋。走投破驛宿。強飯不下咽。茲事未渠央。萬里蜀道難。十年故倦遊。況乃成華顛。蠶老當作繭。不繭夫何言。

## 甘棠驛

萬里三年醉嶺梅。東風刮地馬頭迴。心勞政拙無遺愛。慚向甘棠驛裏來。

靈泉驛後有龍惠泉。

泉螭無語笑經過。欲拊焚鰥奈拙何。孤奉勺恩雖出嶺。歡顏終少汗顏多。

嚴關或謂之炎關。桂人守險處。朔雲多。不入關。關內外風氣迥殊。人以爲南北之限也。

回看瘴嶺已無憂。尚有嚴關限北州。裹飯長歌關外去。車如飛電馬如流。

施進之追路出嚴關且寫予真戲題其上

喚渡牂牁瘴水濱。嚴關關外又逢春。神仙富貴俱何在。且作全家出嶺人。

興安乳洞有上中下三巖。妙絕南州。率同僚餞別者二十一人遊之。

山水敦夙好。煙霞猶奇懷。向聞乳洞勝。出嶺更徘徊。雪林縞萬李。東風知我來。華裾繡高原。故人紛後陪。繫馬玉溪橋。嵌根豁崔嵬。蕩蕩碧瑤宮。冰泉漱牆隈。芝田漑石液。深畦龍所開。勾我一掬慳。類此炎州埃。仍呼輪袍舞。醉倒瑞露杯。但恐驚山靈。腰鼓轟春雷。薪翁雜餉婦。圓視歡以咍。茲巖何時鑿。閱世幾劫灰。始有此客狂。後會真悠哉。南遊冠平生。已去首猶回。歲月可無紀。三洞俱磨崖。會有好事者。摩挲讀蒼苔。

鑱背在興安縣五里所。秦史錄所作也。迎海陽水。壘石爲壇。前銳如鑱。衝水分南北。下爲洲瀕二江。功用奇偉。余交代李德遠嘗修之。

導江自海陽。至縣迺瀾迤。狂瀾旣奔傾。中流遇鑱背。分爲兩道開。南灘北湘水。至今舟楫利。楚粵徑萬里。人謀欽天造。史祿所經始。無謂秦無人。虎鼠用否耳。紫藤纏老蒼。白石溜清泚。是聞可作社。牲酒百世祀。修廢者誰歟。配以臨川李。

大通界首驛

愚悃無華敢自欺。寸誠珍重吏民知。東風重倚庭前樹。送別人情似到時。

陳仲思。陳席珍。李靜翁。周直夫。鄭夢授。追路過大通。相送至羅江分袂。留詩爲別。

相送不忍別。更行一程路。情知不可留。猶勝輕別去。二陳拱埤壁。僊李瑚璉具。周子雋拔俗。鄭子秀風度。嗟我與五君。曩如栖鳥聚。偶投一林宿。飄搖共風雨。明發各飛散。後會渺何處。栖鳥固無情。我輩豈漫與。班荆一炊頃。聽此昆弟語。把酒不能觴。有淚若兒女。脩程各著鞭。慷慨中夜舞。功名在公等。臞儒老農圃。

懷桂林所思亭

寥山奇絕送歸時。曾榜新亭號所思。桂水祇今湘水外。他年空有四愁詩。

羅江

嶺北初程分外貪。驚心猶自怯晴嵐。如何花木湘江上。也有黃茅似嶺南。

初入湖湘懷南州諸官

今晨入湖南。甘土絳以紫。厥壤既殊異。風氣當稱此。回思始安城。舊籍贅楚尾。實惟荊州隸。零陵之南鄙。時雪度嚴關。物色號清美。儻以土宜觀。尚非清湘比。何況引而南。焦茅數千里。向我作牧時。客過不停軌。憧憧走官下。既至輒咎悔。書來無別語。但說瘴鄉鬼。我今幸北轅。又念衆君子。懷哉千金軀。博此五斗米。作詩諷方來。南遊可以已。車輪倘無角。吾詩亦金柅。

清湘縣郊外雜花盛開有懷石湖

午行清湘縣。妍煖春事嘉。柴荆鬧桃李。冥冥一川花。故園豈少此。愈此百倍加。我寧不念歸。顧作失木鴉。百年北窗涼。安用天一涯。君恩重喬嶽。敢計征路賒。鄉心與官身。繫柅方聲牙。橘柚走珍貢。何如繫匏瓜。明當復露奏。天日臨幽遐。儻許清江使。曳尾還汙邪。

珠塘未至清湘二十里。

林茂鳥烏急。坡長驢馱鳴。坐輿猶足痺。負笈想肩頰。廢廟藤遮合。危橋竹織成。路傍行役苦。隨處有柴荆。

題湘山大施堂山中祖師號無量壽。眞身塔在焉。



重倚春林淚竹枝。南遊風物鬢成絲。難尋桂嶺千峯夢。更了湘山一段奇。來去別無心外法。行藏休問塔中師。若論大施門前事。竿木逢場且賦詩。

清湘驛送祝賀州南歸

海內交情兩斷金。離歌倡和俱吳音。桃花如雨暮春酒。竹箭有筠他日心。萬里書來蜀道易。四愁詩成湘水深。田園將蕪各早計。一棹五湖能見尋。

清湘驛送王柳州南歸二絕

南歸北去路茫茫。不是行人也斷腸。可惜湘江春夜月。落花時節照離觴。我已兼程無脚力。君猶追路有襟期。從今月下共花下。誰復醉吟先和詩。

七里店口占

分手暮江寒。徘徊立馬看。尋常相見易。倍覺別離難。

全守支耀卿賦餞七里。倅楊仲宣復攜具至深溪酌別。且乞余書。走筆作此。兼寄耀卿。

店舍煙火寒。塵沙亭堠遠。嫣紅糝芸綠。春事亦已晚。年芳去踐踐。江水來袞袞。故人瀟湘逢。留落一笑莞。已張七里飲。更出深溪餞。草間豔紅粉。竹裏趣廚傳。故意如許長。由來共鄉縣。愧我不能觴。負此離歌囁。別愁滿天末。不醉何由遣。却憶支使君。風前白波捲。

深溪鋪中二絕。追路寄呈元將仲顯二使君

賀州歸去柳州還。分路千山與萬山。把酒故人都別盡。今朝真箇出陽關。

祇有南風捲路塵。斷無南客送車輪。故人合在瀟湘見。却向瀟湘別故人。

戲題愚溪

碧湍漱白石。沄沄復湯湯。既爲人所愚。安用爾許忙。我昔曾經過。重來已三霜。無事蹀雙足。奔走寧非狂。溪流到江平。翻笑客路長。豈不有歲晚。乞身還故鄉。

初泛瀟湘

六槳齊飛急下灘。碧琉璃上雪花翻。越來溪色清如此。只欠磯頭一釣竿。

湘口夜泊南去零陵十里矣。營水來自營道。過零陵下。湘水自桂林之海陽至此。與營會合爲一江。

我從清湘發源來。直送湘流入營水。故人亭前合江處。暮夜檣竿矗沙尾。却從湘口望湘南。城郭山川恍難紀。萬壑千巖詩不徧。惟有蒼苔痕屐齒。三年瘴霧亦奇絕。浮世登臨如此幾。湖南山色夾江來。無復瑤簫插天起。坡陀狼石蹲清漲。澹蕩光風浮白芷。騷人魂散若爲招。傷心極目春千里。我亦江南轉蓬客。白鳥愁煙思故壘。遠遊雖好不如歸。一聲鷓鴣花如洗。

南臺瑞應閣用壁間張安國韻

衝雨上山頭。臨雲看山脚。松間一彈指。開此寶樓閣。直簷才畫錢。拂子不暇握。小偈出雷音。千古驚猿鶴。

湘潭

暮雨檣竿縣一灣。長官立馬水雲間。風吹江沫浮浮去。誰在沙頭閉戶閒。

泊長沙楚秀亭

雨從湘西來。波動南楚門。不知春漲高。但怪江水渾。舟行風打頭。陸行泥沒鞍。且登裴公臺。半日心眼寬。

題嶽麓道鄉臺

山外江水黃。江外滿城綠。城外杳無際。天低到平陸。長煙貫楚尾。遠勢帶吳蜀。故園東北望。遊子闌干曲。

寄題潭帥王樞使佚老堂

孺子滄浪濯纓處。千載新堂來卜鄰。潦收無波徹底靜。東湖之水堂中人。濛濛花譜勝洛下。竹西藥闌來海瀨。新篁綠沉桂丹渥。嶽立奇石蒼苔斂。賞心滿眼伴閉戶。天風夜下扶車輪。胸中種蠹妙經濟。鬢鬚白雪朱顏春。蒼生未佚身未老。斯堂未可忘斯民。四年西略可萬世。孤撐獨立扛千鈞。匹馬幡幡恃天日。危言岌岌愁鬼神。浮生蚤休信不惡。持此欲去非吾聞。客遊瀟湘逢騎吹。知公已爲蒼生起。公今少勞佚者多。湛輩乃可寒江蓑。王公自言堂去東湖頃步。新得彭州牡丹。揚州芍藥。丹桂。貓頭竹。并徐氏五怪石列堂下。

湘陰橋口市別游子明

馬首欲東舟欲西。洞庭橋口暮寒時。三年再別子輕去。萬里獨行吾蚤衰。遙憶美人湘水夢。側身西望劍門詩。老來不灑離亭淚。今日天涯老淚垂。

竈渚

白魚出水臥銀刀。紫筍堆盤脫錦袍。捫腹將軍猶未快。棹船西岸摘萸蒿。

大波林

湖路荒寒又險艱。大千空水我居間。篙師晚始分南北。指點青青漢口山。

連日風作洞庭不可渡出赤沙湖

金沙堆前風未平。赤沙湖邊波不驚。客行但逐安穩去。三十六灣漲痕生。滄洲寒食春亦到。荻芽深碧蘆芽青。汨羅水飽動荆渚。嶽麓雨來昏洞庭。大荒無依飛鳥絕。天地惟有孤舟行。慷慨悲歌續楚些。彷彿幽瑟迎湘靈。黃昏慘淡檣極浦。雖有漁舍無人聲。冬湖落瀟此暫住。春潦怒長隨傭耕。吾生一葉寄萬木。況復搖落浮滄溟。漁蠻尙自有常處。羈官方汝尤飄零。

寄題贛江亭陳李陵贛州詩云·新作此亭·泉使李正之題其榜·要予詩·

二水之會新作亭。主人文章子墨卿。我記斯亭且不朽。千載當與文俱鳴。題榜誰歟漢使者。風流好事節儒雅。平生兩君吾故人。安得繫馬亭塔下。鼓旗西征上奔瀧。所思不見心難降。瞿塘縱有文麟雙。愛莫致之章貢江。

涪溪道中

江流去不定。山石來無窮。步步有勝處。水清石玲瓏。安得扁舟繫絕壁。臥聽漁童吹短笛。弄水看山到日明。過盡行人不相識。

夜泊灣舟大風雨未至衡州一百二十里

阿香攪客眠。夜半驅疾雷。空水受奇響。如從船底來。嘈嘈雨窗鬧。軋軋風柁開。睡魔走辟易。耳界愁喧隘。有頃飄驟過。灘聲獨鳴哀。燈婢燭囊衣。篙師理檣桅。煩擾到明發。村雞亦啾啾。

泊衡州

客裏仍哦對雨吟。夜來星月曉還陰。空江十日無春事。船到衡陽柳色深。

步入衡山

應有人家住隔溪。綠陰亭午但聞雞。松根當路龍筋瘦。竹筍漫山鳳尾齊。墨染深雲猶似瘴。絲來小雨不成泥。更無騎吹喧相逐。散誕閒身信馬蹄。

重遊南嶽

焚香鎮南殿。過銓德觀。醮注生祠。庭觀道君玉符王七及八角玉印。經方四寸許。文曰注生真君。印。雨中登山。遊南臺福嚴。至瑞應。擲鉢天柱諸峯之上。寒甚。病衰。不至上封而返。

捨舟得馬如馭氣。步入青松三十里。我從巒嶺瘴煙來。不怕雨雲埋嶽趾。憶昔南征款廟庭。往來無恙神所社。當時已有歸田願。帝臨此心如白水。煌煌南正館於東。手握八觚溫玉璽。駿奔灑霍左右輔。好生不殺扶炎紀。崇禋竣事曉壇空。躋攀小試青鞋底。不知雲磴幾千丈。但見漫山白龍尾。石頭招我上南臺。瑞應闌干天半倚。福嚴鐘聲過橋來。彷彿三生如夢裏。堂中尊者已先去。苔鎖巖扉何日啓。竹嫌磽确老逾瘦。松畏高寒蟠不起。懼儒尙病怕深登。幽討未窮行且止。我評七十二高峯。鬱律穹窿少觀美。儼然可瞻不可玩。往往雄爭如負屨。乃知嶽鎮蓋深厚。不與他山爭秀偉。區區獻狀眩兒童。乳洞淡巖真戲耳。

四明人董嶧久居嶽市乞詩

祝融峯下兩逢春。雨宿風餐老病身。莫笑五湖萍梗客。海邊亦有未歸人。

三月十五日華容湖尾看月出

雲銷澧陽風。月生岳陽水。誰推赤金盃。湧出白銀地。徘徊忽騰上。蹀蹀恐頓墜。稍高輪漸安。飛彩到篷背。晶晶浪皆舞。鬢鬢星欲避。兜羅世界網。普現無邊際。官居東戶庭。有眼如幻翳。向非行大荒。寧有此巨麗。乘除較得失。漂泊非左計。妻孥競驩譁。渠亦知許事。

釣池口阻風迷失海道

回風打船失。西東柁擬撈。弱無適從。三老號呼鐵纜墜。招頭搥鼓驅魚龍。千篙撐折百丈斷。日暮稍與洪相通。推移尋尺力千里。時有黃帽來言功。康莊大達世不乏。乃獨蹇產濤波中。一官橫起險易相。剎那憂喜隨兒童。漲湖連天遠日斷。且復加飯追萍蓬。蒲團坐煖看香篆。作止任滅如頑空。

鼎河口枕上作

漂泊離巢燕。彎跼負殼蝸。瘦嫌莞席硬。老覺畫屏奢。報道帆當落。傳呼鼓已撾。且投人處宿。未到已聞蟻。

安鄉縣西晚泊

水闊鳥烏倦。墟寒童僕飢。一灣村縣過。百折暮江遲。曉夢孤燈見。春陰病骨知。簡書寧不畏。旅力奈先疲。

澧陽江

順流下沅江。溯流上澧浦。水深蘭芷寒。漂搖憚風雨。采采不盈掬。何由寄遠渚。洞庭浮天白。遐矚莽吳楚。有懷獨晤歎。榜聲與人語。暮夜卽維舟。蒼茫定何許。

澧浦

葦岸齊齊似碧城。江船卷岸逆風行。綠蘋白芷俱憔悴。惟有萋蒿滿意生。

澧江漁舍安鄉澧陽之間。自兵火後。瘡殘猶未復。

狡窟空來四十年。沼江猶自少炊煙。茫茫曠土無人問。蘆荻春深綠滿川。

孫黃渡自此登陸。至公安渡江。過沙頭。

捨舟從陸更間關。徑仄仍荒亦未乾。棘刺近人牢閉眼。泥塗兀馬緊扶鞍。茶山盜藪路程惡。麥壠人家懷抱寬。擔僕輿夫盡劬瘁。病翁那得更加餐。

潺陵

舟橫攸河水。馬滑潺陵道。百里無鋤犁。閒田生春草。春草亦已瘦。栖栖晚花少。落日見行人。愁煙沒孤鳥。老翁雪髯鬢。生長識羣盜。歸來四十年。墟里迹如掃。莫訝土毛稀。須知人力槁。生聚何當復。茲事恐終老。人言古戰場。瘡痍難療。誰使至此極。天乎吾請禱。

將至公安

前村後村啼杜宇。伴人憂煎與人語。雲寒日薄春一夢。地闊天低淚如雨。我馬虺隤我僕補。豈不懷歸畏簡書。公安縣前酒可沽。不如且聽提胡盧。

公安渡江

食罷雨方作。起行泥已深。伴愁多楚些。吟病獨吳音。莫怨馬蹄滑。須愁蠶事侵。梅黃時節是。未可決晴陰。

荆渚堤上

原田何莓莓。野水亂平楚。大堤少人行。誰與藝稷黍。獨木且百歲。甃髀立水滸。當年識兵燼。見赦幾樵斧。

摩挲欲問訊。恨汝不能語。薄暮有底忙。沙頭聽鳴榔。

渚宮野步題芳草

草色沐新雨。綠潤如得意。披拂欲生煙。萋萋著巾袂。天涯各芳春。秦吳千萬里。故人攀桂枝。今夕念游子。

發荊州自此登舟至夷陵。

初上篷籠竹竿船。始知身是劍南官。沙頭沽酒市樓煖。徑步買薪江墅寒。自古秦吳稱絕國。于今歸峽有名灘。千山萬水垂垂老。只欠天西蜀道難。

虎牙灘又名金門十二倍。屬夷陵。

傾崖溜雨色。慘淡水墨畫。辛夷碎花縣。瘦木老藤挂。翠莽楚甸窮。黃流蜀江下。一灘今始嘗。三峽此其亞。雨點鼓士摻。雲騰挽夫跨。驚心度石林。破眼見村舍。牛眠草色裏。犬吠竹林罅。步頭可檣船。安穩睡殘夜。

峽州至喜亭

斷崖臥水口。連岡抱城樓。下有吳蜀客。檣竿立滄洲。雨後長江急。黃濁如潮溝。時見山峽船。鐃鼓噪中流。適從稠灘來。白狗連黃牛。滙潰大如屋。九死爭船頭。人鮮尙脫免。虎牙不須憂。

初入峽山效孟東野自此登陸。至秭歸。

峽山偪而峻。峽泉湍以礫。峽草如毳毛。峽樹多樛枝。峽禽惟杜鵑。血吻日夜啼。峽馬類黃狗。不能長鳴嘶。峽曉虎跡多。峽暮人跡稀。峽路如登天。猿鶴不敢梯。僕夫負嶠哭。我亦呻吟悲。悲吟不成章。聊賡峽哀詩。

士門



汗泥汨峻阪。狼石臥中路。睥睨無敢前。趨起屢却顧。長繩引籃輿。前輓後推去。吏士更叫號。作氣欲飛度。顛墜較分寸。商略營躡步。須臾氣亦竭。一一汗如雨。

桃花舖

老蕨漫山鳳尾張。青楓直榦如攢槍。山深嵐重鼻酸楚。石惡淖深神慘傷。陰崖風生吹客急。草中枯株似人立。映晡卓犖先下程。將士黃昏始相及。

覆盆舖

三登三降岡始斷。一步一休日欲斜。濁酒半瓶不得煖。覆盆有舖無漿家。

小望州

峯頭高絕鄰。四瞰若窺井。小山萬蟻垤。大山拊其頂。叢霄一握近。罡風振衣冷。似聞天人語。笑我雪垂領。曩侍玉案香。空佩太清境。獨下赤城戲。俯仰一枰頃。豈其厭晨華。嗅此腥腐鼎。揮手謝天人。伶俚愧孤影。來償繭足債。尙欠界天嶺。老矣且勸游。歸期行可請。

大望州

望州山頭天四低。東瞰夷陵西秭歸。峽江微茫細如帶。江外千峯青打圍。黃牛廟磯石如劈。想看驚湍虎鬚白。水行陸走俱險艱。安得如鳥有羽翼。

一百八盤

疇昔辭桂林。自謂已出嶺。蛻蟬蠻煙中。恍若醉夢醒。今來峽山路。步步躡雲頂。仍聞蚯蚓瘴。顧與嶠南等。

平生行路難。驚浪兀漂梗。迷塗茲益遠。鳥道非人境。老矣法富佚。懷哉跡可屏。拜手天東南。亟上歸田請。  
火墨坡下嶺

清晨入岑蔚。嵐重寒颼颼。忽聞黃鸝語。方悟麥始秋。旅食法當瘦。遠行人所愁。況復深山中。不與和氣游。  
苦辛那敢憚。病悴良可憂。徒憂亦無益。聊作商聲謳。

八場平聞猿

清猿冷冷鳴玉簫。三聲四聲高樹梢。子母聯拳傳枝去。忽作哀厲長鳴號。天寒林深山石惡。行人舉頭雙  
淚閣。雪澗琴心未足悲。須寫峽中腸斷時。琴曲有雪澗聞猿。

鑽天三里

非岡非嶺復非坡。黃鵠不度吾經過。妻孥下行啼且笑。聯手相攜如踏歌。風吹汗乾人力盡。屐齒與石方  
相磨。鑽天三里似千里。四十八盤將奈何。

蛇倒退

山前壁如削。山後崖復斷。彘吾達隴首。如海到彼岸。那知下嶺處。慄甚履冰戰。牽前帶相挽。絕後衣盡綻。  
健倒輒尋丈。徐行塵分寸。上疑緣竹竿。下劇滾金彈。豈惟蛇退舍。飛鳥望崖反。稍喜一徑平。猶有千石亂。  
仍逢新燒畚。約略似耕畔。心知人境近。顰末百憂散。山民弗數把。鬼質犢子健。腰鑊走迎客。再拜復三歎。  
謂匪人所蹊。官來定何幹。儻爲飢火驅。平地豈無飯。意者官事迫。如馬就羈絆。我乃不能答。付以一笑粲。

大丫隘

峽行五程無聚落。馬頭今日逢耕鑿。麥苗疎瘦豆苗稀。椒葉尖新柘葉薄。家家婦女布纏頭。背負小兒領垂瘤。山深生理却不乏。人有銀釵一雙插。

# 石湖居士詩集卷十六

麻線堆峽口驛前·大山崛起·舊路攀援而上·縈紆如線·十五年前·浮圖德寶始沿澗伐木·作新路·不復登山·余觀峽路皆未嘗經修·感德寶之事·作麻線堆詩一首·以風夔路使者·及歸峽二州長吏·沈、葉、管、熊四君·

雲木盪胸起·鬱峨一峯危·上有路千折·纏縷如縈絲·是爲麻線堆·厥險天下稀·偏仄容半足·顛墜寧復稽·騰猱尙愁苦·游子將安之·浮屠德寶者·悲智緒等慈·隨山刊古木·尋壑得長磯·輿梁捷飛度·布石綿階梯·自從新路改·重趺無齋咨·縣有孫少府·琬琰劖文詞·勿云此事小·惟有行人知·况觀峽山路·由來欠平治·官吏旣弗跡·誰肯深長思·天險固自若·當令略成蹊·土工運舂鍤·石工操鑿椎·烈火敗礮确·築沙填隙巖·多用百夫力·遠無五旬期·但冀米鹽給·不煩金幣支·非客敢竊議·道傍詢旄倪·身雖雪山戍·亦願助毫釐·工費嗟小哉·政須賢有司·東有管夷陵·西有葉秭歸·上維沈隱侯·夔臺今吏師·下維熊繹孫·長材佐州麾·豈吾金閨彥·不如林下緇·縣知識克合·了此一段奇·舟楫避潢潦·置郵疾飛馳·憧憧吳蜀客·來往當無時·仍磨鑽天石·大書四賢詩·不佞願乘筆·遠寄峽口碑·

## 戲書麻線堆下

一身半世走奔波·疑是三生宿債多·折券已饒麻線嶺·責債難免竹竿坡·

## 胡孫愁

傾崖當胸石齧足。失勢毛鷲槁幽谷。王孫却走斷不到。惟有哀猿如鬼哭。僕夫酸嘶訴塗窮。我亦付命無何中。悲風忽來木葉戰。落日虎嘯枯竹叢。

判命坡

鑽天嶺上已飛魂。判命坡前更駭聞。側足三分垂壞磴。舉頭一握到孤雲。微生敢列千金子。後福猶幾萬石君。早晚北窗尋噩夢。故應含笑老榆粉。

千石嶺

晨光挂高嶺。晴色媚遠客。哀湍吼叢薄。宿霧裊絕壁。露重薊花紫。風來蓬背白。迷塗朴渥跳。飲澗於菟跡。層巔多折木。迮磴有飛石。不知山幾重。杳杳入叢碧。

九盤坡布水

莫惜縈迴上九盤。洗心雙瀑雪花寒。野翁酌水煎茶獻。自古人來到此難。

荒口

十步九喫蹶。百夫半躑跚。豁然鳥道窮。努力造其巔。謂是嶺頭了。一峯復當前。既無反顧法。仰望心茫然。

四十八盤

詩曲不前如宦拙。欵傾當面似交難。若將世路比山路。世路更多千萬盤。

紫荷車峽山此藥甚多。

綠英吐弱線。翠葉抱修莖。蠹如青旄節。草中立亭亭。根有却老藥。鱗皺友松苓。長生不暇學。聊冀病身輕。

錦帶花 東南甚珍此花。峽中漫生山谷。

妍紅棠棣粧，弱綠薔薇枝。小風一再來，飄飄隨舞衣。吳下嫵芳檻，峽中滿荒陂。佳人墮空谷，皎皎白駒詩。  
入秭歸界

山根繫馬得漿家，深入窮鄉事可嗟。蚯蚓祟人能作瘴，茱萸隨俗強煎茶。幽禽不見但聞語，野草無名都著花。窈窕崎嶇殊未艾，去程方始問三巴。

早發周平驛過清烈祠下屈平祠也。祠前有獨醒亭。

物色近人境，喜歡嚴曉裝。山月雞犬聲，野風麻麥香。登嶺既開豁，入林更清涼。三呼獨醒士，儻肯釀我觴。

白狗峽陸路亦自峽上過西岸。有玉虛洞。

江紋圓復破，樹色昏還明。連灘竹節稠，洶怒奔夷陵。石磯鐵色頑，相望如姦朋。踞岸意不佳，當流勢尤凜。山回水若盡，但見青蛉嫻。慘慘疑鬼寰，幽幽無人聲。顛沛安危機，艱難古今情。俯窺得目眩，却立恐神驚。白雲冒巖扉，下維玉虛庭。神仙坐閱世，應笑行人行。

秭歸縣周封楚子熊繹於此縣。字宋玉宅。東山清烈祠。屈原宅也。

永日貪程客，長年弔古詩。悲秋荒故宅，負石慘空祠。峻壁鴉翻倦，高畬麥秀遲。窮山熊繹國，偏仄建邦時。  
歸州竹枝歌二首

東鄰男兒得湘纍，西舍女兒生漢妃。城郭如村莫相笑，人家伐閱似渠稀。  
東岸鸞船拋石門，西山炊煙連白雲。竹籬茅舍作晚市，青蓋黃旗稱使君。

昭君臺在興山界中。鄉人憐昭君。築臺望之。下有香溪。然三峽女子十人九瘦。

天生尤物元無禪。萬里巴村出青塚。高臺望思臺已荒。東風溪漲流水香。嬋娟鍾美空萬古。翻使鄉山多醜女。灸眉作癩亦不須。人人有瘦如瓠壺。

人鮮瓮在歸州郭下。長石截然。據江三之二。水盛時。濱渚極大。號峽下最險處。東岸卽屈原宅。自此復登

舟至巫山。

懷沙祠下鐵色礮。中流束湍張禍機。與齋俱入彼可弔。乘流而下吾亦危。江河難犯一至此。天地好生安取斯。朝歌勝母古尙諱。我其覆醢航秭歸。

巴東峽口

水宿頻欹側。徒行又險艱。舟危神女峽。馬瘦鬼門關。照夜燒畬隴。緣雲種笮山。催成頭雪白。休說鬢絲斑。初入巫峽

鑽火巴東岸。縱金峽口船。東江崖欲合。漱石水多漩。卓午三竿日。中間一罅天。偉哉神禹跡。疏鑿此山川。

將至巫山遇雨數日快晴。水落丈餘。舟人方以爲喜。雨作。卽水又長矣。

峽行水落惟憂雨。通昔淋浪怨行旅。千山萬山生白煙。陽臺那得雲如許。牋詞騰告翠帷僊。句我一晴翻手間。放開十二峯頭色。重賦碧叢高插天。

巫山高并序

余舊嘗用韓無咎韻。題陳季陵巫山圖。考宋玉賦意。辨高唐之事甚詳。今過陽臺之下。復賦樂府一首。

世傳瑤姬爲西王母女。嘗佐禹治水。廟中石刻在焉。

濕雲不收煙雨霏。峽船作灘梢。廟磯杜鵑無聲猿叫斷。惟有飢鴉迎客飛。西真功高佐禹跡。斧鑿鱗皴倚天壁。上有瑤簪十二尖。下有黃湍三百尺。蔓花蚪木風煙昏。蘚珮翠帷香火寒。靈旂飄忽定何許。時有行人開廟門。楚客詞章元是諷。紛紛餘子空嘲弄。玉色頰顏不可干。人間錯說高唐夢。

刺瀆淖井序

瀆淖盤渦之大者。峽江水壯則有之。或大如一間屋。相傳水行峽底。遇暗石則瀆起。已而下旋爲渦。然亦未嘗有定處。或無故突然而作。叵測也。舟行遇之。小則欹傾。大則與齋俱入。險惡之名聞天下。峽江饒暗石。水狀日千變。不愁灘瀧。但畏瀆淖。見人言盤渦耳。夷險顧有間。仍於非時作。未可一理貫。安行方熨穀。無事忽翻練。突如湯鼎沸。翁作茶磨旋。勢迫中成窪。怒霧外始暈。已定稍安慰。儻作更驚眩。漂漂浮沫起。疑有潛鯨噴。勃勃駭浪騰。復恐蟄鼈扑。篙師瞪褫魄。灘戶呀雨汗。逡巡怯大敵。勇往決塵戰。幸免與齋入。還憂似蓬轉。驚呼招竿折。奔救竹竿斷。九死船頭爭。萬苦石上牽。旁觀兢薄冰。撇過捷飛電。前余叱馭來。山險回嘗徧。今者擊楫誓。豈復憚波面。澎澎三峽長。颯颯一葦亂。旣微掬指忙。又匪科頭慢。天子賜之履。江神敢吾玩。但催疊鼓轟。往助雙檣健。

嘲峽石井序

峽山江瀆。亂石萬狀。極其醜怪。不可形容。舉非世間諸所有石之比。走筆戲題。且以紀異。

峽山狼無情。其下多醜石。頑質賈憎垂。傀狀發笑啞。粗類墳壤黃。沉瀆鐵矢黑。或如溝泥浣。或似凍壁坼。



堆疑聚廩粟。墜若壞城甍。槎牙鏤朽木。狼籍委枯骸。礪礪包羸蚌。淋漓鋼鉛錫。縱文瓦溝壠。橫疊衣摺襞。鱗皴斧鑿餘。坎窞蹴踏力。云何清淑氣。孕此詭譎跡。我本一丘壑。嗜石舊成癖。端溪紫琳腴。洮河綠沉色。階册截肪膩。泗磬鳴球擊。嵌空太湖底。偶立韶江側。真陽劊千巖。營道剗寸碧。倦游所閱多。未易一二籍。竭來茲山下。刺眼昔未覲。或云峽多材。奇秀鬱以積。絕代昭君村。驚世屈原宅。東家兩兒女。氣足豪萬國。山石何重輕。奚暇更融液。我亦味其言。作詩曉行客。

勞畬耕并序

畬田峽中刀耕火種之地也。春初斫山。衆木盡蹶。至當種時。伺有雨候。則前一夕火之。藉其灰以糞。明日雨作。乘熱土下種。卽苗盛倍收。無雨反是。山多磽确。地力薄。則一再斫燒。始可藝。春種麥豆。作餅餌。以度夏。秋則粟熟矣。官輸甚微。巫山民以收粟三百斛爲率。財用三四斛。了二稅。食三物以終年。雖平生不識秬稻。而未嘗苦飢。余因記吳中號多嘉穀。而公私之輸顧重。田家得粒食者無幾。峽農之不若也。作詩以勞之。

峽農生甚艱。斫畬大山巔。赤埴無土膏。三刀財一田。頗具穴居智。占雨先燎原。雨來亟下種。不爾生不蕃。麥穗黃剪剪。豆苗綠芊芊。餅餌了長夏。更遲秋粟繁。稅畝不什一。遺秉得饜餐。何曾識秬稻。捫腹嘗果然。我知吳農事。請爲峽農言。吳田黑壤腴。吳米玉粒鮮。長腰匏犀瘦。齊頭珠顆圓。紅蓮勝彫胡。香子馥秋蘭。或收虞舜餘。或自占城傳。早利與晚穰。濫吹甌噐間。長腰米狹長。亦名箭子。齊頭白。圓淨如珠。紅蓮色微赤。香子亦名九里香。斗米八數合作飯。芳香滿案。舜王稻魚頭無鬚。俗傳督餉燒種以與之。占城種。來自海南。穰稔稻禾。

價最賤。以上皆吳中米品也。不辭春養禾。但畏秋輸官。姦吏大雀鼠。盜胥衆螟蜥。掠剩增釜區。取盈折緡錢。兩鍾致一斛。未免催租瘢。重以私債迫。逃屋無炊煙。晶晶雲子飯。生世不下咽。食者疋游手。種者長流涎。不如峽農飽。豆麥終殘年。

巫山縣自此復登陸。至夔門縣前。掉石灘最險。登岸以過舟。謂之盤灘。城樓曰高唐門。此去盟唐不百里。

縣人以郭西流石堆爲水信。流石沒則灘漲如馬矣。

借馬巫山縣。盤舟掉石灘。梅肥朝雨細。茶老暮煙寒。門對高唐起。江從灩澦難。流堆三尺在。旅夢一枝安。自巫山遵陸以避黑石諸灘。大雨不可行。泊驛中一日。吏士自秭歸陸行者亦會。

巫山信是陽雲臺。客行五日雲不開。陰晴何常有朝暮。夜雨少休明復來。今朝水長不知數。沒盡山根蒼石堆。東磯西磯盡如削。大灘小灘俱若雷。不知瞿唐復何似。想見萬頃滄一杯。祇今水劑已壯矣。聞道陸程尤艱哉。摩圍隘口石生角。踢颯坡前泥似醅。眼前安得故園路。江沙江草使青鞋。

燕子坡

大山如牆缺。小山如塚壘。衆山直下看。方知此峯危。木末見夔峽。一溝盎春泥。中有天下險。造化真兒嬉。峯頂不滿笑。舟中鬢成絲。登高尙超覽。況乃絕俗姿。

鬼門關

天作隴頭石闕。人言要隔塵樊。百年會須作鬼。無事先穿鬼關。

離巫山好時。午後入瞿唐關。憩高齋半日。

一昨題詩訴苦霖。果然連夜卷曾陰。盡收行雨瑤姬賜。不徇世情巫峽心。喜鵲滿枝朝日淡。哀猿何處宿雲深。水門山徑高齋外。一枕清風屏萬金。高齋卽杜詩所謂暝色延山徑。高齋次水門者。

灑灑堆

灑灑之石誰劖鑿。惡駭天下形眇然。客行五月潦始漲。但見匹馬浮黃湍。時時吐沫作潰淖。潏潏有聲如粥煎。蜀江西來已無路。鑿山作澮方成川。瞿唐之口狹如帶。乃欲納此江漫漫。奔流下赴故偏仄。汝更爭道當其前。舟師欹傾落膽過。石孽水禍吁難全。山川丘陵皆地險。惟此險絕餘難肩。東坡筆端喙三尺。願與作賦評嘲喧。云非此石峽更怒。曰頭忽作傾城妍。我從巫山飛一棹。歡喜偶脫蛟龍涎。是非信否未暇詰。且上高齋清晝眠。

夔州竹枝歌九首

五月五日嵐氣開。南門競船爭看來。雲安酒濃麴米賤。家家扶得醉人迴。赤甲白鹽碧叢叢。半山人家草木風。榴花滿山紅似火。荔子天涼未肯紅。新城果園連灑西。枇杷壓枝杏子肥。半青半黃朝出賣。日午買鹽沽酒歸。纏婦趁墟城裏來。十五五市南街。行人莫笑女羅醜。兒郎自與買銀釵。白頭老媪簪紅花。黑頭姑娘三髻丫。背上兒眠上山去。採桑已閑當採茶。百衲畚山青間紅。粟莖成穗豆成叢。東屯平田秔米軟。不到貧人飯甑中。白帝廟前無舊城。荒山野草古今情。只餘峽口一堆石。恰似人心未肯平。

灩澦如樸瞿唐深。魚復陣圖江水心。大昌鹽船出巫峽。十日溯流無信音。  
當筵女兒歌竹枝。一聲三疊客忘歸。萬里橋邊有船到。繡羅衣服生光輝。

### 雲安縣

春暮子規少。日斜紅鵲飛。兩山多布水。一島幾柴扉。蚓吐無窮壤。人行不斷磯。巴陽昨夜雨。灘上水先肥。  
杜子美詩云。滄萬無杜鵑。雲安詩云。終日子規啼。今萬州外固不聞杜鵑。而雲安已自少矣。紅鵲飛時滿背純赤。或云即黃鵠也。峽中蚯蚓之盛。無如雲安。江濱墳壤。戢戢無際。又多巨石。岸有一石長里許者。杜子美詩云。禹功多斷石。其實甚長。兩山間雨後。瀑泉數十百處。尤可觀。

### 萬州自此後登陸。州號南浦郡。

晨炊維下巖。晚酌檣南浦。波心照州榜。雲脚響衙鼓。前山如屏牆。得得正當戶。西江朝宗來。循屏復東去。  
此萬州形勢也。惟親歷者。當知此言之工。官曹倚巖棲。市井喚船渡。瓦屋仄石磴。猿啼鬧人語。剔核杏餘酸。連枝茶剩苦。窮鄉固瘠薄。陋俗亦寒窶。土人賣杏。皆先別其核。取仁以爲藥也。土茶甚苦。不簡枝葉。雜茶黃煎之。營營謀食艱。寂寂懷軫訴。昔聞吏隱名。今識吏隱處。

### 橫溪驛感懷

行徧天涯與地隅。筋骸那比十年初。朱顏有酒且留住。白髮無方能掃除。未得歸田先作賦。專攻種樹已成書。祇今飛到南山下。猶解清晨出荷鋤。

### 午夜登蟠山

揮暑嚴夜裝。乘涼躡危嶠。猿依黑林號。鬼閃青炬嘯。驚鳥動危葉。吟蟲滿荒草。泉聲遠相隨。山色近如杳。夢猶風燈前。身已雲木杪。浮生固有役。遠道何時了。豈惟失寢興。亦自倒昏曉。恭惟天心仁。頗議民力槁。我懷漢制詔。來慰蜀父老。熙如春臺登。沃若時雨膏。須知簡書急。勿厭蓐食早。但勤筆力淬。時助詩腸攪。

峽石鋪由萬州至此。山頂皆有長石如城壁。亘數峯不斷。峽山至是。亦稍開廣。間有稻田。

峯頭壁立偉天造。萬雉石城如帶繞。山骨鱗皴火種難。山下流泉却宜稻。新秧一稜綠茸茸。茅花先秋雪搖風。后皇嘉種不易熟。野草何爲撻歲功。

蟠龍嶺自峽歸夔萬。至於梁山五郡間。不知其幾嶺。梁山之蟠龍。峯門尤爲高峻。然下嶺卽有平陸。吏卒皆相賀云。

夷陵至胸臆。複嶺苦絲亂。初程尙勇往。少日還委頓。安得長劍揮。盡剷疊嶂斷。雖云北山愚。聊快南溟運。此意竟蕭索。勞歌謾淒曼。日日望平陸。念念到彼岸。人言束馬險。但欠蟠龍峻。摧頽強弩末。黽勉焚舟戰。譬如已償逋。猶有未折券。山根治曉裝。峯頂寄朝飯。稍脫虻瘴染。還探虎窠翫。性命乃可憂。筋力何足算。嶺坐迤有佛頭山。以形得名。其上多驚獸。土人謂之虎窠。

蟠龍瀑布自山頂漫汗淋漓分數道。而下望之宛從天降。當爲城中布水第一。  
銀漢來從左界天。天風吹浪落蒼巔。人間只見秧田潤。喚作蟠龍洞裏泉。

峯門嶺遇雨泊梁山

窮鄉誰與話悲酸。駐馬看雲強自寬。酒力無端妨宿病。詩情不淺任塵官。虎狼地僻炊煙晚。風雨天低夏

木寒行盡峯門千萬丈。梁山鼓角報平安。

邗邱驛大雨

暮雨連朝雨。長亭又短亭。今朝騎馬怯。平日繫船聽。竹葉垂頭碧。秧苗滿意青。農疇方可望。客路敢遑寧。

墊江縣屬崑州

青泥沒髀僕頻驚。黃漲平橋馬不行。舊雨雲招新雨至。高田水入下田鳴。百年心事終懷土。一日身謀且望歸。休入忠州爭米市。暝鴉同宿墊江城。

巾子山又雨

百日籃輿困跼踖。三晨泥坂兀躋攀。晚晴幸自墊江縣。今雨奈何巾子山。樹色於人殊漠漠。雲容憐我稍稍班。如今只憶雪溪句。乘輿而來興盡還。

鄰山縣

山頂噓雲黑似煙。修篁高柳共昏然。烏啼一夜勸歸去。誰道東川無杜鵑。  
沒冰鋪晚晴。月出曉復大雨。上漏下濕。不堪其憂。

晚色熹微煖似薰。兒童歡喜走相聞。無端星月照濕土。依舊山川生雨雲。  
吳諺曰。星月照濕土。明朝依舊雨。蓋雨後微晴。星月燦然。必復雨。占之每驗。旅枕夢寒。涿屋漏。征衫潮潤。冷爐熏。快晴信是行人願。又恐

田家曝背耘。

金山嶺

阪峻身頻偃。崖深首屢回。雲浮平地出。路拂半天來。但閱關山過。都忘歲月催。湘南初上馬。猶插早春梅。  
金山嶺險峻多古梅

四日至鄰水又雨

昨日方無雨。今朝又不晴。滿山皆屐齒。隨處有泉聲。頗怪陰霖差。應催老病成。泥塗千騎士。與我共勞生。

殘夜至峯頂上

片月挂高嶺。我行至其巔。舉手欲攬擷。恐驚乘鸞仙。非非桂香動。肅肅露脚寒。北斗已到地。南斗猶闌干。但聞浮黎音。來從始青天。大星與之俱。曉色明旗旛。素煙渺陸海。中有人所寰。想見地上友。啓明膏火煎。星落玉宇白。日生綺霞丹。冰輪未肯去。相看尙團團。

望鄉臺

千山已盡一峯孤。立馬行人莫疾驅。從此蜀川平似掌。更無高處望東吳。

蚤端發廣安軍晚宿萍池村莊

夜雨洗煩蒸。曉風薦清穆。雲頭隕鐵山。日脚迸金瀑。暑塗一日涼。遠客萬事足。羈人正奔波。觀者何陸續。翠蓋立嚴粧。青裙行跣足。俗陋介南徼。物華入東蜀。竹萌苦已青。荔子酸猶綠。修蘆密成籬。直柏森似纛。泥乾馬蹄鬆。路坦亭堠速。暮投何人莊。窗戶暗修竹。

巴蜀人好食生蒜。臭不可近。頃在嶠南。其人好食檳榔。合蠣灰。扶留藤。一名萋藤。食之輒昏然。已而醒快。三物合和睡如膿血。可厭。今來蜀道。又爲食蒜者所薰。戲題。

旅食譜殊俗。堆盤駭異聞。南餐灰薦螻。巴饌菜先輩。幸脫萋藤醉。還遭胡蒜熏。絲蓴鄉味好。歸夢水連雲。  
嘉陵江過合州漢初縣下

井徑東川縣。山河古合州。木根拏斷岸。急雨沸中流。關下嘉陵水。沙頭杜老舟。江花應好在。無計會江樓。  
新行郵水上與涪江相近

塗泥初乾雨不落。日色未出暑光薄。畏途得晴天復涼。真是腰錢更騎鶴。渾渾鄴水流未平。悄悄涪江如鏡清。過盡江沙穿麥壠。忽有青蝸扶葉鳴。

小溪縣屬遂寧

刈麥千平壠。橫槎一小溪。梓花紅綻碎。粟穗綠垂低。村婦猶多跣。山猿遂少啼。東川雖已過。錦里尙雲西。  
茸山道中感懷

侍臣筆橐舊西班。大將麾幢又百蠻。挂席南箕宿昔事。閃旗東井何時還。日增衰病復一日。山隔舊遊知幾山。倦拂盤陀蒼石坐。歸心聊與石俱頑。

曉發飛鳥晨霞滿天少頃大雨吳諺云朝霞不出門暮霞行千里驗之信然戲紀其事

朝霞不出門。暮霞行千里。今晨日未出。曉氣散如綺。心疑雨再作。眼轉雲四起。我豈知天道。吳農諺云爾。古來占滂沱。說類恢詭。飛雲走羣羊。停雲俗三豸。月當天畢宿。風自少女起。爛石燒成香。汗礎潤如洗。逐婦鳩能拙。穴居狸有智。蜉蝣強知時。蜥蜴與聞計。埤鳴東山鶴。堂審南柯蟻。或加陰石鞭。或議陽門閉。或云逢庚變。或自換甲始。刑鵝與象龍。聚訟非一理。不如老農諺。響應捷如鬼。哦詩敢夸博。聊用醒午睡。



遂寧府始見平川喜成短歌

峽之西。遂之東。更無平地二千里。惟有高山三萬重。不知誰人鑿混沌。獨此融結何其工。我本江吳弄水月。忽來踏徧西南峯。不知塵界在何許。但怪星辰浮半空。直疑飛入蝶夢境。此豈應有人行蹤。今朝平遠見城郭。云是東川軍府雄。原田坦若看掌上。沙路淨如行鏡中。芊區粟壠潤含雨。楮林竹徑涼生風。將士懽呼馬蹄快。康莊直與錦里通。半年崎嶇得夷路。一笑未暇憐飄蓬。

# 石湖居士詩集卷十七

九月十九日。衙散回留。大將及幕屬飲清心堂。觀晚菊。分韻得譟暮。暮字作樂府

甲光射會雲。雨脚不敢到。西山明古雪。秋日一竿照。先偏井絡密。後拒參旗掉。分弓滴博平。鳴劍伊吾小。君看天山箭。狐兔何足了。開邊吾豈敢。自治有餘巧。歸來翠帷卷。聊共黃花笑。雖無落帽風。亦復接羅倒。餘閒校筆陣。刻燭龍蛇埽。毛錐乃更勇。我亦鼓旗譟。

冬至日銅壺閣落成

走徧人間行路難。異鄉風物雜悲歡。三年北戶梅邊暖。萬里西樓雪外寒。已辦鬢霜供歲籥。仍拚髀肉了征鞍。故園雲物知何似。試上東樓直北看。

十二月十八日海雲賞山茶

追趁新晴管物華。馬蹄鬆快帽檐斜。天南臘盡風啼雪。冰下春來水漱沙。已報主林催市柳。仍從掌故問山茶。豐年自是驩聲沸。更著牙前畫鼓拋。

雨後東郭排岸司申梅開。方及三分。戲書小絕。令一面開燕。

雨入南枝玉蘂皴。合江雲冷凍芳塵。司花好事相邀勒。不著笙歌不肯春。

鞭春微雨

旛勝絲絲雨。笙歌步步塵。一年新樂事。萬里未歸人。雲薄竟慳雪。酒濃先受春。送寒東作近。慚愧耦耕身。

綠萼梅

朝罷東皇放玉鸞。霜羅薄袖綠裙單。貪看修竹忘歸路。不管人間日暮寒。

玉茗花

折得瑤華付與誰。人間鉛粉弄粧遲。直須遠寄驂鸞客。鬢脚飄飄可一枝。

張正字母夫人朱氏挽詞

蘋藻儀邦媛。詩書了歲華。簾金寧遺子。羣玉竟傳家。厚施心無斃。浮生自有涯。空餘報恩子。三載亦苴麻。

十二月二十四日西樓觀雪

一夜珠簾不下鉤。微明隨雪上西樓。瑤池萬頃崑崙近。玉壘千峯滴博收。已報春廻南畝潤。從教寒勒北枝愁。四筵都爲豐年醉。錄事何須校酒籌。

丙申元日安福寺禮塔成都 歲故事始於此。士女大集拜塔下。然香挂幡以禳兵火之災。

嶺梅蜀柳笑人忙。歲歲椒盤各異方。耳畔逢人無魯語。蜀人鄉音極難解。其爲京洛音。輒謂之慶語。或是僭僞。時以中國自居。循習至今不改也。既又諱之。改作魯語。尤可笑。姑就其字。鬢邊隨我是吳霜。新年後飲屠蘇酒。故事先然窰堵香。石筍新街好行樂。與民同處且逢場。余新鬢石筍街。

初三日出東郊碑樓院故事祭東君。因宴此院。蜀人皆以是日拜壇。

遠柳新晴暝紫煙。小江吹凍舞清漣。紅塵一閨人歸後。跼跼飢鳶蹙紙錢。

郊外閱曉騎剪柳亦曰撻柳。

千騎同瞻白羽揮。驚塵一閃響金鞮。不知掣電彎弓過。但覺柳梢隨箭飛。  
初四日東郊觀麥苗

去歲秋霖麥下遲。臘殘一雪潤無泥。相將飽喫滹沱飯。來聽林間快活啼。

櫻桃花

借煖衝寒不用媒。勻朱勻粉最先來。玉梅一見憐癡小。教向傍邊自在開。

再出東郊

晚景增年慣。官身作客諳。大都緣偶熟。豈是性能堪。昔者開三徑。他時老一龕。越溪親種竹。芸綠想麩麩。

三月二日北門馬上

新街如拭過鳴騶。芍藥酴醾競滿頭。十里珠簾都捲上。少城風物似揚州。

上巳前一日學射山萬歲池故事

北郊征路記前回。三尺驚塵馬踏開。新漲忽明多病眼。好風如把及時杯。青黃麥壠平平去。疎密楹林整整來。游騎不知都幾許。長堤十里轉輕雷。

上巳日萬歲池上呈程詠之提刑

濃春酒煖絳煙霏。漲水天平雪浪遲。綠岸翻鷗如北渚。紅塵躍馬似西池。麥苗剪剪嘗新麪。梅子雙雙帶

折枝。試比長安水邊景。祇無飢客爲題詩。

新作景亭程詠之提刑賦詩次其韻二首

新景亭程詠之提刑賦詩次其韻二首

飛鴻銜子謾紛紛。萬里西遊始識真。不管吳霜微點鬢。來看蜀錦爛爭春。倚闌定有司花女。秉燭仍留主  
夜神。異縣賞心誰與共。故人新作坐中賓。

小築聊鋤草棘荒。遊人錯比召南棠。花邊霧鬢風鬟滿。酒畔雲衣月扇香。燦爛吟牋煩索句。淋漓醉墨自  
成行。報章遲鈍吾衰矣。終日冥搜謾七襄。

錦亭然燭觀海棠

銀燭光中萬綺霞。醉紅堆上缺蟾斜。從今勝絕西園夜。壓盡錦官城裏花。

寶相花

誰把柔條夾砌栽。壓枝萬朵一時開。爲君也著詩收拾。題作西樓錦被堆。

三月二十三日海雲摸石

勸耕亭上往來頻。四海萍浮老病身。亂插山茶猶昨夢。重尋池石已殘春。驚心歲月東流水。過眼人情一  
閨塵。賴有貽牟堪飽飯。道逢田峻且眉伸。

四月十日出郊

約東南風徹曉忙。收雲捲雨一川涼。漲江混混無聲綠。熟麥騷騷有意黃。吏卒遠時間信馬。田園佳處忽  
思鄉。鄰翁萬里應相念。春晚不歸同插秧。

納涼

雨洗新秋夜氣清。悴肌無汗葛衣輕。畫檐分月下西壁。絡緯飛來庭樹鳴。

西樓獨上

竹日駐微暑。松風生早秋。閒尋來處路。獨倚靜中樓。老景驅雙轂。鄉心挽萬牛。相隨木上坐。脚底亦雲浮。

曉詣三井觀

路轉市聲遠。寬閒古城東。適從紅塵來。忽入蒼煙叢。樞心傾穠露。芋葉翻微風。秋陽澹籬落。殘暑不必攻。野老熟睡起。日高首如蓬。官身騎官馬。君應笑龍鍾。

曉起

黠鼠緣鈴索。飢鴉啄井欄。不眠秋漏近。多病曉屏寒。咄咄渠何怪。休休我自闌。牙門朝日上。簫鼓報平安。

舫齋晚憩

心作萬緣起。境生千劫忙。誰同油幕靜。獨對篆煙長。有盡天魔力。無窮海印光。雨餘弦月上。塵界本清涼。

秋雨快晴靜勝堂席上

一笑憧憧鴈鷺行。簿書堆裏賦秋陽。心如墜絮沾泥懶。身似飛泉激石忙。雨後蹲鴟先稻熟。霜前浮蟻鬪棖香。天涯節物遮愁眼。且復隨鄉便入鄉。

新涼夜坐

吏退焚香百慮空。靜聞蟲響度簾櫳。江頭一尺稻花雨。窗外三更蕉葉風。日日老添明鏡裏。家家涼入短檠中。簡編燈火平生事。雪白眵昏奈此翁。

秋老四境雨已沛然。晚坐籌邊樓。方議祈晴。樓下忽有東界農民數十人。訴山田却要雨。須長吏

致禱感之作詩。

歲晚羈懷有所思。秋來病骨最先知。鏡中公案已甘老。紙上課程休諱癡。西堰頗聞江漲急。東山猶說雨來遲。錦城樂事知多少。憂旱憂霖蹙盡眉。

西樓夜坐

抗塵懷抱若爲寬。繞屋蛙聲亦在官。巖桂無香秋遂晚。江鱸有約歲將寒。文書散亂嘲癡絕。燈火淒清語夜闌。病倦百骸非復我。但思禪板與蒲團。

立秋月夜

已放新涼入簾紋。更驅餘溽避爐薰。穿雲竹月時時見。咽露莎蛩院院聞。稍喜雪山無斥堠。但虞煙驛有移文。行藏且付蘧蘧夢。明發還親鴈鷺羣。

前堂觀月

箕踞繩牀政自豪。遠遊何暇續離騷。蕭森萬竹秋逾瘦。突兀雙楠夜更高。東郭風喧三鼓市。西城石洶二江濤。色塵聲界如如現。本自無禪不用逃。

有懷石湖舊隱

浩蕩沙鷗久倦飛。摧頽櫂馬不勝鞿。官中風月常虛度。夢裏關山或暫歸。橘社十年霜欲飽。鱸江一雨水應肥。冷雲著地塘蒲晚。誰爲披蓑煖釣磯。

太平瑞聖花

雪外捫參嶺。煙中濯錦洲。密攢文杏藥。高結綵雲毬。百世嘉名重。三登瑞氣浮。挽春同住夏。看到火西流。

無題  
聞道明朝送舊官。無情更鼓夜將闌。此生見面知何日。忍淚須臾子細看。

鬼子西寄詩謝酒。自言其家數有逝者。詞意悲甚。次韻解之。且以建茶同往。

我讀鬼子詩。十語九慨傷。長川日夜逝。鬢髮空蒼浪。君家出世學。無生亦無亡。鄉謂法幢立。何乃槁木僵。起滅不滿笑。古來共楸行。豈其捏目華。解翳海印光。我酒愧薄薄。未能煖愁腸。申以春風芽。一淪萬慮忘。慧刀儻未割。曾且掀禪牀。錦里有逢迎。謹避舍蓋堂。居然足音蹙。好在故意長。調耳念一洗。遲君鳳鳴岡。

早衰不寐

官事拘攣似力田。作勞歸晚意茫然。按摩合體俱非我。展轉通宵似遠年。一叟披衣惟兀坐。羣兒得枕便佳眠。人生元是華胥客。休向迷塗更著鞭。

晚步宜華舊苑

喬木如山廢苑西。古溝疎水靜鳴池。吏兵窺翠番更後。樓閣崔嵬欲暝時。有露冷螢猶照草。無風驚雀自遷枝。歸來更了程書債。目昏昏花燭穗垂。

西樓秋晚

樓前處處長秋苦。俛仰璿杓又欲回。殘暑已隨梁燕去。小春應爲海棠來。客愁天遠詩無託。吏案山橫睡有媒。日滿窗鳧驚散。巴童來按鴨爐灰。



明日分弓亭按閱再用西樓韻

眼看白露點蒼苔。歲月飛流首屢回。老去讀書隨忘却。醉中得句若飛來。聞雞午夜猶能舞。射雉西郊不用媒。自笑支離聊復爾。丹心元未十分灰。

丁酉重九藥市呈坐客

會於南北西三方。皆走萬里。皆遇重九。每作水調一闕。燕山首句云。萬里漢家使

桂林。云萬里漢都護。成都云。萬里桐溪客。今歲倦遊甚矣。不復更和前曲。乃作此詩以自戲。

莫向登臨怨落暉。自緣羈宦阻歸期。年來厭把三邊酒。此去休哦萬里詩。烏帽不辭欹短髮。黃花終是欠東籬。若無合坐揮毫健。誰解西風楚客悲。

會慶節大慈寺茶酒

霜暉催曉五雲鮮。萬國歡呼共一天。澹澹煖紅旗轉日。浮浮寒碧瓦收煙。銜杯樂聖千秋節。擊鼓迎冬大有年。忽憶捧觴供玉座。不知身在雪山邊。

冬至日天慶觀朝拜雲日晴麗遙想郊禋慶成作驩喜口號

浙浙霜風不滿旌。紫煙黃氣捧朝曦。五更貫索埋光後。萬里鉤陳放仗時。留滯周南無舊事。布宣漢德有新詩。豐年四海皆溫飽。願把歡心壽玉卮。

十一月十日海雲賞山茶

門巷歡呼十里村。臘前風物已知春。兩年池上經行處。萬里天邊未去人。客鬢花身俱歲晚。粧光酒色且時新。海雲橋下溪如鏡。休把冠巾照路塵。

海雲回按驍騎於城北原時有吐番出沒大渡河上

古道風沙捲夕霏。小江煙浪皺春漪。天於麥壠猶慳雪。人向梅梢大欠詩。頓轡青驪飛脫兔。離弦白羽嘯寒鴟。牙門列校俱剽銳。檄與河邊禿髮知。

合江亭隔江望瑤林莊梅盛開過江訪之馬上哦此

何處春能早。疎籬限激湍。竹間煙雪迴。馬上晚香寒。喚渡聊相覓。巡檐得細看。極知微雨意。未許日烘殘。

新作官梅莊移植大梅數十本繞之

臘前催喚主林神。玉樹飛來不動塵。契闊西湖慚處士。飄零東閣似詩人。一天午夢空花碎。滿地春愁月影新。掃淨宣華藜藿逕。他年誰記石湖濱。

丁酉正月二日東郊故事

椒盤宿酒未全醒。擾擾金鞍逐畫幘。麥雨一犁隨處綠。柳煙千縷幾時青。客愁舊歲連新歲。歸路長亭間短亭。萬里松楸雙淚墮。風前安得諱飄零。

二月二十七日病後始能扶頭

複幕重簾苦見遮。暮占栖雀曉占鴉。殘燈煮藥看成老。細雨鳴鳩過盡花。心爲蚤衰元自化。髮從無病已先華。更蒙厲鬼相提倡。此去山林屬當家。

病中聞西園新花已茂及竹逕皆成而海棠亦未過

梅塢桃蹊斫竹初。三旬高臥信音疎。春雖與病無交涉。雨莫將花便破除。祇合蘧蘧隨夢去。何須咄咄向

空書頗聞蜀錦猶相待。去歲今朝已雪如。

枕上

一枕經春似宿醒。三衾投曉尙淒清。殘更未盡鴉先起。虛幌無聲鼠自驚。久病厭聞銅鼎沸。不眠惟望紙窗明。摧頽豈是功名具。燒藥爐邊過此生。

初履地

扶頭今日強冠簪。餘燼收從百戰酣。長脰關軀如瘦鶴。衝風奪氣似枯柟。客來慵攬懶殘涕。老去定同彌勒龜。何處更能容結習。任教花雨落毵毵。

密室憊坐

如許頭顱莫振矜。但尋曲几與枯藤。餘生不直一彈指。此病寧論三折肱。何處丹房癡候火。誰家籌室強傳燈。本來識字耕夫耳。今乃仍添百不能。

春晚初出西樓

試倚枯藤似鬢雲。堂階微步小逡巡。忽逢巖桂新抽葉。屈指黃紬睡一春。

春晚臥病故事邵廢聞西門種柳已成而燕宮海棠亦爛熳矣

軒窗深窈似禪房。竟日虛明鼻斷香。詩債無邊春已老。睡魔有約晝初長。市橋煙雨應官柳。墟苑池臺自海棠。游騎行歌莫相笑。遨頭六結已龜藏。

病起初見賓僚時上疏勾祠未報

浪將冠服衣猿狙。因病偷閑稍自如。時有好懷誇得句。略無情語怕回書。邊城晏閉稀傳箭。村巷春遊未  
荷鋤。迨此良辰公事少。天恩儻許賦歸歟。

陸務觀云春初多雨。近方晴。碧雞坊海棠全未及去年。

遲日溫風護海棠。十分顏色醉春粧。天公已許晴教好。說與鳴鳩一任忙。  
報事碧雞坊裏來。今年花少似前回。笙簧冷落遨頭病。不著梁州打不開。

清明日試新火作牡丹會。蜀人以洛中千葉種爲京花。單葉爲川花。

再鑽巴火尙浮家。去國年多客路賒。那得青煙穿御柳。且將銀燭照京花。香鬢半醉斜枝重。病眼全昏瘴  
霧遮。錦地繡天春不散。任教檐雨捲泥沙。

三月十九日夜極冷

誰勒餘寒不放回。春深猶煖地爐灰。鄉心忽向燈前動。夜雨先從竹裏來。鷓鴣已如鶯百轉。醅釀那復雪  
千堆。調燮衰樂東風老。慚愧茶甌與酒杯。

垂絲海棠

春工葉葉與絲絲。怕日嫌風不自持。曉鏡爲誰粧未辦。沁痕猶有淚臙脂。

浣花戲題爭標者

凌波一劇使捐生。得失何曾較重輕。蝸角虛名人尙愛。錦標安得笑渠爭。

鹿鳴宴

岷峨鍾秀蜀多珍。坐上儒先更逸羣。墨沼不憂經覆瓿。琴臺重有賦凌雲。文章小技聊干祿。道學初心擬致君。富貴功名今發軔。願看稽古策高勳。

陸務觀作春愁曲悲甚作詩反之

東風本是繁華主。天地元無著愁處。詩人多事惹閒情。閒門自造愁如許。病翁老矣癡復頑。風前一笑春無邊。精牀夜鳴如落泉。一杯正與人相關。

種竹了題愛山亭

灑掃宣華舍此君。煙中月下綠生塵。他年葉葉清風滿。莫忘今年借宅人。

題錦亭

手開花徑錦成窠。浩蕩春風載酒過。來歲遊人應解笑。甘棠終少海棠多。

# 石湖居士詩集卷十八

初發太城留別田父西蜀夏旱。未行前數日連得雨。父老云。今歲又熟矣。

秋苗五月未入土。行人欲行心更苦。路逢田翁有好語。競說宿來三尺雨。行人雖去亦伸眉。翁皆好住莫相思。流渠湯湯聲滿野。今年醉飽雞豚社。

入崇寧界

桑間三宿尙回頭。何況三年濯錦遊。草草鄆筒中酒處。不知身已在彭州。

懷古亭在永康離堆之上。離堆分岷江水。一派漑彭蜀。而支流道鄆縣。以入於府江。

朝來寫得故人書。雙鯉難尋鴈亦無。付與離堆江水去。解從鄆縣到成都。

離堆行沿江有兩崖。中斷。相傳秦李太守鑿此。以分江水。又傳李鎖孽龍於潭中。今有伏龍觀在潭上。蜀旱。

支江水涸。卽遺官致祭。壅都江水以自足。謂之攝水。無不應。民祭賽者。率以羊。歲殺四五萬計。

殘山狼石雙虎臥。斧迹鱗皴中鑿破。潭淵油油無敢唾。下有猛龍陸鐵鎖。自從分流注石門。西州秔稻如黃雲。剗羊五萬大作社。春秋伐鼓蒼煙根。我昔官稱勸農使。年年來激西江水。成都火米不論錢。絲管相隨看蠶市。款門得得酬清尊。椒漿桂酒刪羶葷。妄欲一語神豈聞。更願愛羊如愛人。

崇德廟李太守廟食處也。

雪山南風融雪汁。化作岷江江水來。不知新漲高幾畫。離堆石壁舊有水。則記漲痕占歲事。一畫爲一則。但覺樓

前奔萬雷。天教此水入中國。兩山辟易分道開。我家長川到海處。却在發源傳酒杯。人生幾屐辦此役。遠遊如許神應哈。東歸短棹昨已具。明日發船搥鼓催。灘平放溜日千里。已夢鱸膾如雪堆。丹楓繫纜一回首。玉壘浮雲安在哉。

戲題索橋

織簾勻鋪面。排繩強架空。染人高曬帛。獵戶遠張罟。薄薄難承雨。翻翻不受風。何時將蜀客。東下看垂虹。

青城山會慶建福宮宮舊名丈人觀。予爲請於朝。賜今名。入山前數日。勅書至自行在。予就殿醮以祝聖人壽云。

墨詔東來洵驛傳。璇題金榜照山川。祥開聖代千秋節。響動仙都九室天。觸石湧雲埋紫邏。流金飛火燭蒼巔。祇應老宅龐眉客。長記新宮錫號年。老宅。卽老人村也。舊名濛濛。疑傳之誤。余爲更此名。

再題青城山

萬里清遊不暇慵。雙旌換得一枝筇。來從井絡直西路。上到江源第一峯。海內閒身輸我佚。山中佳氣爲人濃。題詩試刻巖前石。付與他年蘇暈重。

玉華樓夜醮青城觀殿前大樓。制作瑰麗。初夜有火炬出殿後。峯上羽衣云。數年前曾一現。已而如有風吹滅之。比同行諸官至。則無見矣。予默禱云。此燈果爲我者。當再明。使衆共觀之。語訖復現。

丈人峯前山四周。中有五城十二樓。玉華仙宮居上頭。紫雲瀆洞千柱浮。剛風八面寒飈颺。靈君宴坐三千秋。躡符飛行戲元洲。下睨濁世悲蜉蝣。桂旗偃蹇澹少休。知我萬里遙相投。暗蠲奏樂鏘鳴球。浮黎空

歌清夜逾參旗如虹歛下流。化爲神燈燭巖幽。火鈴洞赤凌空旂。誰歟蔽虧黯然收。禱之復然爲我留。半生縛塵鷹在韉。豈有骨相肩浮丘。山英發光洗羈愁。行迷未遠夫何尤。笙簫上雲神欲遊。揖我從之騁素虬。

上清宮自青城登山。所謂最高峯也。

歷井捫參與未闌。丹梯連處更躋攀。冥濛蜀道一雲氣。破碎岷山千髻鬢。但覺星辰垂地上。不知風雨滿人間。蝸牛兩角猶如夢。更說紛紛觸與蠻。

最高峯望雪山

大面峯頭六月寒。神燈收罷曉雲班。浮空忽湧三銀闕。云是西天雪嶺山。

范氏莊園

夕陽塵土漲郊墟。六六峯頭夢覺餘。竹色喚人來下馬。亂蟬深處有圖書。

青城縣何子方使君同年園池

檀塍芋壟意中行。浩蕩薰風不計程。兩脚背人歸玉壘。江聲隨馬入青城。五橋今日新知路。千佛當年舊綴名。水竹光中同一笑。丐君荷露濯塵纓。

何同年書院有丹竈甚雅。

竹色侵晚帙。泉聲漱嵌根。試通丹竈路。應到老人村。

江源縣張季長正字家善頌堂。季長盡出先世所藏圖書。壁有趙清獻公爲令時題名。是日食新米。坐中皆



贊喜·夏初嘗大旱也。

我窮江源來。名勝頗追逐。薰風秀沃野。在處得奇矚。頌堂有佳士。文字照縑竹。圖書抱世守。古錦韜玉軸。黃金不滿籬。故園有喬木。逡巡酒如澗。霍霍具水陸。田頭新穀升。一飯香滿屋。回思閱雨時。敢望遽炊玉。摩挲壁間題。明府遂州牧。山高江水長。百世照尸祝。我來坐琴壇。琴壇在成都西園。清獻公彈琴宴坐處。覩汗媿前躅。空餘煙霞痼。未許是公獨。請歌青城遊。或附耆舊錄。

蜀州西湖荷花正盛開。水月登舟亭也。湖陰亭外。別有白蓮。尤奇。蜀中無菱。至此始見之。

閒隨渠水來。偶到湖光裏。仍呼水月舟。徑度雲錦地。誰云不解飲。我已荷香醉。湖陰玉嬋娟。竄立紅粧外。何須東閣梅。悠然自詩思。驚風入午暑。水竹有秋意。采菱不盈掬。興與蓴鱸會。遙知新津宿。魂夢亦清麗。

新津道中

雨後郊原淨。村村各好音。宿雲浮竹色。清溜走楹陰。曲沼擎青蓋。新畦藝綠針。江天空闊處。不受暑光侵。

次韻陸務觀編修新津遇雨。不得登修覺山。徑過眉州三絕。新津館舍上漏下漏。送客皆不堪憂。修覺

一望。人云可見劍門。杜子美所謂西川供客眼。處眉山城中。悉是汗池。

送客多情難語離。僕夫無情車載脂。平生飄泊知何限。少似新津風雨時。離合紛紛怕遠遊。遠遊仍怕賦登樓。何須一望三千里。望盡西州轉更愁。雨後臺頭山色開。玻璃江清已可杯。綠荷紅菱香四合。又入芙蓉城裏來。

中巖去眉州一程。詰詎羅尊者道場。相傳昔有天台僧遇病僧。與之木鑰匙云。異時至眉州中巖扣石筍。當再相

見·後果然·今三石屹立如樓觀·前兩樓純紫石·中一樓蘿蔓被之·傍有寶瓶峯·甚端正·山半有喚魚潭·  
慈姥龍所居·世傳鴈蕩大小龍湫亦諸詎羅道場·豈化人往來無常處耶·

赤巖倚玲峴·翠邏森戍削·岑蔚嵐氣重·稀間暑光薄·聊尋大士處·往扣洞門鑰·雙撐紫玉關·中蠹翠雲幄·  
應供華藏海·歸坐寶樓閣·無法可示人·但見雨花落·不知龍湫勝·何似魚潭樂·夜深山四來·人靜天一握·  
驚看松桂白·月影到林壑·門前六月江·世界塵漠漠·寶瓶有甘露·一滴洗煩濁·捫天援斗杓·請爲諸君酌·  
慈姥巖興送客酌別·風雨大至·涼甚·諸賢用中巖韻·各賦餞行詩·紛然擘牋·清飲終日·雖無絲竹·  
管絃·而情味有餘·

山靈知我厭塵土·喚起蟄雷慶午暑·松風無力雨絲長·散作毵毵雪塵舞·巖前懸溜珠簾傾·安得吹來添·  
玉觥·詩成酒盡腸亦斷·休喚佳人唱渭城·

次韻陸務觀慈姥巖酌別二絕

送我彌旬未忍回·可憐蕭索把離杯·不辭更宿中巖下·投老餘年豈再來·  
明朝真是送人行·從此關山隔故情·道義不磨雙鯉在·蜀江流水貫吳城·

次韻代答劉文潛司業二絕

平羌江上首空回·慈姥巖前定把杯·縱使石腸都忘却·也應風雨送愁來·  
回廊月下短歌行·惟有知音解有情·一曲紅窗聲裏怨·如今分作兩愁城·

玻瓈江一首戲效陸務觀作

玻璃江頭春淥深。別時沄沄流到今。祇言日遠易排遣。不道相思翻苦心。烏頭可白我可去。蒼花易青君易尋。人生若未離別。不如碌碌無知音。

余與陸務觀自聖政所分袂。每別輒五年。離合又常以六月。似有數者。中巖送別。至揮淚失聲。留此爲贈。

宦途流轉幾沉浮。雞黍何年共一丘。動輒五年遲遠信。常於三伏話羈愁。月生後夜天應老。淚落中巖水不流。一語相開仍自解。除書聞已趣刀頭。

萬景樓在漢嘉城中。山上登覽勝絕。殆冠西州。予令畫工作圖以歸。山谷來遊時。但有安樂園。未有此樓也。左披九頂雲。右送大峨眉。殘山剩水不知數。一一當樓供勝絕。玻璃濯錦遙相通。指麾大渡來朝宗。川靈胥命各東去。我亦順流呼短篷。詩無傑語慚風物。賴有丹青傳小筆。仍添詩客倚闌看。令與山川相暎發。龍彎歸路繞烏尤。棟雲簾雨邀人留。若爲喚得涪翁起。題作西南第一樓。

凌雲九頂卽大石佛處。初登山時。巖壁上悉刻爲小佛。不知其數。山前佛頭難受雅江之衝。最爲艱險。聊爲東坡載酒遊。萬龕迎我到峯頭。江搖九頂風雷過。雲抹三峨日夜浮。古佛臨流都坐斷。行人識路亦歸休。酣酣午枕眠方丈。一笑閒身始自由。

戲題方響洞。漢嘉廣福院中。水洞有聲琅然。莫知其所在。舊名丁東水。山谷易今名。且題詩云。古人名此丁東水。自古丁東直至今。我爲改爲方響洞。要知山水有清音。

隔凡冰澗不可越。衆真微步壺中月。徙倚含風玉珮聲。何須聽作蕤賓鐵。

問月堂酌別

半明燈火話悲酸。此會情知後會難。四海宦遊多聚散。一生情事足悲歡。鬢絲今夜不多黑。酒量徹明無數寬。醉夢登舟都不記。但聞風雨滿江寒。

別後寄題漢嘉月榭陸務觀所作·同年謂王子蒼·萬景、嘉州酒名·湖亭、明月湖也·在州治前方·作旗

亭月榭·正直大峨·取太白峨眉山月之語以名·傍有一巖·景趣尤佳·子蒼欲作樓·未果·

隱吏詩情卜築幽。同年惜別勸淹留。試傾萬景湖亭酒。來看半輪江月秋。川路雖長猶共此。夜船空載且歸休。碧巖勝處頻回首。好事誰能更小樓。

過燕渡望大峨有白氣如層樓拔起叢雲中

圍野千山暑氣昏。大峨煙靄亦繽紛。玉峯忽起三千丈。應是兜羅世界雲。

蘇稽鎮客舍

送客都回我獨前。何人開此竹間軒。灘聲悲壯夜蟬咽。併入小窗供不眠。

峨眉縣縣出符文布·婦女人人續麻·且行且觀·田家束蒿然於門口·爲香氣以迎客·

窮鄉未省識旌旄。雞犬歡呼巷陌騷。村媪聚觀行績布。野翁迎拜跽然蒿。泉清土沃稻芒蚤。縣古林深槐瘿高。珍重里儒來獻頌。盛言千載此丘遭。

初入大峨

煙霞沉痼不須醫。此去真同汗漫期。曾款上清臨大面。仍從太白問峨眉。山中緣法如今熟。世上功名自

古癡。賸作畫圖歸挂壁。他年猶欲臥遊之。

華巖寺

衆峯攢壁立。中有路一線。攀援白雲梯。食頃已天半。我本紫芝曲。誤落青芻棧。向來脫新羈。恍已還舊觀。花煙辭少城。暑雪對大面。來從太白西。更走三峨徧。風生兩腋輕。泉吼四山眩。今晨第一程。莫歎輿僕倦。中峯有普賢閣。背倚白崖峯。餘七十峯共環之。茂真尊者舊菴在峯下。其傍一峯最秀。號呼應。孫思邈所往。

來。傳云。茂真與孫常相呼而應。故名。

凌高踰危峯。斗下頰幽谷。仙英馥椒蘭。嘉蔭轟旄纛。空翠元不雨。洩雲自膏沐。暑綵森有稜。瘁肌淒欲粟。白崖如負依。金界奠蒼麓。衆峯拱二八。娟妙繞重屋。真人與尊者。幽居接松竹。呼之儻有應。留我試餐玉。雙溪在白水寺前。兩溪各自一山來。齊出橋下。前行入林數十步。合爲一水。洄而深潭。以入寶現溪。僧云。

此景猶在廬山三峽。鴈蕩龍湫之上。溪中舊常有兩石子鬪。日照溪中。常有五色光相。

冷風騷騷木葉低。洞滯阻深生怪奇。碧琳雙澗黑無底。中有玉龍相對飛。雷轟雪捲入林樾。化爲一龍潭。底沒摩尼鬪罷四山空。時有寶光巖下發。

寶現溪。雙溪合而一。既出巖竇。散爲此溪。叢三藏自西域歸。過溪。見兩石子鬪。攪得其一。今藏黑水寺。

石上有一目。端正溪底。溪以此得名。

粲粲罨畫沙。鱗鱗麴塵水。朝陽相發揮。光景豔孔翠。寧聞雙溪號。但見穀紋細。神魚不謀食。終日印潭底。躍珠本具眼。聊共阿師戲。收藏更傳寶。一笑落第二。

點心山在白水寺後。自此登峯頂。

入山窘宿雨。上山賀朝霽。跬步便歷險。轉盼已呀氣。豈惟膝點心。固已頭搶地。遊人貪勝踐。姑吟蜀道易。

大扶擗

身如魚躍上長竿。路似鏡中相對看。珍重山丁扶我過。人間踽踽獨行難。

小扶擗

食時方了大扶擗。前逢仄徑仍崎嶇。懸崖破棧不可玩。輿丁挾我如騰狙。平生行路險艱足。如今雪鬢應難綠。却憐苔髮鎮長青。千古穆穆挂高木。

胡孫梯峽山有胡孫愁。予常過之。

木磴鱗鱗滑帶泥。微生欹側寄枯藜。胡孫愁處我猶過。箇裏如今幸有梯。

雷洞平七十二洞皆在道傍。大早有禱投香花不應。即以大石或死蕘及婦人弊履投而觸之。雷雨即至。

行人魄動風森森。兩崖奔黑愁太陰。不知七十二洞處。側足下窺雲海深。聞有神龍依佛住。根觸須臾召雷雨。兩川稻熟須好晴。我亦閒遊神勿驚。

八十四盤

冥鴻無伴鶴孤飛。回首塵籠一笑嬉。八十四盤新拄杖。萬三千乘舊牙旗。石梯碧滑雲生後。木葉紅斑雪霽時。說與同行莫惆悵。人間捷徑轉嶽巖。

婆羅平

仙聖飛行此是家。路逢真境但驚呀。神農嘗外盡靈藥。天女散餘多異花。嵐雨逼衣寒似鐵。冰泉炊米硬於沙。峯頭事殊塵世缺。蹇跳梁笑井蛙。

思佛亭曉望

栗烈剛風刮病眸。登臨何啻緩千憂。界天暑雪青城外。湧地晴雲瓦屋頭。浩蕩他年誇北客。蒼茫何處認西州。千巖萬壑須尋徧。身是江湖不繫舟。

光相寺

峯頂四時如大冬。芳花芳草春自融。苔痕新晞六月雪。木勢舊偃千年風。雲物爲人布世界。日輪同我行虛空。浮生元自有超脫。地上可憐悲攪蓬。

七寶巖

入峨絕頂白水寺已在山半。由白水陡上至巖。又六十里。

天如碧玉甌。下覆白玉盤。晶光眩相射。我獨居兩間。正視不勝瞬。却立聊少安。但覺風浩浩。骨毛森似寒。神仙杳無處。寧論有塵寰。身輕一稿葉。兩腋如飛翰。同行挽我衣。何往何當還。少留作詩去。奇哉此憑闌。

淳熙四年六月二十七日登大峨之巔。一名勝峯山。佛書以爲普賢大士所居。連日光相大現賦。

詩紀實屬印老刻之。以爲山中一重公案。

勝峯高哉。摩紫青。白鹿導我登化城。住山大士喜客至。兜羅布界續相迎。圓景明暉倚雲立。巍如七寶莊嚴成。一光未定一光發。中有墨像隨心生。白毫從地插空碧。散燭象緯天龍驚。夜神受記亦修供。照世洞然千百燈。明朝銀界混一白。咫尺眩轉寒凌兢。天容野色儵開閉。慘澹變化愁仙靈。人言六通欲大現。洗

山急雨如盆傾。重輪桑采印巖腹。非煙非霧非丹青。我與化人中共住。鏡光覲面交相呈。前山忽湧大圓相。日圍月暈浮青冥。林泉草木盡含裹。是則名爲普光明。言詞海藏不勝讚。北峯復有金橋橫。衆慈久立佛事竟。一塵不起山玲娜。向來無法可宣說。爲問有耳如何聽。我本三生同行願。隨緣一念猶相應。此行且復印心地。衣有寶珠奚外營。題詩說偈作公案。亦使來者知吾曾。神通佛法須判斷。一任熱碗春雷鳴。請佛開晚望雪山。數十峯如爛銀晃耀暑光中。

累塊蒼然是九州。大千起滅更悠悠。雪光正照天西角。日影長浮雨上頭。峯頂何曾知六月。塵間想已別三秋。佛毫似欲留人住。橫野金橋晚未收。

淨光軒白水寺

翳華銷盡八窗明。雨竹風泉演妙聲。身世只今高幾許。北峯渾共倚闌平。

虎溪黑水寺前。雖不及雙溪。亦佳處也。開山僧至此斷渡。一虎踞前。因跨之。亂流以濟。今作橋。其上水歲推盪。輒更勑之。

水本無心作浪波。經行偶與石相磨。不須更問橋安否。喚取於菟載我過。

白雲峽牛心寺

雙溪疑從銀漢下。我欲窮源問仙舍。飛瀾濺沫漱籃輿。却望兩崖天一罅。疎疎暑雨滑危梯。策策山風掖高駕。幽尋險絕太奇生。莫笑退之號太華。

孫真人菴



何處仙翁舊隱居。青蓮巉絕似蓬壺。雲深未到淘朱洞。雨小先尋煉藥爐。礪下草香疑可餌。林間虎伏試教呼。閒身儘辦供薪水。定肯分山一半無。

龍門峽

插天千丈兩碧城。中有玉壑穿巖扃。瀑流懸布不知數。亂落嵌根飛白雨。瑤琨爲室雲爲關。龍君所居朱夏寒。不辭擊棹更深入。萬一龍驚雷破山。

既離成都。故人送者遠至漢嘉分袂。其尤遠而相及於峨眉之上者六人。范季申、郭中行、楊商卿、嗣勳、李良仲、譚德稱。口占此詩留別。

我本住林屋。風吹來錦城。錦城亦何樂。所樂多友生。相從不知久。相送不計程。橫絕峨眉巔。欲去有餘情。吾宗蓋難弟。李郭人中英。二楊懿文德。譚子資粹清。相視心莫逆。劇談四筵輕。明朝各回首。雲水相與平。我今投紱去。行且扶藜耕。淒涼別知賦。慷慨結客行。後會豈不好。路長恐寒盟。諸賢乃不凡。骨相有功名。大廈罩羣木。明廷朝萬靈。王畿坦如砥。結綬當同登。道傍石湖水。誰能叩柴荆。夢中儻相見。秉燭聽殘更。聞威州諸羌退聽邊事已寧。少城籌邊樓。闌檻修葺亦畢工。作詩寄權制帥高子長。

籌邊樓上美髯翁。赤白囊飛笑語中。勃律天西元采玉。蓬婆雪外昨分弓。踏筵舞罷平闌月。橫槊詩成滿袖風。諸校各能歌破陣。何須琴裏聽平戎。破陣平戎。皆中本事。子長當一笑領。

# 石湖居士詩集卷十九

隄爲江樓

河邊塔立看歸篷。三老開頭暮欲東。漲水稠灘連峽內。淺山浮石似湘中。無人驛路榛榛草。有客江樓浩浩風。種落塵消少公事。賸裁新語寄詩筒。縣令師永錫同年能詩。

宣化道中

瘦草蕭疎已似秋。盤陀山骨束江流。兩崖若不頑如鐵。爭得狂瀾拍岸休。

將至敘州

亂山滿平野。漲水豪大川。仄徑無轍跡。疎林有炊煙。山農且燒畚。蠻賈暑荷氈。窮鄉足荒怪。打鼓催我船。  
七夕至敘州。登鎖江亭。山谷謫居時屢登此亭。有詩四篇。敬用其韻。

水口故城丘壠平。新亭乃有緇鐵橫。舊戎州在對江山趾。下臨馬湖。蠻江路。蠻自江出。必過城下。故真鎮以爲限。今溪城過江。已失形勝。而猶於亭鎖江。特以闡和而已。非本旨也。歸艤擊汰若飛渡。一雨徹明秋漲生。東樓鎖江兩重客。筆墨當代俱詩鳴。我來但醉春碧酒。星橋脈脈向三更。郡醜舊名重碧。取杜子美東樓詩。重碧酌春酒之句。余更其名春碧。語意便勝。

江安道中近瀘州最險處。號張旗三灘。言張旗之頃。已過三灘。其湍急如此。瀘戎之間有渡瀘亭。然不知孔

明竟出何路。今鎖江對岸廢城。下臨馬湖。有章高紀功碑。歸然荒榛中。疑此或是古迹。

穠綠連村荔子丹。瘴雲將雨暗前灣。張旗且喜三灘駛。叱馭曾驚九折艱。瀘水舟閒迷古渡。馬湖碑缺伴荒山。威名功業吾何有。無事飄飄犯百蠻。

瀘州南定樓

歸艤東下興悠哉。小住危闌把一杯。樓下沅沅內江水。明朝同入大江來。

題譚德稱扇德稱與楊商卿父子送余。遠至瀘之合江。以扇求詩。各爲題一絕。

蠻風吹雨瘴江肥。短草荒山鳥不飛。盡是瀘南腸斷句。如今分與故人歸。

題楊商卿扇

君歸我去兩銷魂。愁滿千山鎖瘴雲。後夜短檠風雨暗。誰能相伴細論文。

題楊子容扇

雙竹軒窗讀書垂。天雲翼要搏扶。與君只作三年別。射策東來過石湖。

譚德稱、楊商卿父子送余自成都合江亭相從至瀘南合江縣始分袂。水行踰千里。作詩以別。

合江亭前送我來。合江縣裏別我去。江流好合人好乖。明日東西南北路。千里追隨不忍歸。一杯重把知何處。臨歧心曲兩茫然。但祝頻書無別語。

發合江數里寄楊商卿諸公

臨分滿意說離愁。草草無言祇淚流。船尾竹林遮縣市。故人猶自立沙頭。

過江津縣睡熟不暇梢船

西風扶櫓似乘槎。水闊灘沉浪不花。夢裏竹間喧急雪。覺來船底滾鳴沙。

恭州夜泊

葦山礪确強田疇。村落熙然粟豆秋。翠竹江村非錦里。青溪夜月已渝州。小樓高下依盤石。弱纜西東戰急流。入峽初程風物異。布裙跣婦總垂瘤。

大熱泊樂溫有懷商卿德稱

暑候秋逾濁。江流晚更渾。瘴風如火熾。嵐月似煙昏。城郭廩君國。山林妃子園。故人新判袂。得句與誰論。

涪州江險不可泊入黔江棧舟

黃沙翻浪攻排亭。潰淖百尺呀成坑。坳窪眩轉久乃平。一渦熨帖千渦生。篙師絕叫歐川靈。鳴鏡飛渡如奔霆。水從岷來如濁涇。夜榜黔江聊濯纓。玻瓈徹底鏡面清。忽思短棹中流橫。釣絲隨風浮月明。

妃子園涪陵荔子。天寶所貢。去州里所。有此園。然峽中荔子。不及閩中遠甚。陳紫又閩中之最也。

露葉風枝驛騎傳。華清天上一嫣然。當時若識陳家紫。何處蠻村更有園。

豐都觀在豐都縣後三里。平都山舊名仙都觀。相傳前漢王方平。後漢侯長生得道處。陰君上升時。五雲從地湧出。丹竈古柏皆其故物。晉隋殿宇無恙。壁畫悉是當時遺蹟。內王母朝元隊仗尤奇。道士云。此地即所謂

北都羅豐所住。又名平都福地也。

神仙得者千方平。誰其繼之陰長生。飄然空飛五雲駢。土賓寥陽留玉京。石爐丹氣常夜明。龍光萬柏森千齡。峽山偪仄岷江縈。滙宮福地古所銘。云有北陰神帝庭。太陰黑簿囚鬼靈。自從仙都啓巖扃。明霞流

電飛陽晶。暉景下墮。鑠九冰。塞絕苦道。升無形。至今臺殿。棲鈴屨。隋圻唐堊。留丹青。十仙怪奇。溪女清瑤。池仙仗紛。娉婷。琅璈赴節。鏘欲鳴。我來秋暑如炊蒸。汗流呀氣扶枯藤。摩挲衆蹟不暇評。聊記梗概知吾會。

萬州西山湖亭秋荷尙盛

叢蒼忽明眼。山腰灑湖光。列岫繞雲錦。深林護風香。西山卽太華。玉井餘秋芳。隔江招岑仙。共璧雙蓮房。下巖

疇昔中巖一夢殘。下巖風景亦高寒。峽中無處堪停棹。雨後今朝始凭闌。不用苦求毫相現。祇教長挂水簾看。山僧勸我題蒼壁。坡谷前頭未敢刊。

魚復浦泊舟望月出。赤甲山山形斷缺如鼉龍。坐而張頤。月自缺。中騰上山頂。

月出赤甲如金盆。蹲龍呀口吐復吞。長風浩浩挾之出。影落半江沉復翻。天高夜靜四山寂。惟有灘聲喧水門。高齋詩翁不可作。我亦不眠終夕看。

夔門卽事

自東川入峽路。至恭州。便有癩俗。夾岸山悉瘠小。入夔界。山皆傑然。連三峽。夔水不可飲。取之臥龍十里之外。雲安麪米春。自唐以來稱。今夔酒乃不佳。

峽行風物不堪論。裊暑驕陽雜瘴氛。人入恭南多附贅。山從夔子盡侵雲。竹枝舊曲元無調。麴米新筩但有聞。試覓清冷一杯水。筒泉須自臥龍分。

瞿唐行 七月十九日。至夔子灘。灑髮不可犯。是夜水漲及山腹。詰旦視灑灑。則已在水中。土人云。此青

草齊也。可以冒險而入。遂鼓棹。略其頂而過。郡中遺候兵立山上。每一舟平安。則揚幟以招後舟。白鹽、赤甲、皆峽口大山。黃嵌、黑石、皆峽中至險處。入峽西岸有聖泉。舟人或向之疾呼曰。人渴也。泉即進。下一杯許。復乾。余舟過甚急。未之試也。

川靈知我歸有程。一夜漲痕千丈生。中流擊楫洶作氣。夾岸賊旗呀失聲。不知灑灑在船底。但覺瞿唐如鏡平。鑿峽疏川狼石破。號山索飲飛泉驚。白鹽赤甲轉頭失。黑石黃嵌擠輕草。齊增肥無泊處。竹枝凝咽空餘情。人間險路此奇絕。客裏驚心吾飽更。劍閣翻成蜀道易。請歌范子瞿唐行。

夜泊歸舟州有宋玉宅。昭君臺。

舊國風煙古。新涼瘴癘清。片雲將客夢。微月照江聲。細和悲秋賦。遙憐出塞情。荒山餘閱閱。兒女擅嘉名。秭歸郡圃絕句二首

花竹蕭騷小圃畦。官居翻似隱淪棲。巴山四合秋陽滿。杜宇黃鸝相對啼。

孤城偪仄復偪仄。前山後山青欲來。市聲蕭條衙鼓靜。惟有叱灘喧萬雷。叱灘即黃魔灘。下連人鮓壑。

宋玉宅相傳秭歸縣治。即其舊址。縣左旗亭。好事者題作宋玉東家。

悲秋人去語難工。搖落空山草木風。猶有市人傳舊事。酒壚還在宋家東。

後巫山高一首。余前年入峽常賦巫山高。今復作一篇。十二峯中。東西各一峯最奇。不可繪畫。左右前後餘

峯之可觀者尚多。不止十二峯也。不問陰晴。雲物常相映帶。尤爲勝絕。但以漲江湍怒難橫泊。鼓棹而過。不復登廟前。余以水暴漲得下瞿唐。至巫山。縣人云。却須水退始可入巫峽。一夜水浴十餘丈。遂不復滯留。

凝真宮前十二峯。兩峯娟妙翠插空。餘峯競秀尙多有。白壁蒼崖無數重。秋江漱石半山腹。倚天削鐵荒行蹤。造化鍾奇蟲瑤巖。真靈擇勝勝深珠宮。朝雲未能暮雲起。陰晴竟日長冥濛。瑤姬作意送歸客。一夜收潦仍回風。仰看館御飛檝過。回首已在虛無中。惟餘烏鴉作使者。迎船送船西復東。

黃牛峽廟爲黃牛神所居。卽石馬繫祠門處。東坡所書歐公詩及本事。碑石在東廡祠後高峯之上。有黃牛迹。客舟甚敬之以歐公故。石馬亦有靈。扁護甚嚴。

朝離悲秋宅。午榜疊石磯。小留黃牛廟。細讀石馬詩。黃牛隱見蒼山裏。石馬至今猶馘耳。當年夢境識仙翁。馬爲迎門神爲起。物生不朽繫所逢。歐詞蘇筆蒼苔封。山高水長翁之風。石馬亦與翁無窮。

假十二峯卽黃牛峽山。自此直至牛喜埧千峯重複靡不奇峭。

巴東三峽數巫陽。山入西陵更鬱蒼。何以假爲非確論。直疑溟滓弟高唐。

扇子峽兩岸山尤奇。殆過巫峽。蝦蟆碚在南岸。

茲行看山真飽諳。今晨出峽仍窮探。南磯北磯白鐵壁。千峯萬峯蒼玉簪。橫前直疑江已斷。崛起競與天相攙。蜀山欲窮此盤礴。禹力已盡猶鐫劖。望舒宮中金背蟾。泥塗脫盡餘老饑。下飲岷江不知去。流涎落吻如排髯。挈瓶穰棹蘄清甘。未暇煮茗和薑鹽。聊將滌硯濡我筆。恍惚詩律高巉巖。

荊渚中流回望巫山無復一點戲成短歌

千峯萬峯巴峽裏。不信人間有平地。渚宮回望水連天。却疑平地元無山。山川相迎復相送。轉頭變滅都如夢。歸程萬里今三千。幾夢卽到石湖邊。

魯家泐入沌。三江口即岳陽路。水大難行。遂入沌行。沌中最空寬處名百里荒。盜區也。

過盡巴東巫峽長。荆川鼓棹更茫茫。避風怕入三江口。乘月貪行百里荒。夜後逢人盡刀劍。古來踏地皆耕桑。可憐行路難如此。一簇寒蘆尙稅場。

### 鄂州南樓

誰將玉笛弄中秋。黃鶴飛來識舊游。漢樹有情橫北渚。蜀江無語抱南樓。燭天燈火三更市。搖月旌旗萬里舟。却笑鱸鄉垂釣手。武昌魚好便淹留。

### 題黃州臨臯亭

夏口風帆赤壁磯。雪堂醜酒竹樓棋。繫舟一日黃州下。只辦登臨不辦詩。

江州庾樓夜宴前瞰大江。後臨廬山。登臨名勝。殆甲他處。庾亮南樓。乃在武昌。非此也。亮常刺江州。後人製此名。非樓之要。

岷江漱北渚。廬阜窺南窗。名山復大川。超覽茲樓雙。何必元規塵。自足豪他邦。使君穠田熟。新涼籩酒缸。落景澹碧瓦。長虹吐金釭。客從三峽來。噩夢隨奔瀧。小留聽琵琶。船旗卷修杠。請呼裂帛絃。爲拊洮河腔。曲終四憑闌。倦遊心始降。即發挂帆去。曉鐘煙外撞。

東林寺慧遠師白蓮社也。傍有樂天草堂。對山絕頂。即天池文殊現燈處。李成焚劫南北山。獨不毀二林。

談易繙經宰木春。三生猶自裊煙熏。客塵長隔虎溪水。劫火不侵香谷雲。老矣懶供蓮社課。歸哉快讀草堂文。山頭一任天燈現。箇事何曾落見聞。



過虎溪對東林蒼巖翠樾下浸大澗宛似靈隱冷泉囑長老法才作亭名曰過溪且爲率山丁雍草定基一朝而畢

過溪無限翠屏開大笑從教虎子猜不獨山中添故事仍教題作小飛來

病倦不能過谷簾三峽寄題

白龍青峽紫煙爐山北山南只半塗說與同來綠玉杖他年終補臥遊圖

湖口望大孤

廬阜岡勢斷江流澗相通大孤如小冠插入瀟淪中我欲說濁浪往馭揚瀾風晃晃銀色界濛濛水晶宮濯足望八荒列宿羅心胸客帆詎肯駐搔首蒼煙叢

澎浪磯阻風

浦口舟藏尋丈慳篙師抱膝朝暮閒逆風來從水府廟濁浪欲碎小孤山太白猶高缺蟾墮長江未盡歸鬢斑短歌聊復怨行路當有聽者凋朱顏

馬當汛阻風居人云非五日或七日風不止謂之重陽信

拍岸回流逆上磯枯楊折葦靜相依趁墟漁子晨爭渡賽廟商人晚醉歸重九信來風未愁大千行徧昨俱非羈愁萬斛從頭數帶眼今秋又減圍

放舟風復不順再泊馬當對岸夾中馬當水府卽小說所載神助王勃一席清風處也戲題兩絕  
萬里江隨倦客東馬當山背勒孤篷無才解賦珠簾雨誰肯相賒一席風

禁江上口柏山東。三日荒寒繫短篷。却憶宮亭湖裏去。隨人南北解分風。

守風嘲舟子

奪命稠灘百駁餘。守風端坐恰乘除。日長飽飯佳眠覺。閒傍蘆花學釣魚。

佛池口大風復泊

碧葦無思連天生。青山有情終日橫。風聲洶怒木朝拔。川氣流光珠夜明。誰能坐守白頭浪。我欲往騎金背鯨。俛仰之間撫四海。可憐步步愁江程。

長風沙

夕陽明遠帆。高浪兀孤嶼。綿綿淮山來。閃閃沙鳥去。落木兩山家。炊煙南北渡。眉伸擊汰行。夢愕阻風處。

九月八日泊池口

斜景下天末。煙霏酣夕紅。餘暉染江色。激灑琥珀濃。我從落日西。忽到大江東。回首舊遊處。曛黃錦城中。藥市并樂事。歌樓沸晴空。故人十二闌。豈復念此翁。

池州九日用杜牧之齊山韻

年年佳節歌式微。秋浦片帆還欲飛。萬里蜀魂思遠道。九歌楚調送將歸。杯中山影分秋色。木末江光借夕暉。細撚黃花一枝盡。霏霏金屑滿征衣。

離池陽十里清溪口復阻風

恰從秋浦挂蘆條。又泊清溪十里餘。愁水愁風吹帽後。作雲作雨授衣初。遠尋草市沽新酒。牢閉篷窗理

舊書行路阻艱催老病。騷騷落雪滿晨梳。

梅根夾

辛苦凌波棹。平安入夾船。日明漁浦網。風側瓦窰煙。老圃容挑菜。村巫橫索錢。且投人處宿。終夜得佳眠。

宿長蘆寺方丈

塔廟新浮水。汀洲舊布金。聊憑一葦力。與障萬波侵。帆影窺門近。鐘聲出院深。夜闌雷破夢。欹枕聽潮音。

將至吳中親舊多來相迓感懷有作

望見家山意欲飛。古來燕管一沾衣。回思客路豈非夢。乍聽鄉音真是歸。新事略從年少問。故人差覺坐中稀。不須更說桑榆晚。霜後鱸魚也自肥。

# 石湖居士詩集卷二十

淳熙五年四月二日直宿玉堂懷舊二絕句

桂海冰天老歲華。直廬重上玉皇家。當年曾識青青鬢。惟有東牆一架花。  
雪山刁斗不停搗。夜把軍書敢顧家。珍重玉堂今夜夢。靜聞宮漏隔宮花。

初歸石湖

曉霧朝暾紺碧烘。橫塘西岸越城東。行人半出稻花上。宿鷺孤明菱葉中。信脚自能知舊路。驚心時復認  
鄰翁。當時手種斜橋柳。無限鳴蜩翠埽空。

寄蜀州楊道人

老來萬事總蕭然。猶憶西州暑雪邊。爲報岷峨山水道。如今真箇得歸田。

送同年萬元亨知階州

老我曾頽萬里春。憐君飛棹也浮秦。當年千佛名經裏。又見西遊第二人。  
路入南山舊漢畿。油油清渭照牙旗。古來百戰功名地。正是雞鳴起舞時。  
十年關隴困科輸。宰德如天盡埽除。臨遣中和二千石。好乘春日下寬書。

次韻蜀客西歸者來過石湖并寄成都舊僚

走徧塵埃倦鳥還。故鄉元在水雲間。黃粱飯裏夢魂醒。青簞笠前身世閒。鷗鷺飛來俱玉立。松篁歲晚各

蒼顏岷峨交舊如相問。鐵鎖無扃任客攀。

十一月大霧中自胥口渡太湖

白霧漫空白浪深。舟如竹葉信浮沉。科頭晏起吾何敢。自有山川印此心。

靈祐觀即古神景宮也。相傳靈宮廊百間繞三大殿。謂之百廊三殿。今不復有堂。前有垂絲檜三本。

陽谷西門鎖洞宮。古苔斑駁檜蒙茸。百廊三殿惟留井。萬壑千巖有瘦筇。

林屋洞仙經。一名左神幽虛洞天。正洞門左觀中出。觀左門又有二門。一名雨洞。一名陽谷洞。

擊水搏風浪雪翻。煙銷日出見仙村。舊知浮玉北堂路。今到幽墟三洞門。石燕翹飛遮炬火。金籠深阻護嵌根。寶鐘靈鼓何須叩。庭柱宵晨已默存。

包山寺 在毛公壇前別峯下。燕受深老所作。深老入山時。手植二竹。今遂成林。山上松多非種植。風吹松子

自成。謂之飛松。

仙塢遜半坐。精廬遷古幢。槁衲昔開山。至今坐道場。熾然說慈忍。禪海薰戒香。穉竹暗寒碧。飛松盤老蒼。船鼓入宴坐。紅塵隔滄浪。藤杖懶歸去。共倚蒲團牀。

毛公壇福地 西山最深處。毛公劉根也。身生綠毛。故云。有劉道人作小菴。在隱泉之上。

松蘿滴翠白晝陰。七十二峯中最深。綠毛仙翁已仙去。惟有石壇留竹塢。竹陰掃壇石槎牙。漢時風雨生。蘚花山中笙鶴尙遺響。湖外人煙驚歲華。道人眸子照秋色。邀我分山築丹室。驅丁役甲莫兒嬉。渴飲隱泉飢餌朮。

上方寺在銷夏灣上。

橫棹古銷夏。撻笳新上方。珠灣鎖員折。冰鏡沉空光。楓纈醉晴日。橘黃明蚤霜。開門松竹徑。隨處有清涼。

銷夏灣吳王避暑處。平湖循山。一灣雲水勝絕。

蓼磯楓渚故離宮。一曲清漣九里宮。縱有暑光無著處。青山環水水浮空。

橘園

橋中有佳人。招客果下遊。胡牀到何許。坐我金碧洲。沉沉剪綵山。垂垂萬星毬。奇采日中曬。生香風外浮。折贈黃團雙。珍逾桃李投。拆開甘露囊。快吸冰泉甌。熱腦散五濁。豈止沉疴瘳。未知商山樂。能如洞庭不。

華山寺在西山盡處。多泉泓。僧房數處有之。有湯岐公。胡茂老樞密。孫仲益尙書諸公題詩。

五湖西岸孤絕處。旃檀大士來同住。性空真水徧清涼。隨緣出現無方所。蒙泉新潔鑑泉明。淪茗羹藜甘似乳。何須苦問蓮開未。桂子萸花了今古。三翁綵筆照青霞。從此他山都不數。我今閒行作閒客。暫借雲窗解包具。魂清骨冷不成眠。徹曉跏趺聽粥鼓。脚力有餘西塢盡。明日灣頭更鳴櫓。却上東山喚德雲。別峯應在銀濤許。

縹緲峯西山最高峯。

滿載清閒一棹孤。長風相送入仙都。莫愁懷抱無消豁。縹緲峯頭望太湖。

鎮下放船過東山二首

打頭風急鼻雷鼾。醉夢閒心鐵石頑。惟有愛山貪未厭。西山纔了又東山。

老禪竿木各逢場。詩客端來共葦航。一任顛風聒高浪。滿船歡笑和詩忙。

翠峯寺在青山靈寶。顯老道場。山半有悟道井。庭下大羅漢木兩株。虬屈蟠壯。甚奇古。

來從第九天。橋社繫歸船。借問翠峯路。誰參雪竇禪。應真庭下木。說法井中泉。公案新翻出。諸方一任傳。

社山放船

社下鐘聲送客船。凌波搗鼓轉滄灣。橫煙曷處雞豚社。落日濃邊橘柚山。八表茫茫孤鳥去。萬生擾擾一舟閒。湖心行路平如鏡。陸地風波却險艱。

東山渡湖

渡船帆飽如張弓。倏忽世界寒沖瀾。堪輿無垠日夜汎。浩浩元氣蓬蓬風。湖光日色不可辨。但見水精火齊合。集成虛空波。臣川后敬愛客。約束祕怪驅魚龍。大千纒作大圓鏡。光中飛度迷西東。蒼茫一身無四壁。八方上下惟孤篷。毛仙出迎笑相問。何乃自苦荒寒中。吾生蓋頭乏片瓦。到處漂搖稱寓公。猶嫌塵土礙人眼。茲遊勝絕餘難同。九衢車馬恍昨夢。付與一笑隨飛鴻。

與游子明同過石湖

契闊相逢一笑歡。當年森桂共驂鸞。試談舊事醒村酒。仍趁新晴暖客鞍。梅粉都皴啼宿雨。柳黃不展噤春寒。從今鼎鼎多幽事。仍喜蛙聲不在官。

次韻同年楊廷秀使君寄題石湖

儀鳳當瑞九韶成。何事栖鸞滯碧城。公退蕭然真吏隱。文名藉甚更詩聲。句從月脇天心得。筆與冰甌雪

梳清。書到石湖春亦到。平堤梅影。綬紋生。  
半世輕隨出岫雲。如今歸作臥雲人。小山有賦招遊子。大塊無私佚老身。禪版夢中千嶂曉。鬢絲風裏萬  
花春。新年社餞鵝黃滿。賸醉田頭紫領巾。

自閩門騎馬入越城

日影穿雲亦未濃。夜來疎雨洗清空。村前村後東風滿。略數桃花一萬重。  
斷橋隕岸數家村。雨少晴多減漲痕。雪白鵝兒綠楊柳。日高猶自掩柴門。

姚夫人輓歌詞

衿帔虞繅後。詩書孟母鄰。高懷琴意靜。晚福詔恩新。自古悲風木。于今詠澗蘋。松銘無溢美。百世考堅珉。  
北山草堂千巖觀新成。徐叔智運使吟古風相賀。次韻謝之。

北山松竹堪怡顏。千巖觀前多好山。誰云都無卓錫地。亦尙有此茅三間。洞門無鑰常不關。小徑百曲蒼  
龍盤。衆芳迷人不知處。片雲與我俱忘還。花前一杯重鼎呂。明日屏田并灌圃。種苗種豆從此忙。昨夜驚  
雷送膏雨。

贈舉書記歸雲丘

一枕清風四十霜。孤生無處話淒涼。相看只有龐眉客。還在雲丘舊草堂。  
四股澗松雷斧碎。十圍巖桂燒痕枯。不知塔下跳珠處。舊竹春來有筍無。  
青山面目想依依。水石風林入夢思。白髮蒼顏心故在。只如當日看山時。



題查山林氏菴

戶庭清深宅翠微。雪如佳壁喚題詩。煙梢蠹蟲青圍屋。露葉鮮鮮綠滿籬。宿雨一春纔汎鴨。新蕪幾日已藏碑。山僧見客如枯木。疑是懶殘南嶽師。

木瀆道中風雨震雷大作

惡風奔雲何壯哉。溪水欲立山欲摧。石岸迸裂纜邊樹。胡牀動搖船底雷。靈巖塔後雨脚挂。胥口廟前浪花來。篷漏衣沾不足惜。酒瓶傾倒愁空壘。

光福塘上

指點炊煙隔莽蒼。午餐應可寄前莊。雞聲人語小家樂。木葉草花深巷香。春去已空衣尙絮。雨來何晚稻初芒。祇今農事村村急。第一先陂貯水塘。

與至先兄遊諸園看牡丹三日行徧

柱杖無邊處處過。粉圍紅繞奈春何。閨門昨日看不足。今日婁門花更多。蜂蝶蕭騷草露漫。小家籬落閉荒寒。欲知國色天香句。須是倚闌燒燭看。

次韻同年楊使君回自毘陵同泛石湖舟中見贈

客舫中流下。人家夾岸看。落花堆錦煖。吳藕鏤冰寒。莫厭清歡暫。須知後會難。小詩煩本事。任禿綵毫端。曲誤不須顧。客狂當好看。日斜雙槳急。風駛夾衣寒。臆說歸田樂。休歌行路難。石湖三萬頃。何處覓憂端。北渚乘風渡。西山帶霧看。袖單嫌翠薄。杯淺怯金寒。宿雨收全易。春醒解却難。且留行色住。重肯過蘇端。

頃乾道辛卯歲三月望夜。與周子充內翰泛舟石湖松江之間。夜艾歸宿農圃。距今淳熙己亥九年矣。余先得歸田。復以是夕泛湖。有懷昔遊。賦詩紀事。

石湖花月浮春空。憶共仙人同短篷。三更半醉吹笛去。權入濕銀天鏡中。鶴鳴喚歸斗未沒。却步扶疎花底月。不知行到碧桃邊。但見天風吹積雪。月圓月缺今幾回。依舊滿湖金碧堆。仙人還上玉堂宿。合有片時清夢來。一笑流光飛電抹。嫦娥相對兩愁絕。桂枝應亦老無花。蟾兔不須疑鶴髮。

嬾牀午坐

晴霄垂北窗。臥我翠幄中。不知幾斧鑿。成此太虛空。前雲稍過盡。後雲來無窮。烏雀有底忙。激彈過牆東。不如雙飛蝶。款款弄微風。我亦困思生。拋書眼蒙茸。

秋前三日大雨

暑殘堪喜亦堪憎。恰似沙場喋血兵。縱有背城餘燼在。能禁幾度瀉檐聲。

秋前風雨頓涼

秋期如約不須催。雨脚風聲兩快哉。但得暑光如寇退。不辭老景似潮來。酒杯觸撥詩情動。書卷招邀病眼開。明日更涼吾已卜。暮雲渾作亂峯堆。

立秋後二日泛舟越來溪三絕

西風初入小溪帆。旋織波紋縐淺藍。行入鬧荷無水面。紅蓮沉醉白蓮酣。一川新漲熨秋光。挂起篷窗受晚涼。楊柳無窮蟬不斷。好風將夢過橫塘。

飯後茶前困思生。水寬風穩信篙撐。不知浪打船頭響。聽作凌波解佩聲。

采菱戶

采菱辛苦似天刑。刺手朱殷鬼質青。休問揚荷涉江曲。只堪聊誦楚詞聽。

曉起聞雨

老來稍喜睡魔清。兀坐枯株聽五更。蕭索輪囷憐燭燼。飛揚跋扈厭蚊聲。登高事了從教雨。刈熟人忙却要晴。莫道西成便無慮。大須濃日曬香秔。

說虎軒夜坐

白雲深處臥癡頑。挂起東窗水月寬。但得好詩生眼底。何須寶剎現毫端。一身莫作官身想。萬境都如夢境看。蠅舍鄰翁能日醉。呼來分與一蒲團。

偶書

太行巫峽費車舟。休向滄溟認一漚。日下冰山難把玩。雨中土偶任漂流。元無刻木牽絲技。但合收繩卷索休。惟有酒缸并飯甑。却須秔秠十分收。

睡覺

漏箭聲中斷角哀。界窗猶有月徘徊。心兵休爲一蚊動。句法却從孤鴈來。漱罷玉池甘似醴。夢餘金鼓辯如雷。夜長展轉添許事。推枕蕭然一笑咍。

閩門行送胡子遠著作守漢川

前年送君朝明光。今年送君還故鄉。錦官樓上一樽酒。萬里閬門折楊柳。吳波沄沄蜀山蒼。人生行路如許長。相逢相送髮如雪。人生能禁幾離別。房湖風月開春臺。石湖水雲歸去來。西棹東帆君未了。相逢還向閬門道。

嘲蚊四十韻

暑魃方肆行。羽孽亦厲習。肖翹極么魔。塊坳累闢翕。濕生同糞蝟。腐化類宵熠。初來鬧郭郭。少進亘原隰。嚶如蠅聲。薨聚若蠡羽。揖俄爲殷雷。閔途作密霰。集口銜鋼針。鋒力洞衲衣。襲啾聲先計。議著肉便噓。吸立豹猶未定。卓錫已深入。血隨姑嘔升。勢甚轆轤汲。沉酣尻益高。飽滿腹漸急。晶晶紫蟹眼。滴滴紅飯粒。拂掠倦體煩。爬搔瘁肌澁。揀束不虞西。擒一已竄十。新癩蓓蕾漲。宿暈斑爛浥。竟夜眠轉展。連牀歎於悒。云何人戚欣。乃係汝張歛。驅以葵扇風。熏以艾煙濕。繁長鎮藏遮。帳隙亟補葺。火攻憚穢臭。手拍嫌腥汁。伏翼佐掃除。網蛛助收拾。薄暮洵交攻。大明訂未戢。牛革厚逾氈。鬣介鉅勝銳。遭汝若欲困。嗟人何以給。夏蟲雖衆多。罪性相百什。蜂蠆豈房權。蟻蝨但禪褶。羊羶蟻登俎。驢逸窟附馬。蠓惟舞醯瓮。蟬止崇書表。蚤爲鶴所撮。蠅亦虎能執。彼愆可貰死。汝罪當獻級。涼飈倏然至。醜類殆哉岌。一吹背吻破。再鼓翅翎縶。三千躒頡利。百萬走尋邑。快哉六合內。蔑有一塵立。虛空旣清涼。家巷得寧輯。雞窗夜可誦。蛩機曉猶織。雨簾繡浪卷。風燭淚珠泣。客來添羽觴。人靜拂塵笈。恍還神明觀。以啓坏戶蟄。消長誰使然。智力詎能及。閬門戲調行客。

日夜飛帆與跨鞍。閬門川陸路漫漫。人生自苦身餘幾。天色無情歲又寒。萬事惟堪六如觀。一杯莫信四

并難重陽雖過黃花少。尙有遲開玉雪團。

九月二十八日湖上檢校籬落

村北村南打稻聲。荒園屐齒亦嬉<sub>吟</sub>。菊邊更覺朝陽好。松下偏聞晚吹清。一歲無非吾樂事。千金不博此閒行。周遭踏徧芙蓉岸。足痺腰頑栩栩輕。

晚步吳故城下

意行殊不計榛菅。風袖飄然勝羽翰。拄杖前頭雙雉起。浮圖絕頂一鷗盤。醉紅匝地斜曛暖。熨練涵空漲水寒。却向東臯望煙火。缺蟾先暎榭林丹。

上沙田舍

更無雲物起微陰。壠畝人家各好音。歲晚陽和歸稻把。夜來霜力到楓林。兒童笑裏豐年面。烏鳥聲中落日心。釀秫炊秬都入手。賸拚腰脚辦登臨。

與現壽二長老遊壽泉因話去年林屋之遊題贈

何年錫杖刷清甘。天遣深源壽此菴。金鬢萬枝浮倒影。爲君題作菊花潭。松風放浪入雲關。二衲相從一士閒。人與瘦筇俱老健。去年今日在包山。

渡太湖

囊風閣雨半晴陰。慘淡誰知造化心。委命浮沉惟一葉。計身輕重亦千金。紅塵猶道不勝險。白浪莫嗔如許深。晚得薊山堪寄纜。臥聽鼙吼與龍吟。

再渡胥口

古來此地快蓬心。天繞明湖日照臨。一鴈雲平時隱現。兩山波動對浮沉。衰髯都共荻花老。醉面不如楓葉深。簪戶釣徒來問訊。去年盟在肯重尋。

跨馬過練墟喜晴

稻穗初乾怕雨時。晚來蒸煖欲霏微。西風若肯吹雲盡。不惜飄飄側帽歸。

晚歸石湖

何須駟馬街鄉關。只作歸農老圃看。夢裏曾腰綰結佩。年來新著惰遊冠。和煙種竹聊醫俗。帶月聞蛙不在官。久矣此心恬不動。如今併與此身安。

北山堂開爐夜坐

困眠醒坐一龕多。竹洞無關斷客過。貪向爐中煨榾柮。懶從掌上看菴摩。閒無雜念惟詩在。老不甘心奈鏡何。八萬四千安樂法。元無祕密可伽陀。

入城

十里清風一餉間。片帆真欲解人顏。林家莊近聞鵝鴨。船到閭門儘未關。儘字俗用已久。據理只合用盡字。

次韻蚤蚊

羽蟲么魔塞區寰。造化胡爲弗疾頑。長養汗泥草木處。縱橫大地山河間。夜聲雷動人力屈。秋喙花開天理還。但願江湖無白鳥。何須金鼎鑄神姦。

冬至晚起枕上有懷晉陵楊使君

新衣兒女鬧燈前。夢裏莊周正栩栩。騎馬十年聽曉鼓。人生元有日高眠。  
多稼亭邊有所思。冬來撚却幾行髭。也應坐擁黃紬被。斷角孤鴻總要詩。

寒雨

何事冬來雨打窗。夜聲滴滴曉聲淙。若爲化作漫天雪。徑上孤篷釣晚江。

戲贈脚婆

日滿東窗照被堆。宿窗猶自煖如煨。尺三汗脚君休笑。曾踏鞦韆待漏來。

除夜前二日夜雨

雪不成。花夜雨來。壠頭一洗定無埃。小童卻怕溪橋滑。明日先生合探梅。

次韻章秀才北城新圃

方流桃花塢。窈窕入壺天。碧城當巖岫。清灣如澗泉。風月欲無價。聊費四萬錢。雪後春事起。紅雲蜂蝶邊。  
西城如西塞。桃花古來多。釣艇鱖魚肥。前身張志和。煙霏幾白鷺。風雨一綠蓑。清江韻新引。清絕勝陽阿。

夢中作

漠漠人間一氣平。虛無宮殿鎖飛瓊。碧雲萬里海光動。何處書來金鶴鳴。

北城爲雪所厄

凍藥粘枝瘦欲乾。新年猶未有春看。雪花祇欲欺紅紫。不道梅花也怕寒。

雪後六言二首

雨聲和深巷。屐風力到短檠燈。可惜滴殘檐雪。從教漂盡河冰。  
歲寒破屋萬卷。風急疎窗一燈。高臥眼生醉繡。遠遊鬚有堅冰。

元夕大風雨二絕

東風無賴妒華年。一夜淒寒到酒邊。放盡珠簾遮畫炬。莫教檐雨濕青煙。  
河傾海立夜翻盆。不獨妨燈更損春。凍澁笙簧猶可耐。滴皴梅頰勢須嗔。

春懷

柳顰梅笑各相惱。詩債棋讎俱見尋。莫道幽居無一事。春來風物總關心。

自橫塘橋過黃山

陣陣輕寒細馬驕。竹林茅店小帘招。東風已綠南溪水。更染溪南萬柳條。

次韻謝李叔玠追路送筍

墮地錦棚苗。解衣溫玉姿。來償食竹債。大勝伏雌炊。少日羹藜子。老來煨芋師。盤餐登異味。指動已先知。



此  
页  
空  
白

# 石湖居士詩集卷二十一

秀州門外泊舟

拍岸清波撲岸埃。黑頭霜鬢幾徘徊。禾輿門外官楊柳。又見扁舟上堰來。

臨平道中

煙雨桃花夾岸栽。低低渾欲傍船來。石湖有此紅千葉。前日春寒總未開。

夜過越上不得遊覽

王程公事兩相催。衝雨片帆連夜開。千巖萬壑在何處。山陰道中無好懷。豈有酒船尋賀老。與盡卻能訪安道。鑑湖春色漫芳菲。付與青青湖畔草。

道中古意二絕

桃李寂無言。垂楊照溪綠。不見苧蘿人。空吟若邪曲。浣紗寂不好。辛苦觸戰箭。東施無麗質。安穩嫁鄉縣。

觀禊帖有感三絕

古人賦多情。無事輒愁苦。蘭亭一觴詠。感慨乃如許。寶章蘊九泉。摹本範百世。白鵝滿波間。誰識腕中意。三日天氣新。禊飲傳自古。今人不好事。佳節棄如土。

浙東舟中

處處槩樊圃。家家桃廡門。魚鹽臨水市。煙火隔江村。雨過張帆重。潮來汲井渾。彎跽短篷底。休說兩朱轡。

初赴明州

四征惟是欠東征。行李如今忽四明。海接三韓諸島近。江分七堰兩潮平。擬將寬大來宣詔。先趁清和去勸耕。頂踵國恩元未報。驅馳何敢歎勞生。昌國縣圖障於海中。輿字云。自此與高麗國接界。蓋宇內極東處也。

寄虎丘範長老

誰云簪紱坐成禽。亦漫爲官漫好音。身已備嘗生老病。心何曾住去來今。一波不動月空照。萬籟無情風自吟。持此東歸似同志。故應分我半山林。

次韻汪仲嘉尙書喜雨

雨雲渾似雪雲同。天意人心本自通。吏役驅驅騎馬滑。何如欵枕閉門中。老身窮苦不須憂。未有毫分慰此州。但得田間無歎息。何須地上見錢流。

曉起

窗明驚起倒裳衣。鈴索頻搖定怪遲。卽入簿書叢裏去。少留欵枕聽黃鸝。

大風四明亦有颶風。

鸚母從來海若家。青天白地忽飛沙。煩將殘暑驅除盡。只莫顛狂損稻花。

大黃花

大芋高荷半畝陰。玉英危綴碧瑤簪。誰知一葉蓮花面。中有將軍劒戟心。

進修堂前荷花

方池留水勝埋盆。露入蓮腮沁粉痕。鈴索無聲人不到。小禽飛入鬧荷根。

州宅堂前荷花

凌波仙子靜中芳。也帶酣紅學醉粧。有意十分開曉露。無情一餉斂斜陽。泥根玉雪元無染。風葉青葱亦自香。想得石湖花正好。接天雲錦畫船涼。

新荔枝四絕

荔浦園林瘴霧中。戎州沾酒擘輕紅。五年食指無占處。何意相逢萬壑東。海北天西兩鬢蓬。閩山猶欠一枝筇。艸船荔子如新摘。行脚何須更雪峯。甘露凝成一顆冰。露穠冰厚更芳馨。夜涼將到星河下。擬共嫦娥鬪月明。

遶泊飛來不作難。紅塵一騎筦長安。孫郎皺玉無消息。先破潘郎玳瑁盤。四明海舟自福唐來。順風三數日至。得荔子。色香都未減。大勝戎涪間所產。莆陽孫使君許寄蜜荔。過期不至。貳車潘進奏餉玳瑁一種亦佳。并賦之。

甬東道院午坐

一夜西風轉酒旗。午餘殘暑不多時。綠荷半蝕霜前葉。丹桂全封雨後枝。忙裏有詩償日課。老來無賦爲秋悲。梳頭小隸那知此。強向窗前數鬢絲。

東門外觀刈熟民間租米船相銜入門喜作二絕。

菊。莎。杞。棘。爨。無。煙。日。日。文。書。橫。索。錢。今。日。甬。東。官。況。好。東。津。門。外。看。租。船。文書。謂諸司督遺者。  
潮。到。靈。橋。綠。繞。船。海。邊。力。穡。屢。豐。年。淡。青。山。色。深。黃。稻。恰。似。胥。門。九。月。天。

探木犀

秋。半。秋。香。花。信。遲。攀。枝。擘。葉。看。纖。微。昨。朝。尙。作。茶。槍。瘦。今。雨。催。成。粟。粒。肥。  
九。月。五。日。晴。煖。步。後。園

海。氣。烘。晴。入。斷。霞。半。空。雲。影。界。山。斜。輕。羅。小。扇。游。蜂。畔。只。比。東。風。有。菊。花。  
九。日。憶。菊。坡

菊。坡。長。恨。隔。橫。塘。城。郭。山。林。自。不。雙。放。棹。松。江。花。已。遠。濤。江。之。外。更。鄞。江。  
重。陽。九。經。堂。作

俗。間。佳。節。自。恩。恩。老。去。悲。秋。又。客。中。青。嶂。捲。簾。三。面。月。黃。花。吹。鬢。幾。絲。風。十。年。故。國。新。栽。柳。萬。里。他。鄉。舊。  
轉。蓬。誰。與。安。排。今。夜。夢。片。帆。飛。到。小。籬。東。

眞瑞堂前丹桂

血。色。凡。花。太。俗。生。花。工。新。意。染。秋。英。袍。紅。太。重。韜。紅。淺。畫。不。能。摹。句。寫。成。  
官。忙。風。月。鎮。長。閒。開。遍。香。紅。酒。尙。寒。若。要。與。花。相。領。略。千。巖。隨。分。有。闌。干。石。湖。千。巖。觀。前。手。植。丹。桂。二。畝。

題羔羊齋外木芙蓉

傭。粧。酣。酒。夕。陽。濃。洗。盡。霜。痕。看。綺。叢。綠。地。團。花。紅。錦。障。不。知。庭。院。有。西。風。

進思堂夜坐懷故山

塵事潮來不可推。身如病鶴強羸。簿書遮斷尋詩路。風雨驚殘問月杯。想得竹門無客到。直須雪夜有船迴。鱸鄉望眼雙明處。祇欠凌霄萬仞臺。

楊少監寄西征近詩來。因賦二絕爲謝。詩卷第一首。乃石湖作別時倡和也。

柴門重客醉中歸。尙憶揮毫索紙時。何物與儂供不朽。西征卷首石湖詩。錦囊隨上越王臺。天海風濤亦壯哉。書到嶺頭梅恰動。一枝應伴一篇來。

羔羊齋小池兩涘木芙蓉盛開有懷故園

洞戶掩秋深。畫橋橫晚靜。嫋嫋芙蓉風。池光弄花影。懷我白鷗邊。錦帳繚千頃。明河拍岸平。紅綠染天鏡。釣船無畔岸。收拾入簿領。牆籬束院落。寒窳令人瘦。

鹿鳴席上贈貢士

登陸由來說四明。台星光處更魁星。海濱二老尊周室。館下諸生右漢廷。秋賦重增人物志。春闈俱上佛名經。一飛好趁扶搖便。咫尺西興是北溟。

大廳後堂南窗負暄

萬壑無聲海不波。一窗油紙暮春和。醉眠陡覺氍毹贅。圍坐翻嫌榼柶多。水煖玉池添漱嚙。花生銀海費揩摩。端如擁褐茅檐下。祇欠烏烏擊缶歌。

晚步北園

刮地晴飈退海痕。出門無扇可障塵。麥粘瘠土何時雪。梅糝疎林昨夜春。天鏡風煙疑夢事。鬢霜時節尙官身。裹章束帶朝還暮。慚愧青鞋紫領巾。

謝賜臘藥感遇之什

鴻寶刀圭下九關。十年長奉蠶封看。扶持蒲柳身猶健。收拾桑榆歲又寒。天地恩深雙鬢雪。山川途遠一心丹。疲忙疾苦今何似。拜手歸來愧伐檀。

立春後一日作

浮生萬法本悠哉。大笑羲娥轉轂催。官事已邀癡作伴。春風應共老俱來。雲容雪意將詩問。柳眼花心待酒媒。九十韶光天不斲。人間笑口自難開。

春前十日作

臘淺猶賒十日春。官忙長愧百年身。雪催未動詩無力。愁遣還來酒不神。節物何曾欺老病。書生自慣說悲卒。終期戚促成何事。今古紛紛一窖塵。

三江亭觀雪

陰山陽朔雪中迴。行到天西玉作堆。乘興卻遊東海上。白銀宮闕認蓬萊。

懷歸寄題小艇

日出塵生萬劫忙。可憐虛費隙駒光。若教閒裏工夫到。始覺淡中滋味長。歲晚角巾思芋栗。年來手版愧耕桑。松風蘿月須相信。春水深時上野航。

雪後雨作

瑞葉飛來麥已青。更煩膏雨發欣榮。東風不是厭滕六。卻怕雪天容易晴。

再雪

銀竹方依檐住。瑤花又入簾窺。一白本憐麥瘦。重來應爲梅遲。

立春日陪魏丞相登三江亭

佳節登臨始此回。聊從瞻靄望蓬萊。水分江北渡頭去。風自海東潮外來。太白天寒猶帶雪。十洲池煖已浮醅。一尊往醉發船鼓。我亦歸帆相次開。

寄題鹿伯可見一堂

夢覺春闈俱轉蓬。仙凡今隔玉霄東。聊攀鐵鎖問何似。豈敢避堂邀蓋公。生來於君一歲長。決去愧我三年遲。今世誰不落第二。著鞭尙續堂中詩。雪溪興盡船當迴。卻擬登陸遊天台。經行見一堂前路。轉入湖山尋悞來。將赴建康出城

牒訴繽紛塞甕天。經年癡坐兩三椽。出門納納乾坤大。依舊青山繞畫船。寺莊

大麥成苞小麥深。秧田水滿綠浮針。今年一飽全無慮。寬盡歸舟去客心。育王方丈



窗紙悲嘶萬壑風。石梁飛澗倒枯松。因勤昨夜三更雨。添作投澗雪色龍。

鰻井

決甃神通未易論。雨聲留客夜翻盆。不辭客路春泥滑。且足秧田舊水痕。

妙喜泉

二士共談碑上法。千僧同酌沼中泉。法門泉味知多少。水桶繩頭一串穿。

明月堂

古來禪窟鎖巖扃。拂子崔嵬拄杖橫。塔上佛光堂上月。莫言公案不分明。

自育王過天童松林三十里

竹輿窈窕入蕭森。逗雨梳風冷客襟。翠錦屠蘇三十里。不知脚底白雲深。

香山

抖擻軒裳一闋塵。任教空翠滴烏巾。老身已到籃輿上。處處青山是故人。

育王望海亭

海雲晦靄日龍葱。案指光中萬象空。想見蓬萊西望眼。也應知我立長風。

天童三閣千佛羅漢善財

松蘿幕天墮空翠。迎面風香三十里。會宮亭亭隔瑤水。碧瓦瓊樓五雲裏。千佛當門無半偈。聲聞未解祖師意。徧參踏破青鞋底。前樓後閣玲瓏起。閒客那知如許事。東齋聽雨爛熳睡。覺來一轉聊布施。普請雲

堂來擬議。

石湖居士詩集 卷二十一

三三

此页空白

# 石湖居士詩集卷二十二

## 送江朝宗歸括蒼

半生三解后。相看成老翁。詩情故舉。袖有天都峯。江山佳麗地。登臨苦忽忽。塔燈落淮水。寺樓倚霜空。攬拾著錦囊。撫掌夸窮工。歸轡不可挽。思入孤征鴻。洞天我昔遊。俛仰星一終。士友歎契闊。吏民念罷癯。婆娑故將軍。白髮簿書叢。足跡雖四方。夢寐煙雨東。歸田有脚力。尙往尋行蹤。期君斬寒藤。伴我搗枯筇。

## 鍾山閣上望雨

天闊山長雨似煙。忽然飛去暗平川。秔禾未實稔禾瘦。不用廉纖便霈然。

## 除夜

婪尾杯殘雪滿簷。牀頭曆日費光陰。故山巧入忙中夢。新歲尤關客裏心。烏鵲倦時三匝繞。鷓鴣穩處一枝深。勞生佚老尋常事。從政那堪力不任。

## 元日

老來百味絮沾泥。期會關身尙火馳。幾夜鄉心欹枕處。今年脚力上樓時。酒缸幸有乾坤大。丹鼎何憂日月遲。莫道神仙無可學。學仙猶勝簿書癡。

## 體中不佳偶書

生平人比似維摩。試比涎孱不啻過。舊摘衰髯今雪徧。頻措病眼轉花多。從來世味聊復爾。此去官身如

老何收拾頽齡加藥餌。尙堪風月對婆娑。

坐嘯齋書懷時方治眼濟。

老來窮苦事相違。兀坐鈴齋竟日癡。眼目昏緣多押字。胸襟俗爲少吟詩。月侵燈影吏方去。春徧梅梢官未知。直待食新方綬帶。明朝騎馬過陵陂。

寶公祈雨感應用陳甲公韻賦詩爲謝

臙原龜坼暮春時。夾路爐薰共禱祠。喚起雲頭千嶂湧。飛來雨脚萬絲垂。無情梅塢猶紅綻。有意秧田盡綠滋。大施門開須滿願。願均此施匝天涯。

送徐叔智運使奉祠歸吳中

手種湖邊花百畝。東風日夜催歸去。當年辛苦種花時。不道白頭猶未歸。君如肯過城南陌。但向水雲紅處覓。煩呼猿鶴問平安。富有畦丁解看客。我今江船亦欲東。檝迎楓橋成兩翁。壓枝萬朵雖過盡。尙及巢龜蓮葉中。

送舉老歸廬山

二千里往回似夢。四十年今昔如浮。去矣莫久留桑下。歸歟來共煨芋頭。

題現老真

三十年來共葛藤。如今蓮社冷如冰。茶瓜櫻筍遊山會。從此齋廚欠一僧。

致一齋述事

文書煙海困浮沉。不覺盤跚百病侵。偶問客年驚我老。忽聞鶯語歎春深。今朝麥粒黃堪麪。幾日秧田綠似針。除却一犁春雨足。眼前無物可關心。

次韻楊同年祕監見寄二首

瘴雲嵐雨幾時歸。應把周南視九夷。舊說鬼神驚落筆。新傳狐兔駭褰旗。韶江石老簫音在。庾嶺梅殘驛使遲。自古朱絃清廟具。莫貪鵬海看天池。

吾衰長愧接輿狂。忙裏何心領燕香。塵土簿書憎鐵研。水雲蓑笠傲金章。論文無伴法孤起。訪舊有情書數行。何日却同湖上醉。露幃宵幄爲君張。

曉起信筆

午枕汗如洗。曉櫺氣稍蘇。莎蛩試風露。滿意鳴相呼。倦客感節物。流光不躊躇。秋聲已如許。殘暑何足驅。人言今歲熱。迥與常歲殊。此理恐未然。豈不知頭顱。年年有三伏。日日非故吾。婆婆今尙可。後當彌不如。病骨須一涼。未暇惜居諸。坐來有清思。西風搖井梧。

送曾原伯運使歸會稽用送徐叔智韻

秧田水滿麥棲畝。勸農使者翩然去。去年愁苦救荒時。豈敢夢爲今日歸。天津橋西官柳陌。文書燈火長相覓。江山信美不留人。寂寞回潮工送客。鏡湖一曲浙河東。萬頃太湖囊笠翁。願廣四愁作五詠。我所思兮思剡中。

王南卿母挽詞

櫛縱稱純孝。笄珈蚤隱憂。病中心已化。身外世如浮。聞道悲風木。誰能駐壑舟。佳兒行古道。足以賁潛幽。

次韻鄭校書參議留別

年豐方共慶。歲晚客他之。吏事朝還暮。人生合復離。江山殘夢破。風月片帆移。後會吾衰矣。桑榆一繭絲。

重九賞心亭登高

憶隨書劍此徘徊。投老雙旌重把杯。綠鬢風前無幾在。黃花雨後不多開。豐年江隴青黃徧。落日淮山紫翠來。飲罷此身猶是客。鄉心却附晚潮回。

寄題王仲顯讀書樓

嗜書如嗜酒。知味乃篤好。欲辨已忘言。不爲醒者道。使君青箱家。文史藃懷抱。平生名教樂。雙旌不滿笑。忽乘雪溪輿。來轍秦淮棹。丘亭客漂泊。夜夜短檠照。人云太癡絕。我自斷輪妙。今朝檣竿起。昨夢繞閣皂。云有百尺樓。歸寄北窗傲。滴露紉朱黃。拂塵靜細縹。想當呻畢時。寧復羨騰趯。古心千載事。俗眼詎能料。蕭灘富還往。取友必同調。一張復一弛。釀秫助歌嘯。

菊樓金陵出一種菊甚高。園丁結以樓塔。或至一二丈。

東籬秋色照疎蕪。挽結高花不用扶。淨洗西風塵土面。來看金碧萬浮圖。

北門覆舟山道中

苒苒霜風掠弊貂。簿書塵外訪漁樵。林煙色淡如雨濛。塘水痕深似落潮。鴈字江天聞塞管。梅梢山路欠溪橋。騎驢索句當年事。歲暮騷人不自聊。

送郭明復寺丞守蜀州

士進固未易。退亦良獨難。西州多故人。歸路常險艱。有道獨行意。郭舟若神仙。勿輕銀兔符。傾倒金貂蟬。唐安君昔遊。百萬蠲逋錢。我亦常客夢。醉歌采菱船。父老尙相記。況君有前緣。想見東西湖。恩波漲春瀾。此地著經濟。紗籠相後先。潭潭相業堂。新題我所刊。政爲來者地。君行豈偶然。去去進明德。後日五四賢。

元日謁鍾山寶公塔

雪後江臯未放春。老來猶駕兩朱輪。歸心歷歷來時路。官事驅驅病裏身。未暇雞窠尋古佛。且防鶴帳怨山人。君看王謝墩邊地。今古功名一窖塵。

元日馬上二絕

泥絮心情雪樣髯。詩囊羞澁酒杯嫌。年來萬事都消滅。惟有牀頭曆日添。筋骸全比去年非。騎吹聲中憶釣磯。待得江風欺老病。何如閒健一蓑歸。

春晚

荒園蕭瑟懶追隨。舞燕啼鶯各自私。窗下日長多得睡。尊前花老不供詩。吾衰久矣雙蓬鬢。歸去來兮一釣絲。想見籬東春漲動。小舟無伴柳絲垂。

北窗偶書呈王仲顯南卿二友

官居故偪仄。北窗誰所開。胡牀憩午暑。簾影久徘徊。高槐忽低昂。知有好風來。須臾墮几席。篆香小飛灰。病翁亦披襟。月露裝奇懷。壠頭暴背耘。永晝婦子偕。不辭夢山裂。田水如潑醅。去年豈堪說。稻根已浮埃。



使君坐侯宅。窗間卽涼臺。何敢訴苦熱。灑然助心齋。

中秋清暉閣靜坐。因思前二年石湖四明賞月。

前年銀界接天迷。去歲金盤湧海低。漂泊相逢重一笑。秦淮東畔女牆西。

玉麟堂會諸司觀牡丹醪醑三絕

東風微峭護餘春。紅紫香中酒自溫。不用忙催銀燭上。醪醑如雪照黃昏。  
洛園姚魏碧雲愁。風物江東亦上游。憶起遨頭八年夢。彭州花檻滿西樓。  
莫向花前惜酒杯。一年一度有花開。浮生滿百今強半。歲歲看花得幾回。

重九獨坐玉麟堂

江上西風動所思。又將清實負東籬。年年客路黃花酒。日日鄉心白鴈詩。籠月秦淮無舊曲。馳煙鍾阜有新移。人生笑口真稀闊。況值官忙閱雨時。

次韻舉老見嘲未歸石湖

半世吟客舍柳。長年憶後園花。爲報廬山莫笑。雲丘今屬誰家。

次韻曾仲躬侍郎同登伏龜二絕

帶東江淮翠岫圍。掌窺臺殿碧鱗差。劉郎句裏登臨眼。壓倒三江二水詩。  
古來遊客謾西東。領會誰如我與公。露坐繩牀天不盡。絕勝簾雨棟雲中。

題李雲叟畫軸兼寄江安楊簡卿府二絕

蒼煙枯木共荒寒。籬落堤灣洶漲湍。歸路宛然歸未得。閒將李叟畫圖看。  
新圖來自雪邊州。皴石枯槎筆最遒。明府能詩如此畫。爲渠題作小營丘。

晨出蔣山道中

霜痕如雨沁東郊。樂歲家家一把茅。故國丘陵多麥壠。新晴籬落有梅梢。  
小山何在應招隱。北嶺如今已獻嘲。歸計未成聊琢玉。飄飄風袖作推敲。

有感今昔二首

陽春白雪雅音希。俚耳冬烘輒笑嗤。麀見麗姬翻決驟。烏聞韶樂却憂悲。  
爛奚輕薄人何敢。伏獵荒唐自不知。蚓竅蠅鳴莫嘲誚。彭亨菌蠢正當時。

飄風驟雨謾驚春。掃蕩何煩臂屈伸。天識不衷宜不恕。神歆非類卽非仁。  
休讎地下枯魚骨。且鬪尊前健犢身。靜看可憐還可笑。香山寧是幸災人。

種竹歎。向在成都種竹滿西園。偶苦寒疾。竭來金陵。復種繞池。未幾以眩臥。閑家人子。遂謂不當

種竹。其說甚可怪歎。口占此詩。

宜華種萬竿。寒疾滴相倚。玉麟種千竿。偶復須藥餌。僮奴狎今昨。競道竹相崇。  
如將取作狂。似以儒爲戲。此君來聲冤。林神亦短氣。我夢不平鳴。霍然推枕起。明當還石湖。賸種千畝地。  
未論比封君。且用執讒喙。

公退書懷

昨者騰章奏發倉。今茲飛檄議驅蝗。四無告者僅一飽。七不堪中仍百忙。  
皦日自能臨俯仰。浮雲寧解制

行藏求田問舍亦何有。歲晚倦遊思故鄉。

# 石湖居士詩集卷二十三

## 初秋二首

急雨過窗紙。新涼生簾藤。蹒跚老鈴下。來炷壁間燈。  
壯歲故多病。老年知不堪。何須看公案。只此是真參。

## 蝙蝠

伏翼昏飛急。營營定苦飢。聚蚊充口腹。生汝亦奚爲。

## 蛩

壁下秋蟲語。一蛩鳴獨雄。自然遭跡捕。窘束入雕籠。

## 四花

素馨間末利。木犀和玉簪。醫來都屏去。頭眩怕香侵。

## 謝範老問病

三椽一席度秋冬。造化兒嬉因此翁。帖有王書難治眩。文如陳檄不驅風。骨枯似枿膚如腊。髮織成氈鬢  
作蓬。點檢病身還一笑。本來四大滿虛空。

## 二偈呈似壽老

法法剎那無住。云何見在去來。若覓三心不見。便從不見打開。

孟說所過者化。莊云相代乎前。何處安身立命。飢餐渴飲困眠。

諾惺菴枕上

噩夢驚回曉枕寒。青燈猶照藥爐邊。紙窗弄色如朧月。又了浮生一夜眠。

癸卯除夜聊復爾齋偶題

五夜燈花重。東風角韻來。雪慳衣未纒。春早句多梅。寂歷羅門亞。溫馨樂鼎煨。老嫌新歲煥。病喜舊星回。鬱壘先題版。屠蘇後把杯。書屏無健筆。爆竹有寒灰。錫櫟牙難膠。椒盤眼倦開。陳人仍憊臥。身世兩悠哉。

甲辰人日病中吟六言六首以自嘲

攢眉輒作山字。啾耳惟聞水聲。人應見憐久病。我亦自厭餘生。日慌慌蟻旋磨。頭岑岑鼈負山。筆牀久已均伏。藥鼎何時巧閒。政爾榮枯衛澁。剛云人厄天窮。歸咎四衝臨歲。乞憐九曜過宮。復吉既愆七日。泰來惟候三陽。曆日今頒寅正。占星更候農祥。有日猶嫌開牖。無風不敢上簾。報國丹心何似。夢中抵掌掀髯。壯歲喜新節物。老來惜舊年華。病後都盧不問。家人時換瓶花。

正月九日雪霰後大雨二首

夜霰三更竹瓦。晝冥一陣翻盆。賴是梅花已過。不然絨玉誰溫。黃昏簷溜垂瀑。清曉屐聲滿門。湖光萬頃何似。小沼先吹縠紋。

正月十日夜大雷震二首

阿香真是健婦。夜半鼓行疾驅。直恐南山破碎。絕憐窗紙枝梧。  
人言有物司鼓。春到揚桴發聲。但要蟄蟲啓戶。何須一許震驚。

吳燈兩品最高

鏤冰影裏百千光。剪綵毬中一萬窗。不是齊人誇管晏。吳中風物竟難雙。

燈夕懷廣蜀舊事

灘水橋西列炬香。少城樓下變燈忙。兒嬉萬里客程遠。老懶一龕春夢長。

上元紀吳中節物俳諧體三十二韻

斗野豐年屢。吳臺樂事并。酒墟先疊鼓。歲後卽旗亭先擊鼓不已。以迎節意。燈市蚤投瓊。臘月卽有燈市。珍奇者。數人釀買之。相與呼盧。采勝者得燈。價喜膏油賤。祥占雨雪晴。質管仙子洞。坊巷燈。以連枝竹縛成。洞門多處數十重。茵蔯化人城。蕙花燈最多。檣炬疑龍見。舟人接竹桅檣之表。置一燈。望之如星。橋星訝鵲成。橋燈。小家厖獨踞。犬燈。高閉鹿雙撐。鹿燈。屏展輝雲母。琉璃屏風。簾垂晃水精。琉璃簾。萬窗花眼密。萬眼燈以碎羅紅白相間砌成。工夫妙天下。多至萬眼。千隙玉虹明。琉璃毬燈。每一隙映成一花。亦妙天下。蒼蘆丹房挂。梔子燈。葡萄綠蔓繁。門葡萄燈。方縑繙史冊。生絹糊大方燈。圖畫史冊故事。村人喜看。圓魄綴門衡。月燈。擲燭騰空穩。小毬燈。擲空中。推毬滾地輕。大滾毬燈。映光魚隱見。琉璃壺瓶貯水養魚。以燈映之。轉影騎縱橫。馬騎燈。輕薄行歌過。顛狂社舞呈。民間鼓樂。謂之社火。不可悉記。大抵以滑稽取笑。村田囊笠野。村

田樂·街市管絃清·街市細樂·里巷分題句·每里門作長燈·題好句其上·官曹別扁門·官府名額·多以絹或琉璃  
照映·旱船遙似泛·夾道陸行·爲競渡之樂·謂之划旱船·水偏近如生·水戲照以燈·鉗赭裝牢戶·獄燈·嘲嗤繪  
樂棚·山棚多畫一時可嘲謂之人·堵觀瑤席隘·喝道綺叢爭·禁鑰通三鼓·歸鞭任五更·桑蠶春繭勸·春自臘月  
即入食次·所以爲蠶事之兆·花蝶夜蛾迎·大白蛾花·無貴賤悉戴之·亦以迎春物也·梟子描丹筆·紅畫鴨子相餽  
遺·鵝毛剪雪英·剪鵝毛爲雪花·與夜蛾並戴·寶糖珍粒粒·餽拍·吳中謂之寶糖餽·特爲脆美·烏膩美飴餽  
烏膩糖·即白餽·俗言能去烏膩·撚粉團變意·糰子·熬糶臍膊聲·炒糯穀以下·俗名李婁·北人號糯米花·筵  
簞巫志怪·香火婢輸誠·俗謂正月百草靈·故帶葦針箕之屬皆卜焉·多婢子之輩爲之·簞卜拖裙驗·弊帚繫裙以下·  
名掃帚姑·箕詩落筆驚·即古紫姑·今謂之大仙·俗名箕箕姑·微如針屬尾·以針姑卜·伺其犀相屬爲兆·名針姑·  
賤及葦分莖·葦莖分合爲卜·名葦姑·末俗難訶止·佳辰且放行·此時紛僕馬·有客靜柴荆·幸甚歸長缺·居  
然照短檠·生涯惟病骨·節物尙鄉情·倚撫成俳優·咨詢逮里毗·誰修吳地志·聊以助譏評·

雪寒探梅

酸風如箭莫憑闌·凍合橫枝雪未乾·吳下得春元自晚·那堪天與十分寒·

曉枕三首

袁湯聽成萬籟·添被知是五更·陸續滿城鐘動·須臾後巷雞鳴·  
臥聞赤脚鼾息·樂哉栩栩蘧蘧·病夫心口相語·何日佳眠似渠·  
舒慘常隨天氣·關心窗暗窗明·日晏扶頭未起·喚人先問陰晴·

不寐

春霄似暖非暖。曉夢欲成未成。風竹時驚雀噪。月窗誰伴梅橫。

戲書二首

長病人嫌理亦宜。吾今有計可扶衰。煩君昇著山深處。恐有黃龍浴水醫。羣兒欺老少陵窮。口燥唇乾髮漫衝。顛沛須臾猶執禮。古來惟有一高共耳鳴。

風號高木水翻洪。歷歷音聞不是聾。一任大千都震吼。便從卷葉證圓通。

案上梅花二首

南坡玉雪萬花團。舊約東風載酒看。冷落銅瓶一枝亞。今年天女亦酸寒。地爐火煖日烘窗。一夜花鬢半吐黃。鼻觀圓通熏百和。博山三夕罷燒香。

古梅二首

孤標元不鬪芳菲。雨瘦風皺老更奇。壓倒嫩條千萬藥。只消疎影兩三枝。誰似西湖處士才。詩中籬落久塵埃。陸郎舊有梅花課。未見今年句子來。

至昌爲具賞東軒千葉梅然梅尙未開

玉葉重英意已芽。新移竹外小橫斜。東齋何似春工晚。鐵樹已花梅未花。

喜周妹自四明到



團欒話裏老龐衰。一妹仍從海浦來。孤苦尙餘兄弟樂。如今雖病也眉開。  
占星者謂命宮月孛獨行無害。但去年復照作災。今年正月一日已出。而歲星作福。戲書二絕。  
昔躔初度本除災。何意重逢作病媒。久住靈旂今日過。曆翁歡喜勸椒杯。  
暗曜加臨有救神。煌煌福德自天仁。只煩終惠蘇殘喘。官爵從渠奉董秦。

題藥方

孤童亦復夢槐柯。無德無功用福多。天理乘除當老病。巢源王訣奈君何。

園丁折花七品各賦一絕

單葉御衣黃

舟前鵝羽映酒塞。上駝酥截肪。春工若與多葉。應入姚家鴈行。

水精毬輕盈嫵媚。不耐風日。又名醉西施。又名風嬌。又名玉勝瓊。

縹緲醉魂夢物。嬌饒輕素輕紅。若非風細日薄。直恐雲消雪融。

壽安紅深色粉紅。多葉易種且耐久。

豐肌弱骨自喜醉。暈粧光總宜。獨立風前雨裏。嫣然不要人持。

疊羅紅開遲旬日始放盡

裝積剪裁千疊深。藏愛惜孤芳。若要韶華展盡。東風細細商量。

崇寧紅

勻染十分豔絕。當年欲占春風。曉起粧光沁粉。晚來醉面潮紅。  
輕紅

猩脣鶴頂太赤。榴萼梅腮弄黃。帶眼一般官樣。祇愁瘦損東陽。  
紫中貴

沉沉色與露滴。泥泥香隨日烘。滿眼豔粧紅袖。紫綃終是仙風。

聞春遠牡丹盛開

東軒聞道有花開。癡坐三椽首。謾回縱得好晴。猶懶看。那堪風雨揭天來。  
蜀花以狀元紅爲第一。金陵東御園紫繡毬爲最。

西樓第一紅多葉。東苑無雙紫壓枝。夢裏東風忙裏過。蒲團藥鼎鬢成絲。  
喜雨

昨遣長鬚借踏車。小池須水引鳴蛙。今朝一雨添新漲。便合翻泥種藕花。

嘲風

紛紅駭綠驟飄零。癡駭封姨沒性靈。報道海棠方熟睡。也須留眼爲渠青。

大風

春晴雖好恨多風。到眼花枝轉眼空。暗不與花爲道地。爭如雲淡雨濛濛。

風止

收盡狂飈捲盡雲。一竿晴日曉光新。柳魂花魄都無恙。依舊商量作好春。

苦雨五首

河流滿滿更滿檐。溜垂垂又垂。皇天寧有漏處。后土豈無乾時。  
不辭蛾化麥穗。叵忍秧浮浪花。兒孫汨汰護岸。翁媪扶攜上車。  
折筍肥梅釘坐。涎蝸鬪蟻上梁。雨工莫賈餘勇。留待稻花半黃。  
潤礎纔晴又汗。濕薪未爆先煙。壯夫往往言病。病叟岑岑且眠。  
已厭衣裳蒸潤。仍憐書畫爛斑。匱香尙餘幾所。盡付熏鑪博山。

謝龔養正送蘄竹杖

一聲霜曉謾吹愁。八尺風漪不耐秋。上座獨超三昧地。諾惺菴裏證般舟。  
釋氏謂常行爲般舟三昧。

寄題祝鄂州白雪樓

楚望風煙倚繡楹。使君靜治有高情。祇應襦袴新翻曲。壓倒當年寡和聲。

夏至二首

李核垂腰祝饒。粽絲繫臂扶羸。節物競隨鄉俗。老翁閒伴兒嬉。  
石鼎聲中朝暮。紙窗影下寒溫。踰年不與廟祭。敢云孝子慈孫。

重午

熨斗薰籠分夏衣。翁身獨比去年衰。已孤菖滌十分勸。卻要艾黃千壯醫。蜜粽冰糰爲誰好。丹符綵索聊

自欺小兒造物亦難料。藥裏有時生網絲。

積雨作寒五首

壓屋雨雲晝暗。環城霖潦夏寒。西池半沒荷柄。南蕩平沉芡盤。  
已報舟浮登岸。更憐橋塌平池。養成蛙吹無謂。掃盡蚊雷卻奇。  
熨帖重尋毳衲。補苴盡護紙窗。餘生雪鬢禪榻。昨夢雲帆漲江。  
婢喜蚊僵霧帳。兒噴蝸篆風樞。兀坐鼻端正白。忘懷眼底常青。  
山寒禪老不下泥。滑琴僧罕來。且喚園丁閒語。喜聞湖岸未頽。

喜晴二首

驅帚水爭溝口。卷簾日款屋山。飢燕癡兒叫怒。拙鳩去婦復還。  
窗間梅熟落蒂。牆下筍成出林。連雨不知春去。一時方覺夏深。

子文大丞重午日走貺袁酒清甚殆與遠水一色何其妙哉數語奉謝。

臘脚清若空。吾聞其語矣。今晨品義尊。公酒正如此。太常家有此段奇。銷得不齋醉如泥。但恨今無遏雲曲。送我菖蒲一杯綠。子文舊有歌者名遏雲。

子文見和云亦有小鬟能度曲復用韻戲贈。

三年屏杯酌甚矣。吾衰矣。眼中有溜澠。猶解商略此。花酒俱來事更奇。不妨禪心絮沾泥。翠眉何時真度曲。細意煩君畫蛾綠。

此  
页  
空  
白

# 石湖居士詩集卷二十四

## 題請息齋六言十首

洞門晝挂鐵鎖。閣道秋生綠苔。著下略同龜伏。瓜中且免蠅來。  
多謝紛紛雲雨。相忘渺渺江湖。坐隅但忌占鵬。屋上何煩譽烏。  
灑灑年年似馬。太行日日摧車。笑中恐有義再。泣裏難防叔魚。  
見影蛾猶鈹鈹。聞聲雁尙鴛鴦。問誰毛生名紙。知我角出車輪。  
不惜人扶難拜。非關我醉欲眠。勞君敬枯木耳。恐汝見濕灰焉。  
稅駕今吾將老。結廬此地不喧。恐妨蝴蝶同夢。笑倩顛當守門。  
口邊一任醜去。鼻孔慵將涕收。閒門冷落車轍。空室團欒話頭。  
冷煖舊雨今雨。是非一波萬波。壁下禪枯達磨。室中病著維摩。  
親戚自有情話。來往都無雜言。酒熟徑須相報。文成聊與細論。  
園丁以時白事。山客終日相陪。竹比平安報到。花依次第折來。

## 送劉唐卿戶曹擢第西歸六首

摩挲漢柱愴分襟。邂逅吳船喜盍簪。別久十年知幾夢。情親萬里只初心。  
學道何關紫與青。發身聊假佛名經。歸來解盡程書縛。千古文章似建瓴。

槐黃燈火困豪英。此去書窗得此生。學力根深方蒂固。功名水到自渠成。中年親友惜分離。況我身兼老病衰。餘景庶幾猶及見。登瀛召客過門時。我識岷峨最上頭。當年脚力與雲浮。兩山父老如相問。一席三椽正臥遊。四海西州舊故多。煩君問訊各如何。心期本自無南北。萬里天波一月波。末句戲用蜀語。以見久要不忘之意。

富順楊商卿使君。曩與余相別于澶之合江。渺然再會之期。後九年。迺訪余吳門。則喜可知也。今復分袂。更增惘然。病中強書數語送之。

合江縣下初語離。共說再會知何時。壽櫟堂前哄一笑。人生聚散真難料。青燈話舊語未終。船頭疊鼓帆爭風。草草相逢復相送。直恐送迎皆夢中。昨聞親上安邊奏。玉階從容移禁漏。天香懷袖左魚符。歸作雙親千歲壽。我今老病塘蒲衰。君歸報政還復來。萬里儻容明月共。更期後夢如今夢。

久病或勸勉強遊。適吟四絕答之。

風月箇中老子。江湖之上散人。化鑪苦靳清福。環堵閒拋好春。鶴怨久迴俗駕。鷗盟誰主載書。一丘一壑謝汝。三歲三秋望予。捫蝨卽是忙事。驅蠅豈非褊心。香煖香寒功課。窗明窗暗光陰。羸如蓐婦多忌。倦似田翁作勞。玩具僧梳別屨。歡惊了尾龜毛。

初秋閒記園池草木五首

莨莠爛紫終陋。蒼藟媯黃亦香。醫俗賸延竹色。療愁催拆萱房。

牛牽碧蔓自繞。雞聳朱冠欲爭。菱葩可範伯雅。蓼節偏宜麴生。蓼葩爲酒杯樣。最佳。蓼入麴爲勝。  
旱地蓮花嬌小。水盆梔子幽芳。微帳半年春艷。桂叢四季秋香。紫薇一名半年紅。嘉桂一種。四季有花。  
醉憐金瓊齊側。臥看玉簪對橫。腥水留灌末利。結香旋薰素馨。末利用治魚腥。水澆方多花。  
玉菌化生稚子。碧枝視現聲聞。馬齒任藏汞冷。鴻頭自勝硫溫。謂孩兒蓮、羅漢木、馬齒莧中有水銀。鴻頭芡實也。芡性煖。號水硫黃。

### 巖桂三首

風簾疎爽月裴回。悵望家人把酒杯。病著幽窗知幾日。瓶花兩見木犀開。  
越城芳徑手親栽。紅淺黃深次第開。不用小山招隱賦。身如強健日千迴。  
一株蕭索倚宣華。東苑香風屬內家。丹碧屠蘇銀燭照。平生奇絕象山花。少城園中惟有一株。建康東郊園有。亦不多。四明丹桂特奇。州宅所種尤蔚茂。常與魏丞相夜飲其下。

### 中秋無月三首

兒女無惊坐客稀。今年孤負隔年期。誰從天上牢遮月。不管人間大欠詩。  
撲地癡雲欲萬重。家家簾幙護房櫺。世間第一無情物。誰似中秋雨與風。  
一生露下風前客。兩歲愁邊病裏身。姑置陰晴圓缺事。藥寮燈火正相親。  
藻姪比課五言詩。已有趣。老懷甚喜。因吟病中十二首示之。可率昆季廣和。勝終日飽閒也。  
奮歲連新歲。涼牀又煖牀。山川屏裏畫。時刻篆中香。畏壘吾安土。支離飽太倉。若教身更健。鶴背入維揚。



物鹿紛紜夢。亡羊散亂心。眇昏遮眼讀。愁苦撚髭吟。幸覺行迷遠。其如臥病深。通身都放下。何用覓砭鍼。  
日煖衣猶襲。宵長被有稜。朝晡三椽飯。昏曉一缸燈。伴坐跼如几。扶行瘦比藤。生緣堪入畫。寂寞憩松僧。  
繩倚扶柺骨。蒲團閣瘁膚。事疑償業債。形類窘囚拘。空劫真常體。浮生幻化軀。箇中元不二。無語對文殊。  
軟熟羞盤饌。芳辛實枕幃。候晴先晒席。占濕豫烘衣。易粟雞皮皺。難培鶴骨肥。頭顱雖若此。虛白自生輝。  
數息憎晨清。伸眉愜晚晴。隙塵浮日影。窗穴嘯風聲。捫蝨天機動。驅蚊我相生。偶然成一笑。栩栩暫身輕。  
貴仕龜鑽筴。閒居馬脫鞵。冠塵昏舊製。帶眼剩新圍。堆案書郵少。登門刺字稀。掩關灰木坐。休示季咸機。  
目眇浮珠珮。聲塵籟玉簫。秋懷潘鬢禿。午夢楚魂銷。注水瓶花醒。吹薪藥鼎潮。南柯何處是。斜日上廊腰。  
靜裏秋先到。閒中晝自長。門闌疑泄柳。尸祝漫庚桑。腹已枵經笥。身猶試藥方。強名今日愈。勃窣負東牆。  
汗漬筇枝赤。苔封履齒青。有醫延上坐。無客抗分庭。霽月鑽窗看。鳴琴側枕聽。莫嗔猿鶴怨。岫幌兩年扃。  
視絮勞羣從。祇承愧闔家。亂泉供水遞。金液養丹芽。加釀厚如酪。旋春香勝花。百端扶老憊。無物報投瓜。  
學業荒呻畢。歡悰隔笑鹽。入秋先複幕。過夏亦疎簾。門客嗔愁思。家人獻吉占。尤憐小兒女。時報鵲鳴簷。  
贈臨江簡壽玉二首。簡攜王仲顯使君書來謁。并示孔毅甫夢蟾圖。今廟堂五府皆有題字。

蕭灘遠客扣田廬。貽我讀書樓上書。千里故情元共月。錯云多病故人疎。  
卷中圖畫袖中珍。上有三階五朵雲。白日青天光範路。未饒蟾窟夢紛紜。

壽樾前假山成移丹桂於馬城自嘲

堂前趣就小嶙峋。未許蹒跚杖屨親。更遣移花三百里。世間真有大癡人。

灼艾

血忌詳涓日。尻神謹避方。艾求真伏道。穴按古明堂。謝去羣巫祝。勝如幾藥湯。起來成獨笑。一病攬千忙。

東宮壽詩

甲觀秋彌月。前星蚤麗天。君親重慶日。家國中興年。英武神機遠。溫文德宇全。摘章森典則。會道極高堅。儉寶躬安履。仁端性自然。淵冲澄有量。海潤浹無邊。五學臨函丈。三朝拱邃延。頌聲敷政久。喜色問安還。銅律諧初度。桑弧絕舊傳。菊催重九近。梅占小春先。戲綵猗蘭殿。宣杯玳瑁筵。青宮千億壽。長對兩宮前。

十月朝開爐偶書。余病歸二年。未能拜掃松楸。曩常以此日侍先兄遊洞庭。并寫悲感之懷。

圃芋今年紫。籬楓昨日丹。開爐修故事。聽雨說新寒。橘社重遊阻。楸行再拜難。此時西望眼。衰涕不勝彈。

有懷龔養正

好在楚龔子。秋來情話稀。昨承書素說。行侍板輿歸。煙水潮平棹。風霜歲晚衣。幾時真訪戴。莫待雪花霏。

白髯行

四十踰四髯始黃。手持漢節臨大荒。輿疾歸來皮骨在。兩鬢尙作青絲光。俛仰行年四十九。萬里南馳復西走。斑斑頷下點吳霜。猶可芟夷誑賓友。屈指如今又十年。兩年憊臥秋風前。人生血氣能幾許。不待覽鏡知嗒然。長安後輩輕前輩。百方染藥千金賣。煩擱包裹夜不眠。無奈霞頭出光怪。病翁高臥門長扃。垂雪穆穆骨更清。兒童不作居士喚。喚作堂中老壽星。

但能之提刑。相別十年。自曲江遠寄二詩。敍舊良厚。次韻爲謝。亦以首章奉懷。略道湘南分攜故

事。末篇自述年來衰病。不復故吾也。

憶昔驂鸞識俊英。朱旛纒斧盡能名。書隨庾嶺一枝寄。句挾韶江九奏成。吳粵交馳清夜夢。參辰不隔故人情。何時重醉金槽曲。一洗陽關別恨平。  
瀟落枵虛似瓠壺。新添雪鬢與雙鬚。也知病叟形容變。非是仙儒骨相攏。歲晚山林如自獻。年豐田野亦多娛。無端拙恙妨清樂。未許扁舟到五湖。

復以蟾硯歸龔養正

夢裏何人歌式微。覺來石友在書幃。鄭環信美非吾寶。趙璧猶全任汝歸。渴水雙蟾窺海闊。出雲孤月照星稀。好將自草三千牘。莫與蚍蜉作釣磯。

大雪書懷

天將奇賞發清歡。疇昔登臨插羽翰。梅下尋詩騎馬滑。松梢索酒倚樓寒。閉門老子愁無賴。返棹歸來興已闌。聊掬玉塵添石鼎。自煎魚眼破龍團。

雪中苦寒戲嘲二絕

冥凌分職大間關。辛苦行冬強作難。費盡無邊風與雪。劣能供得一番寒。  
茸氈帳下玉杯寬。香裏吹笙醉裏看。風雪過門無入處。却投窮巷覓袁安。

雪復大作六言四首

奇寒擁被曉枕。噩夢披蓑晚江。遙想漫天匝地。近聽穿幔鳴窗。

釀成送臘三白。功在迎年九秋。樵指擔肩相賀。飯囊酒甕何憂。  
初報折筩搶地。旋聞壓柳堆橋。寧教風過掀舞。可惜雨來半銷。  
伶俜凍雀蹲晚。噤滲疎梅鎖春。有客典衣沽酒。何人增價賣薪。

立春乙巳

綵勝金旛夢裏。茶槽藥杵聲中。索莫兩年春事。小窗臥聽東風。

題徐熙風牡丹二首

紫花

藥珠仙馭曉驂鸞。道服朝元露未乾。天半剛風如激箭。綠綃飄蕩紫綃寒。

白花

寒入仙裙粟玉肌。舞餘全不耐風吹。從教旅拒春無力。細看腰支嫋嫋時。

題黃居寀雀竹圖二首居寀筌之子。

羣雀歲寒保聚。兩鶉日晏忘歸。草間豈無餘粒。刮地風號雪飛。  
蔓花露下凝碧。叢竹秋來老蒼。噪雀羣爭何事。么禽自嘯清篁。

題張晞顏兩花圖二首晞顏廣漢人。趙昌之甥。

繁杏

紅粉團枝一萬重。當年獨自費東風。若爲報答春無賴。付與笙歌鼎沸中。

玉梨

雪薄冰輕不耐春。雨中愁緒月中真。莫教夢作雲飛去。留伴昭陽第一人。

題范道士二牛圖。道士處州人。號范牛。中年狂顛。人傳其得道。此圖自稱中興道士范子琬。畫未顛時所

作。尤爲精妙。

西疇滌場淨無塵。原頭遠牧秋草春。一牛疾行離其羣。一牛返顧如怒噴。目光炯炯擗而馴。點綴毫末俱逼真。不顛不狂筆有神。妙哉吾宗散仙人。

# 石湖居士詩集卷二十五

## 小峨眉并序

近得靈壁古石。絕似大峨眉正峯。名之曰小峨眉。東坡常以名廬山。恐不若此石之逼真也。作小峨眉歌以夸之。

三峨眉參橫大峨眉高。奔崖側勢倚半霄。龍陸虎臥起且伏。旁睨涿水沱江朝。禹從岷嶓過其下。奠山著籍稱雄豪。告成歸來兩階舞。泗濱錫貢備九韶。覽觀此石三歎息。髣髴蜀鎮俱岩嶷。惜哉擊拊墮籩虜。輦送淮海還山椒。降商訖周謹呵護。磬氏無敢加鐫彫。劉項蝸爭閔靈壁。血漂川谷流腥臊。水官恐此被染沬。氈包席裹吳中逃。市門大隱閱千祀。苔衣塵網纏孤標。尤物顯晦定有數。昨者惠顧不待招。我昔西遊踏禹迹。暑宿光相披重貂。十年境落臥遊夢。摩挲壁畫雙鬢凋。天憐愛山欲成癖。特設奇供慰寂寥。恍然坐我寶巖上。疑有太古雪未消。嵌根巖積巧入妙。峯頂箕踞貴不驕。爐煙雲浮布銀界。隙日虹貫疑金橋。是時歲杪臥衰疾。健起放杖驚兒曹。龍鍾繞園喜折屐。龜手拂拭寒侵袍。太湖未暇商甲乙。羅浮天竺均鴻毛。小峨眉之名神所畀。永與野老歸漁樵。作詩賀我得石友。且以併賀茲丘遭。

## 煙江疊嶂

煙江疊嶂。太湖石也。鱗次重複。巧出天然。王晉卿嘗畫煙江疊嶂圖。東坡作詩。今借以爲名。此石里人方氏所藏故物。非近年以人功雕斲者比。尤可貴。

太湖嵌根藏洞宮。槎牙石生齠淪中。波濤投隙漱且嚙。歲久缺罅深重重。水空發聲夜鏗鏘。中有晴江煙嶂疊。誰歟斷取來何時。山客自言藏奕葉。江上愁心惟畫圖。蘇仙作詩畫不如。當年此石若並世。雪浪仇池何足書。我無俊語對巨麗。欲定等差誰與議。直須具眼老香山。來爲平章作新記。

天柱峯

天柱峯英石也。一峯峭豎特起。有昂霄之意。天柱本在衡山。自黃帝時即以灑山輔南岳。漢氏因之。遂寓其祭於灑。天柱山。衡灑蓋皆有天柱。而灑名特彰。九華。鴈蕩若他山。亦皆以此名峯。不足算也。

衡山紫蓋連延處。一峯巉絕擎玉宇。漢家憚遠不能到。寓祭灑山作天柱。我今臥遊長拚關。卻寓此石充灑山。形摹三尺氣萬仞。世間培塿何由攀。南州山骨孕清淑。乳孽砂牀未超俗。神奇都賦小崢嶸。雷雨飛來伴幽獨。哦詩月明清夜闌。坐看高影橫屋山。摩霄拂雲政如此。吾言實誇誰敢刪。

甲辰除夜吟

一年三百六十日。日日三椽臥衰疾。旁人揶揄還歎咨。問我如何度四時。我言平生老行李。蓐食趨程中夜起。當時想像閉門閒。弱水迢迢三萬里。如今因病得疎慵。脚底關山如夢中。重簾複幕白晝靜。戶外車馬從西東。若問四時何以度。念定更無新與故。瓶花開落紀春冬。窗紙昏明認朝暮。行年六十是明朝。不暇自憐聊自嘲。婪尾三杯錫一楮。從今身健齒牙牢。

次韻龔養正送水仙花

色界香塵付八還。正觀不起況邪觀。花前猶有詩情在。還作凌波步月看。

元日

屋角崢嶸斗柄移。案頭蕭索燭花垂。與時消息評新藥。若節秋憶舊詩。飢飯困眠全體懶。風餐露宿半生癡。尊前現在休嫌老。最後屠蘇把一卮。

正月六日風雪大作

滕六無端巽二癡。翻天作惡破春遲。邀梅勒柳何功業。誰與停杯一問之。奇寒何事入芳辰。不管燈枝欲試新。即日反風吹盡雪。東君已費一分春。

元夕四首

粉痕紅點萬花攢。玉氣珠光寶月團。簾箔通明香似霧。東君無處著春寒。謂吳中剪羅·琉璃二燈。

不夜城中陸地蓮。小梅初破月初圓。新年第一佳時節。誰肯如翁閉戶眠。

藥爐湯鼎煮孤燈。禪版蒲團老病僧。兒女強修元夕供。玉蛾先避雪鬢鬢。

落梅穠李趁時新。枯木崖邊一任春。尙愛鄉音醒病耳。隔牆時有賣錫人。謂唱賣烏酥糖者。

去年多雪苦寒梅花遂晚元夕猶未盛開

隔年寒力凍芳塵。勒住東風寂莫濱。只管苦吟三尺雪。那知遲把一枝春。燈烘畫閣香猶冷。湯煖銅瓶玉尙斂。花定有情堪索笑。自憐無術喚眞眞。

寄題筠州錢有文明府新昌小道院

忠厚平生心學敏。明隨處民功。江左幕中荒政。江西縣裏仁風。



勿云私淑小邑。可以匹休大邦。健筆誰能後賦。向來江夏無雙。

題徐熙杏花

老枝當歲寒。芳蘂春澹泞。霧綃輕欲無。嬌紅恐飛去。

題趙昌木瓜花

秋風魏瓠實。春雨燕脂花。綵筆不可寫。滴露勻朝霞。

題易元吉獐猿兩圖二首

擇食麕相喚。無人意不驚。猿啼風動葉。機熟兩忘情。  
烏逐山公噪。驚麕仰望疑。春林無一事。獮狻自生悲。

題張希賢紙本花四首

牡丹

洛花肉紅姿。蜀筆丹砂染。生綃多俗格。紙本有真艷。

常春

染根得靈藥。無時不春風。倚闌與挂壁。相伴歲寒中。

紅梅

酒力欺朝寒。潮紅上粧面。桃李漫同時。輸了春風半。

雞冠

號名極形似。摹寫與真逼。聊以畫滑稽。慰我秋園寂。

喜沈叔晦至

澹若論交味。嚶其求友聲。江湖幾魚沫。風雨一雞鳴。舊事休重說。新詩莫細評。煩將憶勤夢。歸對海山橫。

驚蟄家人子輩爲易疎簾

二分春色到窮閭。兒女祈翁出滯淹。幽蟄夜驚雷奮地。小窗朝爽日篩簾。惠風全解墨池凍。清晝賸縈雲笈籤。親友莫嗔情話少。向來屏息似龜蟾。韓尙書新造雲笈七籤。

信筆

天地同浮水上萍。羲娥迭耀案頭螢。山中名器兩芒屨。花下友朋雙玉瓶。童子昔曾誇了了。主翁今但諾醒醒。歸田贏得多無事。輸與諸公汗簡青。

請息齋書事三首

覆雨翻雲轉手成。紛紛輕薄可憐生。天無寒暑無時令。人不炎涼不世情。栩栩算來俱蝶夢。啾啾能有幾雞鳴。冰山側畔紅塵漲。不隔瑤臺月露清。

刻木牽絲罷戲場。祭餘雨後兩相忘。門雖有雀尙廷尉。食已無魚休孟嘗。蝨裏趨時真是賊。虎中宣力任爲俚。籬東舍北誰情話。雞語鷓鴣盟意卻長。

聚納醯邊鬧似雷。乞兒爭背向寒灰。長平失勢見何晚。栗里息交歸去來。休問江湖魚有沫。但斬雲水鶴無媒。巖扉岫幌牢肩鑰。不是漁樵不與開。

送文季高倅興元

素衣京洛悵成縑。青鬢江吳喜未絲。燭暗不眠談舊事。酒闌作惡問行期。琴書情話須親戚。風雨殘春更別離。屈指歸來重一笑。掃除門巷著旌麾。

書懷二絕再送文季高兼呈新帥閻才元侍郎

劍關雲棧守非難。函谷泥封久未刊。今日漢中誰國士。莫教春草上齋壇。西出陽關有舊知。薰風淥水泛蓮時。煩君傳語詩書帥。更寄臺城別後詞。

寄題石湖海棠二首

手開芳徑越城頭。紅錦屠蘇結綺樓。不把萬枝銀燭照。淡雲微月替人愁。老懶居家似出家。園林春色雨沾沙。海棠尙自無心看。天女何須更散花。

家人子輩住石湖檢校暮歸

南浦回春棹。東城掩暮扉。兒修雞柵了。女挈菜籃歸。風力雖欺酒。花香尙染衣。衰翁牢守舍。腸斷釣魚磯。

枕上聞蒲餅焦

曉寒燕雀噤春陰。珍重清簧度好音。窗色熹微欹枕聽。夢成舟檣竹溪深。

石湖芍藥盛開向北使歸過維揚時賞根栽此快記舊事二首

竹西歌吹荻花秋。遺老垂凌送遠游。羌笛夜闌吹出塞。當年如此夢揚州。萬里歸程許過不。移將二十四橋花。石湖從此添春色。莫把蒲萄苜蓿誇。

次韻龔養正中秋無月三首

詞客幕天清露下。老翁臥病破窗中。高吟大醉輸公等。不見常娥與我同。  
去年怪雨無端甚。今歲癡雲亦復然。減卻新詩酸卻酒。乘除添得一更眠。  
丙夜清光些子見。兒童驚喜強雄夸。闌珊高興應無幾。恰似春殘看落花。

殊不惡齋秋晚閒吟五絕

好風入簾闔。晝響斜照穿隙網。絲明檐間雙雀有時鬪。壁下一蛩終日鳴。  
旁若無人鼠飲硯。磨之不去蠅登盤。天涼睡起枕痕煖。日晚慵來香字寒。  
就食遷居蟻墳壤。隨風作舍蛛裊絲。百年何處用三窟。萬事信緣安一枝。  
市聲洶洶鼓催陣。日影駸駸潮漲痕。消磨意氣默數息。把翫光陰牢閉門。  
中秋昨已等閒過。重九今還如夢來。霜鬢數莖羞墮幘。黃花三度笑空杯。  
老陳道人自云夢被召作地上主者。又常受一貴家供。祝之曰。他日必來吾家作兒。戲贈小頌。  
野人何苦赴官差。符使追呼撓道懷。幸有子門香積供。不如隨喜去羅齋。

題張戡蕃馬射獵圖

陰山積中射生虜。馬逐箭飛如脫兔。割鮮大嚼飽何求。荐食中原天震怒。太乙靈旗方北指。掣轡逃歸莫  
南顧。猖狂若到殺胡林。郎主猶把何況汝。

題趙昌四季花圖

海棠梨花

醉紅睡未熟。淚玉春帶雨。阿環不可招。空寄凭肩語。

葵花萱草

衛足保明哲。忘憂助歡娛。欣欣夏日永。媚我幽人廬。

拒霜旱蓮

霜天木芙蓉。陸地旱蓮草。水花雲錦盡。不見秋風好。

梅花山茶

月淡玉逾瘦。雪深紅欲燃。同時不同調。聊用慰衰年。

乙巳十月湖開爐三首

石湖今日開爐。紙窗銀白新糊。童子燒紅榾柮。老翁睡煖氈毼。  
石湖今日開爐。兩壁仍安畫圖。萬事篆煙曲几。百年毳衲團蒲。  
石湖今日開爐。俗家恰似精廬。投涕雖無情緒。吟詩卻有工夫。

有歎二首

春秋蘭菊殊調。南北馬牛異方。心醉井蛙海若。眼空鵬海鳩枋。  
貧富交情乃見。炎涼歲序方成。越秦本異肥瘠。魯衛何曾弟兄。

留簡伯俊

我昔賦遠遊。萬里無親朋。惟君同懷抱。相從共茵憑。踰嶺穿瘴茅。捫參倚枯藤。隨行一瓶鉢。澹如雲水僧。  
火馳炎熱場。見此玉壺冰。東歸常愧君無力。相引繩長材屈小。邑果以循吏稱。豈不有薦墨。翩然支郡丞。  
五溪在何言。水駛山峻嶒。漫仕不擇地。搏扶笑鯤鵬。獨有故意長。問疾訪姜肱。疊疊談昨夢。一一記吾曾。  
中年畏離別。況我雪鬢鬢。此意君自解。少留對青燈。

枕上有感

窗明似月曉光新。被煖如薰睡息勻。衝雨販夫牆外過。故應嗤我是何人。

夜坐有感

靜夜家家閉戶眠。滿城風雨驟寒天。號呼賣卜誰家子。想欠明朝糴米錢。

十月二十六日三偈

聲聞與色塵。普以妙香薰。昔汝來迷我。今吾卻戲君。  
有個安心法。無時不可行。只將今日事。隨分了今生。  
窗外塵塵事。箇中夢夢身。既知身是夢。一任事如塵。

此  
页  
空  
白

# 石湖居士詩集卷二十六

吳猷一首送丘宗卿自平江移會稽

吳兒與君緣不薄。再騎竹馬迎南郭。吳兒與君緣復淺。坐席纔温旗脚轉。東人賦重越吟悲。趣了茲段隨朝雞。胸奇百鍊當活國。君豈獨私吳與越。鶴鳴樟橋猿夜啼。匈奴未滅豕何爲。功成他年歸結屋。好在山花休斬竹。宗卿十三年前嘗守吳。今復來。幾年而去越。民困於和買。蓋有意爲蠲滅之。樟橋、宗卿卜築處。有山牡丹二本。歲各發百花。手植筍竹二十年。今一尺圍。作舍時悉當伐去。皆實錄席上語也。

## 贈壽老

農圃規模昔共論。雲奎卜築又逢君。眉菴壽老長隨喜。好箇拋梁伏願文。十八年前。始作農圃堂。壽老自眉菴遠來。相與度地。今雲奎始基。又值其入城留觀上梁。似非偶然。

## 再贈壽老

澹齋寂寞澹菴空。玉柱金庭一夢中。我病君衰猶見在。莫嫌俱作白頭翁。頃與澹齋兄遊洞庭林屋。并澹菴、現老、眉菴、壽老偕。今十年矣。壽老見過話舊事。二澹已爲古人。

## 雪中聞牆外鬻魚菜者求售之聲甚苦有感三絕

飯糲驅出敢偷閒。雪脛冰鬚慣忍寒。豈是不能肩戶坐。忍寒猶可忍饑難。  
憂渴焦山業海深。貪渠刀蜜坐成禽。一身冒雪渾家煖。汝不能詩替汝吟。



啼號升斗抵千金。凍雀飢鴉共一音。勞汝以生令至此。悠悠大塊亦何心。

詠河市歌者

豈是從容唱渭城。箇中當有不平鳴。可憐日晏忍飢面。強作春深求友聲。

偶箴

情知萬法本來空。猶復將心奉八風。逆順境來欣戚變。咄哉誰是主人翁。

丙午新正書懷十首

不用桃符貼畫雞。身心安處是天倪。行年六十舊曆日。汗脚尺三新杖藜。祝我賸周花甲子。謝人深勸玉

東西。春風若借筋骸便。先渡南村學灌畦。新圃在河南名范村。

瘦骨難勝遇節衣。日高催起趁晨炊。病憐柳栗隨身慣。老覺屠蘇到手遲。一飽但靳庚癸諾。百年甘守甲

辰雌。莫言此外都無事。柳眼眉梢正索詩。

養茗燒香了歲時。靜中光景笑中嬉。身閒一日似兩日。春淺南枝如北枝。朝鏡略無功業到。午窗惟有睡

魔知。年來并束牀頭易。一任平章濟叔癡。

窮巷間門本閭然。強將爆竹聒塔前。人情舊雨非今雨。老境增年是減年。口不兩匙休足穀。身能幾屐莫

言錢。埽除一室空諸有。龐老家。人總解禪。吳諺云。一口不能著兩匙。

厲風翻海雪漫天。百計逃寒息萬緣。穩作被爐如臥炕。厚裁綿旋入壁勝披氈。尊前現在嘗騰醉。飯後無

何爛熳眠。斟酌出門高興盡。從教閒卻剡溪船。被爐綿旋皆新得。法老人御冬之具。二物尤爲要切。

俗情如絮已泥沾。因病偷閒意屬厭。鵬鷗相安無可笑。熊魚自古不容兼。灰藏楮楮多時煖。雪壓蔓菁滿。意甜溫飽閉門吾事辦。異時書判指如籤。

炭熟香濃石鼎煨。人言小閣是春臺。蕉心翠展一冬在。梅蕊粉融連夜開。肅肅九冰妨發育。溫溫三火護。恢台養生此外無遺說。梨棗元須趁煖栽。水芭蕉長三寸。在煖閣中。經冬不悴。瓶梅亦烘然先拆。

經過掃軌但幽棲。巢穩林深寄一枝。栗里歸來窗下臥。香山老去病中詩。東風馬耳塵勞後。半夜雞聲睡。熟時俯仰平生盡塵迹。恰如臚膊幾杆棋。

窗明窗暗篆煙翻。珍重晨光與夕暉。東院齋鐘披被坐。南城嚴鼓岸巾歸。幾人霜滑騎朝馬。何處燈殘織。曉機懶裏若承三昧力。始知忙裏事俱非。此篇敘蚤眠早起之事。

殊方節物記吾曾。海北天西一瘦藤。烏攬雞檳嘗老酒。酥花芋葉試新燈。瘴雲度嶺濃如墨。邊雪窺窗冷欲冰。閒展兩鄉圖畫看。臥遊何必減深登。此篇記桂林成都元日舊事。檳攬皆椒盤中物。老酒十數年不壞者。滴酥爲花。熬芋爲柳葉。三夕張燈如上元。上下句分記廣蜀。

### 雲露并序

予素不能飲。病又止酒。比得佳釀法。客以雲露名之。取吉雲五露飲之。則老者少。病者除之意也。乃復濡脣。且爲賦詩。

飲少嘗遭大戶嗤。病中全是獨醒時。三年魯望自憐賦。萬祀淵明真止詩。破戒忽傳雲露法。賞心仍把雪梅枝。一杯未問長生事。先覺蛛塵藥裏絲。陸魯望好飲。病甫里三年。作自憐賦。寶至潔壺置觴而已。

丙午新年六十一歲俗謂之元命作詩自貶

歲復當生次。星臨本命辰。四人同丙午。初度再庚寅。長狄名猶記。沙隨會若新。露心仍竹馬。暮境忽蒲輪。鏡裏全成老。尊前略似春。三年歸汶上。千日臥漳濱。剛長交新泰。陰消脫舊屯。網蛛縈藥裏。寶犬吠醫人。窗下烏皮几。田間紫領巾。鯁淵方止水。鯤海任揚塵。波匿觀河見。維摩示病身。嚶端還一笑。默識幻中真。文潞公詩云。四人三百七十歲。况是同生丙午年。僕與今丞相王公。樞使周公。參政錢公。皆丙午。又頃皆同朝。故用此事稍的也。

丙午人日立春。屈指癸卯孟夏晦得疾。恰千日矣。戲書。

百年能有幾春光。只合都將付醉鄉。衰病豁除千日外。尙餘三萬五千場。

春困二絕吳俗立春日。兒童以春困相呼。以掉頭不應者爲黠。

綵花生菜又新年。節物人情已可憐。不待春來呼我困。四時何日不堪眠。諾惺菴裏呼春困。特地回頭著耳聽。若解昏昏安穩睡。主翁方始是惺惺。

立春大雪招親友共春盤坐上作

積雪鋼萬瓦。雲容如死灰。豈惟梅柳寒。小槽冰去聲。春醅東風乃多事。仍將六花來。兒女曉翻餅。呵手把一杯。葦甲剪翠羽。韭黃醵金斂。齒牙幸牢潔。對案心眼開。華年惜節物。況此霜鬢摧。如何千日病。三見寅杓回。旁人不堪憂。我心猶始孩。衰翁豈知道。癡絕忘形骸。化兒任惡劇。歡伯有奇懷。餘寒會退聽。一笑當安排。

嚴子文以春雪數作用爲瑞不宜多爲韻賦詩見寄次韻

同雲凝不埽。梅柳春到遲。笙歌煖寒會。當任主人爲。圍尺庸何傷。表丈乃非瑞。郢中姑度曲。山左已驅糞。世無辟寒香。誰能不龜手。鄰舍索米歸。衾稠無恙不。貧人寒切骨。無地兼無錐。安知雙綵勝。但寫入春宜。販夫博口食。奈此不售何。無術慰啼號。汝今一身多。

詠吳中二燈

琉璃毬

龍綜纒冰繭。魚文鏤玉英。雨絲風外縹。雲網日邊明。疊暈重重見。分光面面呈。不深閒裏趣。爭識箇中情。

萬眼羅

弱骨千絲結。輕毬萬錦裝。綵雲籠月魄。寶氣繞星芒。檀點紅嬌小。梅粧粉細香。等閒三夕看。消費一年忙。

元夕後連陰

問訊東風幾日來。冷煙寒霧鎖池臺。埽空積雪翻成雨。收盡殘燈未見梅。夜飲厭厭非老伴。春陰漠漠是愁媒。誰能腰鼓催花信。快打涼州百面雷。

次韻嚴子文見寄

雨雲濃壓屋山頭。詩句端來寫客憂。雷電已將金薤取。瓊瑤難報木瓜投。無心我正銘三任。有意君堪話四休。何日尋春同步屨。先教啼鳥說來由。

再次韻述懷約子文見過

灰木心形雪滿頭。鶴鳧長短不悲憂。螽蚱純白無機械。蒲局裊盧任博投。若愛陶陶并兀兀。先須莫莫與休休。箇中情話誰能共。雞黍明當挽仲由。

寄題郟縣蓮仙觀四楠蓮仙手植。嘗有丹光現其杪。

沉犀浦上舊仙蹤。老木長春翠埽空。敢請丹光來萬里。爲扶雲嶠駕飛鴻。

春來風雨無一日好晴。因賦瓶花二絕。

滿插瓶花罷出遊。莫將攀折爲花愁。不知燭照香薰看。何似風吹雨打休。酒冷花寒無好懷。柴荆終日爲誰開。三分春色三分雨。正似東風本不來。

寄題永新張教授無盡藏。

古來誰道四并難。對境心空著處安。要識見聞無盡藏。先除夢幻有爲觀。削平丘垤孤峯峻。撤去籬籬萬象寬。快誦老坡秋望賦。大千風月一毫端。

寄題莫氏椿桂堂。莫氏五子皆登科。居崇德縣。

君不見衣冠盛事今猶昔。前說燕山後崇德。聯翩五組帶天香。世上贏金賤如礫。他年詩禮到雲來。日日高堂稱壽杯。桂長孫枝椿不老。卻比竇家應更好。

春晚卽事留游子明王仲顯。

繡地紅千點。平橋綠一篙。棟花來石首。穀雨熟櫻桃。笑我生塵飯。慚君有意袍。故人能少駐。門徑久蓬蒿。

留游子明

得得登音喜。恩恩笑口開。牢愁攻易破。歸夢挽難迴。我已疎茶椀。君今減酒杯。不知乘輿棹。更得幾回來。

初夏三絕呈游子明王仲顯

東君不解惜芳菲。料峭寒中一夢非。剪盡牡丹梅子綻。何須風雨送春歸。  
一簾芳樹綠蔥蔥。胡蝶飛來覓綺叢。雪白荼蘼紅寶相。尙攜春色見薰風。  
送春迎夏未聞雷。日日斜風細雨來。不是故人能裹飯。柴門雖設爲誰開。

送王仲顯赴瓊筦

三徑蓬蒿春雨肥。微君誰與開柴扉。雷光射牛書過目。虹氣干斗酒淋衣。十年五別歲月老。一方萬里音塵稀。誰云滄海斷地脈。莫信天南無鴈飛。

梅雨五絕

梅雨暫收斜照明。去年無此一日晴。忽思城東黃篋舫。臥聽打鼓踏車聲。

乙酉甲申雷雨驚。乘除卻賀芒種晴。插秧先插蚤秈稻。少忍數旬蒸米成。吳農忌五月甲申乙酉雨。雨則大水。

謬云。甲申猶自可。乙酉怕殺我。

風聲不多雨聲多。洶洶曉衾聞浪波。恰似秋眠隱靜寺。玉霄泉從牀下過。繁昌隱靜寺方丈山後。玉霄泉自板閣下過。最爲佳致。

千山雲深甲子雨。十日地濕東南風。靜裏壺天人不到。火輪飛出默存中。道家東向坐。想日出以煉氣。  
雨霽雲開池面光。三年魚苗如許長。小荷拳拳可包鮓。晚日照盤風露香。

芒種後積雨驟冷三絕

一菴濕蟄似龜藏。深夏暄寒未可常。昨日蒙絺今挾纊。莫嗔門外有炎涼。  
梅黃時節怯衣單。五月江吳麥秀寒。香篆吐雲生煖熱。從教窗外雨漫漫。  
梅霖傾瀉九河翻。百瀆交流海面寬。良苦吳農田下濕。年年披絮插秧寒。

崑山農人梅雨時著纈絮以耘秧。歲以爲常。

東宮壽詩

再造炎圖撫太寧。龍樓毓德會千齡。三宮疊矩深邦本。兩曜重光炳帝庭。自古東明陪出日。祇今南極是前星。鈞天歲歲家人禮。長對瑤階第四冥。  
並世勳華照古今。朱衣綵服侍尊臨。邦家大慶重親養。社稷元良萬國心。菊露壺觴秋色正。桂風殿閣月香深。欲知天序無疆處。銅律聲中治世音。

寄題漢中新作南樓二首

我作籌邊倚半霄。西山雲雪照弓刀。如今且說南樓勝。應共漢壇相對高。  
甲子周天事好還。關河響動劍光寒。秦川草木多如薺。時倚樓闌直北看。

次韻李子永見訪二首

混俗休超俗。居家似出家。有爲皆影事。無念卽生涯。莫覓安心法。翻成捏目花。作糜須穀粟。千劫漫炊砂。  
有意能停棹。多情易憶家。清詩穿月脇。遠夢繞天涯。雨蝶衣濡粉。秋蚊喙吐花。新涼宜小駐。談笑有丹砂。

自詠瘦悴

皮下多無肉。秋來瘦不禁。骨稜春焙銹。筋蹙海山沉。蠱蝨從何有。蚊蠅枉見侵。惟餘老筇杖。相伴兩虛心。



此  
页  
空  
白

# 石湖居士詩集卷二十七

## 四時田園雜興六十首并引

淳熙丙午。沉疴少紓。復至石湖舊隱。野外卽事。輒書一絕。終歲得六十篇。號四時田園雜興。  
柳花深巷午雞聲。桑葉尖新綠未成。坐睡覺來無一事。滿窗晴日看蠶生。  
土膏欲動雨頻催。萬草千花一餉開。舍後荒畦猶綠秀。鄰家鞭筍過牆來。  
高田二麥接山青。傍水低田綠未耕。桃杏滿村春似錦。踏歌椎鼓過清明。  
老盆初熟杜茅柴。攜向田頭祭社來。巫媪莫嫌滋味薄。旗亭官酒更多灰。  
社下燒錢鼓似雷。日斜扶得醉翁回。青枝滿地花狼藉。知是兒孫鬪草來。  
騎吹東來里巷喧。行春車馬鬧如煙。繫牛莫礙門前路。移繫門西碌碡邊。  
寒食花枝插滿頭。蓑裙青袂幾扁舟。一年一度遊山寺。不上靈巖卽虎丘。  
郭裏人家拜掃回。新開醪酒薦青梅。日長路好城門近。借我茅亭煖一杯。  
步履尋春有好懷。雨餘蹄道水如杯。隨人黃犬攙前去。走到溪邊忽自迴。  
種園得果廬僧勞。不奈兒童鳥雀搔。已插棘針樊筍徑。更鋪漁網蓋櫻桃。  
吉日初開種稻包。南山雷動雨連宵。今年不欠秧田水。新漲看看拍小橋。  
桑下春蔬綠滿畦。蕊心青嫩芥薑肥。溪頭洗擇店頭賣。日暮裹鹽沽酒歸。

右春日田園雜興十二絕

紫青蓴菜卷荷香。玉雪芹芽拔薤長。自擷溪毛充晚供。短篷風雨宿橫塘。  
湖蓮舊蕩藕新翻。小小荷錢沒漲痕。斟酌梅天風浪緊。更從外水種蘆根。  
胡蝶雙雙入菜花。日長無客到田家。雞飛過籬犬吠竇。知有行商來買茶。  
湔裙水滿綠蘋洲。上已微寒懶出遊。薄暮蛙聲連曉鬧。今年田稻十分秋。  
新綠園林曉氣涼。晨炊蚤出看移秧。百花飄盡桑麻小。夾路風來阿魏香。  
三旬蠶忌閉門中。鄰曲都無步往蹤。猶是曉晴風露下。采桑時節暫相逢。  
汙萊一稜水周圍。歲歲蝸廬沒半扉。不看茭青難護岸。小舟撐取葑田歸。  
茅針香軟漸包茸。蓬櫺甘酸半染紅。采采歸來兒女笑。杖頭高挂小筠籠。  
穀雨如絲復似塵。煮瓶浮蠟正嘗新。牡丹破萼櫻桃熟。未許飛花減却春。  
雨後山家起較遲。天窗曉色半熹微。老翁欹枕聽鶯囀。童子開門放燕飛。  
海雨江風浪作堆。時新魚菜逐春回。荻芽抽筍河魴上。楝子開花石首來。  
烏鳥投林過客稀。前山煙暝到柴扉。小童一棹舟如葉。獨自編蘭鴨陣歸。

右晚春田園雜興十二絕

梅子金黃杏子肥。麥花雪白菜花稀。日長籬落無人過。惟有蜻蜓蛺蝶飛。  
五月江吳麥秀寒。移秧披絮尚衣單。稻根科斗行如塊。田水今年一尺寬。

二麥俱秋斗百錢。田家喚作小豐年。餅爐飯飯無飢色。接到西風熟稻天。  
百沸繅湯雪湧波。繅車嘈噴雨鳴囊。桑姑盆手交相賀。綿繭無多絲繭多。  
小婦連宵上絹機。大耆催稅急於飛。今年幸甚蠶桑熟。留得黃絲織夏衣。  
下田戽水出江流。高壩翻江逆上溝。地勢不齊人力盡。丁男長在踏車頭。  
晝出耘田夜績麻。村莊兒女各當家。童孫未解供耕織。也傍桑陰學種瓜。  
槐葉初勻日氣涼。蔥蔥鼠耳翠成雙。三公只得三株看。閒客清陰滿北窗。  
黃塵行客汗如漿。少住儂家漱井香。借與門前磐石坐。柳陰亭午正風涼。  
千頃芙蕖放棹嬉。花深迷路晚忘歸。家人暗識船行處。時有驚忙小鴨飛。  
采菱辛苦廢犁鉏。血指流丹鬼質枯。無力買田聊種水。近來湖面亦收租。  
蝸蟻千萬沸斜陽。蛙黽無邊聒夜長。不把癡鷺相對治。夢魂爭得到蓼牀。

右夏日田園雜興十二絕

杞菊垂珠滴露紅。兩蛩相應語莎叢。蟲絲罥盡黃葵葉。寂歷高花側晚風。  
朱門巧夕沸歡聲。田舍黃昏靜掩扃。男解牽牛女能織。不須徼福渡河星。  
橘蠹如蠶入化機。枝間垂繭似蓑衣。忽然蛻作多花蝶。翅粉纔乾便學飛。  
靜看簷蛛結網低。無端妨礙小蟲飛。蜻蜓倒挂蜂兒窘。催喚山童爲解圍。  
垂成穡事苦艱難。忌雨嫌風更怯寒。賤訴天公休掠剩。半償私債半輸官。

秋來只怕雨垂垂。甲子無雲萬事宜。穫稻畢工隨曬穀。直須晴到入倉時。  
中秋全景屬潛夫。棹入空明看太湖。身外水天銀一色。城中有此月明無。  
新築場泥鏡面平。家家打稻趁霜晴。笑歌聲裏輕雷動。一夜連枷響到明。  
租船滿載候開倉。粒粒如珠白似霜。不惜兩鍾輸一斛。尙贏糠覈飽兒郎。  
菽粟瓶罌貯滿家。天教將醉作生涯。不知新滴堪筭未。今歲重陽有菊花。  
細擣棖齏買鱸魚。西風吹上四腮鱸。雪鬆酥膩千絲縷。除卻松江到處無。  
新霜徹曉報秋深。染盡青林作纈林。惟有橘園風景異。碧叢叢裏萬黃金。

右秋日田園雜興十二絕

斜日低山片月高。睡餘行藥繞江郊。霜風擣盡千林葉。閒倚筇枝數鶴巢。  
炙背檐前日似烘。煖醺醺後困蒙蒙。過門走馬何官職。側帽籠鞭戰北風。  
屋上添高一把茅。密泥房壁似僧寮。從教屋外陰風吼。臥聽籬頭響玉簫。  
松節然膏當燭籠。凝煙如墨暗房櫳。晚來拭淨南窗紙。便覺斜陽一倍紅。  
乾高寅缺築牛宮。卮酒豚蹄酹土公。杜特無瘟犢兒長。明年添種越城東。  
放船閒看雪山晴。風定奇寒晚更凝。坐聽一篙珠玉碎。不知湖面已成冰。  
撥雪挑來踏地菘。味如蜜藕更肥醲。朱門肉食無風味。只作尋常菜把供。  
樽柶無煙雪夜長。地爐煨酒煖如湯。莫嗔老婦無盤飮。笑指灰中芋栗香。

袁迺春前臘後蒸。一年長饗甕頭清。麤居何似山居樂。秫米新來禁入城。  
黃紙蠲租白紙催。皂衣旁午下鄉來。長官頭腦冬烘甚。乞汝青錢買酒廻。  
探梅公子款柴門。枝北枝南總未春。忽見小桃紅似錦。卻疑儂是武陵人。  
村巷多年見俗情。鄰翁講禮拜柴荆。長衫布縷如霜雪。云是家機自織成。

右冬日田園雜興十二絕

自晨至午起居飲食。皆以牆外人物之聲爲節。戲書四絕。

巷南敲板報殘更。街北彈絲行誦經。已被兩人驚夢斷。誰家風鶴鬪鳴鈴。  
菜市喧時窗透明。餅師叫後藥煎成。閒居日出都無事。惟有開門掃地聲。  
北牀教回搗鼓遠。東禪飯熟打鐘頻。小童三喚先生起。日滿東窗煖似春。  
起傍東窗手把書。華顛種種不禁梳。朝餐欲到須巾裹。已有重來晚市魚。

舫齋信筆

燕居故可樂。病臥翻可憐。身閒儻更健。其人半神仙。既無揚州鶴。龍鍾任吾年。  
南齋深而明。略似西江船。船中何所有。藥氣雜爐煙。親朋稀老伴。暫來卽飄然。  
秋蠅獨戀戀。終朝相撲緣。霜晴日色濃。窗紙烘春妍。但愁添眼花。  
暝坐聊參禪。困從定中生。膏騰夢相牽。三昧未得力。十魔方現前。  
欠伸付一笑。朽腐難瑠鑄。東藍午齋動。風順鐘鼓傳。家人亦相呼。  
趣具先生餐。牛脰能幾何。蟬腹易便便。此日雖可惜。姑付食與眠。  
病中不復問節序。四遇重陽。旣不能登高。又不觴客。聊書老懷。

四時變遷翻覆手。百卉於人亦何有。騷客顛詩亦狂酒。強惜黃花愛重九。少年習氣似陶公。采采金英滿衣袖。攜壺木末最關情。欹帽風前幾搔首。饒吻偏憐粽栗香。新衣不管囊萸臭。貪將節物趁遨頭。肯向賓筵稱病叟。如今衰颯悟空華。現在去來飛電走。登臨舊迹如夢斷。觴詠故人多骨朽。百年長短隨隙駒。萬化陳新直芻狗。不堪把玩堪一笑。安用歲時歌拊缶。家人亦復探新篔。插花洗醜爲翁壽。蒲團困坐眼慵開。莫把故情看老醜。挽鬚兒女太癡生。更問今年有詩否。

閩門初泛二十四韻。淳熙丙午重九後十日。家人輩以余久病。適新修小舫。勸扶頭一出。以屢被屯滯。遂至

北城。檢校桃花塢。出關。傍漕河。望楓橋。橫塘。中路而還。故有卽事詠景唐律之作。

好在馳煙路。平生載酒行。摧藏身久病。契闊歲頻更。昨夜燈花曉。今朝稻把晴。出門新夢境。觸目舊詩情。水遠推篷眩。天寬倚柁驚。轉灣添繹挽。罨岸併篙撐。舫後裝兒女。艚前酌弟兄。醅香新麴嫩。茗味小春輕。紅皺分霜果。黃鶩撚夕英。緜林疎露屋。朱閣靜臨城。桃塢論今昔。楓橋管送迎。山腰樵擔動。木末酒旗明。竟日窳煙直。中流塔影橫。數帆殘照滿。一笛暮江平。鷗網楓邊桁。牽簷柳際棚。岫雲縈石住。田水穴堤鳴。過渡牛歸速。穿籬犬吠寧。魚寒猶作陣。鴈遠更聞聲。急擄潮痕出。疎鐘暝色生。鄰翁欣問訊。逋客愧寒盟。一昨成歸臥。于今負耦耕。生涯都塌颯。心曲漫崢嶸。猿鶴休多怨。菰葦尙可羹。藥囊吾厭苦。扶憊且班荆。

小春海棠來禽

東君好事惜年華。偏愛荒園野老家。一任西風管搖落。小春自管數枝花。

丙午東宮壽詩

國系丁年盛。天開甲觀祥。黃籬增煥炳。赤伏衍明昌。一日三天見。元辰萬國康。姿神輝玉裕。德業燦金相。書聖規宸藻。文心儷漢章。乾坤參久大。日月並升常。祖武瞻興慶。親庭拱未央。晨昏兩慈壺。詩禮一賢王。道統家傳正。炎圖國本強。桑弧仍穀旦。銅律又清商。舊事蘭猗殿。新涼桂子香。黃華先浥露。青女緩行霜。史賀星同軌。農歌稼滌場。與齡占夢帝。多祐叶思皇。磐石重山固。靈源少海長。三宮同壽域。歲歲頌無疆。

重陽後菊花二首

寂寞東籬濕露華。依前金盞照泥沙。世情兒女無高韻。只看重陽一日花。過了登高菊尚新。酒徒詩客斷知聞。恰如退士垂車後。勢利交親不到門。

驟寒吟

九月奇寒前未聞。巷南巷北無行人。冥凌盡用大冬手。肯爲歲華留小春。陰風吹雨作冰屑。飈裘如鐵綿裘折。可憐籬下木芙蓉。不獨宜霜更宜雪。

重陽後半月天氣溫麗忽變奇寒晦日大雪鄉人御冬之計多未辦

狂飈吹小春。刮面劇劍鉞。雲氣潑濃墨。午窗變曠黃。六花大如掌。浩蕩來無鄉。青女正熟睡。不記行新霜。寒暑故密移。滕巽乃爾狂。南鄰炭未買。北鄰綿未裝。敢論酒價湧。束薪逾桂芳。豈不解蚤計。善舞須袖長。頻年田薄收。十家九空囊。被凍知不免。但恨太匆忙。今朝復何朝。晦色挂屋梁。人物各解嚴。兒童笑相將。熙如谷黍溫。免作溝木僵。兩鄰報無恙。爲汝歌慨慷。

戲詠絮帽簡伯俊傳此樣。睡中甚覺寒氣。



尖斜緇撮似兜鍪。緊護風寒煖白頭。不解兵前富箭鏃。解令曉枕睡齁齁。

雪中送炭與龔養正立春前五日。

誰與幽人煖直身。筠籠衝雪送烏薪。煩君笑領婆歡喜。探借新年五日春。

代門生作立春書門帖子詩四首

煖日黃金柳。光風白玉梅。門闌同壽域。人物滿春臺。  
有喜何須藥。無塵卽是仙。壺中春日月。聊數八千年。  
草木霑雲露。峯巒近壁奎。新春行樂處。南北共花溪。  
日月添書帙。湖山引杖藜。賸周花甲子。多醉玉東西。

# 石湖居士詩集卷二十八

## 送聞人伯卿赴銅陵

雪壓關山畫掩扃。故人何事短長亭。折腰直爲瓶無粟。便腹猶憐笥有經。牒訴塵埃頭更白。簡編燈火眼終青。可憐東壁輝光外。寥落江湖處士星。

## 重送伯卿

雪花來無時。入春遂三作。冰柱凍不解。去地纔一握。東風畏奇寒。未敢破梅萼。已僵員嶠蠶。那問紇干雀。萬徑無行蹤。扣戶驚剝啄。故人竹葉舟。歲晚夢漂泊。自云飢所驅。豈不念丘壑。經誼金華省。文采石渠閣。平生百未試。墨綬嚇猿鶴。取舍一熊掌。得喪兩蝸角。不嫌干進鈍。俯仰無愧怍。低回簿書叢。萬卷無處著。惜哉小舉袖。負此不龜粟。頗聞江臯縣。訟簡民氣樂。政成松竹林。詰訓緝家學。迺翁力菑畝。待子收播穫。三年此書出。衆說眇螢燭。持歸許窺觀。慰我久離索。今朝雲潑墨。霰雨縱橫落。橋竿挽不住。帆峭北風惡。難忘昆弟語。易散清夜酌。忽忽別知賦。掩涕倚郛郭。

## 送壽老往雲間行化

天平船子過華亭。舍衛城中次第行。留取鉢盂歸院洗。東巖新出一泉清。

## 次韻知府王仲行尙書鹿鳴燕古風

昔人重遠行。供帳餞出祖。矧今燕嘉賓。宜有贈行語。府公文章公。青紫拾芥取。聯翩二百言。字字勸稽古。

戒之書魚蠹。勉以雲鵬舉。作霖要實用。洗兵嫌不武。諸生承意氣。脫迹蛻農圃。明年一聲雷。幽蟄起平楚。班行入鷓鴣。榜貼綴龍虎。回頭謝府公。公言非漫與。府公亦廟廊。來蒞瓊林俎。千載吳趨行。愁絕白紵舞。我聞有此作。病臥嗟未睹。今晨梅驛動。副墨到衡宇。調高瑟音希。芒寒劍光吐。誰云鹿鳴廢。正賴廣微補。當年羣玉會。方駕肅飄羽。倡酬久寂莫。解后相勞苦。世故萬浮雲。交情一舊雨。誰當將詩壇。君實東道主。

苦寒六言

簷冰低挂闌角。隙雪斜侵坐隅。春後一寒如此。梅花有信來無。

丁未春日瓶中梅殊未開二首

暖閣無人到。寒枝爲我橫。情鍾吹藥破。靜極覺香生。老去魂休斷。春來眼且明。逃禪時索笑。百匝傍窗行。夜雪臘前凍。朝陽春後蘇。人憐疎藥瘦。花笑病翁臞。露白能多少。尋春似有無。詩催全不力。煮水換銅壺。

再題瓶中梅花

園林籬落凍芳塵。南北枝間玉蘂皴。風袂挽香雖淡薄。月窗橫影已精神。雪霜春事年年晚。今古詩情日日新。鐵石如翁猶索句。眞成嚼蠟對橫陳。

王仲行尙書錄示近詩。聞今日勸農靈巖。次韻紀事。

館娃宮殿壓雲頭。自昔登臨隘九州。雪浪長風三萬頃。蒼煙古木二千秋。賓僚誰伴作詩苦。父老競傳敷政優。想見歸時穿夜市。月邊燈火滿西樓。

仲行再示新句復次韻述懷

神仙懶學古浮丘。祖意慵參老趙州。四壁塵埃心似水。一生風露鬢先秋。病衰謹謝吳中客。技拙甘同楚國優。斥鷃蓬蒿元自足。世閒何必臥高樓。

李子永赴溧水過吳訪別戲書送之

萬壑斷流冰塞川。千巖森玉雪漫天。忽忽葉縣雙鳧鳥。換卻山陰訪戴船。犯寒書劍出春蘿。風雪橋邊得句多。牒訴繽紛似煙海。梅花時節奈君何。

民病春疫作詩憫之

乖氣肆行傷好春。十家九空寒螿呻。陰陽何者強作孽。天地豈其真不仁。去臘奇寒衾似鐵。連年薄熱甑生塵。疲忙憊矣可更病。我作此詩當感神。

題夫差廟

縱敵稽山禍已胎。垂涎上國更荒哉。不知養虎自遺患。只道求魚無後災。夢見梧桐生後圃。眼看麋鹿上高臺。千齡只有忠臣恨。化作濤江雪浪堆。

翻襪菴夜坐聞雨

閒門冷落靜無譁。小閣簾幃密自遮。日晚課程丹竈火。夜深光景佛燈花。人生寧有病連歲。身世略如僧在家。步履尋春非老伴。任教風雨喚雷車。

睡起

愁愁與世共兒嬉。兀兀從人笑我癡。閒裏事忙晴晒藥。靜中機動夜爭棋。心情詩卷無佳句。時節梅花有

好枝熟睡覺來何所欠。氈根香軟飯流匙。

賞海棠三絕

芳春隨分到貧家。兒女多情惜歲華。聊爲海棠修故事。去年燈燭去年花。  
燭光花影兩相宜。占斷風光二月時。但得常如妃子醉。何妨獨欠少陵詩。  
憶向宣華夜倚闌。花光妍煖月光寒。如今蹋颯嫌風露。且只銅瓶滿插看。

午窗遣興家人謀過石湖

雲日初收破柱雷。小窗坐穩興悠哉。爇爐花氣朝醒解。茶鼎松風午夢迴。  
謝客門闌風動竹。惜春時節雨肥梅。畫船破浪亦一快。聞道湖光如潑醅。

將至石湖道中書事

水綠鷗邊漲。天青雁外晴。柳堤隨草遠。麥隴帶桑平。白道吳新郭。蒼煙越故城。  
稍聞雞犬鬧。僮僕想來迎。

三月十六日石湖書事三首

春事日以闌。暑陰正清美。拖筇入林下。秀綠照衣袂。盧橘梅子黃。櫻桃桑椹紫。  
荷依浪花顫。筍破苔色起。風日收宿陰。物色有新意。鄰曲知我歸。爭來問何以。病惱今有無。  
加飯日能幾。掀髯謝父老。衰雪已如此。種木二十年。手開南野荒。苒苒新歲月。依依舊林塘。  
汗萊擅下濕。岑蔚驕衆芳。菱母尙能瘦。竹孫如許長。憶初學圃時。刀笠冒風霜。  
今茲百不堪。裏帽人扶將。龍鍾數能來。猶勝兩相忘。

湖光明可鑑。山色淨如沐。閒心愜舊觀。愁眼快奇矚。依然北窗下。凝塵滿書簾。  
訪我烏皮兒。拂我青氈褥。

荒哉賦遠遊。幸甚遂初服。老紅餞餘春。衆綠自幽馥。好風吹晚晴。斜照入疎竹。兀坐胎息勻。不覺清夢熟。或勸病中不宜數親文墨。醫亦歸咎。題四絕以自戒。末篇又以解嘲。

作字腕中百斛。吟詩大外片心。習氣吹劍一吹。病軀垂堂千金。意馬場中汗血。隙駒影裏心灰。吉蠲筆墨安用。付與蛛絲壁煤。詩成徒能泣鬼。博塞未必亡羊。剛將妄言綺語。認作錦心繡腸。師燿尙合餘燼。羹熱休吹冷盞。解醒縱無五斗。且復月攘一雞。

### 送遂寧何道士自潭湘歸蜀

塵埃波浪幾東西。歸去丹瓢挂杖藜。戊己爐中真造化。功成分我一刀圭。書劍飄然席未溫。火雲撲地暑煙昏。山黃水濁湖南路。竹月荷風憶范村。

### 立秋二絕。戴楸葉。食瓜水。吞赤小豆七粒。皆吳中節物也。

三伏熏蒸四大愁。暑中方信此生浮。歲華過半休惆悵。且對西風賀立秋。折枝楸葉起園瓜。赤小如珠噉井花。洗濯煩襟節節物。安排笑口問生涯。

### 秋雷歎。吳諺云。秋字曉。捐萬斛。謂立秋日雷也。

立秋之雷損萬斛。吳儂記此占年穀。汰哉豐隆無藉在。政用此時鳴孝輶。向來夏旱連三月。吁嗟上訴聲滿屋。訟風未慙復占雷。助魃爲妖天更酷。我雖閒寂忝祠史。家請官供尙倉粟。塵甑貧交滿目前。卒歲將何救枵腹。但願吳儂言不驗。共割黃雲炊白玉。天人遠近叵戲論。裨竈安能尸禍福。

用漢中帥閻才元侍郎韻送樊子南西歸兼呈侍郎。

萬里山巔與水涯。春風招看杏園花。向來科第直溷子。此去文章應滿家。休學遊仙窮越蕙。且從知己控褻斜。南樓東望當思我。藥裏堆中兩鬢華。子南嘗自岷山西遊。窮探勝境。多見異人。南樓侍郎新作。

書樊子南遊西山二記後

仙山草木鎖卿雲。不到花平不離塵。十丈牡丹如錦蓋。人間姚魏卻爭春。

右牡丹瓶

春晚娑羅百葉開。仙翁精舍長蓬萊。朝元未罷門深閉。不管人間有客來。

右大面

題天平壽老方丈

二十三年再入山。此山於我有前緣。時人不用憐衰病。天與房弗一線泉。壽老近於半山石壁之中得泉眼如筋。清泉如一線。涓涓而出。大旱不增減。欲爲余作小菴於泉傍以煉丹云。

再遊天平有懷舊事且得卓菴之處呈壽老

訪舊光陰二十年。殘僧相對兩依然。木蘭已老無花發。石竹依前有麝眠。萬戶直須龜手藥。一龕何用買山錢。從今半座須分我。共說昏昏一覺禪。

重九日行營壽藏之地

家山隨處可行楸。荷鍤攜壺似醉劉。縱有千年鐵門限。終須一個土饅頭。三輪世界猶灰劫。四大形骸強

首丘。螻蟻烏鳶何厚薄。臨風拊掌菊花秋。

得壽藏於先隴之傍。俯酬素願。感慨交懷。

密邇松楸地。一隅會心何必問青烏。亢宗雖愧鎮公子。沒世尙從先大夫。京兆漢阡賢問望。邢山鄭冢儉規模。家庭遺訓焄蒿在不學。邪卿畫古圖。

晚登木瀆小樓

萬象當樓黼繡張。闌干一士立蒼茫。雲堆不動山深碧。星出無多月淡黃。宿鳥盡時猶數點。歸鴻驚處更斜行。松陵政有鱸魚上。安得長竿坐釣航。

題秋鷺圖

昨夜新霜冷釣磯。綠荷消瘦碧蘆肥。一江秋色無人問。盡屬風標兩雪衣。

送蘇秀才歸永嘉

再入庭闈再入山。偷閒百日了金丹。他年拔宅上升後。休道使親忘我難。大道凝神術養形。形神俱煉始功成。勸君觀妙還觀微。先作頑仙地上行。

東宮壽詩丁未年。

有赫題期盛。無疆嗣歷昌。中興歸濬哲。重慶啓元良。兩亥開基遠。三丁系統長。恭惟藝祖。太宗皇帝。元命皆在亥。今太上主。上殿下元命。皆在丁。帝咨同物瑞。人卜降年祥。雖日融雙照。乾天秉少陽。晨昏周內寢。詩禮舜巖廊。極右辰居煥。心前火德光。與齡偕聖父。德壽協虛皇。銅律風占兌。瑤山樂奏商。莫芳鄰五位。菊色麗



中央視膳斑衣拱。傳觴玉契將。宸楓霜獻葉。仙桂月輸香。薰炷爭延祝。吟牋曷讚揚。形容仁與孝。步障有雲章。

送同年朱師古龍圖赴潼川

杏園耆舊如晨星。白頭相對眼故青。奉常禮樂照東蜀。十年清名留漢廷。蜀人減估天恩厚。高議清陰猶記否。邇來聞道更蠲除。此段始終君一手。歸見岷峨無愧詞。父老笑迎還歎咨。賈生未可去宣室。屯膏一州誰謂宜。魏闕江湖關出處。招頭不用催鳴榔。遙知夢境尙京塵。啞咤滿船聞魯語。蜀士仕於朝者。所買婢妾。例不肯隨歸。獨師古家無一人肯相舍。傳以爲奇事。蜀人以中原語音爲魯語。

題趙希遠案鷹圖

學射春山萬歲湖。牙門列騎卷平蕪。如今黃土原邊夢。猶識呼鷹嚇犬圖。

題米元暉吳興山水橫卷

道場山麓接何山。影落茗溪浸碧瀾。只欠荷花三十里。檣頭船上把漁竿。

圍田歎四絕

萬夫陘水水乾源。障斷江湖極目天。秋潦灌河無洩處。眼看漂盡小家田。山邊百畝古民田。田外新圍截半川。六七月間天不雨。若爲車水到山邊。壑鄰罔利一家優。水旱無妨衆戶愁。浪說新收若干稅。不知逋失萬新收。臺家水利有科條。膏潤千年廢一朝。安得能言兩黃鵠。爲君重唱復陂謠。

素羹

氈芋凝酥敵少城。土藩割玉勝南京。合和二物歸藜糝。新法儂家骨董羹。

夜雨

燭花垂穗伴空齋。心事如灰入壯懷。老倦更闌惟熟睡。任他疎雨滴空階。

野景

菰蒲聲裏荻花乾。鷺立江天水鏡寬。畫不能成詩不到。筆端無處著荒寒。

除夜地爐書事

節物閒門裏。人情老境中。雁聲凌急雨。燈影戰斜風。糟醕新醅白。柴錐軟火紅。人家炊夜話。我已困蒙茸。

吳人酌酒盃浮醅。謂之鑿醕。酒之精英也。

元日立春感歎有作二首

元日兼春日。霜寒又雪寒。併煩傳菜手。同捧頌椒盤。疊膝稀穿履。扶頭懶正冠。五年如此度。寧得諱衰殘。

元日兼春日。閒身是老身。行年申直戊。交運丑支辛。豈敢綦安佚。聊希刮鈍屯。童兒看書戶。把筆已如神。

古鼎作香爐

雲雷縈帶古文章。子子孫孫永奉常。辛苦勒銘成底事。如今流落管燒香。

偶書

捏目華中影現身。有爲皆妄懶方真。已甘擗擗勤爲圃。休向滔滔苦問津。書至五千空拄腹。錢非十萬不

通神君看汗簡沉碑者。隨水隨風幾窅處。

太上皇帝靈駕發引輓歌詞六首

紹運鍾陽九。興王撫半千。斷鼇媧立極。翔鳳漢中天。宵叶三星紀。希夷十閏年。聲容彌宇宙。浩石不勝鵲。  
自將吳津騎。誰嬰泰一鋒。旄頭連夜落。京觀隔江封。舞武三成備。書文九譯重。修攘遺策在。嗣聖續車攻。  
簫勺妖氛靜。甄陶叶氣還。春回慈殿駕。天作祐陵山。開闢風雲慘。登平日月閒。艱難雖獨瘠。壽域徧人間。  
傳聖家人禮。凝神象帝先。勳華今曆數。汾社古山川。衆父尊歸父。中天更有天。壽宮何所厭。函上白雲仙。  
帝業雖天廣。皇心本谷虛。神應游混沌。夢不返華胥。堦德難涯涘。銘功總緒餘。誰能言大道。第入四墳書。  
文德堯新廟。威靈舊禹山。海門賓羽衛。地軸啓雲關。無路攀仙駕。當年拱聖顏。小臣衰疾淚。空望帝鄉灣。

別擬太上皇帝輓歌詞六首不進

身濟投艱業。時乘撥亂機。荆榛荒帳殿。風雨頽戎衣。有日臨黃道。無星彗紫微。至今淮海上。猶詠六龍飛。  
太上皇帝初載御製詩云。六龍轉淮海。萬騎臨吳津。

大孝天孚佑。精誠敵可摧。龍輶遷座至。駟馭及泉回。永祐千章木。慈寧萬壽杯。古今無此事。絕德詔方來。  
斂福開皇極。儲祥握赤符。寇降千猘獮。胡拜兩單于。遺誥之下。淮北父老涕泣曰。太上皇帝眞主也。實受北虜兩  
朝之拜。謂寬亮二首。皆嘗在聘使中。洗甲民安枕。垂衣國覆盂。有生何以報。壽域亘綿區。

與子傳神器。承家得聖人。堦庭天下養。壺嶠海中春。四葉斑衣樂。三加玉册新。壽宮如帝所。何必上霄晨。  
舞羽修文後。投歌講藝時。天章雲漢麗。國典日星垂。麟絕仲尼筆。猿啼神禹碑。傷心河洛水。無處問龍龜。

甫賀蠅傳赦。俄驚鶴馭風。首山銅鼎就。前殿玉卮空。日豈揮戈及。天無鍊石功。如何千萬壽。不待九齡終。  
送許耀卿監丞同年赴靜江倅四絕

南國春深雁欲回。湘江花浪一帆開。知君不爲驂鸞去。直爲淵明五斗來。  
羅帶江流碧玉峯。舊游如夢一星終。煩披蘚石尋題字。定有人能記此翁。  
鴈塔交親比斷金。故人歲晚更情深。只今不隔同年面。想見青雲異日心。  
官塗真有上竿魚。玉筍翻乘別駕車。聞道留行有公論。從今日日看除書。

此  
页  
空  
白

# 石湖居士詩集卷二十九

次韻虞子建見哈贖帶作醮

齋祠難著野衣冠。旋贖金章始見閒。台架塵侵毳路暗。花書墨漬笏頭斑。當年駟騎傳呼賜。此日村童拂拭還。若比前廳荒驛舍。見存猶可一開顏。  
兒女傳觀省見稀。病身聊復借光輝。莫嫌憔悴沈腰瘦。且喜間關秦璧歸。不是典來還酒債。亦非將去換蓑衣。麴魚餽釜時相陋。微汝誰能爲解圍。

顏橋道中

村村籬落網新修。處處田疇盡有秋。一段農家好風景。稻堆高出屋山頭。

上沙舍舟

村北村南打稻聲。竹輿隨處款柴荆。斜陽倒景天如醉。明日山行更好晴。

宿閭門

五更潮落水鳴船。霜送新寒到枕邊。報道霧收紅日上。野翁猶蓋短篷眠。

攜家石湖賞拒霜

水上晴雲綵練橫。許多蜂蝶趁船行。漁樵引入新花塢。兒女扶登小錦城。豔粉發粧朝日麗。濕紅浮影晚波清。誰知搖落霜林畔。一段韶光畫不成。

壽櫟東齋午坐

屋角靜突兀。雲氣低鴻濛。殘葉颭疎雨。孤花側淒風。北窗午睡起。一笑萬事空。無人共此意。莎塔咽微蛩。

晚思

薜牆莎砌響幽蟲。睡起緡書覺夢中。殘暑一窗風不動。秋陽入竹碎青紅。

壽櫟堂枕上

禪牀初著小山屏。夜久秋涼枕席清。纒鬢飛蚊妨好夢。臥聽簷雨入池聲。

宿妙庭觀次東坡舊韻

桂殿吹笙夜不歸。蘇仙詩板挂空悲。世人舐鼎何須笑。猶勝先生夢石芝。

升降三田自有丹。浪尋盤鼎斷仙壇。扣門倦客惟思睡。容膝菴中一枕安。觀爲董雙成故宅。元祐間修造。掘

地得琉璃盤。銅鼎。中有丹。已而盤碎。失丹。惟鼎存。坡詩蓋紀其事。鼎後爲宣和殿取去。

餘杭初出陸

村媪羣觀笑老翁。宦途何處苦龍鍾。霜毛瘦骨猶千騎。少見行人似箇儂。

桐廬江中初打槳

二十年前鬢未斑。下灘歸路落潮乾。如今衰雪三千丈。卻趁潮平再上灘。

釣臺

久矣心空客路埃。茲行端爲主恩來。杜陵詩是吾詩句。臥病豈登江上臺。

和豐驛

晚境惟於閉戶宜。出門惟有病相隨。四方雖是男兒志。莫忘柯山在莒時。

次韻龔養正病中見寄

衰翁埽軌欲垂車。怪子頽然也向隅。激水要令風在下。涸泉翻以沫相濡。瘠肥逸爾自秦越。勢利紛然皆耳餘。且復放船來話舊。不妨蓮葉臥看書。

題蜀果圖四首

木瓜

沈沈黛色濃。糝糝金沙絢。卻笑宣州房。競作紅粧面。

櫻桃

火齊寶瓔珞。垂於綠繭絲。幽禽都未覺。和露折新枝。

石榴

日烘古錦囊。露浥紅瑪瑙。玉池嚙清肥。三彭跡如埽。

甘瓜

夏膚粗已皴。秋蒂熟將脫。不辭抱蔓歸。聊慰相如渴。

李粹伯侍御挽詞二首

奕葉邯鄲後。乘驄第一人。交情多舊雨。到處有陽春。磊落功名意。摧頽夢幻身。黃墟高可隱。何地著經綸。



公昔參敷納。人期到辨章。珠光空月皎。玉氣忽虹藏。歲晚東方騎。生平北海觴。玳簪風雨散。幾客奠楸行。

次韻袁起巖從刑遊金焦二山二首

二山巉絕照南州。俯看千檣繚芥舟。日脚鎔金浮巨浸。波聲翻雪撼高丘。鍾聞兩岸詩無敵。口吸西江話已酬。別有英雄懷古意。他年擊楫誓中流。憶曾歸自雪邊州。帆落中瀾小繫舟。食蛤坐來期汗漫。駕鴻飛去揖浮丘。臥遊久矣無登覽。辱贈蒼然有唱酬。寂寞東臯舒嘯後。爲君濡筆賦臨流。

次韻謝鄭少融尙書爲壽之作

交游稀似曉來星。歲月飄如水上萍。桂海宦情詩可紀。吳山別恨酒難平。我今以病爲欣戚。公合於時繫重輕。安得故人來話舊。碧空日日暮雲生。近見尙書再和桂林詩。成大與尙書相別於桂林。今十二年矣。

鄭少融尙書初除端殿以書見及賦詩爲賀

敬老尊賢大政初。速郵響動出新除。卽從光範開門館。先向文明直殿廬。後日沙堤新宰相。當年革履舊尙書。鋒車若向吳中路。應記南山有荷鋤。

書事三絕

爨婢請淘酒米園。丁催筭花錢。如許日生公事。誰云窮巷蕭然。日日處方候脈。時時推筮禳災。門外雖無車轍。醫生卜叟猶來。簡子約同湖棹。周郎許過田廬。碧雲日暮空台。多病故人遂疎。

親鄰招集強往使歸

樂天漸老欲謀歡。大似蒸砂不作團。已覺笙歌無煖熱。仍嫌風月太清寒。氣衰況復三而竭。心賞尤於四者難。卻恐人嫌情太薄。聊將花作霧中看。

次韻袁起巖常熟道中三絕句

小雨蕭寒破晚晴。疎疎密密滴簷聲。烏鴉盤舞黃雲亂。早與商量雪意生。吳徑難勝四牡駢。扁舟辛苦繫冰歸。簡書鞅掌吟詩苦。并與東陽減帶回。使君橫槩賦詩回。斷取天風海雨來。綵筆從今閒不得。雪花梅蕊一時開。

次韻袁起巖許浦按教水軍二絕句

橫波組練試揚舲。風捲魚龍海欲凝。但得綈袍如挾纊。何妨鐵甲冷如冰。戈船戰櫂疾如飛。莫遣潮沙澱海湄。草奏直須窮利病。奉身從此繫安危。

次韻起巖喜雪

吹成一雪便吹殘。風伯無端豈坐慳。夜報飛花平瓦壠。曉驚疎雨落簷間。休教凍解魚龍水。更待誠通虎豹關。准擬姑蘇臺上看。春前三度老青山。袁詩猶以雪未甚積。必念此意。當益感通矣。

枕上聞雪復作方以爲喜起巖再示新詩復次韻

三白何憂稼穡艱。天於玉粒未吾慳。不知夜色明空外。但覺朝寒到夢間。誰子騎驢吟灞上。何人跋馬客藍關。爭如睡熟蒲團上。靜聽飢鴉啄屋山。

起巖又送立春日再得雪詩亦次韻

十分佳景媚冬殘。好事天心不復慳。已遣梅花斜竹外。更飄瑞葉向人間。漁蓑晚色都堪畫。羌笛春光亦度關。想得東風來處路。白銀宮闕鎖三山。

同年楊廷秀祕監接伴北道道中走寄見懷之什次韻答之

昨遣長鬚迓詩老。人言已過閩門了。梅邊腸斷傍寒溪。詩老官忙應未知。何時真訪山中許。已辦竹深留客處。只恐歸程官更忙。天驕催上沙堤去。

曉枕聞雨

暗淡更殘景。低迷病酒懷。剔燈寒作伴。添被厚如埋。膽冷都無夢。心空卻似齋。地爐煎粥沸。聽作雨鳴階。

雪意方濃復作雨

擬看飛花陣。翻成建水聲。雨吾寧不識。雪汝幾時成。三白從今卜。千倉待此盈。黃雲如有意。青女莫無情。

春朝早起

莫笑眠常早。還憐起不遲。穠香溫夜氣。小雨濕春姿。瘦比中年甚。寒惟病骨知。羨渠兒女健。繞屋探南枝。

詠懷自嘲

蒼溜春猶凍。門扉晚未開。退閒驚客至。衰懶怕書來。日日教澆竹。朝朝遣探梅。園丁應竊笑。猶自說心灰。

早衰

早衰頭腦已冬烘。信拙心情似苦空。僚舊姓名多健忘。家人長短總佯聾。一窗煖日棋聲裏。四壁寒燈藥

氣中晚景只消如此過。不堪拈出教兒童。

習閒

習閒成懶懶成癡。六用都藏縮似龜。雪已許多猶不飲。梅今如此尙無詩。閒看猫暖眠氈褥。靜聽鴉寒叫竹籬。寂寞無人同此意。時時惟有睡魔知。

一龕

一龕窄似鳥窠禪。世界悠悠任大千。與老有情冬後煖。去仙無幾日高眠。斫開竹後初三逕。忘卻詩來又一年。破戒忽題無味句。劣能成字不成篇。

陰寒終日兀坐

東風微解綴簷冰。仍喜朝來井水清。臘淺得春全未煖。雪慳和雨最難晴。小窗日煖猶棋局。窮巷更深尙屐聲。莫把摧頽嫌暮景。且將閒散替勞生。

親戚小集

避濕遠寒不出門。一冬未省正冠巾。月從雪後皆奇夜。天向梅邊有別春。秉燭登臨空語舊。擁爐情味莫懷新。榮華勢利輸人慣。贏得尊前現在身。

立春枕上

擇蔬翻餅鬧殘更。兒女喧喧短夢驚。想得春風連夜到。東禪粥鼓忽分明。

睡覺

尋思斷夢半膏騰。漸見天窗紙瓦明。宿鳥噪羣穿竹去。縣前猶自打殘更。

# 石湖居士詩集卷三十

## 臘月村田樂府十首并序

余歸石湖。往來田家。得歲暮十事。採其語各賦一詩。以識土風。號村田樂府。其一冬春行。臘日春米。爲一歲計。多聚杵臼。盡臘中畢事。藏之土瓦倉中。經年不壞。謂之冬春米。其二燈市行。風俗尤競上元。一月前已買燈。謂之燈市。價貴者數人聚博。勝則得之。喧盛不減燈市。其三祭竈詞。臘月二十四夜祀竈。其說謂竈神翌日朝天。白一歲事。故前期禱之。其四口數粥行。二十五日煮赤豆作糜。暮夜闔家同饗。云能辟瘟氣。雖遠出未歸者亦留貯口分。至襁褓小兒及僮僕皆預。故名口數粥。豆粥本正月望日祭門。故事流傳爲此。其五爆竹行。此他郡所同。而吳中特盛。惡鬼蓋畏此聲。古以歲朝而吳以二十五夜。其六燒火盆行。爆竹之夕。人家各又於門首燃薪滿盆。無貧富皆爾。謂之相暖熱。其七照田蠶詞。與燒火盆同日。村落則以禿帚若麻。蘸竹枝輩燃火炬。縛長竿之杪以照田。爛然徧野。以祈絲穀。其八分歲詞。除夜祭其先。竣事。長幼聚飲。祝頌而散。謂之分歲。其九賣癡獸詞。分歲罷。小兒繞街呼叫云。賣汝癡賣汝獸。世傳吳人多獸。故兒輩諱之。欲賈其餘。益可笑。其十打灰堆詞。除夜將曉。鷄且鳴。婢獲持杖擊糞壤。致詞以祈利市。謂之打灰堆。此本彭蠡清洪君廟中如願故事。惟吳下至今不廢云。

## 冬春行

臘中儲蓄百事利。第一先春年計米。羣呼步碓滿門庭。運杵成風雷動地。篩勻箕健無糲糠。百斛只費三

日忙齊頭圓潔箭子長。隔籬耀日雪生光。土倉瓦竈分蓋藏。不蠹不腐常新香。去年薄收飯不足。今年頓頓炊白玉。春耕有種夏有糧。接到明年秋刈熟。鄰叟來觀還歎嗟。貧人一飽不可賒。官租私債紛如麻。有米冬春能幾家。

燈市行

吳臺今古繁華地。偏愛元宵燈影戲。春前臘後天好時。已向街頭作燈市。疊玉千絲似鬼工。剪羅萬眼人力窮。兩品爭新最先出。不待三五迎東風。兒郎種麥荷鋤倦。偷閒也向城中看。酒壚博塞雜歌呼。夜夜長如正月半。災傷不及什之三。歲寒民氣如春酣。農家亦幸荒田少。始覺城中燈市好。

祭竈詞

古傳臘月二十四。竈君朝天欲言事。雲車風馬小留連。家有盃盤豐典祀。豬頭爛熟雙魚鮮。豆沙甘鬆粉餌團。男兒酌獻女兒避。醑酒燒錢竈君喜。婢子鬪爭君莫聞。貓犬觸穢君莫嗔。送君醉飽登天門。杓長杓短勿復云。乞取利市歸來分。

口數粥行

家家臘月二十五。浙米如珠和豆煮。大杓轆鐺分口數。疫鬼聞香走無處。鏝薑屑桂澆蔗糖。滑甘無比勝黃梁。全家團欒罷晚飯。在遠行人亦留分。襍口孩子強教嘗。餘波徧沾獲與臧。新元叶氣調玉燭。天行已過來萬福。物無疵癘年穀熟。長向臘殘分豆粥。

爆竹行

歲朝爆竹傳自昔。吳儂政用前五日。食殘豆粥掃罷塵。截筒五尺煨以薪。節間汗流火力透。健僕取將仍疾走。兒童卻立避其鋒。營塔擊地雷靈吼。一聲兩聲百鬼驚。三聲四聲鬼巢傾。十聲百聲神道寧。八方上下皆和平。卻拾焦頭疊牀底。猶有餘威可驅瀆。屏除藥裹添酒杯。晝日嬉遊夜濃睡。

### 燒火盆行

春前五日初更後。排門然火如晝。大家薪乾勝豆豉。小家帶葉燒生柴。青煙滿城天半白。棲鳥驚啼飛格磔。兒孫圍坐犬鷄忙。鄰曲歡笑遙相望。黃宮氣應纒兩月。歲陰猶驕風栗烈。將迎陽豔作好春。政要火盆生煖熱。

### 照田蠶行

鄉村臘月二十五。長竿然炬照南畝。近似雲開森列星。遠如風起飄流螢。今春雨雹繭絲少。秋日雷鳴稻堆小。農家今夜火最明。的知新歲田蠶好。夜闌風焰西復東。此占最吉餘難同。不惟桑賤穀芘芘。仍更苧麻無節菜無蟲。

### 分歲詞

質明奉祠今古同。吳儂用昏蓋土風。禮成廢徹夜未艾。飲福之餘卽分歲。地爐火輒蒼朮香。飶盤果餌如蜂房。就中脆錫專節物。四座齒頰鏘冰霜。小兒但喜新年至。頭角長成添意氣。老翁把盃心茫然。增年翻是減吾年。荆釵勸酒仍祝願。但願尊前且強健。君看今歲舊交親。大有人無此盃分。老翁飲罷笑撚鬚。明朝重來醉屠蘇。



賣癡狀詞

除夕更闌人不睡。厭禳鈍滯迎新歲。小兒呼叫走長街。云有癡狀召人買。二物於人誰獨無。就中吳儂仍有餘。巷南巷北賣不得。相逢大笑相揶揄。櫟翁塊坐重簾下。獨要買添令問價。兒云翁買不須錢。奉賒癡狀千百年。

打灰堆詞

除夜將闌曉星爛。糞埽堆頭打如願。杖敲灰起飛撲籬。不嫌灰浣新節衣。老媪當前再三祝。只要我家長富足。輕舟作商重船歸。大牯引犢鷄啼兒。野繭可繹麥兩岐。短衲換著長衫衣。當年婢子挽不住。有耳猶能聞我語。但如我願不汝呼。一任汝歸彭蠡湖。

自嘲二絕

終日嘒嘒漫說空。觸來依舊與爭鋒。登時覺悟忙收拾。已是闍黎飯後鐘。惡聲惡色橫相干。覲面須臾萬箭攢。有客癡聾都不動。方知我被見聞漫。

海棠欲開雨作

春睡花枝醉夢回。安排銀燭照粧臺。蒼茫不解東風意。政用此時吹雨來。

雨再作政妨海棠

漂紅濕紫滿莓苔。潑墨濃雲尙送雷。風雨豈無他日再。何須隨卻海棠來。

蠻觸

蠻觸紛拏室未虛。心知懲忿欠工夫。腹須空洞方容物。事過清涼已喪吾。萬仞我山高不極。一團心火蔓難圖。從今立示寒灰觀。笑看蒼黃走鄭巫。

偶然

偶然寸木壓岑樓。且放渠儂出一頭。鯨漫橫江無奈蝮。鵬雖運海不如鳩。躬當自厚人何責。世已相違我莫求。石火光中爭底事。寬顏收拾付東流。

曉泊橫塘

短夢難成卻易驚。披衣起漱玉池清。遙知中夜南風轉。洶洶前村草市聲。

次韻袁起巖瑞麥。此麥兩岐。已黃熟。其間又出一青枝。亦已秀實。傳記所未載也。

民和神福固其宜。況有仁先四者施。吳稻卽看收再熟。周牟先已秀雙岐。薰風半老黃金穗。梅雨重春綠玉枝。樂不可支聊發詠。田間日日是芳時。

次韻袁起巖甘雨卽日應祈

天遣賢侯惠此州。隨車一雨緩千憂。藥寮坐看雲穿屋。蓮棹歸將葉蓋頭。三伏涼來那易得。百年飽外更何求。合詞但祝爲霖手。早侍薰絃十二旒。

劉德修少卿避暑惠山因便寄贈

鳴鳳朝陽尺五天。忽忽過白鷗邊。遙憐海內無雙士。獨酌人間第二泉。決去君今身似葉。贈行誰有筆如椽。老夫但祝重相見。未擬消魂賦黯然。

幽棲

幽棲先自嬾衣裳。秋暑薰肌汗似漿。對客緒言多勉強。謀家生事總荒唐。蚤眠不待星當戶。晚飯常占日半牆。莫道閒中無外慕。朝朝屈指望新涼。

園林

園林隨分有清涼。走遍人間夢幾場。鐵硯磨成雙鬢雪。桑弧射得一繩麻。光陰畫紙爲碁局。事業看題檢藥囊。受用切身如此爾。莫於身外更乾忙。

七月十八日濃霧作雨不成

曉霧障朝暉。日脚戰未透。儻然成一雨。亦足洗塵瞽。江南富秋暑。老穉呻永晝。田間翻畏涼。能糝嘉穀秀。昨朝東有虹。光彩照高柳。占云天掠剩。政恐耗升斗。陽光趣堅實。乘除或相掇。臞儒雖病渴。且復忍汗垢。吳人謂立秋後。虹爲天收。雖大稔。亦減分數。

戲贈勤長老

從君揮塵演金乘。我已無心纏葛藤。第一圓通三鼓夢。大千世界一窗燈。罷參柏子庭前意。權作梅花樹下僧。飯飽閒行復閒坐。人間有味是無能。

次韻袁起巖送示郡沼雙蓮圖

珠淵玉水折方員。湧出雙蓮照酒邊。壓倒小湖三級草。增光後沼兩重蓮。茗華名字元相並。桃葉根株本自連。好把吳歛翻楚步。楊荷新曲勝當年。  
洞庭小湖寺。舊得瑞象。有草繞之。投草湖中。生三級紅蓮。皮日休有

木蘭後池重臺蓮詩云·兩重元是一重心·皆吳中瑞故事·而未有雙蓮之傳也·

次王正之提刑韻謝袁起巖知府送茉莉二檻

千里移根自海隅。風颿破浪走天吳。散花忽到毘耶室。似欲橫機試病夫。  
燕寢香中暑氣清。更煩雲鬢插瓊英。明妝暗麝俱傾國。莫與攀仙品弟兄。

再賦茉莉二絕

薰蒸沉水意微茫。全樹飛來爛熳香。休向寒鴉看日景。祇今飛燕侍昭陽。  
憶曾把酒泛湘灘。茉莉毬邊壁荔枝。一笑相逢雙玉樹。花香如夢鬢如絲。

再賦郡沼雙蓮三絕

館娃魂散碧雲沉。化作雙葩寄恨深。千載不償連理願。一枝空有合歡心。  
池光闌檻倚斜暉。把酒看花醉不歸。但許鴛鴦相對浴。休驚翡翠一雙飛。  
兩歧秀罷已蒿萊。春意還從菡萏回。不是使君和氣勝。此花應向別人開。

范村午坐

好風入修篁。槁葉舞而墜。斷續一蛩吟。高下雙蝶過。凍榭午陰圓。靜極成癡坐。老便几杖供。慵廢誦弦課。  
蒲團輒易煖。困來百骸惰。四傍無人聲。誰驚短夢破。

此  
页  
空  
白

# 石湖居士詩集卷三十一

讀白傅洛中老病後詩戲書

樂天號達道。晚境猶作惡。陶寫賴歌酒。意象頗沉著。謂言老將至。不飲何時樂。未能忘煖熱。要是怕冷落。我老乃多戒。頗似僧律縛。閒心灰不然。壯氣鼓難作。豈惟背聲塵。亦自屏杯酌。日課數行書。生經一囊藥。若使白公見。應譏太蕭索。當否竟如何。我友試商略。

秋夕不能佳眠

晝坐旣摧頽。夜臥亦展轉。檢校百骸間。無一得安穩。四大元假合。解散會歸盡。何煩造化兒。前期苦相窘。咄咄方書空。忽發一笑讪。都緣有我相。浪把此身認。於中有安否。隨卽生喜慍。蟬聲耳根響。蠅翅目中暈。無明徧大千。祇自植愁本。化兒安在哉。作詩謝不敏。

王正之提刑見和末利小詩甚工。今日末利漸過。木犀正開。復用韻奉呈二絕。

南花宜夏不禁涼。猶繞珍叢覓舊香。留得典刑傳菊圃。別筵新酒待重陽。吳中有末利菊花。

末利吟餘又木犀。碧瑤葉底露金支。從今日日須搜句。莫遣硯池生網絲。

復用韻記昨日坐中劇談及趙家琵琶之妙。呈王正之提刑二絕。

病來六結總龜藏。不用濃薰戒定香。花下酒邊非我事。但餘消瘦是東陽。

曹穆新聲和者稀。如今妙手屬天文。轉關濩索都傳得。想見飛凰舞綠絲。

正之云。轉關六么濩索。梁州歷統

薄媚·醉吟商·胡渭州·此四曲·承平時專入琵琶·今不復有能傳者·余按北夢瑣言·載黔南節度王保義女善彈琵琶·夢吳人授曲·內有醉吟商一調·其來遠矣·

再題白傅詩

香山歲晚錯芳辰。索酒尋花一笑欣。列子御風猶有待。鄒生吹律強生春。若將外物關舒慘。直恐中途混主賓。此老故應深解此。逢場聊戲眼前人。

石湖中秋二十韻。十二年前嘗與工部兄及賓客爲此遊。今有隔世者。感今懷舊而作。

野外行吾意。城中寄卻愁。半秋三夜月。千古五湖舟。湧地金芒發。行天玉鏡流。珠星沉不現。銀漢黯如收。高浪連三境。長風近十洲。水天雙對鏡。身世一浮漚。迴白包元氣。空明慰病眸。只憐心浩蕩。不管鬢飄飈。放棹真狂矣。關門有此不。四并非易事。一笑亦難謀。急管參漁笛。清歌間棹謳。逢迎成解后。嘯咏勸綢繆。女擷蘋花獻。妻傾竹葉酬。今宵如不飲。何處可忘憂。憶昔誰同賞。于今歲恰周。陟岡睽魯衛。伐木愴應劉。獨歎靈光在。能追汗漫遊。大都緣未盡。豈是病都瘳。縱意褰篷席。輕生倚柁樓。節宣誠小爽。猶勝賦悲秋。

中秋後兩日。自上沙回。聞千巖觀下巖桂盛開。復橫石湖留賞一日。賦兩絕。

金粟枝頭一夜開。故應全得小詩催。籃輿緩緩隨兒女。引入天香洞裏來。千巖觀下碧瑤林。歲晚青青共此心。隱士歸兮花未老。每年來把一杯深。

有會而作

拙是天資嬾是真。本來何用戒香薰。強陽氣盡冥恩怨。杜德機深混見聞。念動即時漂鬼國。心空隨處走

魔軍室中已自空。諸有休負天機與地文。

戲題無常鐘二絕

著衫脫袴兩浮休。切莫隨渠認路頭。三尺蒲牢關底事。尋聲接響大悠悠。合成四大散成空。草木經春便有冬。生滅去來相對代。爲君題作有常鐘。

自箴

有對易成畛域。無情那有從違。疑人妄認逆境。平地自生鐵圍。白傅病猶牽愛。晁公老未斷嗔。莫問是情是性。但參無我無人。俗物汨陳大好。家奴倒迕何誅。泡幻初無典要。光陰況已桑榆。

題畢少董繙經圖

絳帳胡沙暗。青編古意深。誰知洛下詠。中有越人吟。

次韻袁起巖喜雨

使君精禱動仙靈。月御俄從畢噶經。昨夜雲頭隨皂蓋。今朝雨脚挂青冥。池光拍岸浮州宅。湖面粘天漲洞庭。賸采吳歛歌歲事。傳歸擊壤調中聽。昨驪復池光亭觀。故因及之。

再次喜雨詩韻以表隨車之應

仙篆驅龍效水靈。佛螺吹梵演雲經。何煩礎汗生蒸潤。使借爐薰作晦冥。一念故應周法界。萬神元不隔明庭。昌時圭璧形聲應。不似周時莫我聽。



三次喜雨詩韻少仲嘉頌

嚮非賢牧政通靈。幾負松陵耒耜經。天籟侵晨占少女。雨師連夜檄元冥。作霖豈必求商野。召見誰能右漢庭。聞有追鋒傳好語。從今側耳爲君聽。

府公錄示和提幹喜雨之作輒次元韻

雨挾潮痕漲具區。流渠決決繞幽居。荷鋤日課都忘倦。抱甕天機本不踈。且喜水平昌谷稻。莫教雷假介休車。老翁飽外還多事。更把林間種樹書。

雨後田舍書事再用前韻

村村畦圃藝新區。處處田廬葺舊居。熟透晚梅紅的皪。展開新籜翠扶疎。向來矜寡猶遺秉。此去汗邪又滿車。誰解續經如魯史。爲將連歲有年書。

放下菴卽事三絕

無風香篆吐長絲。書架凝塵不下帷。烏雀聲和野日暖。午窗捫蝨坐多時。病後天魔不戰降。夢中千頃白鷗江。心空境寂聲塵盡。卻愛秋蠅撲紙窗。閉門幽僻斷經過。靜極兼無雀可羅。林下故人知幾箇。就中老子得閒多。

寄題西湖并送淨慈顯老三絕

南北高峯舊往還。芒鞋踏徧兩山間。近來卻被官身累。三過西湖不見山。膏肓泉石痼煙霞。半世遊山不著家。老入蒲團三昧定。坐看穿膝長蘆芽。

中秋月了又黃花。卯後新醅午後茶。別沒工夫譚不二。文殊休更問毘耶。

題藥簾

合成四大本非真。便有千般病染身。地火水風都散後。不知染病是何人。

淨慈顯老爲衆行化且示近所寫真戲題五絕就作畫贊

孤雲野鶴本無求。剛被差充粥飯頭。擔負一筵牙齒債。鐘鳴鼓響幾時休。  
冒雪敲冰乞米迴。齋堂如海鉢單開。衆中若有知恩者。一粒何曾敵破來。  
千里驅馳出爲人。顏容消瘦老於真。食輪轉後無餘事。莫學諸方轉法輪。  
何時平地起浮圖。化得冬糧但付廚。推倒禪牀并拄杖。飢來喫飯看西湖。  
殿中泥佛已丹青。堂上禪師也畫成。笑我形骸枯木樣。無禪無佛太纏生。

老態

浮生自有老規模。寒燠隨宜不用拘。未盡九秋先挾纊。猶除十月已開爐。一心定後冥欣厭。四大安時適慘舒。若使強追年少樂。直成赤手縛於菟。

憶昔

鉛刀曾齒莫邪銛。遊倦歸歟雪滿髯。柳帶受風元不結。荷盤承露竟無黏。逢場鼓笛如灰冷。送老齏鹽似蜜甜。留得本來真面目。行藏何假問龜占。

梅林先生夫人徐氏挽詞二首

擇對鳴珂里。宜家駟馬門。肅雍成孝敬。燕喜助平反。閱士彌三壽。還鄉忽九原。松風搖草露。愁絕後堂萱。昔筮鯉庭後。嘗瞻林下風。一從隨地遠。五度閱星終。教載恩勤在。驚呼夢幻空。送車知幾兩。獨欠舊孤童。

胡長文給事挽詞三首

結綬參高妙。垂紳侍邃清。紫荷青瑣闥。玉帳錦官城。行矣超龜列。終然鬱驥程。寂寥經濟事。遺恨入銘旌。許國心如日。還家鬢未星。四并供燕喜。萬事付櫻寧。東牖樽猶湛。南園醉不醒。淒涼招隱路。苔蝕履綦青。煙館交情厚。官聯事契長。鳴珂朝並轡。乘獨夜傳觴。何意塘蒲晚。翻哦露薤章。羸軀如可強。慟哭踞湖岡。

次韻王正之提刑大卿病中見寄之韻。正之得請歸四明。并以餞行。

名卿緒前輩。風格如玉山。纍纍培塿中。見此高孱顏。攢轡忽思歸。無人解縻賢。飄飄駕紫車。浮雲眎朱丹。向來小病惱。體力今已安。胡爲犯風雪。江湖行路難。呼酒煖征衫。寧計斗十千。倡酬悔不數。長懷悲短緣。離合固常事。忽忙增惘然。浩蕩海山春。登臨想臞仙。笑我守荒徑。老繭深裏纏。擬題憶鄞句。思咽冰下泉。遲公寄新作。使我頭風痊。

戲題趙從善兩畫軸三首。王正之云：從善家有琵琶妓甚工病。翁未得見。借此畫以戲之。

一枝香杏一枝梅。各占東風挂玉斂。居士石腸都似夢。王孫心眼怎安排。無笑無言兩斷魂。一杯誰爲煖霜寒。情知別有真真在。試與千呼萬喚看。搔頭珠重步微搖。約臂金寒束未牢。要見低鬟揜玉腕。更須斜抱紫檀槽。

枕上六言二首

寒更寂歷向曉。短夢參差屢驚。鷄鳴似喚我醒。犬吠知有人行。獨眠被出圭角。晏起帳承隙光。一老綢繆牖戶。幾人顛倒衣裳。

喜收知舊書復畏答書二絕

故人寥落似晨星。珍重書來問死生。筆意不如當日健。鬢邊應也雪千莖。強裁尺素答相思。兩目眇昏腕力疲。牽率老夫令至此。門前猶說報書遲。

簡畢叔滋覓牡丹

冷落韶光穀雨寒。一年孤負倚闌干。欲知春色偏濃處。須向香風逕裏看。畢園花逕名香風。

再賦簡養正

南北梅枝噤雪寒。玉梨皴雨淚闌干。一年春色摧殘盡。更覓姚黃魏紫看。

此  
页  
空  
白

# 石湖居士詩集卷三十二

## 春日覽鏡有感

習氣不解老。壯心故嗟峨。忽與鄉曲齒。方驚年許多。有眼不自見。尙謂朱顏酡。今朝鏡中逢。憔悴如枯荷。形骸既遷變。歲華復蹉跎。悟此吁已晚。既悟富若何。烏兔兩惡劇。不滿一笑呵。但淬割愁劍。何須揮日戈。兒童競佳節。呼喚儻且歌。我亦興不淺。健起相婆娑。

## 故太夫人章氏挽詞二首張子儀總領之母。

洵美相門裔。有齊邦媛賢。藻蘋南澗下。萱竹北堂前。孝敬三從謹。哀榮五福全。松銘諸健筆。題作晉陵阡。積慶今如許。生兒得寧馨。軻親躬授教。韋子世傳經。壽聿明卿月。安輿拱使星。市橋何處在。夢斷一溪青。

## 舅母太夫人方氏挽詞三首

四德儀邦族。三遷奠里門。姑寧憂疾痛。子自樂平反。夏枕方供扇。薰堂甫種萱。那知秋暑退。無復御輕軒。門戶傳清白。階庭侍紫青。百年歌燕喜。五福用康寧。訣籙嘗觀妙。旒旌設勒銘。神遊定超絕。何必訊泉扃。我願延陵道。幾如渭水陽。適傳杯泛影。何意隙沉光。擬補蘭陔雅。翻吟薤露章。支離妨執紼。兩泣望楸行。

## 壽樸堂前小山峯凌霄花盛開葱蒨如畫因名之曰凌霄峯

天風搖曳寶花垂。花下仙人住翠微。一夜新枝香焙煖。旋薰金縷綠羅衣。山容花意各翔空。題作凌霄第一峯。門外輪蹄塵撲地。呼來借與一枝筇。

代兒童作立春貼門詩三首

剪綵宜春勝。泥金祝壽幡。雪梅同雪鬢。相對兩凌寒。  
綠野添花逕。青春引杖藜。家人行架處。雙勸玉東西。  
盛族推山長。修齡號櫟翁。屏花春不老。日日是東風。

代兒童作端午貼門詩三首

畫閣圍香裊。明窗宴坐中。兵符不須篆。丹轉藥爐紅。  
管領神仙侶。追陪山長家。往來惟意適。歌舞對年華。  
黍筒小費名田課。昌歎多浮樂聖杯。笑倩艾人看外戶。北窗深處詠歸來。

重陽不見菊二絕

節物今年事事遲。小春全未到東籬。可憐短髮空欹帽。欠了黃花一兩枝。  
冷蕊蕭疎蝶懶飛。商量何日是花時。重陽過後開無害。只恐先生不賦詩。

古風送南卿

盧阜有佳人。顏色皦冰玉。不能時世粧。蕭然古冠服。紛紜倚市門。組麗眩紅綠。妖歌促豔舞。飛上黃金屋。  
安知乘鸞侶。流落墮空谷。風泉入環珮。月露作膏馥。梁肉豈不珍。淪雪煮黃獨。聊用慰朝飢。歲寒膚起粟。  
綺叢三尺塵。無路到松竹。誰能撫孤桐。爲奏招隱曲。

偶至東堂

岸幘蕭騷雪滿簪。一閒真是直千金。歸來栗里多情話。病後香山少醉吟。久坐蒲團蕉葉放。閒拖藜杖薜花深。飢時喫飯慵時睡。何暇將心更覓心。

李郎中挽詞二首 聖俞

劇郡思賢牧。名曹失望郎。六參能幾日。兩鬢未全霜。霽水新阡遠。桐川舊隱荒。絕憐垂白母。淚血獨還鄉。憶昔單車使。惟君勇輔行。馬墮招共載。瓶乳約同盟。老去長懷舊。悲來遽隔生。故人凋落盡。衰涕不勝橫。

謝江東漕楊廷秀祕監送江東集并索近詩二首

遠道悠悠日暮雲。愁眉今日爲君軒。殘燈獨照江東集。短夢相尋白下門。卽事想多梅蕊句。有誰堪共桂花樽。斯文賴有斯人在。會合何時得細論。

禿翁衰雪涕垂頤。仿佛三生懶散師。浹髓淪膚都是病。傾困倒廩更無詩。笑看筆格網絲徧。閒數窗櫺花影移。事業光陰今若此。故人休說舊襟期。

霜後紀園中草木十二絕

菊老芙蓉退。化工少均逸。蚤晚梅花動。從此無閒日。遮藏茉莉檻。纏裹芭蕉身。我亦入室處。忍寒待陽春。製芰亦不急。縵袍堪禦冬。從渠抱枝槁。撼撼鳴霜風。種葵如種麥。隔歲已下子。僅成一輪花。浪備四時氣。棠梨芳意多。頗惜歲晚晚。殷勤小春花。特地慰愁眼。



牡丹初翦時。已具新花眼。代謝不容髮。笑殺鐵門限。  
客從揚州來。遺我揚州花。筠籠貯枯枿。明年擅春華。  
風倒醱醞架。長條頭搶地。趁渠未萌芽。政可相料理。  
清霜染柿葉。荒園有佳趣。留連伴歲晚。莫作流紅去。  
眞珠綴玉船。梧子炒可供。莫嫌能墮髮。老夫頭已童。  
桃能驅不祥。霜後葉鋪地。抱枝崑崙奴。猶解禦魑魅。  
門冬如佳隸。長年護塔除。生兒乃不凡。磊落玻璃珠。

以玃坐覆蒲龕中

蠹蝕塵昏度幾年。蒙茸依舊軟如綿。且來助煖烏皮几。莫憶衝寒紫繡韉。

再到虎丘

不過溪橋又兩年。偶隨筇竹訪幽禪。有緣再踏雲巖路。無處重尋石井泉。擬輟半山分座住。先攜一枕借  
牀眠。覺來飽喫紅蓮飯。正是塘東稻熟天。虎丘石井。在張又新東南。水晶第三。今寺僧不能名其處。妄指寺中一  
土井當之。經藏後有大方井。舊名觀音井。上有石柱爲挂轆轤之處。疑此是古石井。今井已墜塞百年。柱亦徒他用。累  
飄住山者。多說然。今以語壁老。

虎丘六絕句

點頭石

當年揮塵講何經。賺得堅頑側耳聽。我自吟詩無法說。石頭莫作定盤星。

千人坐

聽經人散。薜花深。千古誰能更賞音。只好岸巾披鶴氅。風清月白坐彈琴。

白蓮池

碧泓白石偃樛枝。愛水嫌風老更低。潭影中間龍影臥。一山好處沒人題。

劍池

石罅泓渟劍氣潛。誰將樓閣苦莊嚴。只知煖熱遊人眼。不道蒼藤翠木嫌。

致爽閣

碧嶂橫陳似斷鼇。畫闌相對兩雄豪。東軒只有雲千頃。不似西山爽氣高。

方丈南窗

鼓板鐘魚徹曉喧。誰云方外事蕭然。窗間日暮寒煙重。未到齋時我正眠。

雪寒圍爐小集

席簾紙閣護香濃。說有談空愛燭紅。高釘檀根澆杏酪。旋融雪汁煮松風。康年氣象冬三白。浮世功名酒一中。無事閉門渠易得。何人躡屐響牆東。

白玉樓步虛詞六首并序

趙從善示余玉樓圖。其前玉階一道。橫跨綠霄中。琪樹垂珠網。夾階兩傍。綠霄之外。周以玉闌。闌外方

是碧落階。所接亦玉池。中間湧起玉樓三重。千門萬戶。無非連璫重璧。屋覆金瓦。屋山綴紅牙。垂璫四簷。黃簾皆捲。樓中帝座。依約可望。紅雲自東來。雲中虛皇。乘玉輅。駕兩金龍。侍衛可見者。靈官法服騎而夾侍二人。力士黃麾前導二人。儀劍四人。金園子四人。夾輅黃幡二人。五色戟帶二人。珠幢二人。金龍旗四人。負納陛而後從二人。雲頭下垂。將至玉階。樓前仙官冠帔出迎。方下階。雙舞鶴行前。雲駕之傍。又有紅雲二。其一仙官立幢節間。其二女樂並奏。玉樓之後。又有小玉樓六。其制如前。寶光祥雲。前後蔽虧。或隱或現。小案之前。獨爲金地。亦有仙官自金地下迎。傍小樓最高處。有飛橋。直瑤臺。仙人度橋。登臺以望。名數可紀者。大略如此。若其景趣高妙。碧落浮黎。青冥風露之境。則覽者可以神會。不能述於筆端。此畫運思超絕。必夢遊帝所者。髣髴得之。非世間俗史意匠可到。明窗淨几。盡卷展玩。恍然便覺身在九霄三景之上。奇事不可以不識。簡齋有水府法駕導引歌詞。乃倚其體作步虛詞六章。以遺從善羽人。有不俗者。使歌之於清風明月之下。雖未得仙。亦足以豪矣。

珠霄境。卻似化人宮。梵氣彌羅融萬象。玉樓十二倚清空。一片寶光中。  
浮黎路。依約太微間。雪色寶階千萬丈。人間遙作白虹看。幢節度高寒。  
罡風起。背負玉虛廷。九素煙中寒一色。扶蘭四面是青冥。環拱萬珠星。  
流鈴響。龍馭籟雲來。夾道騫華籠綵仗。紅雲扶輅輾天街。迎駕鶴鴒鳴。  
鈞天奏。流韻滿空。琪樹玲瓏珠網碎。仙風吹作步虛聲。相和入鸞鳴。  
樓闌外。輦道插非煙。閒上鬱蕭臺上看。空歌來自始青天。揚袂揖飛仙。

送趙從善少卿將漕淮東

玉筍風標右漢廷。起家聊直使車星。古來將相多頭黑。此去功名尙鬢青。披草兩年南北巷。折梅明日短長亭。門前車轍從今少。寂寞柴荆且暫扃。

范村雪後

習氣猶餘燼。鍾情未濕灰。忍寒貪看雪。諱老強尋梅。熨貼愁眉展。勾般笑口開。直疑身健在。時有句飛來。

寒夜觀雪

靜極孤鴻響。寒疑萬籟暗。眼花燈下字。髭斷雪中吟。頗似償前債。非關惜寸陰。可憐蝴蝶夢。翻作蠹書蟬。

瓶花二首

水仙攜蠟梅。來作散花雨。但驚醉夢醒。不辨香來處。小梅未可折。不折惜空回。擁鼻燃一枝。也道探春來。

瑞香三首

小檻移秀色。端來媚禪房。道人不解飲。醺然醉天香。紫雲蹙繡被。團欒覆衣篝。濃薰百和韻。香極卻成愁。一叢三百朵。細網拆濃檀。簾幕護花氣。不知窗外寒。

此页空白

# 石湖居士詩集卷三十三

塵居久不見山。或勸作小樓以助登覽。又力不能辦。今年益衰。此興亦闌矣。

結廬占城市。初豈卜云吉。謁醫并治庖。二事便衰疾。乘除徐自笑。翻覺此計失。經年不見山。無異處暗室。平生痼煙霞。歲晚成俗物。安得百尺樓。屋上高突兀。列岫擁青來。爽氣助佔畢。嘗試與匠謀。工費蝟毛出。俸餘強弩末。家事空囊澀。經營十年餘。高興音蕭瑟。人生不如意。十事常六七。身今況遲暮。長算屈短日。縱成此段奇。髮白何由漆。且學商山翁。彎陸整霜橘。

## 愛雪歌

平生愛雪如子猷。江湖乘興常泛舟。長篙斲冰陰火迸。玉板破碎凝不流。淙琤大響出船底。兩舷戛擊鏘鳴球。棹夫披蓑舞白鳳。灘子挽繆拖素虬。四開篷窗愛清供。風慙花絮飛來稠。飄飄著衣寶唾住。片片入酒春酥浮。醉中榜入玉煙去。耳熱不管寒飈颼。大千空濛到何許。日暮未肯回船頭。夜深凍合隨處泊。歌呼達曉魚龍愁。明朝掬雪頰且漱。揮毫落紙雲煙遒。新詩往往成故事。至今句法留滄洲。推遷華年絃柱換。俛仰歸鬢塘蒲秋。曉衾聞雪亦健起。徑欲一棹追昔遊。氈衫胖臙束渾脫。絮帽匱匪蒙兜整。十步出門九步坐。兒女遮說相苛留。謂言此是少年事。歲晚牖戶當綢繆。萬景無窮鼎鼎至。百年有限垂垂休。夢隨落鴈墮沙觜。愁對飢鴟蹲瓦溝。重尋勝踐可復許。且挹清寒揩病眸。須臾未遽妨性命。呼童盡捲風簾鉤。牆外賣藥者九年無。一日不過吟唱之聲甚。適雪中呼問之。家有十口一日不出。卽飢寒矣。

十日啼號責望深。寧容安穩坐氈針。長鳴大咤欺風雪。不是甘心是苦心。

大雪送炭與芥隱

無因同撥地爐灰。想見柴荆晚未開。不是雪中須送炭。聊裝風景要詩來。

雪後苦寒

旋融簷滴凍琅玕。風力如刀刮面寒。雪陣攪空風卻軟。天公知我倚闌干。

新歲書懷

門閭知閒好。窗牖與睡宜。歲華書戶筆。年例探梅詩。看長棊三著。量添飯兩匙。豁除身外事。未是苦衰遲。

次韻養正元日六言

歲踰耳順俄七年。去古稀只三。從今蓮葉巢穩。誰在槐柯戰酣。臍下丹田休想。口邊白醜罷參。渴飲飢餐。

困睡。是名真學瞿聃。養正詩云。流年五十踰二。明日半百過三。上魏文帝語。下樂天語。養正今年五十三。此句甚

工。余今年六十七。亦自撰三字韻二句。

次韻姜堯章雪中見贈

玉龍陣長空。臯比忽先犯。鱗甲塞天飛。戰逐三百萬。當時訪戴舟。卻訪一寒范。新詩如美人。蓬華愧三粲。

次韻徐提舉游石湖三絕

三徑荒蕪岫幌開。錦車何事肯徘徊。春風想爲高人住。落絮殘花好在哉。  
日脚烘晴已破煙。山頭雲氣尙披綿。卻須多謝朝來雨。洗淨明湖鏡裏天。

天上麒麟翰墨林。富家手筆擅文心。欲知萬頃陂中意。但向三篇句裏尋。

閏月四日石湖衆芳爛熳

北垞南岡總是家。兒童隨逐任驩譁。開嘗臘尾蒸來酒。點數春頭接過花。盡把園林蒙錦繡。多添門戶鎖煙霞。杖藜想被春風笑。扶卻衰翁管物華。

檢校石湖新田

今朝南野試開荒。分手耘鋤草棘場。下地若干全種秫。高原無幾謾栽桑。蘆芽碧處重增岸。梅子黃時早澆塘。田里只知溫飽事。從今拚卻半年忙。

致政孫從政挽詞

丈室推居士。安居稱老夫。回骸桑下餓。續命轍中枯。重道幾三叟。輕財似八廚。欲知潛德報。青紫付遺孤。

寄題林景思雪巢六言三首

大地九冰徹底。小巢四壁俱空。只有梅花同調。雪中無限春風。  
何處溫泉水井。誰家熊席狐裘。堂燕幾番炎熱。冰蠶一繭綢繆。  
萬境人蹤盡絕。百圍天籟都沉。惟餘冷淡生活。時復撚髭凍吟。

枕上二絕效楊廷秀

藤枕頻移觸畫屏。無膠滋味厭殘更。寒雞且道貪眠著。窗紙如何不肯明。  
枕前百忍忽紛然。舊學新聞總現前。現到天明無可現。依前還我日高眠。



送文處厚歸蜀類試

萬里東來萬里歸。正憐寡婦與孤兒。死生契闊心如鐵。風雨飄搖鬢欲絲。早集漢庭陪振鷺。莫留岷嶺戀蹲鴟。故家零落今餘幾。門戶非君更屬誰。  
處厚族弟李高。客死成都。制置使京仲遠誘送其家扶護還吳。慨然遠來。忘其勞費。

重送文處厚因寄蜀父老三首

江上連橋疊鼓行。不爭微利卽爭名。算來無似君瀟灑。來往空船載月明。  
下峽東歸十五年。因君話舊意茫然。煩將遠道悠悠夢。直到天西暑雪邊。  
灌口江源不斷流。峨眉山月幾番秋。江山好處吾能記。爲問江山記客否。

虎丘新復古石井泉太守沈虞卿舍人勸農迴之爲賦三絕謹次韻

勸耕堂上醉高年。和氣春風共藹然。大士亦修隨喜供。夜來古井躍新泉。  
落紙雲煙墮翠巒。一泓潭月鬪清寒。鳳凰池上揮毫手。卻掬山泉淬筆端。  
傳聞公作新亭好。先報農家拄杖知。便擬挈瓶來煮茗。繞闌干角徧尋詩。

連夕大風凌寒梅已零落殆盡三絕

枝南枝北玉初勻。夜半顛風捲作塵。春夢都無三日好。一冬忙殺探梅人。  
玉雪飄零賤似泥。惜花還記賞花時。賞花不許輕攀折。只許家人戴一枝。  
花開長恐賞花遲。花落何曾報我知。人自多情春不管。強顏猶作送春詩。

唐懿仲諸公見過小飲凌寒殘梅之下二絕

春風動是隔年期。更對殘花把一卮。少待和煙和月看。依稀猶似未開時。  
問人何處是花蹊。香玉勻鋪不見泥。莫怪山翁行步澀。更無空處著枯藜。

雲露堂前杏花

蠟紅枝上粉紅雲。日麗煙濃看不真。浩蕩光風無畔岸。如何鎖得杏園春。

夢覺作

年增血氣減。樂密飲食稀。氣象不堪說。頭顱從可知。忽作少年夢。嬌癡逐兒嬉。覺來一惘然。形骸乃爾衰。  
夢中觀河見。只是三歲時。方悟夢良是。卻疑覺爲非。

次韻陳融甫支鹽年家見贈二首

范村如荒村。一老雪垂領。高軒款門來。驚破雀羅靜。披草出迎客。玉筍森秀整。短章雖寂莫。染指已嘗鼎。  
歸驂不可駐。晨昏思定省。

乃翁一經傳。播穫了家事。短檠寓真樂。尺璧豈良貴。年家有寧馨。令我喜無寐。加鞭翰墨場。一躍羣空冀。  
聞石湖海棠盛開亟攜家過之三絕

東風花信十分開。細意留連待我來。開過十分風不動。更無一片點蒼苔。  
家人扶上錦城頭。蜂蝶團中爛熳遊。報答春光須小醉。紅雲洞裏按伊州。  
低花妨帽小攜筇。深澤臙脂一萬重。不用高燒銀燭照。煖雲烘日正春濃。

寄題毛君先生蓮華峯菴

天台一萬八千丈。蓮華峯在諸峯上。峯前結屋屋打頭。獨有幽人自來往。湖海雲遊二十春。歸來還作住菴人。漫山苦賣食不盡。繞屋長松爲四鄰。丹訣三千滿雲笈。住來且喜無交涉。清晨石上一爐香。此時天地皆訴合。我衰無力供樵蘇。尙能相伴煖團蒲。但願瘦筇綠未斷。曾把蓮峯分一半。

# 石湖居士詩集卷三十四

附賦

## 館娃宮賦并序

靈巖山寺。故吳館娃宮也。山上下閒臺別館之迹。髣髴可攷。余少長遊焉。感遺事而賦之。洵西山之南奔。勢鬱裨其巉空。若大敵之在前。忽踞虎而踞龍。半紫崖而砥平。訪館娃之故宮。是爲逸王之舊遊。有墟國之遺恫焉。嗟乎汰哉。復賢胥之忠告。巽陰詔之誠說。暗養虎之後患。縱處女使免脫。迨嘗膽之謀成。駭疽囊之潰裂。蓋自有以賈禍。非天爲之孽。方其銜哀茹痛。投淚飲血。儼拂士於前庭。尅三年而報越。訖甘心而一快。夫何初志之英發。及其見棲於姑蘇。遽雌伏而大壞。援宿恩而乞憐。或赦圖於臣罪。當是之時。又何其憊也。遑禍福之無門。曷今愚而昨賢。後千載之嗤點。莫不鍾咎於嬋娟。尤物之移人。抑猶有可得而言。蓋嘗觀於若人矣。好大而欲速。厭常而棄舊。狂會稽之得意。謂周鼎其唾手。闖齊楚以朵頤。睨陳蔡而驤首。道甚遠而疾驅。氣已餒而猶鬪。外未寧而內憂。東略之而西否。阻關河以頓兵。撤牆屋而致寇。亟歸視其四封。蔑一夫之能守。是猶螳螂之慕蟬。不知黃雀之議其後也。然以蕞爾之旅。衝行四方。攻靡堅郛。戰無距行。事便時利。如徑乎無人之鄉。惜也未聞大道。宜其逸樂而志荒。次有臺池。宿有嬪嬙。左攜修明。右撫夷光。粲二八以前列。咸絕世而浩倡。嗟浣紗之彼姝。乃獨繫於興亡。蕩龍舟之水嬉。插香徑之春芳。載夕陽以俱還。秉遊燭於夜長。灑金鍾之千石。傲酒池於舊商。歌吳歎而楚舞。薦萬壽

於君王。悵星河之易翻。嘉來日之未央。錚銅壺之鳴悲。爛急烽之森芒。慘梧宮之生愁。踐桐夢之不祥。歛高陵與深谷。委盛麗於蒼茫。所謂玉檻銅溝。朱簾椒房。理鏡之軒。響屨之廊。杏煙蕪與露蔓。紛日暮之牛羊。況捧心之百媚。濯粉之餘粧者哉。今則雲雨之巔。仙望是宅。硯沼蕙浮。琴臺松岫。封古蘚於井竇。宿暗芳於洞穴。木鯨吼以清厲。金磬隱其蕭瑟。彼方外之徒。龜藏而螻屈者。又安知往古與來。今方枯禪而縛律。翮鴻影之拂坐。見前山之銜石。

問天醫賦 井序

余幼而氣弱。常慕同隊兒之強壯。生十四年。大病瀕死。至紹興壬申。又十三年矣。疾痛疴癢。無時不有。夏至前一日。得寒疾。夢謁天醫。省問荅了然。獨未知天醫爲何神。案昔書卷舌六星。其一曰天讒。王巫醫而孫氏千金書。以日辰推天醫所在。其是歟。皆未可必也。雖然。吾疾自是其有間哉。乃敘其夢爲問天醫賦。

吳山之隴。不達不聞。有門常關。日與病親。歲直壬申。亢中於昏。薄寒中之。不良睡眠。覺邪夢邪。陸離紛紜。神馬具裝。出於頂門。驅風鞭霆。莫知所從。紫城翠樓。千窗萬櫺。玉書垂芒。天醫之宮。中有一人。瑤冠紫衣。如帝如尊。衆真繞圍。我瞻而思。是其天醫者邪。竊樂其名。幸已我疾。次且而前。再拜以出。仰而稱曰。蟻蝨之臣。有鬱弗宣。幸遭聖靈。利用乞憐。願賜清閒。聽臣苦言。天生下人。如沙如塵。長養安樂。壽其天。臣獨多疾。支離輪困。炎黃之經。厥病四百。去半取半。臣悉經歷。五日一曳杖。十日一臥簣。苗爲瘞痲。潰爲瘡癰。遊爲痺頑。尼爲否塞。疏爲洞溢。節爲關格。躁爲囂呼。靜爲爽惑。榮衛挾寒而留行。溪谷流溫而橫溢。翼於

皮毛客於絡脈。次於焦府。盡於形色。攀拳惰其四支。黠黷淫乎大宅。百骸九竅。無一得適。十巫遞進。三醫更謁。探金匱之寶藏。紬玉函之祕策。方書堆於几案。藥物庠於牆壁。訪和扁以制度。招桐雷使炮炙。參以天泉左右之運。列以君臣佐使之職。配合者相須。畏惡者相敵。參朮芝桂。鉛汞乳礪。果菜之英。醪醴之液。萬歲之藟。千年之珀。莫潤於養血之茸。莫瀆於委蛻之骼。厭遠効於中和。要近功於武力。三建若燎。五毒若螫。入口如茶。下咽如戟。燥剛以發舒。酸苦以湧洩。杵臼無停鳴。鑄鼎不暇滌。瞑眩酷烈。疾戰縱擊。外邪未潰。中氣先踣。久立則踣。久行則蹙。語多則逆。臥多則惕。先寒而裘。未暑而綌。席避風而五遷。衣惡濕而再變。且欲興而三休。夜將誦而九息。聽蟻爲牛。視朱作碧。中憤憤其結臙。頭岑岑而戴石。人生世間。居處飲食。臣以病故。跣步榛棘。春醅珠紅。暑醴玉白。翠瓢之瓜。青房之酌。泣梨液之流膚。滌橘泉之破隙。臣欲過門而大嚙。黃媪推臣以避席。清空沈寥。霧旦霜夕。駕牛西上。騎鯨東極。納寒月於半領。御罡風於兩腋。臣欲褰裳而往從。皓華挾臣以辟易。弱柳怪其早衰。瘹木嗤其多瘖。怠悔出於家人。煩勞困於僕役。羣居之中。軋軋厭厭。狎者臣嘲。疏者臣嫌。獨疚臣身。不可任堪。人之多疾。自取自探。不一其凡。大略有三。其一者。心根泄機。命門喪阻。明消精散。形弊神苦。擲溫玉以昇火。奉甘餐而戲虎。陰惑陽而化蜮。風落山而成蠱。若是者。得於晦淫。命曰伐性之斧。其二者。愁莫愁於生離。痛莫痛於死別。哭不淚而神傷。歎無聲而怨結。魂欲升而中斷。腸將思而已絕。孤憤爲丹心之灰。隱憂爲青鬢之雪。若是者。得於情鍾。命曰蠹心之孽。其三曰。深居奧處。溫煨窈窕。重帷複幄。風日不到。枵然如久繫之匏。藹然如處陰之草。玉體軟脆。動輒感冒。若是者。得於貴游。命曰煬和之竈。凡此三者。臣非有之。呻號繁冗。誰職爲之。孰與孰厲。孰攻孰襲。何方

而來。何門而入。抑嘗聞之。造化爲爐。人物爲象。洪鈞無心。大放厥帑。元陽之氣。可斤可兩。人受其中。有瘠有膿。故有稟生多艱。形枯德腴。委隨情窳。命也何如。子房所以辟穀。長卿所以閒居。士安散髮。黽勉扶輿。希逸懈懈。疾與生俱。天實爲之。非人速辜。臣也不肖。殆類此乎。地產之藥。方家之書。媿寒配溫。僻遠怪迂。欲持人以勝天。嗟慮密而功疏。竊聞大神天醫之王。範圍堪輿。運平陰陽。起死回骸。斡旋天藏。揉太和以爲劑。酌沆瀣沱爲漿。嘘碧落以發英。糜朝霞而薦芳。神火氣籊。日暎星芒。度人千億。奮飛仙鄉。賜臣刀圭。刮摩膏肓。濡枯充虛。豐羸植僵。解臣朽骨。濯臣腐腸。宅胎仙以葆真。凝虛白而發光。碎鼎槌鑪。破瓢褫囊。脫兔彭殤之囿。蛻蟬人鬼之場。不老不衰。來歸帝傍。臣之願也。非所敢望。語未竟。仰聞太息曰。有是哉。汝之憂也。凡汝所苦。可以理測。凡汝所求。吾不汝嗇。病自汝得。造化吾知。汝窮汝原。何藥之爲。今卽汝身。示汝三機。隱几遐思。載撫四維。汝身塊然。汝方火馳。甘寐於牀。委骸陳尸。夢遊何方。悲啼笑嘻。溘焉以死。烏鳶狐狸。生汝安住。死汝安歸。形與化遷。汝豈變移。虛空無傍。奚所據依。厥狀維何。爲青爲黃。爲一爲多。爲短爲長。未病何形。已病何色。瘡苛酸辛。誰覺誰識。吾將遠遊。汝速返去。試用我言。周徧求汝。脫焉得之。解痼釋痾。不然已矣。將奈汝何。叩稽玉階。退而下歸。形開神激。汗濡寢衣。嗚呼異哉。爲信爲欺。是邪非邪。至今疑之。

望海亭賦 并序

會稽太守參政魏公。作望海亭於臥龍之巔。率其屬爲歌詩以落成。錄與書來。且使賦之。余謹掇其膏馥之餘。擬賦一首以寄。後日獲從。杖履其上。於山川之神。尙有舊焉。其辭曰。

諸侯之客。有來自東。而姪會稽之遊者曰。佳乎麗哉。越之爲邦也。縈山帶湖。樓觀相望。背臥龍而崛起。煥丹碧之翬翔。躋攀下臨。顧瞻無旁。平疇蔚以穉綠。喬木森其老蒼。淙萬壑之春聲。寫千巖之秋光。朝霞暝霏。扶疎微茫。望山河之故墟。弔草木之餘社。夏后萬國之朝。勾踐百戰之野。興亡梗概。猶有存者。至於流觴泛雪。高人之舊事。浣紗采蓮。游女之遺跡。鬱溪山之如畫。尙彷彿其可識。訪故老以問訊。興慨歎於疇昔。是爲游覽之大略。而蓬萊觀風之所得。雖然。士固多感。而況於對景以懷古。撫事而凝情。往往使人魂斷意折。酒澹而歌不平。故麗則麗矣。而未擅乎登臨之勝也。若夫浩蕩軒豁。孤高伶俜。騰駕碧寥。指麾滄溟。墮愛端於眇莽。挹顛氣於空明。飄飄焉有連鰲跨鯨之意。舉莫如望海之新亭。嘗試登茲而望焉。沃野旣盡。遙見東極。送萬折之傾注。豔寒光之迸射。浸地軸以上浮。盪天容而一色。珠輝具芒。蠹棘宿霓。快宇宙之清寬。悵百年之偈仄。當其三星曉橫。萬境俱寂。浴日未動。晨光先激。波鱗鱗而躍金。天晃晃而半赤。頽輪騰上。東方皆白。煙消塵作。栖鳥振翼。俯羣動而紛起。寄一笑於遐覲。永我暇日。苒其將夕。餞斜暉於孤嶂。候佳月於滄浦。沉沉上下。杳無處所。驚玉地之破碎。漾銀盤而吞吐。忽褰雲而湧霧。獻霜影於庭宇。夜色旣合。初聞鐘鼓。觴屢至而不辭。詩欲成而起舞。又若潮生海門。萬里一息。浮光如綫。濤頭千尺。方鐵馬之橫潰。倏銀山之崩圻。氣平怒霽。水面如席。吳帆越檣。飛上空碧。此亦天下之偉觀。然猶未及乎目力。燕香春容。俗客莫陪。神清意消。徙倚徘徊。天風激吹。波濤闔開。五雲明滅。丹宮絳臺。睇三山之不遠。其爲公而飛來。遂招汗漫之勝游。下飈車之逸軌。屬紫霄之妙質。侑玉笋之清醴。勤歌鸞與舞鳳。壽仙伯以多祉。恍風雨之皆散。但驚塵之四起。悟真靈之不隔。而何有乎弱水之三萬里也。噫。昔之居此者多矣。曾靡



暇於經營。逮山靈之効奇。發遺址於巖扃。殫妙巧於天藏。超埃壙而上征。極觀聽之所接。遂杳渺而難名。嗟此樂之無央。與來者而同登。決皆盪胸。雪其塵纓。且安知前日之蒼煙白露。斷蔓而荒荊者哉。顧客子之所能道者。纔管中之一斑。惟覽者之自得。會絕景於憑闌。心凝神釋。浩如飛翰。而後知茲亭之仙。而凌虛御風之無難。主人瞿然而起曰。有是哉。吾將觀焉。

惜交賦 并序

屈原既遭子蘭子椒之譖。傷楚國之俗。朋友道薄。始合之難。而終以輕背。故著惜交之詞。道知心之難遇。故舊之不再得。動心忍性。徘徊不能去。君子覽之。有以增義合之重焉。

余既有此淑質兮。昔幽處而無仇。悵佳人之眇覲兮。走六漠而周求。歲甲子之初春兮。維元日吾始游。紉木蘭以爲蓋兮。抗杜蘅以爲旂。詔凍雨俾清道兮。戒日星使燭幽。恐駟驪之選軟兮。又命飛廉而挾輶。玃天紘而驚列缺兮。頰幽都與玄丘。天地四方多賊姦兮。忽吾班乎齊州。恍神釋而目粲兮。悅夫人之好修。佩鞶鞢之連璐兮。戴陸離之高冠。紛雞鶩之朋飛兮。儼黃鵠之踟躕。葆衆美以自畀兮。夫何獨處之嬋娟。吾恐始合之易兮。終離之者不難。號百靈而訊之兮。筮告余曰。吉哉。予令巫咸往招兮。介蹇修而爲媒。枉若人之嘉惠兮。命保介而載予。摻脩袂而約言兮。曰歲晚其與俱入。既與之同袍兮。出又與之同車。投我以蒼玉之連環兮。予報以獨繭。曳緒玉宛轉而不斷兮。繭縈紆而連縷。谷風習其自東兮。固維風而及雨。汝行前而予殿兮。予安歌而汝舞。至於今其十年兮。固知美惡周必復。敏予德而日新兮。羌未變乎初也。修予容其滋媚兮。嗟采色其猶未暮也。妬被離而害交兮。讒翕脇而敗度。雖君子之石腸兮。固將徇乎市。

虎兩造膝而笑言兮。慘其間之容斧。子冶容虞子善洗兮。頽顏謂子汝怒。髮甚短而怨長兮。輿則固而路艱。蹇中道而如遺兮。子既寡而汝鰥。夫豈無他人兮。焉有夫君之好賢。雖得汝於萬一分。終不及當時之纏綿。彼日而食兮。此日而虧。物不終盡剝兮。信復盈之有時。涕承睫而交下兮。若孟津之流澌。敢誦言而怨慕兮。恐衆人之汝窺。曼子聲以悲吟兮。託戶風而要之。政木石必回瞻兮。將白首而爲期。儻曾飛而不顧兮。嗟此怨之誰歸。

荔枝賦 井序

紹興丙子夏。有自行都餉貢餘新荔子者。坐客稱歎。窮山所未嘗。有呼酒更酌。鼓琴以侑之。且爲之賦。時爲新安掾。

吾聞南國之南。水激而山蟠。鍾具美於一物。繫化工之所難。攔絳綃以袂服。襲蔕桃而中置。湛冰明之灌漑。粲玉粒之團團。翁生香之令芳。泫仙液於微瀾。走候置其萬里。上玉宸與金鑾。顧人間之流落。纔千倉之一簞。餉江南之病客。索孤笑於鬢端。斥蜂蜜之黃膩。謝佛桑之紅乾。覺龍目之么麼。哈蒲萄之甘酸。藉以秋雲之巾。薦以水晶之盤。羞以燒春之浮醅。相以流水之清彈。迨風月之溫暱。耿星河其未翻。予一嚼而三嚙。灑玉池之清寒。恍醉夢之翺飛。掖九天之風翰。望涪江與閩嶺。麾八極於雷轟。方溟濛其路暗。儻浩蕩其天寬。岌芳宮與繡戶。窈玉聲之闌珊。款荔枝之仙人。若平生之所歡。謂客子其少留。紛擘綠而破丹。招玉環於東虛。御清空之雙鸞。訪長生之舊曲。有千載之遺歎。悵三山之回風。驚南斗之闌干。亂梧竹之滿庭。渺雲海之漫漫。

桂林中秋賦并序

乾道癸巳中秋。湘南樓月色佳甚。病起不觴客。又祈雨蔬食。清坐默數年來九遇此夕。皆不常其處。乙酉值三館。丙戌與嚴子文游松江。有來歲復會之約。丁亥又以薄遽走陽羨。與周子充遇於菴書溪上。戊子守括蒼。己丑以經筵內宿。庚寅使虜。次於睢陽。辛卯出西掖。泊舟吳興門外。壬辰始歸石湖。而今復踰嶺。歎此生之役役。次其事而賦之。

登湘南以獨夜兮。挹訾洲之橫煙。絳霄豔其光景兮。湧冰鏡於蒼巔。悵旻宇之佳節兮。并四者其良難。矧吾生之漂泊兮。寄遽廬於八埏。九得秋而九徙兮。靡一枝之能安。上瀛洲而瀑飲兮。當作噩之初元。旋水宿於垂虹兮。混金碧之浮天。尅後期而竟爽兮。忽罨畫之滄灣。既戊子而守括兮。摘少微於樓欄。丑寓直於玉堂兮。聽宮漏之清圓。再西風而北征兮。胡茄咽於夜闌。迨返旆之期月兮。放蒼雲之歸船。幸故歲之還吳兮。帶夕暉而灌園。甘土偶之遇雨兮。就一丘而考槃。今又飄飄而桂海兮。賓望舒於南躔。訪農圃之昨夢兮。杏征路之三千月。亦隨予而四方兮。不擇地而嬋娟。諒素娥之我哈兮。老色澹於朱顏。觀月之曩見兮。炯不動而超然。適病餘而閉閣兮。屏危柱與哀絃。復訟風而閔雨兮。謝鼎食之芳鮮。聞清齋而晤歎兮。驚足迹之間關。誰職爲此驅逐兮。豈不坐夫微官。知明年之何處兮。莞一笑而無眠。

楚辭

幽誓

天風厲兮山木黃。歲晚晚兮又早霜。虎號崖兮石飛下。山中人兮孰虞。予造輒兮挾轉。紛不可兮此淹留。

靈曄兮邁邁。趣駕兮遠遊。予高馳兮雨濡。蓋予揭淺兮水漸。珮橫四方兮未極。泥盎盎兮予車以敗。望夫君兮天東南。江復山兮斯路巉。恍欲遇兮忽不見。奄晝晦兮雲曇曇。前馬兮無路。稅駕兮無所。誰與共兮芳馨。獨蒼茫兮愁苦。

愍遊

君胡爲兮遠遊。蹇行迷兮路阻脩。朝予濟兮滄海。靈胥怒兮蛟躩舟。暮予略兮太行。車墮輻兮驂決。攀援怪蔓兮一息。雷晝闕兮山裂。四無人兮又風雨。靈幽幽兮爲予愁絕。君胡爲兮遠道。委玉躬兮荒草。與魑魅兮爭光。與虎兕兮羣鳴。君之居兮社木蒼然。衡門之。兮可以休老。歸來兮婆娑。芳滿室兮儻歌。奉君子兮眉壽。光風蕩兮酒生波。雲日兮同社。月星兮偕夜。千秋兮歲華。弭予蓋兮繼予馬。悲莫悲兮天涯。樂莫樂兮還家。

交難

美一人兮巖之扃。珮璧月兮間珠星。歲旣單兮不韋幣。路巉絕兮遠莫致。稼石田兮長飢。誰與此兮藪之。藉子玉兮雙鼓。先子絺兮五兩。不萬一兮當此。託長風兮寄想。長風兮無旁。吾媒乏兮鳳凰。謂蘋若兮蒿艾。鳳告予兮以不祥。恐青女兮行秋。奄銷歇兮衆芳。攀芳華兮玉蕤。將以遺兮所思。玉蕤兮霜露。所思兮未知。

歸將

輿不濟兮中河。日欲暮兮情多。子蘭橈兮蕙棹。願因子兮凌波。智壑兮以漁。罔落兮以驅。驪龍兮飛度。郊

之麟兮去汝波。河潰兮迷塗。黃流怒兮不可以桴。目八極兮悵望。獨顧懷兮此都。御右兮告病。鑿鈴兮靡  
騁。河之水兮洋洋。不濟此兮有命。

# 跋

先人嘗爲莘等言。自十四五始爲詩文。晚而采篤。或寢疾。醫以勞心見止。亦以政自不能不爾謝之。手編僅成帙。而棄不肖之孤。其尙忍言哉。嘗從九京遊而未敢者。以先人之志未承也。詩文凡百有三十卷。求序於樞先生誠齋。求校於龔編修芥隱。而刊於家之壽櫟堂。春秋霜露。思其志。意思其所樂。優然如見。愴然如聞。庶得藉口以告吾先人云。

嘉泰三年十二月初三日。莘茲謹書。

上海图书馆藏书



A541 212 0006 12998

中華民國二十七年七月初版

湘

(81374.1)

國學基  
本叢書  
石湖居士詩集 一冊

實價新法幣五元

——上海發行所——

撰 者 范 成 大

發 行 人 王 雲 五  
長沙南正路

印 刷 所 商 務 印 書 館  
長沙南正路

發 行 所 商 務 印 書 館  
各 埠

(本書校對者毛鵬基)





冊數	1
售價	0.50